



LXIV



THE BOSTON PUBLIC LIBRARY

JOAN OF ARC COLLECTION

39999 059853505



HISTOIRE
DE MESSIRE
BERTRAND
DV GVESCLIN

CONNESTABLE DE FRANCE,
DVC DE MOLINES, COMTE DE
Longueuille, & de Burgos.

CONTENANT LES GVERRES, BATAILLES,
*& conquestes faites sur les Anglois, Espagnols, & autres, du-
rant les regnes des Rois IEAN & CHARLES V.*

Escrite en prose l'an M. CCC. LXXXVII. à la requeste de Messire
Iean d'Estouteuille, Capitaine de Vernon sur Seine.

*Et nouvellement mise en lumiere par M^c. CLAVDE MENARD,
Conseiller du Roy, & Lieutenant en la Prenoisté d'Angers.*



A PARIS.

EN LA BOVTIQUE DE NIVELLE.
Chez SEBASTIEN CRAMOISY, rue S. Iaques,
aux Cicognes.

M. DC. XVIII.

AVEC PRIVILEGE DV ROY.

92

D86H6

Joan of Arc

DC 97

D8H5



2749

A MONSEIGNEUR,
MONSEIGNEUR DV VAIR
GARDE DES SEAVX
DE FRANCE.



ONSEIGNEUR,

Cette Histoire ne deuoit estre présentée au public, si l'autorité de vostre nom ne luy donnoit sauſconduit en ce ſiecle, auquel nous voyons avec regret, que la vertu n'a pas touſiours ſon iuſte prix, pour eſtre releuée ſelon ſon merite: mais heureux d'ailleurs, de ce que vous, comme cenſeur public des Royales faueurs, les ſcauez meſnager ſur les ſeules conſiderations de l'honneur & du courage. L'on verra en ceſte Histoire, quelle ardeur pouſſoit nos peres aux combats, meneꝫ par vn Lyon, quelle frayeur chasſoit les colombes preſſées par noſtre Aigle. L'on y verra ce faſt eſtranger contraint d'obeir aux loix de noſtre bon-heur, confeſſer eſtonné ſon impuiſſance. L'on y verra l'orgueil de nos voiſins ceder à nos droits, ployer ſouꝫ la

valeur de nos bras, & confus après tant de pertes, bazu par tant de victoires, se cacher honteux dans le détroit de leur vaste Ocean. Que si quelque ame genereuse veut profiter en sa lecture, elle y apprendra mille beaux traicts de candeur, de franchise, & de loyauté.

VOUS, MONSEIGNEUR, qui scauez dignement estimer & releuer toutes ces vertus, pourriez vous en desagreer la monstre? Vous, qui faites voir à tous les hommes iusques à quelle perfection conduist la vraye Philosophie, quand traitée comme il faut, elle fait avec le temps paroistre sa bouche dor prez du bon Traian, le sage Rusticus au conseil d'Antonin, son bien disant Themistius pres du grand Theodose?

BENISSE le ciel nos souhaits communs, & fasse reuiure en nos iours, sous le doux œil de vostre prouidence, cét esprit de paix, de iustice, & de pieté, que nos confusions auoient honteusement alteré. Ces vertus sont vierges, & sœurs, n'ayans qu'un point pour naissance, vn pareil horoscope pour directeur, vn semblable aspect en leur fortune: PRESENT DV CIEL, HONNEUR VNIQUE DE LA TERRE, sous les influences gracieuses desquelles paroissent les grandeurs & se conseruent; florissent les sceptres & se perpétuent. Qu'elles r'entrent en splendeur desormais, afin d'appuyer vos actions, dresser vos aduis, & proposer vostre nom pour but accompli de leurs perfections, ou comme disoit mieux de son S. Paul l'éloquent Chry-

*sofome , αἰδιδότα τῆς ἀρετῆς , posée sur le pié d'une
rare fermeté, laquelle se faisant admirer à tous Fran-
çois, tire de mon ame ce vœu public de la verité, que
i'attache tres-content au temple eternel de la vraye re-
nommee, pour m'y denoüer,*

MONSEIGNEUR,

Vostre tres-humble & obligé
seruiteur, C. M E N A R D.

à iij



*A LA NOBLESSE
FRANCOISE.*

MESSIEURS,

Ce Miltiade François cherchant des Themistocles parmi nous, se fait iour au trauers de nos histoires, à ce qu'un exemple singulier de courage, honneur, & fidelité réueille les vostres, & enseigne puis qu'il le faut, quels doiuent estre vos cœurs dans nos armes, quelles vos couleurs dans les factions. Et pleust à Dieu que cét esprit qui vous rendoit autrefois, ASYLE DE LA RELIGION, COLOMNES DE CETTE MONARCHIE, FRONTIERES DES PEVPLES VOISINS, SEVRETE' DES LOIX, RECOVRS DES OPPRESSEZ, vous maniaist encore tous, & n'eussions veu de nos yeux ce que nos Annales n'ozeront publier cy-apres, ou en rougiront: peser son deuoir, & le balancer non au poids de la vertu, non aux grains de l'honneur, mais de la passion & des vengeancees, qui décrient vostre ordre & la fidelité que promettent vos espées. Icy verrez-vous vne ame forte, nourrie dans le fer, pétrie sous des palmes, dans laquelle Mars fist escole long téps, la Bretagne en fut l'essay, l'Anglois son boutehors, la Castille son chef-d'œuure; dōt les actions n'estoient que Heraults de sa gloire; les défaueurs, theatres éluez à sa constance, le cercueil embasement d'un immortal trophée. Et la mort empeschée de treu-

uer successeur à tant de vaillances, luy fit meriter le plus honorable prix, que sceptre donnaist iamais à sujet. Le ieune Charles à la teste du conuoy, couuert de ses Lauriers, suyure son corps, & pour tiltre solemnel des obligations qu'il auoit à sa loyauté, l'appartir à ses cendres. Profitez en cette leçon genereux sang, le plus pur de ce corps, & confessez que ces tiltres glorieux ne s'acquierent au cantonnement des Prouinces, dans le sac de vos compatriotes, ou par déchirement d'une Couronne que vos ayeux prodigues de leur vie auoiēt si haultement fleuronnee. Le culte diuin, le service du Roy non pretexté, la defense du lys vous les doiuent, & cette sainte affection que doit vostre bras à l'innocence.

Cevallant Cheualier Messire Bertrand de Guesclin, qui tant de cheualeries ot faites, tant que par sa proesse estoit Connestable de France, fut trop mal content des parolles qu'on luy rapporta, & en ot moult grand deuil: Car il estoit cheualier de grant cœur. Et dit, Puisque le Roy me tient pour suspect qui i'ay loyaument seruy, ie ne demeureray iamais en son Royaume, ains m'en vois en Espagne, où i'ay ma vie tres honorable: car ie y suis Duc, & luy renuoie son espee. Dont pource vint vn si grand bruit en ce royaume, que ce fut merueille, pour le Sieur de la Riviere, & tant que tout le monde le commança à hayr, & monstrent au Roy Charles tous les grands Seigneurs, pourquoy il le mouuoit dedebouter cevallât cheualier Messire Bertrand de Guesclin, qui si bien l'auoit seruy, & estoit mauuais exemple aux autres. Et sur ce le Roy de France Charles s'aduisa & vult reparer la chose, & enuoia les Ducs d'Aniou & de Bourbon en Bretaigne, pour appaiser le Connestable du courroux qu'il auoit, lesquelz allerent au Pont Ourson, & là manderent le Connestable qui à eux vint volontiers. Et luy venu dit le Duc d'Aniou, Connestable, fait-il, Mon Seigneur le Roy nous enuoie à vous, moy & beau Cousin de Bourbon, pource que vous auez esté mal content d'aucunes parolles qu'il vous a mandez, c'est à sçauoir qu'on luy auoit donné entendre que vous teniez la partie du Duc de Bretaigne, & vous deuez estre bien lié & ioyeux quant telles choses vous mande, lesquelles le Roy ne creust oncques. Voez icy l'espee d'honneur de vostre office, reprenez lal, le Roy le veut, & vous en venez avec nous. Les parolles finies du Duc d'Aniou, respondit le bon Connestable: Mon tres redouté Seigneur ie vous remercie humblement des parolles que me dites, & des parolles que m'auetz aussi dit

que le Roy ne creut oncques, dont ie remercie le Roy, „
nonobstant le grád bruit qui en a couru. Et vueille bien „
Monseigneur, que le Roy sçache que ie l'ay seruy bien „
& loyaument comme preud'homme, & ne luy feis „
oncques trahison. Car si ie seruoye le Duc de Bretagne „
qui est contre luy, ie seroye traistre contre lui, qui est le „
plus grand Roy qui viue. Et ce peu d'honneur que i'ay „
conquis en ce monde, ie ne le voudroye pas perdre „
pour quelque chose qui viue, & dites au Roy que i'ay „
me plus mon honneur que toutes les Seigneuries & „
biens qu'il me pourroit donner. Et cela ie luy certifie. „
Si vous remercie de l'espée que m'avez aportée, ie ne la „
reprendray point, baillez la à vn autre qu'il luy plaira: „
Car pour l'oster de soupçō & tous autres, ie m'en vois „
en Espagne, & vous iure par ma foy que iamais en ce „
Royaume ie ne demeureray. Dont le Duc d'Aniou „
fut moult courroucé, & dit au Connestable: Ha beau- „
cousin! ne faictes point cecy, & ne le mettez point en „
vostre teste. Adonc parla le Duc de Bourbon, Cousin „
Connestable ie vous prie que ne faites ce que vous di- „
tes. Car Monseigneur le Roy vous veut moult grand „
biē, & vous l'avez bien desseruy, & feriez mal de le lais- „
ser en ceste maniere. Et lors respondit le bon Conne- „
stable: Ha Monseigneur de Bourbon! I'ay esté en vo- „
stre compagnie en tous les plus grands faits de ce Roy- „
aume, & vous & moy auons dechassé le Duc de Bre- „
tagne de son pays, qu'il n'y auoit que vn chastel. Il est „
mal à croire que ie me fusse ralié avec lui. Et quant à ce „
que vous me requerez de demeurer, vous estes le Sieur „
du Royaume qui plus m'avez fait de plaisir, & qui ie „
croirois plus volōtiers, & à qui ie suis plus tenu apres le „
Roy. Mais ie vous iure & promets par ma foy de ce „
que ie vous ay dit, vous n'en trouuerez point le con- „
traire, vous suppliant que l'amour que auez tousiours „

„ eue à moy , vous ne la vouliez point oblir : car où que
„ ie fois ie vous seruiray de corps & de cheuance, & n'o-
„ blieray iamais les plaisirs que vous m'auiez fait. Et vous
„ prie que vous ayez souuenance de celuy qui m'a brassé
„ cecy; car vous sçauiez les tours qu'il vous a faits, & fait
„ tous les iours, & ne tardera deux mois que ie passeray
„ à belle compaignie en vostre pays, & verrez que ie ne
„ m'en iray mie seul. A tant s'en allerent les Ducs d'An-
„ iou & de Bourbon rapporter au Roy les parolles de son
„ Connestable, que pour nulle-rien plus ne le pouuoit
„ conuertir à faire demourer. Dont le Roy fut moult
„ courroucé & dolent, & dit le bon Duc Loys de Bour-
„ bon en la presence du Roy deuant tous (apres ce que
„ ot parlé le Duc d'Aniou) Monseigneur vous faictes au
„ iourd'huy l'vne des grandes pertes que vous fissiez pie-
„ ça long temps: Car vous perdez le plus vaillant cheua-
„ lier, & le plus preud'homme que ie cuidasse oncques:
„ Mais voicy de son estat, & ont mal fait ceux qui ont
„ commencé cecy.

*Puis il suit au chapitre suiuant sa retraitte pour aller en
Castille, & que passant par le Bourbonnois où le Duc estoit,
lors ne pouuant le retenir luy donna vn bel hanap d'or émaillé
de ses armes, luy priant qu'il y vouldist boire tousiours pour
l'amour de luy, & luy donna aussi belle ceinture d'or tres-riche,
de son ordre de l'Esperance, laquelle luy mist au col. Ainsi prin-
rent congé l'un de l'autre, & luy bailla le Duc de Bourbon dix
gentilz hommes de son hostel, pour le conduire quatre iours,
lesquels il nomme, avec lesquels estant au Puy Nostre Dame
les citoyens le supplierent qu'il vouldist aller deuant Chastel-
neuf de Randon qui destruisoit tout le pays, & que ainçois
qu'il partist du Royaume le deliurast, & que ce lui seroit vne
louable memoire avec les autres biens qu'il auoit faits. Ce qu'il
accorda, & apres son pelerinage fait au Puy posa son siege, à
la conduite duquel il mourut. Voila ce qu'en dit cette histoire*

particuliere, bien autrement que ce qu'en auons ailleurs. Mais nous ne pouuons aussi taire ce que d'Argentré au dixiesme de son, histoire chapitre 26. a escrit, qu'en la recontre de la Brosiniere en laquelle le Baron de la Poule Anglois fut defeat par le Comte d'Aumale gouverneur d'Anjou & du Maine l'an MCCCCXXIIII. la bonne femme Iehanne de la Val veufue du Connestable Guesclin viuoit encores, qui ceignit l'espee dudit Guesclin à André de Laual puisné de la maison, qui fut depuis Marechal de France, lors fort ieune, & le fist chevalier.



BERTRAND DV GVESCLIN COMTE DE
LONGVEVILLE CONESTABLE DE FRANCE

D'Argentré liure 8. de l'Histoire de Bretagne
chapitre 7.

Ce fut la fleur de cheualerie; fust de sa personne. Pour auoir combatu d'homme à homme en chāp clos, six ou sept fois: fust en conduittes de batailles ou d'armees. Iamais le grand nombre ne l'empescha de charger: & l'eussent bien mieux apperceu les Anglois sur la fin, n'eussent esté les estroittes deffenses que luy faisoit le Roy de ne hazarder iamais rien, ny de combattre: ce que luy desplaisoit assés. Ce fut vn homme sans fard, sans dissimulation, le visage tousiours ouuert, en mesme estat prest de quelque agreable parole, guay & accueillant, large & liberal du sien. Tout son meuble & bagues de sa femme se dependoient en l'aduan cement de la solde aux Capitaines & gens de guerre, & payemens de rençons, pour les pauvres soldats, quelque fois hors de guerre des Anglois mesme: & s'il estoit tel, si estoit sa femme de mesme, qui ne plaignoit pas de dependre cent mille francs qui luy auoient esté deposez, pour remonter les Capitaines qui le suyuoient quand ils estoient deualisez à la guerre, entreprenans vaillamment. Il estoit aduisé & prompt à l'execution, l'ennemy l'auoit sur les braz, qui le pensoit à trente lieues loin, comme il monstra bien au Roy Dom Pedro à Montiel, lequel il defist accompagné de cinquante mil hommes avec vingt mille qu'il auoit, estant venu de sept iournees nuit & iour pour le surprendre; au millieu d'vne bataille, froid & asseuré comme en sa chambre, au combat, furieux, fort, & roide. Iamais n'affailly place qu'il ne prist par composition, sappe, escalade, ou par force, fors bien peu. Il comman-

don aux armées, où estoient les Princes : il les sçauoit
seruir de ce qu'il leur failloit : les contenter & retenir le
commandement : & tout se passoit par ce qu'il com-
mandoit, quelque grandeur ou ambition qu'il y eust,
avec tel comportement, & deference, que chacun
pensoit auoir esté le commandeur de ce qui s'estoit bié
fait. Bref cet homme fut en toutes choses excellent, &
digne d'immortalité de tous siecles, le dispensant du
peché d'auoir porté les armes contre son pays: car com-
me disoit vn ancien, il n'y a cause qui puisse sembler
iuste depuis que l'on porte les armes contre sa patrie.

TABLE



TABLE

DV LIVRE HISTORIAL

DES FAIZ DE FEV MONSEIGNEVR
BERTRAN DV GVESCLIN, IADIX DVC
de Molines, Comte de Longueuille & de Bur-
gos, Conneftable de France.

DE la naiffance de Monfeigneur Bertran, & de fes
meurs, & de fon maintien & gouuernement iuf-
ques à l'âge de dixhuit ans ou enuiron. chapi-
tre premier. pag. 3.

De la premiere ioufte notable qu'il fift, & dont il ot le pris,
laquelle fu à Rennes. chap. 11. 13.

Du commencement & cause de la guerre menüe entre Mon-
fieur Charles de Blois, & Monsieur Iean Comte de
Montfort, pour cause de la Duché de Bretaigne. chap.
III. 16.

De la prinfe du chastel de Fougeray faite par ledit Bertran
& fes gens, & comme ilz desconfirent les Engloiz qui
dedens estoient, & le Capitaine aussi, & autres En-
gloiz, qui ou dit chastel vouloient retourner, le quelz ils
rencontrerent sur les champs. chap. IIII. 19.

Du siege que le Duc de Lenclastre & ses gens mirent deuant
Rennes, & comment Monsieur Bertran les assailly sou-
uent, ledit siege durant. Et parmy l'ost entra dedens Ren-
nes, où il amena plusieurs viures, qu'il conquist sur les
Engloiz, & ardy vn berfray, qu'ilz auoient drecié
deuant ladite ville, chap. V. 22.

TABLE

- De la iouste faite par ledit Bertran en la presēce du dessusdit Duc, contre Guillaume de Blābourc Cheualier Engloiz, de trois cops de glaiue; dont au quatriesme le mata durant ledit siege. Et comment iceluy siege fu leuē. Chap. vi. 36.
- Du siege que le Duc de Lenclastre mist deuant la citē de Dinant, durant lequel, en sa presence, & en ladite ville de Dinant, où il vint par saufconduit, Bertran du Guesclin combati & outra en gage de bataille Thomas de Cantorbie cheualier Engloiz. Chap. vii. 48.
- Du siege que le Conte de Monfort mist deuant le chastel de Becherel, qui par traictiē fu delaisiē: & comme ledit Bertran s'eschappa de la prison, où icellui Conte l'auoit fait tenir sans cause. Et tātost fu fait Capitaine de Guingant, & acquist trois chasteaux que les Engloiz tenoient ou païs de Bretagne. Chap. viii. 64.
- De l'assaut que Monsieur le Regent fist faire à la seconde forteresse de Melun, où Monsieur Bertran & ses gens, & autres assaillirent moult fort. Et comment la ville fu renduē en l'obeissance de mondit Seigneur le Regent, qui lors fist Bertran Capitaine de Pontorson. Chapitre ix. 74.
- Du siege, assaut, prise, & destruction du fort de Roleboise, & de la prise de Mante & de Meulenc. En laquelle ville de Meulenc le chastel & murs furent abatus. Chap. x. 82.
- De la bataille de Cocherel faite par Bertran & les autres François, en laquelle le Captal, & les dessusditz Engloiz & Nauarroiz furent tuez, & desconfiz. Et apres ce Monsieur le Regent donna à Bertran le Contē de Longueuille. Chap. xi. 108.

DES CHAPITRES.

De la prinse de Valongnes, Carantan, & Douure, faite par ledit Bertran & ses gens, & d'une desconfiture faite par eulx sur les Engloiz oudit pays de Normandie.

Chap. XII.

121.

Du siege, qui fu mis par le Conte de Montfort deuant le chastel d'Alroy en Bretagne, & de l'assemblée qui se fist pour ledit siege leuer, & combattre ledit de Montfort.

Chap. XIII.

130.

De la bataille, qui fu deuât ledit chastel d'Alroy entre Monsieur Charles de Bloys avec ses gens & soubdoyers, d'une part, & le Comte de Montfort & ses gens, avecques Engloiz d'autre part.

Chap. XIII.

140.

Du commencement & cause de la guerre d'Espengne, meüe entre le Roy Pietre, contre Henry, que l'en disoit bastard d'Espengne.

Chap. XV.

154.

Du trespassement de la Roïne d'Espengne femme de Pietre, & comme il fu sceu que Henry estoit droit heritier dudit Royaume, & ledit Pietre riens n'y deuoit auoir.

Chap. XVI.

161.

Comment Bertran fist absodre les gens de grandes Compaignies, qui escommuniez estoient : & puis les mena en Espengne avecques plusieurs Cheualiers & Escuiers François, en l'ayde & secours de Henry, & à l'encontre du Roy Pietre.

Chap. XVII.

169.

Comment Bertran du Guesclin, & la blanche compaignie prindrent d'assaut ou nom du Comte Henry trois bonnes villes fermées en Espengne, c'est ascauoir Maguelon, Borge, & Beruesque, avec les chasteaux d'icelles.

XVIII.

184.

Comment les citez de Burs & de Toulette se rendirent au

TABLE

Conte Henry, sans attendre siege ne àssault, tantost qu'ilz oyrent dire que Bertran & la blance Compagnie venoient deuers eulx, chap. xix. 196.

Comme la cité de Seuille la grant fu rendue à Henry, à Bertran, & aux autres Barons, tant par assault, comme par le moyen de deux Iuifs, qui leur liurerent l'une des forteresses de ladite cité, que les Iuifs tenoient. C. xx. 221.

Comment Pietre ala querre secours à Lissebonne au Roy de Portugal, qui luy en failly. Et du message que Henry enuoya pour ce deuers le Roy de Portugal. Lequel message gaigna à Lissebonne, & en apporta avec soy le pris des iustes. Chap. xxi. 223.

Comment deux Iuifs accusez de la mort de la Roïne d'Espengne, qui icelle Dame auoient fait murdrir, furent arz & bruiZ de la foudre du ciel, qui sur eux chey en vn chāp de bataille, où ilz se combatoyent l'un contre l'autre. Parquoy tresgrant nombre de Iuifs & Sarrazins se firent baptizer. Chap. xxii. 235.

Comment le Roy Pietre ala querre secours deuers le Prince de Galles en Angolesme; auquel il donna illec sa table d'or, avecques plusieurs autres nobles ioyaux. C. xxiii. 240.

Comme le Prince de Galles fist vn mandement à Bordeaux pour aler en Espengne, & enuoya par ses lettres deffier le Roy Henry. Par lesquelles il manda tous les Engloiz, qui avecques lui estoient, qu'ils le laissassent, & s'en venissent audit Prince en ladite ville de Bordeaux. Chap. xxiiii. 246.

Comment Bertran du Guesclin desconfit en Espengne l'auantgarde du Prince de Galles, où furent tueZ Guillaume de Feleton, qui estoit Capitaine avecques autres che-

DES CHAPITRES.

- ualiers Engloiz, bien le nombre quatre vingts, ou plus,
 & plusieurs Escuyers & varletZ. chap. xxv. 252.
- De la bataille, qui fu en Espengne entre le Roy Henry &
 sa gent, avecques Bertran & les François d'une part; &
 le Roy Pietre & ses gens, avec le Prince de Galles & le
 Duc de Lenclastre, & les Engloiz d'autre part. chap.
 xxvi. 257.
- Comment les citeZ de Burs & de Toulette, & de Sebil-
 le, reuindrent au Roy Pietre. Et des conuenans, dont
 il failly au Prince depuis qu'il fu party d'Espengne, &
 entré ou Royaume d'Espengne. chap. xxvii. 273.
- Comment le Roy Henry parti de Trichemare lui troisièf-
 me, vestus en tapinages comme pelerins, & alla deuers
 le Roy d'Arragon, qui ne le recognoissoit, quant se fist à
 lui congnoistre. Auquel il porta grant honneur, & pre-
 senta deux cens hommes d'armes, iusques à trois mois.
 chap. xxviii. 280.
- Cōment le Roy Hery ala ou dit estat à Bordeaux veoir Ber-
 tra du Guesclin, qui y estoit en prisō, & parla à lui. Mais
 à pou qu'il ne fu accusé au Prince de Galles. c. xxix. 283.
- Comment le Roy Henry ala pour auoir secours deuers
 Monsieur le Duc d'Aniou, qui lui donna toute sa vesselle
 d'or & d'argent, & lui aida de certain nombre de tres-
 bonnes gens d'armes à mener en Espengne, c. xxx. 289.
- Comment Messire Ernoul d'Andrehem Mareschal de
 France & le Besgue de Villaines furent deliurez de pri-
 son, où le Prince de Galles les auoit tenuz à Bordeaux. Et
 du retour que icelui Besgue fist en Espengne avec ledit
 Henry, par l'ordonnance de Monseigneur d'Aniou.
 chap. xxxi. 292.

TABLE

- Commēt Sallemarque & Madric villes fermées en Espen-
gne se rendirent au Roy Henry tant par amour comme
par assault, & du siege qu'il mist deuant la cité de Tou-
lette, qui moult longuement y dura. chap. xxxii. 294.
- Comment Bertran se mist à finâce à cent mille doubles d'or,
que le Prince amodera à soixantemille, dont la Princess-
se luy donna dix mille. Et le residu deuoit payer à certain
iour, ou retourner en prison à Bordeaux: durant lequel
temps il ne se pouoit armer. chap. xxxiii. 297.
- Comment la ville de Tarracon se rendi, tantoſt comme Ber-
tran vint deuant icelle, lequel n'estoit aucunement armé,
mais que tant ſeulement il tenoit vne verge en ſa main.
chap. xxxiiii. 307.
- Comment Bertran fu du tout deliuré de prison, & s'en re-
uint en Espengne deuers le Roy Henry, qui auoit affie-
gée la cité de Toulette deuant dite, chap. xxxv. 319.
- Comment Dam Pietre, pour auoir ſecours du Roy de Bel-
marin, & prendre ſa fille à femme, renoya la loy de Ieſus
Chriſt. chapitre xxxvi. 321.
- De la ſeconde bataille, où Bertran vint au ſecours du Roy
Henry, qui deſconfit Pietre, & vingt mille Eſpaignoiſ
Chreſtiens, & vingt mille Sarraſins & Iuiſs. chap.
xxxvii. 326.
- De la tierce bataille d'Eſpengne entre les Roys Pietre &
Henry, lequel y fu ſeconde fois vaincu, & parauant ref-
uſé à Montuardin, & comme Montefclaire ſe rendi au
Roy Henry, & tout par l'ayde Bertran, & des au-
tres François. Lequel Bertran fu adonc fait Duc de Mo-
lines. Chap. xxxviii. 331.
- De la quatrieſme bataille d'Eſpengne, où Bertran deſconfit

DES CHAPITRES

les Sarrafins venus en l'ayde du Roy Pietre. Lequel Roy en allant querir iceulx Sarrafins & autres, fu vendu sur ladite mer à vn Iuif. chap. xxxix. 337.

De la cinquiesme & derreniere bataille d'Espengne, acheuée par Bertran & les siens: où le Roy Pietre fu descõfit, & bien soixante mille Sarrafins & Iuifs, avec partie de Chrestiens Et du siege mis deuant le chastel de Montueil, où ledit Pietre estoit à garant. chap. xl. 353.

Comment le Roy Pietre cuidant fuyr par nuyt, fu pris du Besgue de Villaines qui le liura au Roy Henry: lequel fist decapiter, & lors pendre aux murs dudit chastel, qui lors se rendi. chap. xli. 369.

Comment le Roy Henry enuoya la teste de Pietre en la cité de Sebile la grant, qui pour ce se rendi. Et apres se rendirent à lui Toulette, & plusieurs autres citez, villes, & chasteaulx. chap. xlii. 376.

Comment Bertran prist d'assault le chastel de Sorye en Espengne, & en Guienne sur les Engloiz les villes, chasteaux, & fortereffes de Brandonne, Saint Yré, Montpanon, Mauseray, & plusieurs autres. chap. xliii. 381.

Comment Bertran fu fait Connestable de France, apres ce que Robert Canole ot amené les Engloiz deuant Paris, lesquelz Bertran poursuy. Et de l'assemblee des gens d'armes par luy faite à Caen, pour combattre iceulx Engloiz. chap. xliiii. 398.

De la bataille de Pontualain, en laquelle Thomas de Granton Lieutenant du Connestable d'Engleterre, Geuffroy Ourcelay, Thomelin Folisset, Hennequin Hacquet, & Guillebert Guiffart, furent prins, & leurs gens tuez & desconfiz. chap. xlv. 405.

TABLE DES CHAPITRES.

- De la prise du chasteau de Vaux, & de la ville de Bersiere, & comme les Engloiz s'enfoiyyrent de saint Mor sur Loire, où ils boucerent le feu; lesquels Bertran aconsuy deuant ladite ville de Bersiere. Et d'une desconfiture faite sur les Engloiz au ray de S. Mahieu. Chap. XLVI. 426.*
- L'armée faite par Yuain de Galles sur la mer. De la prinse du Conte de Pennebroc Engloiz faite par les Espaignols, ou nauire d'Espengne, deuant la ville de la Rochelle. Chap. XLVII. 450.*
- D'une bataille, où Chandos fut mort, & Caraenloet pris. Et de la prinse, mine, & assault de Chasteaulerault, Moncontour, & sainte Sauere, que les Engloiz tenoient: & de la destruction des faux François illeceftans. Chap. XLVIII. 468.*
- De la renduë des villes & chasteaux de Chaunigny & de la Rochelle, & de la cité de Poitiers, & de la prise des chasteaux dudit Poitiers & de Benon par assault, lesquels chasteaux les Engloiz tenoient. Chap. XLIX. 507.*
- De la prise & rendue de saint Iean d'Angely, Xaintes en Poitou, Monstreul Bonnyn, Cizay, Niors, sainte Foy, Bergerac, & saint Maquaire. Et de la bataille de Cizay, & de vne autre faite lez Bergerac: esquelles batailles Engloiz furent desconfiz. chapitre L. 520.*
- De la prise de Chasteauneuf de Randon, qui volentierement se rendi à Bertran, lequel ala ilec de vie à trespassement: & de sa sepulture & enterrement à saint Denys en France. Chap. LI. 537.*

FIN.



HISTOIRE
DE MESSIRE
BERTRAND
DV GUESCLIN,

DVC DE MOLINES, COMTE DE
LONGVEVILLE ET DE BVRGOS,
Connestable de France.

PROLOGVE.



TOVS ceulx qui les cuers ont gentilz, & aiment & desirent honneur, noblesce & gentillesce, naturellement se delitent moult à lire, ou faire lire, & recorder, pour amener à memoire les nobles faiz des vaillans Cheualiers & preudommes, hardiz és armes, qui ont esté és temps passez, pour sauoir les proesses, & cheualeries, & emprises, que par leur grans sens & hardiesses ils ont faictes & acheuées en leurs aages. Et mout est prouffitabile à tous ieunes hommes, qui de leurs pouoirs entendent à ensyeuir les euures, pour y

prandre bon exemple: affin que par vasselage & vigour de corps ils puissent acquerre loz & pris d'armes pour monter en honneur, & en haultesse, ainsi comme ceux-cy firent. Mais combien que les faiz de tous preuz facent à ramenteuoir, il puet sambler selon raison naturelle, que plus conuenable chose soit de reciter, ou relater, & aux oyans plus delitable de oïr & entendre les faiz de ceux, dont ils ont eüe cognoissance par propre vision, & les aucuns d'iceux plus certaine par conuersatiõ; que des autres qu'ilz n'ont veu, ne de leurs besongnes aucunement sceu, mais que par narration d'escriture. Et pour ce espoir, que plusieurs liront, ou ferõt lire ce present Romant, lesquelz parauanture ont plusieurs foiz veu & cogneu, & les aucuns d'iceulx frequenté & conuersé vn tres-vaillant, large, loyal, & hardy Cheualier, c'est assauoir feu Monseigneur BERTRAN DV GUESCLIN, iadix Connestable de France: qui de vaillance, & de largesse puet & doit estre acompaigné aux neuf Preux, pour les beaux faiz qu'il fist, & acheua en son viuant. Lequel Romant, sans addicion ou diminueion aucune, sera cy-apres traictié en prose pour cause de briefté, & extrait d'un autre Romant compilé en paroles rymées; excepté mutacion de paroles pour autres, pour abregier le langage, & euader prolixité. Je supplie treshumblement à tous ceulx qui la Vie & Histoire dudit Monsei-

gneur BERTRAN sceuent, pour lequel, à l'aide de Dieu, ce present Liure sera fait & ordonné, que se aucune faulte ils treuuent en la substance de la matiere, qu'il leur plaise à corriger, (car aussi l'ay-ie fait soubz leur correction) & moy auoir pour excusé. Car ie ne puis edifier d'autres estoiffes, que de celles que i'ay. Et qui voudra legierement & aisiement trouuer les Chapitres dudit Liure, sans lire tout aourné, si regarde cy dessus en la Table, laquelle l'en trouuera comptée par nombre, & rabatiue, ou referande ausditz Chapitres.

*De la naissance de Monseigneur BERTRAN, & de
ses meurs, & de son maintieng & gouuernement
iusques à l'aage de XVIII. ans
ou enuiron.*

CHAPITRE I.

MONSEIGNEUR BERTRAN DV GVESCLIN dessus nommé, dont ce Prologue cy a fait & fera mention, fu nez de loyal mariage, ou chastel de la Mote de Broon, à six lieuës pres de Rennes, extrait de moult noble lignée, combien que lors teinssent pou de terre. Et fu son pere nommé Messire REGNAVT DV GVESCLIN, & sa mere estoit vne tres-belle & gentil Dame. Mais BERTRAN estoit lait enfançonnet, & mal

gracieux, & n'estoit plaissant de visaige, ne de corsage. Car il auoit le visage moult brun, & le nez camus. Et avecques ce estoit de grosse & rude taille le corps, rude aussi en maintieng & en paroles: pou habilité à chose quelconque, & de petit contiennement. Et avecques ce, moult semilleux & ennuyeux, & pour les ieunesces que il faisoit: & continuellement tenoit vn baton. Et pour ce son dessus dit pere & sadite mere le hayoient moult, & souuent desiroient sa mort: ne ne vouloient souffrir, qu'il fust à la table de ses freres, combié qu'il feust l'ainsnel de tous leurs enfens. Mais souuentesfois l'appelloient nyce, coquart, malostru, & mescheant. Et moult estoit debourré & dechascié tant d'eux, comme de leurs mesnies.

Si auint à vn iour de la Sension, que la mere dudit BERTRAN estoit en sa chambre, & ses deux autres fils avecques elle, assishonorablement à haute table. Et ledit BERTRAN, qui ainsnez estoit, comme dit est, & auoit pour lors l'aage de six ans ou environ tant seulement, se feoit tout seulet & sans compaignie à vne petite tablette. Lors se leua, & vint à ses freres, que il moult aimoit, & leur demanda de haulte voix: Se ilz se deuoient là asseoir des premiers au mengier, & il deust ieûner, & attendre aussi cōme vn garçon. Et en outre leur dist, Que il iroyt seoir à leur table, voulzissent ou non, & se ilz en par-

loient, il abatroit tout par terre. Lors ses diz freres le recueillirent doubcement, & s'ala feoir delez eulz, & rudement print à mengier à plain poing. Et quant sa mere vit sa contenance, elle luy escria hautement, Que se delà ne se leuoit, elle le feroit tres-bien battre. Et quant il l'entendi, il se leua tout courroucié, en telle maniere qu'il trespucha ladite table à terre, & tout ce qui dessus estoit. Et lors sa mere dist, que c'estoit vn rude charreton, & qu'en luy n'auoit sens, raison, ne maniere, ne ja à son extraction ne feroit honneur.

ENTRETANDIZ entra leenz vne Conuerse, qui Iuifue auoit esté, laquelle venoit visiter la Dame, pour lui donner remeide & garison d'aucune maladie. Laquelle Conuerse se cognoissoit ou signe des mains & du visage, & commença à regarder BERTRAN, qui estoit tout simple & coy, pource que on luy auoit dit moult de villenies, & appellé garçon & bergier. Lors elle le salua, en disant, Que Dieu le beneist. Lequel cuidant qu'elle le deist par derisiõ, luy dist, Que elle le laissast en paix, ou se non, il lui donroit du baton que il tenoit. Mais elle l'apaisa moult doubcement, en luy disant, Qu'il ne se courrouçast, & qu'il auroit plus d'honneur ou temps auenir, que hõme de son lignage. Lors dist le Maistre d'hôtel, qui ceste parole oy, Qu'elle s'estoit bien acquitée, & belle bourde auoit trouuée. Et lors la-

dite Conuerse vint à la Dame, & lui demanda de
„ BERTRAN, se c'estoit son fils. Et elle luy res-
„ pondi, que oy. Mais pour les rudescs & nicetez,
„ qui estoient en soy, son Seigneur ne le pouoit
„ amer. Mais ladite Conuerse, qui la philosommie
dudit BERTRAN auoit bien auisée & regardée,
conta veritablemēt à sadite mere de mot à autre
tout le bien & honneur, qui à auenir lui estoit; &
comment il seroit prisiez & honnourez en plu-
sieurs lieux, & par especial ou Royaume de Fran-
ce, & amez des Fleurs de Liz. Laquelle Dame me-
re dudit BERTRAN, ne le pouoit croyse, pour
ce qu'elle en veoit si petite apparence. Et apres
ce, fist disner ladite Conuerse. Mais comme le-
dit Maistre d'ostel apportoit vn paon pour la
seruir, BERTRAN lui osta des deux poings, &
„ en seruy icelle Conuerse, en luy disant, Qu'il luy
„ vouloit amender ce que ainsi rudement auoit
„ parlé à elle. Et puis lui versa plaine coppe de vin
si habondamment, qu'il le conuint aseronder.
„ Pourquoi ladite Conuerse dist, Que oncques
„ mauuaise chair ne l'auoit engendré. Et sa mere
„ dist, Que oncques maiz ne lui auoit veu faire tāt
„ de bien. Mais BERTRAN, qui à la Conuerse
auoit dit, que iamais n'esperoit auoir bien, ioye,
ne honneur, pour ce que son pere & sa mere le
deboutoient ainsi, & ne sauoit pourquoi, res-
„ pondi lors à sadite mere: Que mauuais estoit le
„ fruit, & riens ne valoit, qui meurir ne pouoit.

Mais pou acoutoit de chose que l'en deist de lui. Et quant il vint en l'aage de neuf ans, il se maintint plus honnestement. Et sadite mere aussi le fist vestir & ordonner plus gentement: & deffendi à toutes ses gens, que l'en ne lui messeist, ne mesdeist aucunement.

MOULT croissoit & amendoit ledit BERTRAN, & vne coustume auoit, lors que souuent en plains champs ou emmy les prez il assembloit tant d'enffens comme il pouoit, si comme quarante, ou cinquante: & les faisoit tournoyer & combatre les vns contre les autres, tournoyoit & combatoit avecques eulx, les abatus releuoit, & les releuez hurtoit & boutoit jus. Et aucunesfois y auoit d'iceux enffens, qui plouroient & crioïent moult hault. Et ledit BERTRAN, qui là endroit auoit donné & receu de grans cops, tant que par maintesfoiz lui failloit le sang par la bouche & par le nez, & auoit sa robe toute souyllie & deschirée, donnoit vn certain pris au mieulx tournoyant & combatant, lesquelz departoient par son ordonnance & commandement; puis les menoit boyre, & paioit pour eulx. Dequoy ils parloient souuent ensemble, en loant sa personne, & priant à Dieu, qu'il lui acreust honneur. Si auenoit que BERTRAN estoit parti de leur compaignie, & retournoit à l'ostel de son pere ainsi souyllié & deschiré comme dit est. Sa mere le laidangoit & blasmoit moult durement, en disant,

„ Que c'estoit vn chetif garçon, qui menoit laide
 „ vie & deshonneste : & le menaçoit moult fort,
 que se plus retournoit en tel estat, il se repanti-
 roit. Et lui ramenteuoit les biens que la Conuer-
 se auoit forty sur soy. Lesquelz, si comme elle di-
 soit, ne le creoit pas. Car il ne demonstroit pas
 qu'il fust yssuz de si noble lignée cōme il estoit,
 & qu'il se gardast de fouloyer, ou elle le courrou-
 ceroit. Mais BERTRAN ne s'en deportoit en
 riens, ains tournoyot continuellement, & fai-
 soit tournoyer en plusieurs paiz. Et se comba-
 toit encontre les plus fors & les greigneurs, en
 escliant GUESCLIN : & leur commandoit qu'il
 ne fust deporté neant plus que le mendre de eulx
 tous. Tant que par plusieurs foiz retournoit
 fouyllié, & deschyré, & nauré, cōme autres plu-
 sieurs foiz auoit fait. Et avecques ce faisoit dre-
 crier quintaynes, & y ioustoit & faisoit iouster : &
 au mieulx ioustant donnoit vn beau pris au de-
 partir. Quant son pere vit ce, il fist crier & def-
 fendre en sa terre, & ou païs dessusdit, Que nuls
 „ quelconques ne laissast son filz suiur BERTRAN,
 „ en poyne de cent solz d'amende. Et adonc les
 enfans furent si doulans & coiz, qu'ils se deffuy-
 oient de BERTRAN, quant approucher les vou-
 loit. Et quant il vit ce, souuent les venoit assaillir
 de luitier, & malgré eulx à eulx luitoit. Dont à
 son pere en venoit les plaintes, lequel maudioit
 la mere qui l'auoit porté, laquelle en plouroit
 moult

moult tendrement : & tant, qu'elle dist, que l'en
 n'en pourroit cheuir, qui ne le mettroit en pri-
 son. Lors fu emprisonné BERTRAN bien
 l'espace de quatre mois, & lui enuoyoit-on à
 boyre & à menger, & ce qui besoing lui estoit.
 Mais vne foiz enferma en ladicte prison la chā-
 briere, qui lui aportoit à disner, & s'en yssy, &
 emporta les clefs, puis se mussa au mieulx qu'il
 pot. A vn matin vint à vn champ à vn bouvier,
 qui haroit de deux iumens à la charue du pere
 dudidt BERTRAN. Lequel destacha l'vne d'i-
 celles, & monta dessus. Et quant ledit bouvier
 vit, qu'il s'en aloit, il commença fort à crier.
 Mais BERTRAN n'en fist que rire, qui cheuau-
 cha sans selle & sans bride, à tout vn licol de la-
 dicte iument, laquelle estoit toute pelée. Et quāt
 son pere sceut ces nouuelles, il vouldist bien qu'il
 fust noyé. Lequel s'en vint à Rennes à vn sien
 oncle, qui vne sienne belle ante auoit espousée.
 Et quant elle le vit, elle lui blasma moult ses fo-
 lies, en disant qu'il auoit telle renommée, dont
 sa mere estoit moult tourmentée au cuer : & qu'il
 ressembloit mal au lignage dont il estoit yssus, &
 qu'il menoit vne vie aussi comme toute desuée.
 Lors son mary reprint ycelle, en disant qu'elle
 auoit tort, & qu'il conuenoit que ieunesce fust
 iectée, & que BERTRAN estoit encores ieunes
 assez, pour auoir sens & honneur : & vouloit,
 qu'il demourast avecques eulx, tant comme il

lui plairoit. Laquelle chose n'estoit pas bien agreable à la Dame. Car moult se doubtoit, que ledit BERTRAN ne les troublast ou courrouçast par aucune fole ieunesce. Mais toutesfoiz il se tint biē trois moys paisiblement avec son oncle, sans aler iouer ne çà ne là. Et aucunesfoiz cheuauchoit vn cheual avecques lui, & de foiz à autre aloit avecques sadite belle ante. Et tant que en ladite ville on ordonna vn bon pris à donner au mieulx luytant à vn certain iour de Dimanche apres disner, & en certaine place. Auquel iour & heure la tante de BERTRAN le mena avecques elle au Sermon. Mais il sembla tout bellement d'elle, si tost comme ledit Sermon fu commencié. Et vint esdites place & luyte, où plusieurs le recogneurent, qui lui requierent de luyter. Mais il leur dist, qu'ilz lui promettroient ainçoiz, qu'ilz ne le disroient à son ante; & que se elle le sauoit, il seroit batuz. Lors firent, qu'ilz ne l'encuserent point.

ADONC BERTRAN, qui moult ieune estoit, & n'auoit que dix-sept ans d'aage, regarda vn Breton, qui auoit luitié fierement, & abatu plusieurs des compaignons, bien le nombre de douze, sans ce qu'il feust cheu aucunement. Et vint prendre & aherdre icelui Breton, & tant par force comme par engin le geçta contre terre. Mais BERTRAN chey avecques lui, pour l'autre qui le tiroit fort à foy: & au cheoir qu'i

fist encontra vn caillou tranchant, qui le genoil lui entamma, si que le sanc en sailly formant, & fu tellement blecié, qu'il ne se pouoit soustenir sur la gambe. Lors commença à dermenter & complaindre, pour paour qu'il auoit, que sa belle ante ne sceust le fait. Et pria aux compaignons, qu'ilz lui feissent appareiller sa playe à vn mire, & puis qu'il fust porté en l'ostel de sadiete belle ante. Laquelle chose ils firent, & lui mirent sur son chief ledit pris, qui estoit vn chapel ouuré d'or & d'argét. Et il leur dist, que pour Dieu ilz lui ostassent, & qu'il n'estoit pas endaussez & droit. A icelle heure qu'il fu apporté ou dit hostel, le Sermon dessusdit estoit finé, & le queroit par tout sa belle ante. A laquelle dist vn Breton, qui delez elle estoit, que BERTRAN s'estoit moult bien porté à la luyte, & auoit gagné le pris : mais il estoit blecié d'une pierre, qui lui auoit coppé le genouyl à moitié. Et quant la Dame l'entendi, icelle fu moult courroucée : & s'en ala en son hostel, où elle trouua BERTRAN couchié dedens vn lit. Lequel elle commença mout fort à tencher, & lui dist, qu'il ne se maintenoit pas comme filz de Cheualier, de aler ainsi luitier avecques les chetifs : & que mieulx lui vaulzist, puis que ainsi vouloit faire, de essaier sa force à bouhourdier. Et il lui respondi, que elle ne se vaulzist courroucier, & que quant il seroit gary comme il pensoit à estre bien brief, se Dieu

plaist, & qu'il peust cheuaucher, il syeueroit ioustes & tournoys. Si fu gary dedens le neufiesme iour, & se tint là vn mois tout en paix.

Ce temps durant l'en le fist apaisier à son pere, & puis fist tant que sa mere, son ante, & les autres amis lui donnerent armeures, escu, espoy, & vn roucin trotant, qui n'estoit pas trop bon. Et par tout où il sauoit ioustes & tournois, il alloit, & montoit sur la meilleur iument de son pere. Car son petit roucin lui duroit moult poy. Et quant il auoit besoing d'argent, il vendoit sa monteure, & prenoit des autres iumens de son dit pere, & de ses ioyaulx aussi, & de ceulx de sa mere, & les vendoit. Et où il sauoit aucun diner de nobles gens, ou aucun gentil homme logié, il enuoioit de son vin. Et tant de seruoit, que chacun lui faisoit ioye, & le festoient & honnoient. Mais pource qu'il estoit si ieune, comme de l'aage de dixhuit ans, on ne le laissoit nulle part iuster, pour ce que son frere en auoit fait priere. Dont BERTRAN estoit moult dolent. Et quant il estoit retourné à l'ostel de son dit pere, il luy comptoit les honneurs, avecques l'estat & maintieng des Seigneurs, si honnourablement, que mou lui plaisoit. Et quant ledit BERTRAN veoit aucun pouure homme demandant aumône pour l'amour de Dieu, il lui donnoit pain, vin, ou argent. Et se il que donner ne lui eust d'icelles choses, ainçois lui donnoit de sa propre ve-

sture. Et ce estoit le principal apres generation, pour quoy son pere plus l'amoit, & pensoit qu'il deust venir à honneur.

De la premiere iouste notable qu'il fist, & dont il ot le pris, laquelle fu à Rennes.

CHAPITRE II.

EN ce temps repairoit BERTRAN en ladite ville de Rénes, avecques son ante. Et auint, que à vne feste y fu cryée de ioustes de hault pris, lesquelles furent à vn Mardi, où auoit plusieurs Cheualiers & Escuiers d'onneur: & aux fenestres pour regarder plusieurs Damoiselles & bourgeois tref-belles & bien parées. Et BERTRAN estoit monté sur vn pouure roucin de haraz, qu'il auoit pris à vne des charues de son pere. Et estoit regardez de plusieurs, qui disoient, qu'il sembloit mieulx bouuier que filz de Cheualier, & qu'il cheuauchoit vn cheual de monnyer: & mieulx estoit taillié de seruir vn bergier, que il n'estoit de venir tournoyer ne iouster. Et ly autres, qui de lui auoient oy parler, l'excusoient, & en disoient moult de bien. Lors commença à dire BERTRAN à soy-mesmes, que iamaiz ne feroit amez ne cogneuz des Dames, pour ce qu'il estoit laiz, & mal faitiz. Et moult se plaignoit à soy de son pere, qui autrement ne luy vouloit

aidier. Lequel estoit en la place monté & armé du costé de ceulx de dedens: mais BERTRAN riens n'en fauoit. Lors on commença à tromper, & Cheualiers & Escuyers à iouster moult fort de lances les vns contre les autres, cheuaulx & hōmes à verser, & testes à desheaumer. Et moult y auoit grant assemblée, tant de Bretons Galoz, comme de Bretonnans. Et lors BERTRAN s'en vint à vn sien cousin, qui retournoit des ioustes, lequel icellui iour auoit moult bien iousté. Et lui pria bien acertes, que son cheual & ses armes lui prestaist, & il lui guerredonneroit bien en autre temps. Lequel les lui bailla & aida à lui armer. Et lors BERTRAN se mist és rens, ainsi monté & armé. Et vit vn Cheualier, qui iouste demandoit. Et BERTRAN lui signa la main, & corut son cheual contre luy: & le feri droit à la visiere, en telle maniere qu'il lui osta le heaume tout ius du chief, & versa Cheualier & cheual par terre. Si que le cheual mourut, & ledit Cheualier se pasma, tant que l'en cuidoit que il fust mort. Et Heraulx commencierent fort à crier, mais ne sauoient qui estoit BERTRAN. Et quāt le Cheualier pot parler, il demanda qui tel cop lui auoit donné. Et on lui dist, que saoir ne le pourroit, se il ne le desheaumoit. Lors se fist vitement armer, pour venir contre BERTRAN. Mais le pere dudit Bertran, qui ledit iour auoit iousté moult vaillammēt, & qui estoit de la par-

rie dudit Cheualier, s'auança pour venir contre
 Bertran son filz, qu'il ne cognoissoit. Mais quât
 BERTRAN aduifa les armes, il ietta tantost ius la
 lance. Et cuida son pere, qui plain d'ardiesse e-
 stoit, qu'il le fist par espouement. Apres vint
 vn autre Cheualier, qui iousta à Bertran: & Ber-
 tran contre lui, qui l'attaint par telle maniere;
 qu'il le desheauma, & le heaume enuoya plus de
 douze piez loing de soy. Adonc commencie-
 rent haultement à crier les dessusdiz Heraulx: A
 l'aentureux nouuellement venu. Dont Bertran
 out moult grant ioye, qui iousta quinze lances
 ains qu'il cessast. Si en fut moult prisée la iour-
 née. Puis vint vn Cheualier de Normendie, qui
 aussi comme par enuye iousta à BERTRAN, &
 le desheauma. Et adonc fu recogneuz de ceulx
 de sa lignée, qui moult le festoierent. Et entre
 les autres son pere luy dist, que iamaiz ne lui fau-
 droit, mais bailleroit cheuaulx, or & argêt, pour
 acquerir Baronnies; & deust toute sa terre enga-
 ger à long temps. Moult estoient ioyeux tous les
 amis Bertrá, de ce qu'il auoit ainsi fort iousté à la
 feste, & d'icelle emporté le pris & honneur, qui
 moult estoit grant.

*Du commencement & cause de la guerre meüe entre
Monsieur CHARLES DE BLOIS, &
Monsieur Iehan Comte de Montfort,
pour cause de la Duché de
Bretaigne.*

CHAPITRE III.

EN la Duchie de Bretaigne auoit eu vn vaillant Duc, qui bon François fu toute sa vie, & ala auecques le Roy PHILIPPE de France en la compaignie de plusieurs autres, Nobles, & gés de Commune, pour leuer le siege mis deuant la cité de Tournay, par Edouart d'Engleterre, & ses gens: qui sans aucun droit chalongoit l'onneur de la Couronne de France, & à tres-mauuaise & sans nulle cause guerrye & guerroyoit le Royaume. Et auecques iceulx Engloiz estoient plusieurs Flamens, Henuyers, Brabançons, & Alemans. Et ala le Roy en son ost, ou quel auoit bien quatre cents mil hommes, pour lui combattre. Mais vne vaillant Contesse, qui lors estoit en Henault, laquelle auoit le monde delaisié, & estoit deuenüe Abbeesse à Fôtenelle; & estoit icelle Dame sœur dudit Roy Philippe, & mere de la femme dudit Edouart, pourchassa tant qu'il y ot treues entr'eux. Et s'en vint le Roy en France, qui à ses gens donna congié, & mercia moult
le

le Duc de Bretaigne, qui à ses commandemens estoit tousiours venu. Lequel Duc retourné en son pays, en l'année d'apres ala de vie à trespassement. Lors auint, que deux personnes, qui se disoient ses heritiers, dont l'une fu vne Dame, femme Monsieur CHARLES DE BLOIS; & l'autre fu le Conte de Montfort nommé JEAN, qui vouloit precéder en hoyrye. Tant que procès en fu en la Court de Parlement. Mais pour ce que ledit Conte doubtoit, qu'il ne cheyft, il se parti à vn matin sans congié du Roy; depuis ce qu'il auoit esté pris à Nantes du Duc de Normandie filz dudit Roy. Et s'en ala en Bretaigne, où il fu de aucuns receuz, & d'autres non. Illec garny neuf ou dix chasteaulx, & de là passa la mer, & ala en Engleterre, & prist aliance avecques les Engloiz, pour greuer Vannes & Rénes; où il estoit haiz & escandit, & conquerre toute la Duchie. Adonc enuoya le Roy d'Engleterre à tout grāt foison gens d'armes & archiers, le Duc de Lancastre descendre oudit pays. Ouquel estoit lors BERTRAND DV GVESCLIN, qui bien auoit oy dire, que le Duc Charles auoit greigneur droit, que le Conte de Montfort. Adonc quist & assembla soixante compaignons, qu'il alia avecques soy, en propos de aidier de bon cuer audit Charles, & de nuire aux Engloiz à son pouoir. De iour couroit & cheuauchoit où bon luy sembloit, & de nuit se tenoit és bois & és forests.

Si sceut que pres d'ilec les Engloiz tenoient vn chastel nomm  FovGERAY: dont estoit Capitaine Robert de Bl boure, Cheualier Engloiz, qui moult estoit doub  . Et estoit ce chastel   demie lieu  pres de boys, lequel Bertran faisoit espier de tous coustez. Tant que vn iour vn varlet espie lui vint dire, que ledit Capitaine & ses gens s'en aloient vers l'ost Charles de Bloys, & n'y auoit oudit chastel gueres de gens, qui peussent garder la fermer  . Et quant Bertra  oy ce, il fist desguiser lui & ses gens en habiz de boscherons: mais dessoubz estoient bien armez. Et s'en alerent chargez de bourr  s, fagoz, & autres busches, deuers ledit chastel. Et Bertran aloit deuant, qui bien sembloit boscheron. Et bi   auoit ordonn   & encharg     ses compaignons ce que faire deuoient. Lesquelz venoient apres lui en quatre parties. Et quant ceulx, qui estoient ou dongon du chastel, les apperceurent, la garde commen     sonner sa trompe. Adonc y ot telz des compaignons Bertran, qui bien voulzissent estre autre part. Mais ils n'osoient retourner, pour ce que Bertran approuchoit ainsi le chastel, & bien leur affermoit que icelui iour y entreroient.

De la prinse du chastel de Fougeray faite par ledit Bertran & ses gens, & comme ilz desconfirent les Engloiz, qui dedens estoient, & le Capitaine aussi, & autres Engloiz, qui oudit chastel vouloient retourner, lesquels ilz rencontrerent sur les champs.

CHAPITRE IV.

QVANT ceulx du chastel de Fougeray virent venir Bertran & ses compagnons ainsi vestuz de robes blanches, & chargiez de busches, ilz cuidierēt pour vray que ce fussent boscherons; & furent d'acort, qu'ilz les mettroient dedens, pour ce que besoing auoient de bois à ardoir. Lors ala le portier lui quatriesme sans plus desuerroüyller la porte, & pons aualer. Adonc Bertran & aucuns de ses compagnons vindrent getter leur busches ius, en telle maniere que on ne peust fermer ladite porte. Mais Bertran s'acha s'espée, & tua le portier, & puis escria GUESCLIN. Et ses gēs passerēt apertemēt le pont, & lui aidierent à gaaigner la porte. Lors saillirēt auant Engloiz, qui bien estoient oudit chastel, tant soudoiers, comme queux, bouteillers, varlés, & autres mesnies, deus cens hommes ou plus, qui moult fort assaillirent ledit Bertran & ses gens, en gettant de gros cailloux, & traiant & lançant moult fort à eulx, tant qu'ilz estoient à

grant destroit, pour la deffence que les Engloiz faisoient. Et entretens vn Escuier Engloiz, qui vne cognie tenoit, fery vn des compaignons Bertran, si que il le tua. Et Bertran le tua aussi de son espée. Et puis prist ladite cognie, & escria GUESCLIN, & les Engloiz recula iusques à vne bergerie. Et là fu tellement empresseé lui & ses compaignons, que plus n'en pouoiet. Et il mesmes estoit naurez en plusieurs lieux. A tant vint deuant le chastel vne cheuauchée de gens d'armes, qui estoient à Monsieur Charles de Blois, lesquelz par certains espies auoient sceu l'issue du Capitaine, & autres du chastel. Et quant ilz oyrent, ilz se bouterent dedens, & vindrent au secours à Monsieur Bertran, & des siens. Mais ains qu'ilz y entrassent, ceulx qui la porte gardoient leur escrierent, qu'ilz n'y meissent le pié, se ilz n'estoient des gens & bien vueillans de Monsieur Charles de Blois, ou autrement mors seroient. Car Bertran du Guesclin estoit leenz à tout cinq cents combatans, qui occyoient Engloiz. Lesquelz entr'eulx dirét, que aussi le queroient-ils. Et commencerent à escrier, GUESCLIN, & que tous y mourroient les Engloiz. Et quant Bertran l'oy, ne sceut que deuenir, ne que penser: mais esperoit que ce fust son Seigneur de pere, qui icelles gens conduisist. Mais quant iceulx le secoururent, qui venoient de dehors tous nouueaulx, ilz le trouuerent les armeures

toutes despeciées, & que le sanc lui couroit en plusieurs parties du corps, & auoit sur lui dix Engloiz. Et sa coignie auoit perduë, & s'aidoit des poings. Adonc dirent bien, que c'estoit le plus vaillant Escuier, que oncques mais eussent veu. Lors ala à Bertran vn Cheualier, qui bien le cognoissoit, lequel à force d'espee fist vn par entour lui, & dérompi la presse. Mais à Bertran troubloit tellement la veuë pour le sanc qu'il auoit perdu, qu'il ne veoit mais goutte. Et le Cheualier luy disoit tousiours, qu'il le sycuist. En fin tous les Engloiz furent mis à mort, & le chastel conquis & rendu à Bertran. Car chacun d'eulx disoit, que c'estoit le plus preux du monde. Et bien estoit de raison, que le bien de lui feust rementeuz. Puis leuerent les pons, & fermerent la porte. Et apres vindrent à Bertran, pour lui bender & medeciner ses plaies. Mais il ne vouloit point, que on le teinst, ne feyst aucun bien. Apres ce, Bertran leur demanda, qui là les auoit enuoyez. & on lui compta. Puis mengierent & burent largement, des viures qui là estoient; & firent tres-bonne chiere. Et lui vint-on dire entretandiz, cōme ilz mengoient, que Robert de Blambourc iadis Capitaine dudit chastel, & ses gens, y cuidoient retourner, & s'estoit mis à voye. Et adonc nos gens yssirent hors, qui desconfirent & tuerent ledit Blambourc, & ses gens; excepté ceulx qui s'enfuyrent..

Ainsi demoura Bertran & ses gens ou chastelet de Fougeray, dont moult desplut au Conte de Montfort, qui durement s'en plaignoit. Mais Charles de Bloys, qui parler en oy, dist à sa gent: Que volentiers le verroit, & se il le pouoit tenir, moult de bien lui feroit. Mais entretandiz lui vindrent nouuelles de la descenduë du Duc de Lenclastre, & de ses gens, que EDOWART d'Engleterre auoit enuoyez pour secourir ledit Messire Iehan de Montfort, fust tort ou droit. Et quant Monsieur Charles de Bloys sceut les nouuelles, il fist mettre en villes, qu'il auoit, garnison de gens d'armes & d'arbalestriers, & aussi de viures & de batailles. A Rennes mist le Tort boiteux de Peuchot, qui estoit moult bon Cheualier, & plusieurs soudoyers auoit avec soy.

Du siege que le Duc de Lenclastre & ses gens mirent deuant Rennes, & comment Monsieur Bertran les assailly souuent, ledit siege durant. Et parmy l'ost entra dedens Rennes, où il amena plusieurs viures, qu'il conquist sur les Englois, & ardy vn berfray, qu'ils auoient drecié deuant ladite ville.

CHAPITRE V.

OR auint que le Duc de Lenclastre, avec soy le Conte de Pennebroc, Iehan de Chandos, Robert Canole, Iames Daudelée, & leur ost,

vindrent assiegier Rennes. Et avecques eulx auoient plusieurs Bretons. Et iura le Duc de Lenclastre, que iamais n'en partiroit, tant qu'il auroit mis son panon dedens. Et BERTRAN se tenoit en vn bois près d'ilec, qui mout estoit courroucié, que atant ne pouoit estre venu, pour entrer en la ville, où il auoit plusieurs parens & amis. Et toutesfois il espioit, & faisoit espier ceulx de l'ost de tous costez. Et souuent les assailloit tant, qu'il ne les laissoit dormir ne repouser. Dont souuent en oyoit parler le Duc de Lenclastre, qui enquist qui estoit celui, qui tant d'ennuy leur faisoit. Et vn Cheualier Breton, qui bié congnoissoit Bertran, compta au Duc son lignage, sa ieunesce, & sa proesce, & comment il auoit pris le chastel de Fougeray, qu'il tenoit. Adonc le priza mout, mais mieulx le voulzist loing de foy, que si près. Puis fist miner, & commencer vne tres-grant mine, & planiere, où la lumiere estoit tousiours. Mais Bertran le costoyoit de près, tant que vn iour en cheuauchant sur la riuiere, il rencontra vn Cheualier Engloiz, qu'il prist, & par lui sceut l'estat de l'ost, & de ladite mine, & bien le fist garder. Puis vindrent lui & ses gens bouter le feu en l'ost, & escria GVESCLIN. Et cuidoient ceulx de l'ost, que le secours de France fust venu. Mais au partir, lui & ses gens prindrent quatre Cheualiers Engloiz, qui fiancerent de la main: lesquelz se rendirent.

tant seulement à Bertran, lequel s'en party atant. Et dist le guet du iour, que chacun s'en allast en son logeys, & qu'il n'y auoit estrange personne entour eulx. Adonc le Duc de Lenclastre dist, qu'il se pensoit, que ce eust esté Bertran du Guesclin. Et bien auoit cuidé parauant, que ce eust esté le Duc Charles, qui là eust amené ses gens. Et bien les tenoit pour brebiz, qui ainsi se venoient bouter entr'eulx. A tant vint ilec vn Cheualier, que Bertran auoit deliuré: lequel dist audit Duc, que ce auoit fait Bertran, & le pareil lui en gardoit, se dedens Rennes, où ses amiz estoiet, ne le laissoit paisiblement entrer. Et le Duc respondy, que à vn tel garnement ne pensoit à donner treues. Et fist miner tref-fort, & la dessus dite mine auancier tref-fort, tant qu'il pot: dôt ceulx de la cité estoient en tref-grant effroy. Car ilz ne fauoient de quel costé on minoit. Et pour ce le Tortboiteux ordonna pendre bacins en tous les hostelz, qui prés des murs estoient. Parquoy ilz sceurent bien la mine. A l'encontre de laquelle ilz contreminerent tant, que icelle renecontrerent: laquelle ne valu riens, mais fonda, & y furent tous mors les mineurs, & ceulx qui leur aidoyent, tant engloiz, comme Bretons. Dont le Duc de Lenclastre fu moult courroucié. Adonc commenda à getter ses engins, & la ville moult fort à assallyr. Et auoient les citoyens moult pou de viures, & par especial de chars. Et pour ce le
Duc

Duc, qui bien le pensoit, fist amener és prex-
deuers les fossez bien deulx mil porceaux, que
par ce il cuidoit bien faire yllir ceulx de la cité,
& les attrapper, & mettre à mort. Lesquels vou-
loient aler dehors. Mais le Tort Capitaine leur
defendit, & dist que bien aroit de leurs pour-
ceaux sans d'ilecques partir. Car les Engloiz ne
la * voient, que pour eulx decevoir. Lors fist a-
mener vne grant truie, & la fist pendre lez la
porte, & le pont aualer. Et quant les porceaux
oyrent ladite truie, qui cryoit, & brayoît moult
hault en son complaignait, pour ce que la cor-
de, à quoy elle pendoit, la distraingnoit & en-
goissoit; iceulx porceaux commencierent à
courir tant comme ilz pourent deuers la porte.
Si tost comme les premiers ilz furent, qui crie-
rent laidement comme les autres, on despendi
vistement ladite truie, & la trayna l'en dedens la
ville. Si commença à crier plus fort que deuant,
& les porceaux à la sycuir. Et Engloiz, qui ce
auoient bien veu, cheuaucherent vers ledit pôt,
& crioient à ceulx de dedens, que faussement
leur auoient leur proye emblée, comme faulx
Bretons, mais ilz l'acheteroient de chair & de
sang. Mais quant ceulx de dedens virent, que
l'ost des Engloiz s'esmouuoit, ilz leuerent leur
pont, & fermerent leur porte, puis monterent
sur les créneaulx, & se commencierent à moc-
quer & gaber des Engloiz, en disant qu'ilz n'a-

uoient pas perduz leurs pourceaulx, & que bien les deuroient payer de ce qu'ilz gardoient leurs porcs. Lesquelz furēt lors departiz, & bien en auoient besoing. Car leenz estoit pres pris de viures. Ainsi furent long temps en ladite cité, sans yssir de leenz, ne estre assailliz. Mais leurs viandes restraingnoient, & apetchoient moult.

Vn iour de Mercredi le Tort boiteux assembla le Conseil de la cité, & leur dist: Seigneurs, vous sauez comment le Duc de Lenclastre & les Engloiz nous ont assiegiez, & iuré que de cy ne partiront, tant qu'ilz nous auront. Si fust bon, ce me semble, de enuoyer deuers le Duc Charles, lequel est à Nantes, pour auoir secours, ainçois que rendre nous conuiengne. Mais ie ne scay, qui feroit si bon ne si hardi, qui ou message osast aler. Adonc parla vn bourgeois, lequel en la ville auoit trois filles & cinq filz, qui n'auoiēt maiz que menger, & leur estoit le pain failly. Et dist qu'il se auantureroit, & mettroit en peril de mort pour eulx à aler oudit message, & que de ses enfans pensassent. Adonc orent tous grant pitié de lui. Et le Tort boiteux s'arma, & fist ses gens armer. Et quant le bourgeois deubt yssir, qui à pié aloit, cheuaucherent vers l'ost des Engloiz, lesquelz yssirent lors cōtre eulx, & y out estour. Mais ceulx de la cité se reculerent, & r'entrèrent ens, puis leuerent leur pont, & fermerent la porte. Et le bourgeois qui s'en aloit fu pris & happé

des Engloiz moult villainement. Maiz il leur dist, que point ne l'arrestassent, mais le feissent parler au bon Duc. Lors respondirent, qu'il auoit moult bien parlé, & le menerent tout droit deuers le Duc, qui estoit en son paueillon. Lors se agenoilla, & le salua, en faisant moult le dolent, & le desconforté. & puis lui dist: Sire, entendez moy pour Dieu. Apou, que ie ne me desespere. Car ceulx de Rennes par leur felonnie ont fait vn trop grant meschief. Car ilz ont mis à mort tous les petiz enfens, & des miens ont tué sept. Et ce ont fait, afin que on n'aperçoie leur estat. Et aussi ont occys & mis à mort tous les vielz hommes & vielles femmes, mesmes les pouures qui queroient leur pain. Et miculx ayment à les ainsi destruire, que à les bouter hors, pour doubte qu'ilz n'eussent raconté à vous, & à voz gens le meschief & famine, qui y est. Si vous diray comme venger en pourrez vous & moy. Et se vous voulez, demain leur doiuent venir quatre mil Alemans si chargiez de vitailles, que oncques maiz homme n'en vit tant. Et se vous vous mettez au deuât, vo⁹ lez encôtrerez. Car ilz viennent en deux parties pour vostre ost espier. Adonc lui dist le Duc, qu'il le tenoit pour vaillant. Et assez lui fist donner à boire & à mengier. Et quant ilz qui estoit sages & bien en parlez, ot bien beu, il dist assez de bourdes. Mais le Duc fist armer & ordonner ses gens, & leur dist qu'ilz au-

roient dedens brief temps l'assault, se ilz ne se gardoient: & que Charles de Bloys venoit à tout quatre mil Alemans armez, que le Roy Iehan de France lui auoit enuoyez. Si vouloit aler apres vespree à l'encontre d'eulx, & ses coureurs enuoyer au deuant, pour leur secrez sauoir. Et quant le bourgeois vit, qu'il les ot ainsi assotez, & qu'ilz se mettroient au chemin; il, qui bien fauoit le pais, pour ce que nez en estoit, se mist au chemin, que oncques ne fu auisé d'Engloiz, qui en leur ost auoient chargié grant foison vin & vitaille, qu'ilz emporterent avecques eulx. Et ceulx, qui en l'ost estoient demourez, cuidoient bien que le secours venist grant & fort. Et ceulx de la cité faisoient sonner maint instrumens. Combien que bien pou eussent à boire & à mengier, & qu'ilz eussent trestous grans fain. Car les riches bourgeois, dont planté y auoit, auoient tous leurs biens repris & muciez couuertement. Et mesmement ceulx, qui auoient aucuns viures, le gardoient moult bien, que on ne le sceut en la ville.

OR fault parler du messâgier, qui en la nuit qu'il parti trouua vn hôtél, où n'auoit homme ne femme, ouquel il se repousa iusques à l'adiournement. Mais quant partir s'en deust, il trouua & encôtra BERTRAND DV GUESCLIN, & ses gens armez, qui aloit pour espier l'ost des Engloiz. Et quant il apperceut le bourgeois, il

l'appella fausse espie, & lui dist que le corps Dieu le creuentast, & que il lui diroit verité, ou il perdrait la teste. Et ilz, qui grant paour out, lui cria mercy, & dist qu'il se rendoit. Et lors Bertran lui demanda, qui le faisoit là hanter, & que c'estoit pour espier lui & sa gent, & liurer aux Engloiz. Et le bourgeois lui conta lors ce que fait auoit, & comment les Engloiz s'estoient partiz, & laissié leur ost. Mais Bertran demanda, se il disoit verité. Et il lui respondy, que oyl, & auecques lui retourneroit. Adonc Bertran fist armer ses gens, & les mist en moult noble ordonnance. Et leur dist, que ce iour acquerroient grant honneur, & que dedens Rennes entreroient. Et ilz respondirent tuit, que il estoit temps d'aler. Moult amoient Bertran, & estoient bon & hardi, & le seruoient bien. Car encores vendroit à grant honneur. Et qu'il estoit bien taillé de deuenir Roy ou Duc. Voire, dist li autre nommé " Helye, s'il puet long temps viure. Mais gens si a- " uentureux ne deuiennent pas volentiers vielz. " Lors dist vn autre, Sur Bertran a l'on fortly main- " te haulte proesse, & tout auendra quanque au- " nir doit. Entretandiz, que Bertran & ses gens " cheuauchioient vers l'ost du Duc de Lenclastre, qui la matinée auoit cheuauchié, se tenoit en vn champ, ses batailles rengées: & deuant auoit enuoyé ses coureurs la nuit, auecques maintes espies, qui riens n'auoient trouué. Si n'osoiet par-

ler ne faire liée chiere. Donc commença le Duc
„ à dire: Je croy que c'est moquerie. Or auons
„ nous ainsi lessié nostre ost toute nuit à nuitée.
„ Se Bertran du Guesclin à toute sa mesnie le ve-
„ noit assaillir, bien serions deceuz. Et bien me
„ doute, que sa parole n'en soit auerie. Mais ledit
Bertran & les siens s'en vindrent en l'ost droit à
Soleil leuant, ainsi comme le guet de la nuit es-
toit repairié, & la greigneur partie des gens en-
dormiz. Lors abatirent tentes, & bouterent feux
en plusieurs loges. Dont ceulx de l'ost crioient,
& plusieurs autres s'en fuyoient. Car ilz cuidoiēt
de vray, que ce fussent François, qui ylec fussent
venu bien vint mille tout à vne foiz. Et les gens
Bertran tresbuchaient tout ce qu'ilz trouuoiet,
& tant qu'ilz vindrent à vne rue, où auoit plus
de cent charettes chargées de chars salées, de
vins, & de fourmens. Aufquelles auoit, à chacu-
ne d'icelles, ou cheual, ou iument. Et s'en cui-
doient fouyr quant ilz virent l'esmeute. Mais
Bertran en tua plusieurs, & les autres baty, & fist
batre & naurer, & malgré eulx mener à Rennes
tout le charroy. Et en alant, les battoit & feroit
tellement, comme se ce feussent esclaves. Tant
„ que le plus hardi disoit: Je me rens. Et il les ap-
pelloit villains, & disoit que se ilz ne hastoient
leur chemin, il les feroit pèdre comme maatins.
Mais en l'ost n'ot Engloiz, homme d'armes, ar-
chier, ne autres, qui faillist auant pour secourre

le charroy; mais s'en fuyoient tous. Et Bertran vint à la barriere de la cité, & commença à crier, G V E S C L I N, en disant, qu'il estoit leur cousin. Lors tantost ses amis le recongneurent. Et vint le Tort boiteux encontre lui, lequel auoit faict ouurir la porte: & acola le vaillant Bertran. Et entra lors dedens Rennes. Et encontre lui vindrent des bourgeois & bourgoises des plus souffisans: & mesmes les petiz enfens, lesquels enclinoient tous Bertran. Puis le menerent à son hostel, chieux son ante. Adonc fist tout le charroy venir deuant sondit hostel. Puis demanda aux charretiers, qui là estoient, se ces biens estoient à eulx, & qu'ilz ne lui celassent pas. Et qu'ilz n'auroient nul mal, ia n'en doubtaissent. Et ilz dirēt, que oyl, & qu'ilz estoient marchans, & ces biens auoient amenez pour l'ost gouuerner. Adonc leur dist Bertran: Seigneurs, or entendez, ia n'y perdez qui vaille vn seul denier, ne cheual, ne iument aussi. Mais ferez paiez de ce que vōs dé- rées vous ont cousté, puis vous en retournerez en l'ost. Car ie le vous commande ainsi. Et me re- commandez au Duc de Lenclastre, & lui dites, que ie me suis mis ceans à garant: & que nous auons des biens assez pour viure, au plaisir de Dieu, tant que secours nous soit venu. Et vous deffens aussi à trestous, que en l'ost vous ne reueuez iamais en vostre vie. Et se ie vous y truys, vous me lairrez ce que vous enporterez, & se

perdrez la vie. Et culx respondirent, qu'il n'en voulust doubter, & que iamaiz en leur viuant ilz n'y retourneroient. Et soubzhaidierent, qu'il plust à Dieu, que il tenist le remenant.

ENTRETANDIZ fut compté au Duc de Léclastre l'affaire, qui moult courroucié fu, quant il le sceut. Et dist, que bien auoient perdu leur nuytie; & que le villain leur auoit belle donnée. Et soubzhaydoit, que il le tenist en sa tente, où tout le fait lui fu compté. Et bien lui sembloit chose fayée. Atant vindrent là les charretiers, qui bien lui dirent le message Bertran, & comment il les auoit fait paier, & rendre cheuaulx & „ voitures: & en oultre dire au Duc. Sire, Bertran „ se recommande à vous, & dit que par Dieu il vous „ verra le plus tost qu'il pourra. Et assez a viure lui „ & ses gens. Et quant il vous plaira des vins de la „ cité, il vous en enuoyera: & du boschet aussi pour „ adoucir vostre cuer. Car assez en a. Et quant le Duc l'entendi, il s'en merueilla moult. Et dist que grant honneur l'auoit engendré, & qu'il estoit gentil de cuer, s'il lui deuoit prouffiter. Car oncques larges cuer ne deust finer mauuaise- ment. Et dist, que selonguement viuoit, il de- uroit passer tous les Cheualiers du monde. Mais moult lui pesoit de ce que oncques ne l'auoit veu. Lors le Conte de Pennebroc dist au Duc: „ Sire, se vous me creez, vous ferez venir Bertran „ par vn fauf-conduit, que vous lui enuoierez. Et

ie suis certain, & ne le mescreez pas, que se vous le mandez, il lui vendra tantost. Lors en fu le Duc d'acord, & appella vn Herault, & lui bailla vn sauf-conduit tout seellé, lequel il fist faire pour Monsieur Bertran. Et moult le desprioit qu'il y venist soy quatriesme de tel gent comme il voudroit, & bon gré lui en fauroit. Adonc le Herault s'en parti, lequel portoit à son col les armes de son Seigneur. Et cheuaucha tant, qu'il vint là. Et quant ceulx de dedens l'aperceurent, nul ne trayt, ne lanca à lui. Mais le Tort boiteux, qui la ville gardoit, s'en vint sur les creneaulx; & demanda au Herault, pourquoy il venoit là. Et il lui respondi, qu'il venoit de par le noble Duc, qui en la cité enuoyoit vne lettre. Tantost fu la porte ouuerte, & le pont aualé. Et alerent plusieurs encontre lui, & forment fu honoré. Et le Capitaine vint là, & ses gens. Mais le Herault, qui regardoit de toutes pars, dist que il ne veoit pas celui, pourquoy il estoit là venuz. Et lui demanda le Capitaine, qu'il demandoit. Et il dist, que c'estoit Bertran du Guesclin à la chiere hardie, qui leurs gens auoit ainsi esueillé au matin. Lors le Capitaine venant contreu la chaufsiée, lui dist que c'estoit celui au iaques noir. Et six Escuyers auoit en sa compaignie. Et quant il les vit, il dist que ce sembloient bien brigants, qui marchans espiaissent. Et lors ledit Capitaine pria au Herault, qu'il ne deist à Ber-

tran, fors que courtoisie. Et se il lui auoit dit aucune villenie, il lui auroit tost donné de sa hache parmy la teste. Et il dist, que Dieu & la Vierge Marie l'en voulzissent garder. Adonc le Capitaine vint à Bertran, & lui dist qu'il parlât à ce Herault. Et Bertran lui demanda, qu'il vouloit sermonner. Lors s'enclina le Herault deuant lui. Et Bertran le fist releuer, & le salua: & demanda, quelles nouuelles il vouloit raconter. Et le Herault respōdi, que le Duc de Lécلاstre lui prioit, que à lui venist, & ses gens aussi: & bon sauf-cōduit lui apportoit, de venir & retourner, sauf allant, & sauf venant, s'il y voulzist aler. Car pas ne le deuoit refuser. Et Bertran lui respondi, qu'il estoit près de l'aler. Adonc prist le sauf-cōduit, & le bailla à lire. Car riens ne fauoit de lettres, ne oncques n'auoit trouué Maistre, de qui il se laissast doctriener: mais les vouloit tousiours ferir & fraper. Et quant Bertran out entendu ce que le Duc lui auoit mandé, il dist au Herault, qu'il yroit auecques lui. Et tantost le mena à son hostel, & luy donna vn bon gippon de soye tout neuf, que oncques n'auoit vestu. Puis ala à son forchier, & en trayt cent flourins, qu'il lui donna aussi. Il l'en pris grandement. Et oyants tous, que chascun l'escouta, que s'il estoit Duc ou Conte, que si lui auoit-il donné beau don: & que encores vendroit le corps de lui à grant hōneur. Et moult l'en pris le Capitaine. A tant

Bertran monta sur son cheual, & commanda s^{on} corps à Dieu. Puis cheuaucha moult fierement vers le Duc de Lenclastre, & le Herault avecques lui, qui moult l'onnoura. Et quant il fu entré en l'ost, moult fu regardé. Et disoit li vns à l'autre: Veez comme il est gros & noir, & comme il a les poings quarrez. Il est fort & puissant, mal est, qui le porta. Car il nous a fait des maux, & fera encores. Mais Bertran ala tout oultre, tant qu'il vint deuant le Duc, & s'agenoylla. Mais le Duc, qui bien doctriné estoit, le prist par la main, & le fist tantost leuer. Et dist, que bien fust-il venuz, & bon gré lui fauoit de ce qu'il estoit venu à lui quant il l'auoit mandé. Et Bertran dist: Je suis tout aprestez de faire ce que vous me demanderez, fors que de faire paiz iusques à ce que vous le ferez encontre mon Seigneur, qui est mon aduré. Et le Duc lui demāda lors, qui estoit son Seigneur. Et il lui dist, que c'estoit le Duc CHARLES DE BLOYS, & Madame sa femme, qui de Bretaigne l'eritage deuoient tenir. Et le Duc respondi à Bertran, qu'il ne fauoit, & que ainçois en mourroient cent mil hommes. Et Bertran dist: Je vueil, que on en occye assez. Au moins auront l'auoir ceulx qui demourront. Le Duc dist, que c'estoit verité, & commença à rire. Et Bertran leue les sourcis, & le regarda comme Ilion Crete. Et quant le Duc vit, que Bertrā ne s'ebayssoit, il commença à rire plus que de-

uant. Et puis lui dist ces paroles, ou semblables:
 „ Bertrá, se vous voulez demourer avecques moy,
 „ vous aurez trouué vn bon ami & loyal. Je vous
 „ feray Cheualier, & vous donray aussi grant ter-
 „ re, & grant auoir. Sire, dist Bertran, se ie vous a-
 „ uoye premierement seruy, & i'aloie seruir vn
 „ autre mortel ennemy; bien me deuriez tenir
 „ pour traictour. Et ia ne plaise à Dieu, que ie le
 „ fasse ainsi. Mais se à mon droit Seigneur le Duc
 „ Charles, lequel est extrait du sanc Royal, vous
 „ aurez paix & accort; ie feroye vostre gré, ie le
 „ vous certifie. Et le Duc de Lenclastre respondi,
 que ainsi ne pouoit estre.

*De la iouste faite par ledit BERTRAN en la presence du
 desusdit Duc, contre Guillaume de Blambourc
 Cheualier Engloiz, de trois cops de glaiue:
 dont au quatriesme le mata durant le
 dit siege. Et comment iceluy sie-
 ge fu leué.*

CHAPITRE VI.

AINSI COMME BERTRAN DV GUESCLIN
 parloit au Duc de Lenclastre en sa tente au
 siege deuant Rennes, apres ce que le Duc, qui
 moult le prisoit, lui ot fait bailler vin & espices
 largement, vn Cheualier nommé Guillaume de
 Blambourc, lequel estoit prochain parent de

Robert de Blambourc, qui auoit esté Capitaine du chastel de Foulgeray, que Bertrá auoit prins, comme dit est icy deuant, s'en vint audit Bertran, & le requist de trois cops de glaue, par tel conuent, ques'il lui eschappoit, le Duc l'en lairroit aler fiancement à Rennes. Et Bertran vint prendre le Cheualier par la main, & lui dist que grans mercis: & qu'il ne lui en fauldroit pour son pesant d'argent. Et s'il ne souffisoit de trois, il en auroit six, se voulenté lui en prenoit. Et quant le Duc l'oy ainsi parler, il dist au Cheualier, que c'estoit vn fier vassal, & qu'il auoit en son cuer vn droit cuer de serpent. Et grant merueille ot, de ce qu'il auoit ainsi respondu. Et dist, Puis que ainsi le voulez faire voz deux, ie vous mettray le iour. Ce sera à demain au matin. Et le Herault s'en vint tantost agenouiller deuât le Duc, & lui dist comme Bertran lui auoit donné vn gippon de soye, & cent flourins d'or. Et adonc fist presenter à Bertran vn coursier bel & riche, qui valloit maint deniers. Et quant Bertran l'ot receu, il dist au Duc: Sire, Dieu vous gart d'encombrier. Car oncques mais ie ne trouay Duc, Conte, ne aultre Prince, qui me donnaist vaillât vn seul denier, se ie ne l'ay conquis à l'espée. Et se ie vous pouoye faire seruice aucun, ne chose qui fust à vostre desirier, mon honneur sauuée, & sans abaissier mon pris, ie le vous rendroye de cuer. Car le cheual est bel, qui le sauroit cheua-

monta à cheual: mist l'escu à son col, & fist lacier son heaume: & prist la lance, qui le fer ot trenchant. A tant vint sa tante, qui lui commença à dire. Ay, beau niez, vous me courrouciez moult, & vous alez mettre en peril de mort. Car vous alez iouster à l'un des plus preux Cheualiers, qui soit en cel ost là deuant. Et les Engloiz aussi tiennent pou de leurs conuenans. Et se ie vous voy morir, ie mourray. Si te pry, beau niepz, ou nō de Dieu, que tu fasses oster ton heaume, & ie te baisera. Et Bertran lui dist, Dame mesprenez. Pourquoy vont li ieune clerç à l'escole, mais que pour aprendre? Et aussi m'en vais-ie à l'escole pour aprendre à iouster, & deuenir Cheualier souffisant. Alez vous en à l'ostel baisier vostre mary, & ne me syeuez plus: & à Dieu vous comment. Et quant la Dame entēdi son nepueu Bertran, elle lui dist doubcement: Beau niez, ie voy bien, & scay, que cuidier & grant ieunesce vous ont admonesté de penser à telle chose, de quoy le vostre pere aura son cuer irié, & vostre mere aussi, & tous ceulx, qui vous sont de sanc & d'amitié. Belle antē, dist Bertran, n'ayez vostre cuer irié. Je reuendray tantost s'il plaist à Dieu. Faites que le disner soit apresté. Car ainçois que le feu soit alumé & espriz, & le disner aprestez, ie seray retourné. Adonc est Bertan yssus de Rennes, & les Cheualiers & autres gens de la ville sont montez aux creneaulx: & regardoient Bertran, qui

qui s'en aloit vers l'ost tout parmy les prez, où le Cheualier estoit venu, moult noblement montré & armé. Mais vn commandement fist lors faire & crier le Duc de Lenclastre, que nul homme, qui armé fust, n'aprochast les deux champions de vingt lances, ou de plus. Et se le Cheualier estoit vaincu en champ, ne qui fust maté, ne mis au dessoubz, que nulz ne se must pour lui aidier & secourre. Et qui le dit commandement trespasseroit, il le feroit pendre. Lors n'y ot nul, qui ne se teust & tenist coy. Et le Cheualier descendi du cheual, & prist le glaiue en sa main, dont le fer fu tranchant, & pendi son escu à l'arçon de sa selle. Et Bertrā vint à lui, qui ne lui fist pas courtois salut; mais dist, que ce n'estoit pas bon signe, que si tépre estoit venu, & mieulx voulzist, qu'il fust encores couchié en son lit. Et qui croistre le voudroit, il n'en feroit plus. Mais ce ne disoit-il pas pour le refuser, mais pour le contrarier. Et oultre lui dist, que bien tost se leuast, & s'il pouoit il seroit tantost abatu. Et quant le Cheualier entendit Bertran, qui ainsi parla, il ne parla nés vn mot, mais monta sur son cheual, prist son glaiue en sa main, & acola son escu. Et Bertran d'autre part s'aficha és estriers, & moult bien se font mis en arroy. Et le Duc de Lenclastre estoit sur le pré, & le Conte de Pennebroc avecques lui, & des autres assez: qui moult se merueilloient de Bertran, qui ainsi s'en aloit, & riens ne

doubtoit. Et le Cheualier vint contre lui, qui pou le prisa. Mais Bertran le fery sur son escu, en telle maniere qu'il le perça, & le haubert aussi, tant qu'il entra au couton du pourpoint. Mais adonc ne le toucha aucunement en chair. Et le Cheualier, qui pou l'amoit, fery lui dessus le bacinet, si que le glaiue y atacha, & pou s'en failly, qu'il ne le perça tout oultre. Mais oncques Bertran ne se remua du cheual. Car il se affichoit és estriers comme vne tour. Adonc reuint au tout François, & raporta son glaiue. Mais si dolens fu au cuer, qu'il ne sonna mot. Puis r'alerent ensemble, tant que trois glaiues coururent. Et bien se porterent l'un contre l'autre, que nulz ne s'y bleça. Et Bertran lui escria haultement, se plus en vouloit, qu'il ne le celast pas: & que se pour le Duc ne fust, & ce aussi qu'il estoit venus de leur lez, il ne l'eust ia tant deporté. Mais se plus l'attendoit, il lui en mescherroit. Et quant le Cheualier entendit la raison de Bertran, il ne le prisa pas vn bouton; ains dist, qu'il recommenceroit. Et Bertran dist, qu'il le vouloit. Adonc coururent l'un contre l'autre. Mais Bertran fery le Cheualier en son escu, où il l'auoit feru le premier horion, tant qu'il lui perça, & hauqueton. Et fery parmy le corps en telle maniere, qu'à pou qu'il ne lui perça le foye, & le pommon; & tout armé l'abati du cheual emmy le sablon, & lui dist à haulte voix, Que assez en auoit pour la

liure son. Et se ne fust pour le Duc, qui tant estoit redoubtez, il donnaist au Cheualier encor vn autre horion. Puis saisi le cheual par le frain, & dist tout haut: Seigneurs, adieu vous comment. Je m'en vais à nostre maison à deux cheuaux. Et le Herault commença à crier: Sire, le Duc vous mande, que vous n'ayez soupeon, & que bien vous en pourrez aler à vostre volenté. Car vous auez accompli vostre entention. Adonc le salua Bertran, & lui donna le cheual que conquis auoit. Dont moult fist à louer. Et tous les Cheualiers vindrent contre lui, & moult l'onnouerent. Puis le menerent ou chastel, où ils auoient aprestez vn moult riche disner pour lui. Et les Engloiz s'allerent ordonner, & assirent la cité ainsi comme sur le aduesprement, & auoient fait charpenter vn grant beffray de bois moult hault, lequel ilz firent trainer sur roes iucques pres du fossé. Et quant il fu drecié, grant planté de gens y auoient, & pouoient. Et le firent garder les Engloiz toute nuit, pour ce que le lendemain en vouloient ouurer, & à la ville donner vn grant assault. Mais Bertra du Guesclin, qui moult fist à loer, à l'aube du iour lui, & le Capitaine, avecques leurs gens d'armes, & cinq cens arbalestriers yssirent hors, & porterent feu Gregoys avecques eulx. Et allerent tellement assembler aux Engloiz, qu'il les conuint reculer en l'ost. Adonc commencierent à crier & à brayre, &

Engloiz & Bretons à eulx armer. Et le Duc de Lenclastre mesmes auança tant, comme il pot. Mais auant qu'il peust venir, Bertran bouta le feu ou befray, que on veoit flamber de toutes pars. Ainsy fu le befray tout ars & despecié. Adonc vindrent les Engloiz rengiez & ordonnez, qui assaillirent, & enchassierent François, tant que reculer les en conuint. Et rentrerent dedens Rennes, & le Capitaine, & Bertran aussi, qui en emmenerent leurs gens liés & ioyeux. Mais moult estoit le meschief grant en la ville, de ce que pou auoient vitaille. Et le Duc de Lenclastre si fu moult traueillé, & ses gés aussi. Et estoit en vn temps d'iuier, que le temps estoit moult diuers. Et moult volentiers s'en feussent partiz, & le siege laissié, s'il ne fust ce qu'il auoit iuré, dont s'en repentoit, qu'il ne s'en partiroit pour estre mehaigné, iucques atant que son panon fust mis en hault sur les creneaulx de la cité. Et lors fu vn parlement entre les Engloiz & les Bretons. Et fu ordonné par Bertran, par le Capitaine, & les autres plus notables de la cité, que pour le serement que le Duc auoit fait, on le laisseroit entrer en ladite cité, lui dixiesme, armez, & mettre son panon sur la porte pour son dit serement accomplir: par ainsy que lui & ses gens leueroient le siege, & s'en yroient. Et lors fu crié solempnellement par ladite cité, que tous les bourgoys & habitans d'icelle, fussent lendemain prest &

obeissant pour receuoir le Duc de Lenclastre en-
 uiron l'aube apparissant, sur peine de perdre
 corps & auoir. Et que qui auroit pain, chair,
 poisson, ou autres viures quelconques, qu'il le
 meist sur l'estail à huis, ou à fenestre, à plaine rue.
 Et qui en receloit la valeur de six deniers, ou de
 plus, tout seroit forfait. Et seroient tenuz de ar-
 rester corps & biens les sergens. De ceste ordō-
 nance furent les aucuns liés, & les autres dolent.
 Car de telz y auoit, qui auoient plus viures que
 l'en ne pensoit. Et tel en fist le iour six denrées,
 qui autresfoiz en auoit vendu bien autant deux
 solz. Et moult en fu le commun reconforté de la
 planté des viures, dont assez y auoit pour gou-
 uerner la cité vn an tout entier, ou plus. Et auoiēt
 les Engloiz, & ceulx de dedés pris treues ense-
 mble iusques à trois iours. Mais le Duc trouua tã-
 dizen conseil, qu'il n'y mettroit ia le pié, s'il n'a-
 uoit la ville conquestée à sa volenté. Mais tou-
 tesfois, pour acquitter son seremēt, il vint à che-
 ual dedés Rénes, lui dixiesme de Cheualiers. A-
 dōc ceulx de la cité vindrent contre lui, & moult
 lui firent grant hōneur. Puis fu mené par la ville
 avec ses gens. Et Bertran aussi lui tenoit compa-
 gnie. Et quant le Duc aperceut les hostelz ain-
 si garnis de vitailles, il dist tout coyement à soy,
 que il tendroit le marchié, que il auoit promiz.
 Et quant il ot veu tant de chars salées & crues, &
 poissons salez, tant saurions comme autres, &

Engloiz & Bretons à eulx armer. Et le Duc de Lenclastre mesmes auança tant, comme il pot. Mais auant qu'il peust venir, Bertran bouta le feu ou befray, que on veoit flamber de toutes pars. Ainsi fule befray tout ars & despecié. Adonc vindrent les Engloiz rengiez & ordonnez, qui assaillirent, & enchassierent François, tant que reculer les en conuint. Et rentrerent dedens Rennes, & le Capitaine, & Bertran aussi, qui en emmenerent leurs gens liés & ioyeux. Mais moult estoit le meschief grant en la ville, de ce que pou auoient vitaille. Et le Duc de Lenclastre si fu moult traueillé, & ses gés aussi. Et estoit en vn temps d'iuier, que le temps estoit moult diuers. Et moult volentiers s'en feussent partiz, & le siege laissié, s'il ne fust ce qu'il auoit iuré, dont s'en repentoit, qu'il ne s'en partiroid pour estre mehaignié, iucques atant que son panon fust mis en hault sur les creneaulx de la cité. Et lors fu vn parlement entre les Engloiz & les Bretons. Et fu ordonné par Bertran, par le Capitaine, & les autres plus notables de la cité, que pour le serement que le Duc auoit fait, on le laisseroit entrer en ladite cité, lui dixiesme, armez, & mettre son panon sur la porte pour son dit serement accomplir: par ainsi que lui & ses gens leueroient le siege, & s'en yroient. Et lors fu crié solempnellement par ladite cité, que tous les bourgoys & habitans d'icelle, fussent lendemain prest &

obeissant pour receuoir le Duc de Lenclastre en-
 uiron l'aube apparissant, sur peine de perdre
 corps & auoir. Et que qui auroit pain, chair,
 poisson, ou autres viures quelconques, qu'il le
 meist sur l'estail à huis, ou à fenestre, à plaine rue.
 Et qui en receloit la valeur de six deniers, ou de
 plus, tout seroit forfait. Et seroient tenuz de ar-
 rester corps & biens les sergens. De ceste ordō-
 nance furent les aucuns liés, & les autres dolent.
 Car de telz y auoit, qui auoient plus viures que
 l'en ne pensoit. Et tel en fist le iour six denrées,
 qui autresfoiz en auoit vendu bien autant deux
 solz. Et moult en fu le commun reconforté de la
 planté des viures, dont assez y auoit pour gou-
 uerner la cité vn an tout entier, ou plus. Et auoiēt
 les Engloiz, & ceulx de dedés pris treues ense-
 mble iusques à trois iours. Mais le Duc trouua tã-
 dizen conseil, qu'il n'y mettroit ia le pié, s'il n'a-
 uoit la ville conquestée à sa volenté. Mais tou-
 tesfois, pour acquitter son seremēt, il vint à che-
 ual dedés Rénes, lui dixiesme de Cheualiers. A-
 dōc ceulx de la cité vindrent contre lui, & moult
 lui firent grant hōneur. Puis fu mené par la ville
 avec ses gens. Et Bertran aussi lui tenoit compa-
 gnie. Et quant le Duc aperceut les hostelz ainsi
 garnis de vitailles, il dist tout coyement à soy,
 que il tendroit le marchié, que il auoit promiz.
 Et quant il ot veu tant de chars salées & crues, &
 poissons salez, tant saurions comme autres, &

lars és bacons aussi, & puis en la boucherie char
de beuf, gras aigneaulx, & grans moutons, il dist
aux Cheualiers de la cité: Seigneurs, i'enuoyeray
querre mon panon. Lors respondi Bertran: Sire,
se vous estiez là dehors, i'amaïs ne rentrerez en
ceste cité, tant comme à menger y auroit. Car le
Duc CHARLES est arriuez à Iugon. Et croy que
vous venez sauoir nostre estat. Si ne say quel se-
rement vous pensez à tenir. Adonc le Duc en-
uoya en l'ost querre son panon d'Engleterre par
vn Herault. Et quant le Duc tint la banniere, il
monta sur la porte, & ilec l'atacha, present le
Capitaine, & plusieurs autres, qu'il mena avec
lui. Et Bertran du Guesclin apres ce lui presenta
le vin. Le Duc si but, & puis si demanda congié.
Et Bertran lui demanda: Sire, où sera la guerre?
Dites moy s'il vous plaist, & ne le me celez ia. Car
i'ay bien en pensé, que ie vous s'yeuray par tout,
où il aura guerre. Et quant le Duc l'oy, il com-
mença à rire, & dist à Bertran, qu'il le sauroit. A-
rant s'en parti le Duc, & si tost qu'il ot passée la
barriere, & les dix Cheualiers, qui avecques lui
estoient, ladite banniere d'Engleterre, qui sur
ladite porte estoit, fu gettée à terre à ses piez, &
fu tellement huez, que tout honteux en estoit.
Lors dist à ses gens, que maudite fust l'eure, que
ils estoit oncques à ce acordez. Mais non pour
quant il lui conuenoit ses loyaultez tenir. Puis
fist deslogier & trousser tantes, trefs, & paueil-

lons, & bouter le feu és logeys. Et pour le temps d'iuier se vint logier dedens Aurroy, qui bien estoit fermé. Et quant le temps fu passé, Charles de Blois vint à Rennes, & plusieurs Cheualiers en sa compaignie. Et quant il ot oy compter la verité des faiz de Bertran, il lui donna vn chastel moult bien fermé, que l'en apelle la ROCHE DERIEN, & de l'auoir assez. Et le retint avecques soy, & moult fu son priué. Et suruint en ce temps là en Bretaigne plusieurs grans guerres & mortalitez. Et moult y auoit d'aduersitez, pour la guerre, qui estoit entre ledit Monsieur Charles de Bloys & le Conte de Montfort. Ces deux Seigneurs tenoient plusieurs villes, chasteaulx, & citez. Mais pour ledit Conte secourir, le Roy d'Engleterre enuoya grant foison de gens. Entretandiz ceulx de Dinant firent sauoir au Duc Charles, cōme il enuoiait secours de soudoyers en leur ville. Car bien doubtoient estre assailliz. Et lors y enuoya Bertran à tout cinq cens ou six cents combatans. Mais tandiz comme ilz aloiēt, le Duc de Lenclastre, avecques lui le Conte de Mōtfort, le Conte de Pēnebroc, & plusieurs Engloiz & Bretons Bretonnans vindrent mettre le siege deuant Dinant. Mais ainçois furent dedens entrez ledit Bertran & Oliuier son frere, qui de nouuel s'estoit mis aux armes, & le Tort boiteux, & plusieurs autres Cheualiers hardiz & combatans, qui puis firent aux Engloiz mains ennuys.

Du siege que le Duc de Lenclastre mist deuant la cité de Dinant, durant lequel, en sa presence, & en ladite ville de Dinant, où il vint par sauf-conduit, Bertran du Guesclin combati & oultra en gage de bataille Thomas de Cantorbie Cheualier Engloiz.

CHAPITRE VII.

QVANT ceulx de Dinant se virent asseigiez des Engloiz, lesquels gardoient le pas à Brest, & à Bahon: & quant les gens Monsieur CHARLES DE BLOIS, qui dedens Dinant estoient, apparceurent ce, ilz enuoyerent deuers le Duc de Lenclastre, à ce qu'il leur voulzist dōner terme de cy à quinze iours. Lequel temps durant ilz enuoyerent deuers Monsieur Charles de Blois pour auoir secours. Et se dedens ilz ne l'auoient, ilz se rendroient au Duc de Lenclastre, & au Conte de Montfort: lesquels s'y accorderent. Et fist-on crier les treues d'une part & d'autre. Et auint à vn certain iour, tandiz comme ces treues duroient, que Oliuier du Guesclin frere Bertran yssy hors de Dinant tout seul, à cheual, moult richement monté, ainsi comme vn ieune homme feroit, & comme celui qui cuideroit bien estre asseuré. Mais ledit Oliuier fu rencontré sur les champs d'un Cheualier Engloiz, que on appelloit Thomas de Cantorbie, lequel estoit

estoit frere de l'Archeuesque. Lequel Cheualier estoit moult orgueilleux, & moult desmesuré. Et s'en vint à Oliuier moult fierement, & le prist par le giron; & puis lui demanda moult orgueilleusement, qui il estoit, qui ainsi aloit. Et Oliuier lui dist, que on l'apelloit Oliuier du Guesclin, quant sauoir le vouloit, & frere de Bertran: mais il estoit le mainfne. Lors dist le faulx Engloiz: Par saint Thomas vous ne m'eschapperez, vous estes mon prisonnier, vous en vendrez auecques moy. Et se vous ne vous rendez, tantost ie vous tondray la teste, & morrez tout maintenant en despit de Bertran. Ne ia pour son nom n'en ferez deportez, pour tant qu'il a tousiours greuez noz bons amis. Le deable out tant fait, qu'il est monté si haut. On parle plus de lui & de ses faiz, que on ne fait de tous ceulx de ce pais. Sire, dist Oliuier, vous auez grant tort. C'est vn poure Cheualier, & pourement herité. Et se il s'est auancié pour auoir richesse, & estre honnorez, vous ne l'en deuez blasmer. Dont dist l'Engloiz, que ia respit n'y auroit. Et vint à l'espée traite. Et quant Oliuier le vit, si li mua le sac. Et ne fu pas de merueille. Car il estoit desarmé, & tout seul. Et l'autre si estoit bien armé, & si auoit quatre Escuyers auecques lui. Lors dist: Ie me rens, puis que vous le voulez. Mais croy que vous me rendrez, & si n'aurez du mien qui vaille deux. Certes, dist l'Engloiz, ainçois me rendrez

„ mil florins, ou vous ne partirez iamais. Ce n'est
 „ pas grant finance. Car Bertran en a assez. Ainsi le
 Cheualier Engloiz emmena Oliuier prisonnier
 en sa tente, où ses compaignons estoient. Et là fu
 apperceu d'un Escuyer Breton, qui bien le re-
 -cognut, lequel s'en ala tantost à Dinant deuers
 Bertran, qu'il trouua ou marchié, où il regar-
 doit le ieu de la paulme. Lors lui dist en bas tout
 coyement, qu'il venoit tout droit de l'ost, où il
 auoit veu Oliuier son frere, que un Cheualier
 Engloiz menoit en sa prison. Et quant Bertran
 l'oy, il teint comme un charbon, & deuint bien
 esbahy. Puis demanda à l'Escuier, se il bien l'a-
 uoit auisé. Et il dist, que oyl bien par Dieu, & que
 de pieça le cognoissoit. Car il auoit seruy leur
 pere & seruoit, quant il lui donna armes, pour a-
 ler deuers Bertran. Et lors lui demanda, se il sa-
 uoit point le nom du Cheualier, qui son frere
 tenoit en prison. Et il dist, que il l'auoit oy nom-
 mer Thomas de Cantorbie, & frere estoit de
 l'Archeuesque. Dont dist Bertran, que par saint
 Yues il lui rendroit, ne oncques si mauuais pri-
 sonnier n'auoit pris. Adonc monta sur son che-
 ual, passa la porte, & s'en vint à force d'esperon
 iusques aux tantes. Il est entré en l'ost, & chacun,
 qui le cognut, le festoya moult. Et demanda la
 tante au Duc, & on lui enseigna. Adonc est venu
 deuant le Duc, qui iouoit aux eschez à Jehan de
 Chandoz. Si y fu le Conte de Montfort, Robert

Canole, le Conte de Pennebroc, & plusieurs autres Cheualiers & Seigneurs, lesquelz Bertran salua moult honnourablement. Et s'agenoilla deuant le Duc. Et le Duc lui dist, que bien fust-il venu. Et tâtost laissa le ieu, & le prist par la main, & le releua. Et Iehan de Chandoz lui dist doucement: Bertran, bien soyez venu, vous buuerez de mon vin, ainçois que vous retournez. Et Bertran lui respondi, que ia n'en buuroit iucques à tant que on lui eust fait droit. Et Chandoz lui dist, que s'il y auoit Cheualier en l'ost, qui tort leur eust fait, qu'il leur fist apparoir, & tantost lui feroit amender. Et Bertran respondi..... Oyl, vous auez vn Cheualier que ie n'aime point, que l'en appelle Thomas de Cantorbie. Car sans raison il m'a courroucié. Vous sauez, que de vostre acort, & du nostre, nous auons treues iusques à certain iour. C'est voir, dist le Cheualier. Aussi les tendrons nous, ne vous en doubtez pas. Seigneurs, ce dy Bertran, vous dites moult bien. Mais le Cheualier, dont i'ay parlé deuant, a trouué vn mien frere, qui n'est encore que enfant, lequel estoit yssus de Dinant aux champs pour soy aller esbatre. Si l'a pris, & mis en sa prison, ainsi comme vn mescheât. Si vous requier, Messieurs, pour loyaulté, que vous me fassiez deliurer mon frere Oliuier. Car, beaus Seigneurs, ie feroye pour vous plus que tant. Dont lui dist Iehan de Chandoz, que plus n'en parlast, & incontinent

lui feroit deliuré, & amendé à sa volenté. Et Bertran leur dist, que grans merciz. Dont firent apporter le vin, & burent. Et à Bertran firent donner à boire. Puis manderent le Cheualier, qui Oliuier tenoit: lequel y vint, & ne l'osa refuser.

» Et le Duc lui dist: Vecy Bertran, qui vous vueil
» accuser, que vous auez emprisonné son frere
» germain aujourd'hui, & comme vostre prison-
» nier le voulez raençonner. Ce n'est mie bien fait.
» Car s'il le puet prouuer, vous le deliurerez, & si
» l'amenderez. Et le Cheualier, qui fu fel & orgueilleux, dist au noble Duc, quant il oy ainsi
» parler: Sire, vecy Bertran. Mais s'il vueil sur moy
» adeuiner, & que i'aye fait chose qui à blasmer
» fasse, & que bon Cheualier ne puisse faire de
» droit, vecy mon gage près de le combatre ou
» champ de bataille, corps à corps, per à per. Et
quant Bertran oy ce dire, sans vn seul mot sonner, il ala happer le gaige, & puis le prist par la
» main, en disant: Faulx Cheualier, traître, & tel
» vous prouueray-ie deuant tous les Seigneurs,
» ou ie mourray à honte. Et dist le Cheualier; Je
» ne vous en fauldray ia, ne iamaiz ne dormiray en
» lit, iucques à tant que combatu vous aye. Et Bertran respondy, que iamaiz ne mengeroit que trois soppes en vin ou nom de la Trinité, iucques à tant que le gaige fust fait. Et lors Iehan de Chandoz lui dist, que volentiers le feroit armer, & lui presteroit le meilleur cheual qu'il eust. Car volentiers veist le champ d'eulx deux.

Ceste nouuelle fu en la cité sceüe. Et quant le Capitaine, Cheualiers, & autres gens d'armes le sceurent, les bourgeois aussi moult en furēt troublez & courrouciez. Là auoit vne Dame nommée Tiphaine, extraicte de noble lignée, laquelle auoit enuiron vingt quatre ans, ne oncques n'auoit esté mariée, & estoit bonne, sage, & bien doctrinée, & moult experte ésars d'Astronomie. Aucuns disoient, que elle estoit faée. Mais non estoit, ains estoit ainsi inspirée de la grace de Dieu.

CESTE Dame, qui née estoit de Dinant, & qui aussi y demouroit, quant elle oy, que tant le peuple auoit doubté du champ, que Bertran deuoit faire: elle leur dist, en hault, que nulz ne s'esmayast, & qu'ilz le receuroient sain & sauf dedens Soleil couchant, & si desconfiroit ou champ son ennemy. Et s'en ne le veoit ainsi auenir, elle vouloit perdre quanque elle auoit vaillant. Adonc la nouuelle ala en la ville, dont les* orent moult grant ioye. Lors vn Escuyer Breton monta à cheual, & s'en ala brochant de l'esperō, tant comme il pot, à Bertran, qui estoit en l'ost des Engloiz, comme dit est. Et quant il vint à lui, il l'enclina, & lui dist qu'il vouloit parler à lui. Et Bertran lui demanda, qu'il vouloit, & que tantost deist sans decryer. Et lors l'Escuier, qui preux & hardiz estoit, dist que vne Dame à moult hault pris, laquelle estoit nommée Tiphaine,

auoit dit à Dinant à tous, que pour certain il vainqueroit son ennemy. Et pour ce, se combattist hardiement. Dont respondi Bertran; Vaa, fol est, & bien chetif, qui se fie en femme; il n'est pas moult soubtil. Car il n'a en lui de sens neant plus que en vne berbiz. Et ne s'en fist que riser. Atant vint à lui vn message de par le Tort boireux, & de par les bourgoiz de Dinant. Et dist en hault à Bertran: Sire, le Capitaine, & les autres bourgoiz de la cité m'enuoyent deuers vous, & vostre ante aussi, lesquelz vous prient, & conseillent, que ou marchié dedens la cité de Dinant vous venez vostre bataille faire contre vostre aduersaire, se le Duc de Lenclastre le veult. Regardez, il y pourra bien venir, & avecques lui vingt ou trente des siens, & on lui donra hostages souffisans, sans aucun mal penser, & retourner par deça. Mais à ceulx de Dinant desplaist, que tant vous voulez fier aux Engloiz, comme de vous auenturer tellement entre eulx. Par ma foy, dist Bertran, ie ne me doy pas doubter. Car le Duc de Lenclastre est tant gentil, qu'il ne daigneroit penser traison. Maiz non pour quant ie yray ceste chose recorder. Adonc s'en vint au Duc, & lui dist: Sire, vous auez oy cōpter à cest Escuyer-cy ce que ceulx de Dinant me mandēt, lesquelz ie ne vueil pas courroucier ne troubler. Car mes amis y sont. Et non pour quant i'ay grant desir de faire le champ. Si regardez com-

me vous en voulez ouurer & ordonner. Adonc dist le Duc, que par Dieu il seroit fait ou marchié de Dinant. Car se aucuns de ses hommes vouloient greuer Bertran, aucuns pourroient dire pour lui deshonnorer, qu'il en seroit consentant, pour braiser trayson. Et c'est vne renommee, que tout preudomme doit doubter. De ce furent d'acort touz les Barons Engloiz, & manderent à ceulx de Dinant, que ostages souffesans leur enuoyassent, & ilz entreroient dedens Dinant pourveoir le champ acheuer. Lesquelz leur enuoierent bons ostages. Et adonc le Duc de Lenclastre entra en ladite cité, avec lui vingtiesme, sans plus. Mais que il mena avecques lui Bertran, & le Cheualier Engloiz. Lequel Duc & les dessusdz furent bien festoiez & moult honnorablement receuz. Et s'arrestèrent ou marchié de Dinant. Et adonc les Engloiz se rengierent moult gentement. Lors y out vn parlemēt pour faire la paix, & le champ delaissier. Mais Bertran en iura Dieu, que iamaiz en son viuant n'en feroit paix, si seroit li vns d'eulx recreant. Adonc dist le Duc de Lenclastre, que plus on n'en parlait, mais tous priaissent pour le droit. Dont se fist Bertran armer moult noblement de bonnes plates & greues, & ot l'espée & le coustel & lance pour iouster, & riche bacinet & gans à broiches de fer, qui bié faisoient à doubter. Puis lui fist-on son cheual amener en la place, sur lequel il mō-

ta & s'aficha aux estriefs. Puis prist le glaiue en sa
 main, & moult se fist regarder. Car il estoit
 moult bié appareillié pour acheuer son champ.
 Pour le quel veoir, tous les Barons d'un costé &
 d'autre se mistrent lors en ordonnance. Et le
 Tort boiteux fist moult bien garder ledit cháp,
 & crier que aucun ne se messast de l'un ne de l'autre
 aidier, ne greuer; ne qui à l'Engloiz messist
 pour son pris aualer, en poync de perdre la teste.
 Dont n'y ot si hardi, qui s'en ofast messer. Mais
 le Cheualier Engloiz alors se doubta moult, &
 espouenta en son cuer. Car au besoing cuidoît
 trouuer de ses amis. Et bien se voulzist acorder à
 Bertran, & lui rendre son frere Oliuier. Lors lui
 en fist parler, sans ce que l'en monstraist, que ilz
 venissent en son nom, par Robert Canole &
 Thomas de Grançon, lesquelz s'en vindrent à
 Bertran, & lui dist ledit Robert moult doubce-
 „ ment: Sire Bertran, les gens de nostre costé, tant
 „ Cheualiers, comme Barons, ont regardé au fait.
 „ Si ne voudrions pas, que mal vous venist de par
 „ nous en aucune maniere. Et combien que vous
 „ soiez en vostre possession, & entre vos amis. Ou
 „ se vous estiez vaincu de nostre champion, on
 „ pourroit dire en tous pais estranges, que le cháp
 „ ne seroit pas fait par iuste partie. Car vous estes
 „ trop ieune pour championner, & mieulx vaul-
 „ droit bonne paix, que mauuaise tençon. Et se
 „ vous nous voulez croyse, nous apaiserons ceste
 „ discen-

disension, & ferons quitter la rençon de vostre "
 frere. Comment? ce dist Bertran, il ne doit riés. "
 Et il m'est auis que c'est conscience, & bien rai- "
 son, que se vns est à tort en prison mis, qu'il en "
 doibt estre purement deliuré. Et d'autre part, "
 vecy le noble Duc de Lenclastre, & Iehan de "
 Chandoz, où tant a honnour, & le Conte de "
 Pennebroc, & les autres Barons, tant de vostre "
 costé comme du nostre, qui ne lairront auoir à "
 mon aduersaire ne à moy nulle villenie. Mais "
 qui nous lairra faire le champ, que empris auõs, "
 ie iure à Dieu tout puissant, que le faux Cheua- "
 lier, qui m'a fait villenie, n'eschappera iamais "
 iucques à tant que son tort lui aye monsté. Ou "
 ie le destruyray, ou ie rendray la vie, ce voyant "
 la Baronnie, s'il ne me rent s'espée tenāt la poin- "
 te en sa main, en disant, qu'il se rent à mon com- "
 mandement. Lors dist Robert Canole, que ce "
 ne seroit-il pas. Dont dist Bertran, qu'il feroit "
 grant folie. Car on doibt plus doubter la mort, "
 que villenie. Quant les Engloiz oirent sa res- "
 ponce, moult en furent courrouciez. Et bien di- "
 soient li vn à l'autre, que c'estoit vn droit Ro- "
 lant. Dont s'en alerent à l'autre Cheualier cham- "
 pion ne scay quans Cheualiers Engloiz, qui lui "
 dirent, qu'il pensast de sauuer sa vie: & que en "
 Bertran ne pourroient trouuer acort, respit, ne "
 plaissant parole, mais conuient que le champ soit "
 parfait. Lors dist le Cheualier: Or m'en vueille "

„ Dieu aidier. Je ne vy oncques mais homme si en
„ grant * de faire bataille. Mais se ie puis, il s'en re-
„ pentira. Maiz toutesfoiz ie vous prie, que se vous
„ veez, que i'en soie au deseure, que vous ne le cō-
„ trediez, parquoy ie ne le puisse tuer. Car mon
„ cuer le desire. Et se ie en suys au pys, si me vueil-
„ lez secourre, & sauoir à lui, se il se voudroit ac-
„ corder à la paix faire. Et ilz ont respondu: Ne
„ vous en doubtez. Mais se le champ fust fait là
„ hors, nous vous puissions mieulx aidier, se il en
„ fust besoing. Apres ce parlement, chacun se de-
partit, & ala en sa place. Et les deux champions
s'entreregarderēt, & vindrent l'un contre l'autre
les glayues en leurs poins, comme fiers ennemiz.
Puis vindrent courre leurs cheuaulx, & eulx en-
treferir sur les escuz, tant que iceulx glaiues rō-
pirent, & les fers en volerent. Mais l'un ne l'au-
tre ne chey ne trespucha. Puis tray à son retour
chacun son espée, & se sont rassemblé & entre-
feri de taille & d'estoq moult fierement. Et tant
de gens y auoit entour eulx pour les regarder,
que tous estoient enclos deuāt & derriere. Maiz
ilz auoient place assez, qui par auant leur auoit
esté ordonnée. Adonc s'en vint Bertran esco-
quier l'Engloiz de son espy ou haubert moult
fort en boutant, & puis ou bacinet, & l'Engloiz
aussi lui. Puis s'entracolerēt par le haterel à tout
leurs broiches de fer. Et fust-on bien allé vne
lieüe de terre, ainçois que de leur corps yssy

point de sanc; & fort s'esperouuoiet aux espées. Tāt que l'Engloiz, qui mout fort estoit en bou-
tant, laissa cheoir son espée. Et quant Bertran le
vit, qui moult ioyeulx en fu, il poigny son che-
ual, & fist semblant qu'il voulziit fouyr. Maistā-
toſt qu'il fu vn poy eſlongné, il miſt pié à terre,
vint à l'eſpoy, & le releua. Puis le getta en l'air
hors du champ, ſur la tourbe des gens. Dont le
Cheualier fu dolent & irié. Mais fort ſe deffen-
di de ſon couſtel de plates. Mais Bertran lui eſ-
cria: Faulx traiētre, defendez voſtre cheual, ou
tout en l'eure ſera vendu & tué: & puis vous oc-
ciray. Car telle eſt ma voulenté. Mais l'Engloiz
le fuyoit, & aloit autour du champ, ſans arreſter.
Et Bertran ne pouuoit courir, pour ce qu'il a-
uoit les genoulx armez. Adonc s'aſſiſt à terre, &
ſe deſattacha & deſarma la iambe, pour auoir le
genoyl à deliure, & eſtre plus legier. Et l'Engloiz
cheuaucha deuers lui, apreſté de combattre. Et ſe
il peult, il euſt fait paſſer ſon cheual par deſſus
lui. Mais Bertran fery le cheual de ſon eſpoy par-
my les coſtes. Et quāt ledit cheual ſe ſenty feru,
il regimba ſi fort, & tellement ſe demena, que le
Cheualier, qui ſus eſtoit, treſbucha à terre. Et a-
tant Bertran ſailly ſur lui, & lui deſboucla le ba-
cinet. Puis lui donna de ſon eſpoy ſur le nez: &
apres des broches du gantelet, tant que le sanc
lui couroit ſur le haterel. Et tant fu auuglez de
ſanc, que ainſi lui ſilloit, qu'il ne ſot où il fu, ne

point ne veoit Bertran, mais bien le sentoit. Dõt se leua en estant. Et lors vindrent dix Cheualiers Engloiz, qui dirent à Bertran, qu'il ne se meust, & que assez en auoit fait. Et il leur respondi, que pour eulx il n'en feroit riens; se son Capitaine nommé Tort boiteux ne lui prioit, ou commãdoit, qu'il se cessast: mais occiroit l'Engloiz fust bon gré, ou malgré. Atant vint le Tort boiteux, qui entra ou cham, & dist à Bertran, qu'il en auoit fait assez: & que se iamais paix ou acort n'en estoit fait, que ce seroit à son hõneur. Voire par Dieu, dist le Duc de Lenclastre, ce sera grant dommage, se Bertran meurt ainçois qu'il soit Roy d'aucune Royauté. Car oncques Alexandre, qui tant fu renommé, ne fu aussi hardi. Haa! Seigneurs, dist Bertrã, ne me raualez point pour Dieu, mais laissez moy partuer ce traictre parjure. Car ce sera grant perte, se vous m'en destournez. Adonc entrerent ou champ Engloiz, & ceulx de Dinant, qui se mirent entredeux, pour faire laisser le champ. Mais Bertran leur dist: Seigneurs, laissez moy ma bataille acheuer. Car par la foy que ie doy à Dieu, ou il se rãdra à moy comme mon prisonnier, ainsi comme il a fait faire mon frere, ou ie le tueray tout mort. Dont dist Canole: Bertrã, ie vous requier, que vous baillez vostre champion au Duc. Car vous en auez assez fait, & est en vostre dangier. Et vecy le Tort boiteux vostre Capitaine, à qui

vous ceulx de Dinant doiuent par droit obeir; “
 qui vous vient prier, cōme vous vous en vueillez “
 deporter. Dōt dist Bertrā; Quāt ie l'orray parler, “
 ie lui respondray du faire, ou du laissier. Adonc “
 dist le Tort boiteux. Ie vous prie & requier, “
 que au gré de Robert Canole vous vueillez faire “
 paix, & nous vous garderons vostre droit. Adōc “
 dist Bertran: Ie l'octroy à vostre desir. Dont fist- “
 on l'Engloiz moult bien appareillier. Et de Ber- “
 tran furent moult ioyculx dedens Dinant, & fi- “
 rent faire le soupper pour lui festoyer. Là vint “
 son ante, qui l'acola, & lui dist, que moult l'auoit “
 Dieux chier.

A DONC s'en ala Bertran ou Palais, & en la “
 presence des Cheualiers, Escuiers, & bourgoiz. “
 Et s'agenoilla deuant le Duc, & lui dist: Sire ne “
 vous vueillez pas merryr, se i'ay fait mon deuoir “
 contre vostre Cheualier. Car il m'auoit fait def- “
 raison. Et se pour l'onneur de vostre hault nom “
 ne fust, iamais à sa sauueté ne me fust eschappez, “
 que ie ne l'eusse occis. Bertran, ce dist le Duc, à ce “
 que on puet veoir, aussi grant honneur y auez “
 vouseuë, comme se vous l'eussiez occis. Car il a- “
 uoit grandement mespris. Si r'aurez vostre frere “
 Oliuier. Et pour ce qu'il vouloit auoir mil flou- “
 rins de rençon, il paiera à vostre frere mil liures, “
 que ie lui donne en pur don; pour ce que par “
 trayson lui vouloit faire ennuy. Et aussi ie vous “
 donne son cheual, & toutes ses armeures; ne ia-

„ mais en ma court ne mettra le pié. Car ie n'ay cu-
„ re de gens, qui fassent trayson, ne point ne l'a-
„ uôs accoustumé en nostre pais. Mais le iardin est
„ bel & noble, où ourtye ne puet venir en sa faisõ.

Ainsi iugea le Duc de Lenclastre. Puis fist deli-
urer, & mener deuant lui Oliuier du Guesclin, &
lui fist amender le tort fait plainement, ainsi cõ-
me iugié & ordonné l'auoit. Dont s'en rentra en
son tref, & sa gent avecques lui; & renuoya à Di-
nant ses ostages, ainsi comme il auoit promis. Et
Bertran fu moult festoyez au soupper, Et là fu le
Capitaine, qui moult noblement l'auoit fait ap-
prester: & les bourgeois & bourgoises de la ville
aussi. Et apres sopper, chanterent, & danserent
moult noblement. & grant fu l'esbatement. Et
en ce temps estoit le Roy Iehan filz du Roy
Philippe en Engleterre. Et fist EDVART vne
armée en icelui temps, pour venir en France. Et
vint iusques deuant Rains. Et pour ce manda ses
gens, qui estoient lors en Bretagne, lesquelz en-
trerent en mer à Brest de lés Buhon. Et pour ce-
ste cause fu leué le siege de Dinant. Et lors fu vn
Parlement d'Euesques & d'Abbez pour faire &
ordener vn traictié. Parquoy certain acort fu
fait entre les gens du Duc Charles & le Conte de
Montfort. Et lors les Engloiz partirent de Bre-
tagne, & s'en retournerent en Engleterre, où ilz
trouuerent le nauire de leur Roy tout prest, qui
ledit passage vouloit faire en France. Ouquel vo-

yage faissant, par droit miracle de Dieu, & pour la punition diuine, vne tempeste & vn orage vint descendre sur l'ost des Engloiz. Et cheoient les pierres si dures & si pesans, que plusieurs en estoient naurez, & tous senglans. Et se mussoient & quatissoient, & disoient entr'eulx, que c'estoit aucun signe & demonstrence, que Dieu leur faisoit. Et en icelle saison, le Roy Edouart passa la mer, & s'en retourna en Engleterre, où estoit ce tres-excellent Prince le bon Roy Iehan filz du bon Roy Philippe de France, qui tant furent hardiz & cheualereux. Et tant amerent leurs subgiez, que pour la deffence du peuple voudrent auenturer leur corps en batailles mortelles contre les Engloiz ennemis du Royaume. Le Duc Charles de Blois out moult à faire, & plus encores eust, se ne fust Bertran, & les bons Cheualiers, qui lui aidoint. Et pour certain le Roy Engloiz perdy plus en ce voyage, qu'il n'y gaaigna. Et durant icellui, ainsi comme il plut à Dieu, que vne maladie du ventre vint au Duc de Lenclastre, pour quoy, tant pour icelle occupation, comme pour autres, & par especial que lui & ses gens auoiēt esté tous affamez en la cheuauchée, que faite auoient en l'iuier precedant, parmy le Royaume de France, s'en retourna en Engleterre. Et en icellui temps gouernoit Bertran la guerre en Bretaigne pour ledit Charles de Blois, qui lors n'estoit pas si puissant de gens, comme le Conte de Montfort.

Du siege que le Conte de Montfort mist deuant le chastel de Becherel, qui par traictié fu delaisié: & comme ledit Bertran s'eschappa de la prison, où icellui Conte l'auoit fait tenir sans cause. Et tantost fu faict Capitaine de Guingant, & acquist trois chasteaux que les Engloiz tenoient ou país de Bretaine.

CHAPITRE VIII.

AINSI se departirent les Engloiz auecques le Duc de Lenclastre, de la Duchie de Bretaine, où moult auoit grant guerre entre Monsieur Iehan de Montfort, qui lors tenoit plusieurs chasteaux, & Monsieur Charles de Blois; qui ne peust soustenir guerre encontre lui, si ne fust BERTRAN DV GUESCLIN, qui prist ou dit país de Bretaine plusieurs chasteaulx fors & grans. Si auint, que ledit de Montfort auoit en son obeissance de par vn vaillant Cheualier, nommé Rogier Dauy, lequel auoit espousée la mere au Viconte de Rohan, vn grant chastel & fort nommé Poscyen, & celui de Turquot lés Iugāt, & plusieurs autres: chalongoyt Becherel, qui est chastel fort & grant, de vielle antiquité. Si vint deuant icellui de Montfort auec grant assemblée. Et y estoit le Latmer d'Engleterre, qui auoit planté d'Archiers, Iehan de Chandoz aussi, qui estoit Lieutenant du Roy Engloiz, Robert Canole;

nole, Harpedayne, & Gautier Huet, qui tous y estoient venuz de par ledit Roy, avecques grant foyson de gens d'armes, qu'ilz auoient amenez de leur dit pais d'Engleterre, pour aidier audit de Montfort. Lequel aussi auoit avecques soy du pais de Bretagne Messire Iehan de Beaumanoir, & plusieurs autres Barons. Lesquelz Cheualiers vindrent aux barrieres dudit chastel, & pour traictier, & parler au Capitaine de leenz. Et moult fort lui prioit Messire Iehan de Montfort, comme le chastel & la terre deuoient estre à lui de droit. Mais le Capitaine Chastelain dist, qu'il n'en sauoit riens. Et toutesfois, pour ce qu'il se doubtoit dudit de Montfort, il respondi en conclusion, qu'ilz enuoieroient deuers le Duc Charles son Seigneur *. Et ou cas qu'il ne l'aroit bon & brief, il rendroit & deliureroit ledit chastel. Mais pour ce ne s'en remua dudit siege l'ost dudit Conte: ainçois attendoit la response d'icellui Duc. Auquel icellui Capitaine escriui par certain message le fait & appointment dessusdit. Et quant il sceut la teneur des lettres, il fu moult doulent. Car il vit bien, que s'il perdoit Becherel qu'il pourroit tout perdre. Si iura Dieu, en qu'il creoit, que se il deuoit mourir, si l'irayt-il secourre. Adonc manda ses Cheualiers & Escuiers, & autres soubdoyers. Si vindrent à lui le Seigneur de Lual, le Viconte de Rohan, Bertran du Guesclin, & Oliuier de Mauny, avec

plusieurs Archiers & Arbalestriers, lesquelz le-
dit Monsieur Charles vouloit mener à Becherel
pour leuer le siege. Et tant les mena, que il n'a-
uoit que vne eauë à trespasser, qu'il ne peust as-
sembler en bataille avec ses ennemiz. Sur la ri-
uiere aloient plusieurs de ses gens palater, pour
eulx esbatre. Et là vint vn Euesque pour faire
paix, & mettre à amour les deux parties aduerses.
lequel aloit souuent de l'vn à l'autre. Et pour son
beau parler fist tant par deuers les deux Sei-
gneurs, que ilz furent d'accort, sans faire batail-
le, parmy ce que chacun d'eulx, qui disoit auoir
le droit, cause, & propriété de la Duchie de Bre-
taine, porteroit nom de Duc: & auroit chacun
d'eulx tant de citez, villes, chasteaulx, & terres,
qu'il pourroit bien porter le nom. Pour lequel
acort mieulx tenir, & estre plus ferme, furent li-
urez hostages de l'vne & de l'autre partie. Et fu-
rent baillez pour le Duc Charles, Bertran du
Guesclin, & trois autres Cheualiers: & pour
Messire Iehan de Montfort plusieurs Engloiz y
furent liurez. Et y ot certain iour nommé, pour
accomplir ce que dit est. Et durant icelui temps,
on deuoit nombrer & apprecier par iuste pris
ou estimation les citez, villes, chasteaulx, forte-
resses, & autres dessusdites. Mais ladite ordon-
nance ne fu en riens tenue. Et quant la iournée,
qui mise estoit, fu faillie, & aux Engloiz l'en ot
deliuré & rendu leurs ostages, Bertran du Gues-

clin, qui auoit esté baillé en ostage pour le Duc Charles, comme dit est, demoura tout seul en prison. Et le gardoit vn Cheualier Engloiz nommé Guillaume de Feleton, lequel estoit moult amy du Conte de Montfort, qui aussi le lui auoit baillé en garde: pour ce que trop hayoit Bertra, autant comme il lui auoit esté nuyfant, & aydât au Duc Charles. Mais toutesfoiz Bertran ne tenoit pas prison, mais aloit esbatre où il lui plaisoit. Et toutesfoiz lui ennuyoit de ce que armer ne se pouoit. Vn iour dist audit Guillaume de Feleton: Sire, ne me le celez pas, dites moy, dites à quoy il tient que ie suis si longuement par deçà. Vous sauez que le iour est passé, qui fu mis de la paix accorder, laquelle ne se tendra ia si comme ie croy. Je vous prie pour Dieu, que vous vueillez faire sauoir au Conte de Montfort, comment ie puisse estre deliuré: & se il me veult rançonner, ou comment. Car il me ennuye trop. Et se il veult de mon argent, il en aura volentiers. Mais toutesfoiz ie ne doy, moienant qu'il me vouldra faire raison. Et se on en prent rançon, par Dieu, qui tout crea, ou l'un, ou l'autre le me rédra: ou ie auray tel chastel, qu'il me souffra bien. Bertran, ce dist Guillaume, ne menacez point. Car vous pourriez dire tel chose, que vostre fait empireroit. Sire, dist-il à Guillaume, non fera, se Dieu plaist. Car le Conte de Montfort, qui me bailla à vous, est si loyal, ce croy-ie,

» qu'il me fera droit. Et Guillaume dist, qu'il mes-
mes yroit, & s'en payneroit de son pouoir pour
l'amour de Bertran, & partiroit le plus tost qu'il
pourroit. Puis demoura vn mois sans partir. Et
apres ce, ledit Guillaume s'en ala deuers le Con-
te de Montfort, qui moult doubtoit Bertran.
Lequel Conte dist audit Guillaume en conseil,
que Bertran n'en partiroit ia, mais l'enuoyeroit
en Engleterre, où il auroit en conuenant, que
contre lui iamais à nul iour ne s'armeroit. Dont
retourna ledit Guillaume, qui à Bertran compta
ces parolles. Dont forment s'en ennuya, & moult
en fu doulent. Et derechef lui dist, que sans cau-
se estoit detenu prisonnier pour ladite plegerie.
Car en soy n'auoit pastenu, que l'acort n'eust e-
sté fait. Et d'autre part to⁹ les pleiges dudit Côte
lui auoient esté deliurez. Parquoy il monstroit
clerement son droit, & le tort que on lui faisoit.
» Et Guillaume dist, que c'estoit verité: mais amē-
» der ne le puis, dont il me poise. Si conuient at-
» tendre, & ie croy que vous aurez bonnes nou-
» uelles bien prouchainement. Voire, ce dist Ber-
» tran, s'il plaist à Dieu. Mais à celui qui attend en-
» nuye aucunes foiz. Et quant Bertrá vit, que pour
beau parler il n'en pourroit yssir, ne venir au
bout, il se aduifa cōme malgré eulx il s'en pour-
roit yssir, vouleissent ou non. Dont appella vn
sien Escuier, qu'il moult amoit. Et lui comman-
da, que les deux meilleurs cheuaux, & mieulx en-

fellez, dont il pourroit finer, il lui fist amener à
 certaine place qu'il lui ordonna. Dont appelle
 Bertran vn ieune enfant tout bassement, qui e-
 stoit filz Guillaume Felleton: Alons, dist-il, vn
 pou esbatre aux champs là dehors. Car i'en dis-
 neray mieulx. Et l'enfant en fu d'acort. Adonc
 se party Bertran du chastel, où il estoit, avecques
 lui icelui enfant, & sondit Escuier: & n'estoient
 que eulx trois. Et fu ou mois d'Auril, que les o-
 seillons chantent. Et tant diuisa Bertran, qu'il
 vint à ses cheuaux. Et cil qui amené les eut, lui sot
 bien enseigner. Et Bertran monta à cheual, &
 puis dist audit enfant: Beau filz pensez de repai-
 rier, & me saluez vostre pere. Et lui dites que ie
 m'en vais en France aidier au Duc de Normen-
 die à guerrier. Si pourroye bien oblier mon me-
 stier. Et quant l'enfant l'oy, il commença à plou-
 rer, & dist qu'il seroit tenciez. Et Bertran lui dist,
 qu'il ne s'esmayrast, & que se son pere lui faisoit
 ennui ne destourbier, qu'il reuenist tantost vers
 lui, & il lui donroit assez à boyre & à mengier,
 & chasteaulx & armeures: & que ia ne lui faul-
 droit tant comme il eust denier. Puis dist à son
 Escuier, qu'il cheuauchast fort. Car il se vouloit
 aler herbergier à Guinguant. Et tant cheuaucha,
 qu'il vint en icelle ville, & moult il fu festoiez des
 bourgeois. Et lui dirent que bien fust-il venuz.
 Car de lui auoient bien besoing. Car entour eulx
 auoient plusieurs chasteaulx garniz d'Engloiz,

qui souuent courtoient iusques à leurs barrières,
& ne leur laissoient aub maille grosse ne menue,
que ilz n'emmenassent. Et par especial le chastel
de Pescyen leur faisoit le pis. Et quant Bertran
l'entendi, si en fu moult doulent. Mais pourtant
n'auoit-il illec talent de sejourner: mais s'en vou-
loit aler tout droit à Paris aidier à mondit Sei-
gneur le Duc de Normendie, qui aux Engloiz &
Nauarois auoit grant guerre. Et se monta & ar-
ma Bertran moult bien à Guingant, & à Dinant
fist venir son auoir. Mais aussi tost comme Ber-
tran monta sur son cheual, & la gent qu'il cuida
emmener avecques lui, on lui ferma la porte de
la ville, & leua l'en le pont. Dont tout le sanc lui
„ mua, & leur dist: Seigneurs, pour Dieu que vous
„ ay- ie fait? Se aucun se plaint pour vn denier, ie
„ lui en paieray deux. Maudit soit- il, à qui ie doy
„ riens, se il tantost ne le demande. Et cilz ont res-
„ pondu: A ce ne tient pas. S'il vous faut de l'ar-
„ gent, nous vous en baillerons assez. Car nous en
„ auons à vostre commandement la valeur de soi-
„ xante mil liures. Mais nous vous prions pour
„ Dieu, que vous nous aidiez contre Engloiz: &
„ que nous allons assaillir avecques vous le chastel
„ de Pescyen, qui tant nous fait de grief. Haa! hō-
„ me de Dieu, ne nous faillez mie. Chacun de nous
„ vous en supplie de cuer. Car nous nous fions tāt
„ en vous, & en vostre Seignourie & maistrerie, qu'il
„ nous semble, que se vous venez en nostre com-

paignie, que Engloiz seront destruis, & mis à mort. Et quant Bertran l'oy, le cuer lui attendrya moult. Car illec fu plusieurs foiz nommé homme de Dieu. Et tant le deprierent tous les bourgeois, qu'il s'en retourna à son hostel. Arant fu la chaucee & la rue plaine de gens, qui disoient l'un à l'autre: Bertran est demouré, Dieu lui doint bonne vie. Et là demoura Bertran vn an entier & accomply, & conquist trois chasteaulx. Mais ainçois y out maint escarmouche & enuaye. Et Bertran y conquist grant honneur, & grant grace: & moult fu prisé & amé de la bourgeoisie. Et puis s'en departy, & s'en alla deuers le bon Charles de Bloys, que on dit qui est sains; lequel lui fist grant honneur, & grant courtoisie. Car il lui donna à Dinant vne gentil Dame & de noble lignee, & la plus sage qui fu ou Royaume. Et celle prist Bertran, qui auenu lui estoit, & pour ce qu'il deuoit passer fleur de Cheualerie, comme elle sauoit bien par l'art d'Astronomie, où elle estoit moult experte, comme i'ay dit cy deuant. Ne elle n'ot pas esté huit iours en sa compagnie, quāt elle lui pria qu'il creust son conseil, ou il feroit folie. Et lui aprist les iourseureux de combatre. Et lui dist, que tāt comme il feroit ce, il ne feroit desconfit lui ne sa gent. Mais Bertran le tenoit adonc pour trufferie. Mais puis trouua-il bien sa parole auerye, quant il fu prins deuant Alroy, & ses gens desconfiz, comme cy apres sera plus à

plain esclarcy. Ou temps dessusdit fu prins respit pour la guerre de Bretaigne. Mais en France auoit entre les haults Barons vne guerre moult merueilleuse. Car en la Duchie de Normendie le Roy de Nauarre, qui lors hayoit & greuoit le Royaume de France, tenoit Eureux, Breual, Annet, Pacy, Nogent, Gauroy, Renneuille, Turchebray, le Moulin Chappel, Conches, le Pontaudemer, Chierbourc, & plusieurs autres forteresses, bonnes villes, chasteaulx, oudit pays: & ailleurs, si comme Mante, Meulenc, & Roleboise. Et tant y auoit Engloiz & Nauarroiz oudit pays de Normendie, tant aux lieux dessusdis, comme à saint Sauueur, qui est pres de la mer. Dont estoient les principaux Capitaines le Captal de Busch, le Pascon de Mareul, Pierre de Sacquauuille, & Iehan Iouel, qui tellement occupoient icelui pays, que nulz ne osoit aler par terre sans sauconduit portant, que il fust François. Et aussi les Engloiz de Roleboise gardoient tellement le pas endroit icellui sur l'eauë, que nul marchand ne autres François ne Normand n'osoit, ne pouoit monter ne aualer la riuere de Saine, sans leur congié, & sans soy raençonner à eulx. Car là auoit vn Chastellain moult cruel & felon. Et moult en estoient courrouciez ceulx, qui marchandise vouloient faire mener: & par especial les marchans du pays de Rouën. Et adóc le Roy de France par dure fortune estoit prisonnier

nier en Engleterre. Et le Duc de Normendie son ainsné filz nommé CHARLES, attendant d'estre Roy, & pour lors Regent ledit Royaume; lequel estoit tant sage & discret, & plain de grât prudence, & noble conscience, que bien y est puis apparu, & appert encores, auoit en icellui tempstant de tribulations, que nulz ne le pouoit dire. Et les Engloiz aussi estoient en Picardie & en Beauuoisiz, au Moulin de la Sau..... à la Rochelle, & en plusieurs autres lieux. Et brièvement auoit lors ou Royaume telle diuision & discension de guerres, que c'estoit grant pitié: & mesmement de ceulx, qui par droit & par raison deussent viure en tresgrant amour, & estre tresloiaulx freres, compaignons, & amis. Et tout fu par tentation de l'ennemy, qui ne desire fors que mal. Adonc manda mondit Seigneur de Normendie, pour auoir secours des citez, & bonnes villes du Royaume, si comme Tournay, Arras, Amiens, & Noyon, & autres. Et se assemblerent les Picarslés vn fort chastel, qui Mauconseil a nom. Et les Normans se assemblerent en autre costé. Et auoit Monsieur le Duc tant à faire lors, qu'il ne fauoit où mener ses soubdoyers, dont il auoit foison. Si proposa qu'il yroit à Melun.

De l'asaut que Monsieur le Regent fist faire à la seconde forteresse de Melun, où Monsieur Bertran & ses gens, & autres asallirent moult fort. Et comment la ville fu rendue en l'obeissance de mondit Seigneur le Regent, qui lors fist Bertran Capitaine de Pontorcon.

CHAPITRE IX.

POURCE que ceulx de Melun faisoient à Monsieur le Regent moult d'ennuy, & à la bonne ville de Paris, où ilz ne laissoient descendre aucune marchandise de au dessus d'illec par la riuere de Saine, mondit Seigneur le Duc se party avecques lui de Paris, & grant planté de gens d'armes, Arbalestriers, & Archiers. Et s'en vint deuers Melun, où il auoit, & a encores deux villes fermées, & vn moult bon chastel. Et en la premiere ville fu receu le Duc & ses gens. Mais l'autre fermeté, qui est au bout du pôt, fu moult contraire au Roy, dont ilz firent grant mespison. Et avec les gens du Duc estoit venu Bertran, qui ne cognoissoit François ne Bourgoignons, ne aussi n'en estoit cogneu, & auoit amené avec lui ses gens. Mais briefment se fera cognoistre, ainsi comme vous orrez. Bertran entra dedens Melun avecques lesdites gens du Duc. Et fu passée à gaiges lui & ses gens par le Marechal du Duc.

Mais pou faisoit-on compte de lui, se n'estoient aucuns, qui en auoient oy parler, comment il se auenturoit hardiement. Ainsi fu le Duc de Normandie logié dedens Melun. Et en l'autre forteresse estoit le Bascõ de Mareul, & avec lui maint soubdoyers, gens d'armes, & Archiers, Engloiz, & Nauarroiz. Et oudit chastel estoit la Roync **BLANCE**, qui bien se faisoit garder, & tenoit ledit chastel à sien. Et Monsieur le Duc lui fist moult courtoisement sauoir, comment elle lui voulzist faire liurer la ville & le chastel: & il lui recompenseroit autant ailleurs. Mais son Conseil respondi, qu'il n'en failloit plus parler, & que ia le Duc n'en ioyroit, ne ne possederait, se par force ne le pouoit prendre & conquerer. Et quant le Duc oy ceste responce, il leur manda qu'ils auroient assaut. Mais le Bascon de Mareul n'y acompta riens. Car le lieu estoit fort & bien garny de viures, & bien porueu de gens. Et quant Bertran oy dire, que l'en feroit assaut pour conquerer honneur, il iura Dieu que il auenturerait corps & mēbres. Et de ce n'e mēti pas. Celle nuit reposerent les François. Et commenda le Marechal de l'ost, que chascun fust prest le lendemain pour assaillir. Et quant vint au matin, on cria aux armes droit à l'aiourner, de par le noble Duc, & que chacun alla à l'assaut pour honneur acquerre. Et leur souuenist comment Engloiz & Nauarroiz auoient villainement ouuré & desobey

oudit Monseigneur le Duc , qui Regent estoit , & attendant d'estre Roy. Et que l'endoit bien exiler ceulx , qui tendoient à le desheriter. Adonc s'armerent Cheualiers & Escuyers, Archiers & Arbalestriers, & autres gens: & prendrent lances, escus, pauais, & autres targes pour le trait. Adonc s'en vindrent enuers la ville, & commencerent l'assault, tellement que grant beauté estoit de veoir. Et le Bascon de Marueil & ses soubdoyers estoient sur les murs, & se defendoient en gettant pierres moult fort aual, & faisoient traire leurs Arbalestriers moult raide-ment. Mais sur tous les autres ledit Bascon iettoit tref-fort, qu'il n'ataignoit nul, qu'il ne fust mort, ou mehaingné. Et tant que les plus hardiz le doubtoient moult. Et quant Bertran l'aperceut: Haa! Dieu, dist-il, ie n'eu oncques si grant fain de boire ne de mengier, comme i'ay de combattre celui, qui ainsi se deffent. Car il me semble, que s'il estoit desconfit, que on en conquerroit les autres assez plus legierement. A cel assault se defendoient moult fort ceulx de dedés, comme dit est. Mais es fossez entrerent des François bien quatre cens, ou plus, qui portoient eschielles pour apoyer aux murs. Mais tel y monta, qui apres s'en repenti. Car moult fort se defendoient le Bascon de Mareul & les siens. Et le noble Duc de Normendie, combien que par foiblesse de greues maladies qu'il auoit eues, ne fust pas en estat de porter armeures, ne soy gaires tra-

uailler, vouloit à toutes fins soy auenturer avec les autres à l'assault. Mais son conseil le retint. Dont il n'ot en lui que courroucié. Et leurs disoient, qu'ilz le feroient blasmer, pour ce qu'il estoit le premier, ce disoit, & ilz lui faisoient regarder sa perte. Sire, ce dist son Conseil, lessiez ouurer vos gens. Car trayson fait moult à redoubter aujourd'huy, & moult a greué le Royaume. Et pensez de vous garder, & y mettez poine. Ou se non, vous ne pourrez aller nulle part sauvement. Et Monsieur le Duc, qui à vne fenestre estoit apoyé, disoit en soy demeurant: Haa! doubz Pere IESVS-CHRIST, or est bien le Royaume confondu. Car le Roy mon pere est detenu prisonnier en Engleterre, ou seruage du Roy Engloiz, qui à nous deust estre bien tenu par raison, & le deussiez battre, & il nous a battu, & tient plusieurs de nos chasteaulx, où il a mis ses gens. Et ceulx qui amis & escus me deussent estre, se sont encontre moy esmeuz: tellement que ie ne scay où aler. Haa! noble Royaume, quand seras-tu remis sus à l'onneur de la Fleur de Liz? Dont regretoit les XII. Pairs de France, c'est assauoir Rolant, Oliuier, & Ogier, qui tant furent preux: & le Duc de Naymes, qui tant fu sages & loyal Conseiller. Parquoy le Royaume de France ne pourroit estre mal pourueu d'autele gent. Et le Besgue de Villaines dist en le reconfortant: Sire, prenez en vous aduiz. Car se

„ vous auez plenté d'ennemis, aussi ot Charlemai-
„ gne, qui regna comme hardy encontre Turcs &
„ Payens, & mesmement ot maintesfoiz guerres &
„ estriz contre plusieurs de ses subgez. Puis l'ama
„ tant nostre Seigneur, qu'il se trouua au dessus de
„ ses ennemiz. Combien que en gardât son droit,
„ il pardist plusieurs foiz de ses meilleurs amis. Si
„ ne fust-il oncques plus noble Roy. Et si l'ama
„ tant nostre Seigneur, que pour lui faisoit mira-
„ cle de iour & de nuit. Si vous vueillez resiouyr
„ & penser d'acquerre des amis. Car si tost comme
„ vn Prince est hay, il est perdu. Et le Duc respon-
„ di, que c'estoit verité, & que bien s'en apperce-
„ uoit. Car ceulx qui la fleur de Liz deussent gar-
der & honnourer, la vouloyent defouler au pié,
ce lui est aduis. Adonc commenda, que on feist
fort assaillir, quoy qu'il deust couster. Lors vit-
on maint vaillant hommes d'armes puissammēt
assaillir d'un merueilleux assault. Et ceulx de de-
dens se defendoient à guise de sangliers. Mais les
assaillans conuenoit souuent reculer en bas, des
pierres qui cheoient. Mais Bertran, qui ce veoit,
s'en ala es fossés, pour entamer le mur. Mais pour
neant se traueilloit. Car on n'y pouoit myner.
Dont commença à regarder le Bascon de Ma-
rueil, qui forment espouentoit les François. A-
donc souhayda moult, qu'il le peust tenir. Et iu-
ra, que ainçois feroit-il tellement atourner son
corps, que Mire ne lui auroit besoing, où il yroit

aux creneaux parler à sa teste. Dont faisy vne eschielle, qu'il mist sur son chief; puis se fist aidier, & se pena tant qu'il vint aux murs, & y appoya l'eschielle. Apres prist vn ays, dont il se couury, & comença à monter contremont. Et quant le Duc le vit, il demanda à ses gens, qui estoit qui ainsi montoit. Et vn Cheualier lui dist: Sire, c'est Bertran, qui és faiz de Bretaigne endura tât de poine pour vostre cousin le Duc Charles, ne oncques tel Cheualier ne fu. Lors le Duc dist, qu'il lui en souuiendroit, & qu'il en prenoit assez poine, & trop. Car en peril se mettoit d'estre tout affolé. Puis dist ledit Monseigneur le Duc ainsi: Se à mon Cōseil pleust, par qui ie suis gouverné, ie montasse voulétiers à ces carneaulx pour aler requerer mes mortelz ennemis. Ainsi disoit le vaillant Seigneur, qui puis fu Roy, cōme vous orrez cy apres. Et tel desobey lors à faire sa voulété, qui puis s'en repent. Mais Bertran, qui monté estoit sur ladite eschielle, vn escu sur son chief, se penoit tant cōme il pouoit d'entrer dedens, & crioit hault au Bascon de Mareul: Bascon lessiez moy aller sur ces creneaulx, ou tu viengnes ça dessoubz. Et ie te prouueray, que tu à tort & à mauuaise cause tiens la ville contre le Duc de Normendie. Mais le Bascon n'acoutoit riens à son dit: mais demanda vne pierre à ses gēs toute la plus pesante que l'en pourroit trouver. Et ilz lui dirent: Vous auez deuant vous ce

„ que vous demandez, & grans bans trauerffains,
„ & queuës plaines des caillous. Vous ne pouez
„ faillir, boutez à tous costez sur ce villain, qui
„ ainsi monte. Mais comme il est gros & quarré, &
„ court & tout enflé pour ses armeures, qui le tū-
„ beroit ou fossé, il aroit tantost le cuer creué. Et
„ sembloit estre vn porteur d'affeutrures, qui soit
„ nez de Paris. Car il estoit tout boursoufflé. Ainsi
se mocquoient de Bertran ceulx qui mal le co-
gnoissoient. Et le Bascon descharga sur lui &
sur son eschielle vn grant quaque tout plain de
cailloux, qui rompi ladite eschielle, & abati le-
dit Bertran ou fons des fossez, ne il n'ot aubert
ne escu, qu'il ne fust froissiez. Car ainsi comme il
estoit aual, le faiz le sieuoit : & chey la teste en
l'eauë, & les deux piez dehors. Et tellement fu
estourdi, qu'il ne sauoit où il estoit. Dont s'es-
cria le Duc à ses gens, que Bertran fust secouru,
& que pitié seroit se il mouroit ainsi. Adonc le
prist vn Escuier par les piez, & à force le tira hors
de l'eauë. Et Bertran, qui en auoit beu, esqueut
la teste. Et pour certain il sembloit mieulx mort
que vif. Puis fu porté en vn fumier tout chaut.
Et quant il pot tirer ses membres, & qu'il fu re-
uenü à soy, il demanda à ceulx qui le gardoient,
qui deable l'auoient là porté, & se l'assault estoit
ia failly, & qu'il conuenoit qu'il y allast. Et vn
Escuyer, qui bien le cognoissoit, lui dist, qu'il
lui pouoit bien souffire, & qu'il en auoit bonne
part.

part. Mais Bertran se leua tantost dudit fumier, pour aller à l'assault. Mais aucuns des François s'en retreioient ia. Et dist-on à Bertran, qu'il n'alaist plus assaillir, & que l'assault fineroit tantost. Et Bertran respondi, qu'il yroit aux barrieres. Et de ce dist-il verité. Car il n'auoit illec si hardi, qui fust osé aler où il ala. Car par force il rebouta d'un glaiue qu'il tenoit en sa main les ennemis dedens leurs barrieres, & plusieurs en abati. Mais ilz fermerent leurs barrieres, & leuerent le pont apres ledit assault, qui longuement auoit duré. Et quant vint à l'anuytier, on sonna la retraitte iusques à l'endemain Soleil leuant. Dont y ot un parlement, & fu fait un traictié, par lequel la Royne & son Conseil rendi Melun au Duc, la ville & le chastel, qui grant ioye en ot. Puis s'en retourna à Paris. Et moult honnoura Bertran, & le fist Capitaine de Pontorson, lequel ne seiourna gaires à Paris. Car adonc auoit à Meulanc, à Mante, & à Roleboise dessus nommées, qui toutes sont sur la riuere de Saine, grant plenté d'Engloiz & Nauarroiz, comme dit est; qui trop greuoient le país, tant par terre comme par eauë.

Du siege, assault, prise, & destruction du fort de Roleboise, & de la prise de Mante & de Meulenc.

En laquelle ville de Meulenc le chastel & murs furent abatus.

CHAPITRE X.

CEV Lx de Rouën, qui leur Capitaine auoiēt Cesseu & fait d'un riche bourgoiz de la ville, nommé Jacques de Lyeur, qui moult gentemēt se maintint, tant que d'eulx estoit moult amez, yssirent de ladite ville tous d'une volenté bien dix mille en la compagnie de leur Capitaine, & vindrent asseigier Roleboise du costé deuers Saine. Et la tour estoit en hault assise sur le mōt, qui pent. Et ainsi comme ledit siege y estoit, le hardi Cheualier Bertran, & plenté de Cheualiers & autres gens avecques lui, vindrent prendre leur logeys de l'autre costé deuant Roleboise pour assaillir la tour, laquelle ilz assaillirēt moult asprement. Mais le fier Chastellain se defendoit moult orgueilleusement, ne la vouloit nullemēt rēdre. En l'ost de Bertran auoit vn Cheualier nōmé Guillaume de Launoy. Celui s'auisa vn iour, par quel engignement on pourroit entrer dedēs Mante, qui bien estoit fermée. Et en icelle auoit vne moult belle Eglise, & aisée à fortifier cōme vn chastel. Dōt furent à cōseil ledit Che-

ualier, & autres dix ou huit, avecques Bertran, qui disoit que on ne la pourroit auoir, qui n'y yroit bien garniz de gens d'armes, & d'Arbalestriers, & qu'ilz yroient au plaisir de Dieu, mais qu'ilz eussent conquis le fort, où ilz estoient deuant: & qu'il ne demourroit fort Engloiz ne Nauarroiz entour Paris, qu'il ne fust conquis, s'il pouoit. Mais ledit de Launoy, qui estoit bien soubtil, leur dist que à son auis ilz auroient Mante, ainçois qu'il fust trois iours accompliz. Vn iour prist de ses gens à vn soir iusques au nombre de trente, & les ordonna, & fist vestir en habit de vigneron. Et bien sembloient gens, qui les vignes du pays deussent labourer. Mais au dessoubz estoient moult bien armez, & portoiēt les aucuns d'eux bonnes espées, & les aultres bons cousteaulx. Et puis leur dist Guillaume ce que faire deuroient. Et par le conseil de Bertran auoit logié dedens ladite ville de Mante bien trente glaiues ou plus de leurs gens, tous logiez en vne hostellerie: lesquelz auoient donné à entendre à ceulx de la ville, qu'ilz estoient au Roy de Nauarre. Et menaçoient fort le Duc de Normandie. Si auint que ledit Guillaume de Launoy se leua apres myenuit, & s'arma, & fist armer ses gens, puis se mist à la voye. Et quant ilz approcherent Mante, ilz descendirent & se mirent à pié. Celle nuit faisoit grant bruyne. Encores y veoit-on bien peu, quant le Soleil fu leué. Et

auoient de coustume ceulx de Mante, que au martin toute la proie se assembloit à la porte, pour yssir dehors, & aler paistre aux champs. Laquelle porte ouuroient quatre bourgoiz d'icelle ville, qui les clefs en gardoient. Si fu ainsi, que quant iceulx bourgoiz ourent ouuert le guichet, & la moitié de la barriere, ilz apperceurent les dessusdiz, qui ainsi s'estoient deguisez, qui s'estoient tant auancier, qu'ilz estoient bien près de Mante. Si cuidierent pour vray les dessusdiz bourgoiz, que ce feussent vigneron, qui venissent en la place pour gaaigner leur iournée. Adonc ouurirent la porte & toute la barriere à plain, puis alerent en leur garde mettre leurs armeures, & les bestes yssirent. Lors vindrent à la porte quatre desdiz vigneron, qui dedens entrèrent, & puis six, qui occuperent la porte. Adonc facha chacun son espée. Et sur l'eure furent illec tous assemblez. Adonc cornal vn d'eulx d'un cornet tant comme il pot, afin que Guillaume de Laignoy & ses gens, qui près d'illec estoient embuschez, l'oysissent. Et entretandiz les vigneron donnerent aux bourgoiz maint grant colée. Adonc commencerent à crier ceulx de la ville, comme gens effroyez: Tray, tray. Et les vigneron auoient sur le pont destellé vne charrette, que l'en cuidoit mener dehors, par où ne pouoit le pont leuer. Et combien que ladite ville fu moult estonnée, encores n'y auoit-il gaires de gens le-

uez, quant Guillaume de Launoy & son armée entrerēt dedens. Et tantost les trente glaives, qui parauant y estoient, comme dit est, se mirent auecques lui, & commencierent à crier hault, LAVNOY, LAVNOY. Adonc s'enfouyrent ceulx de la ville vers l'Eglise de Nostre Dame. Puis vint en la ville Bertran, & auecques lui le Conte d'Aucerre, & maint autres Cheualiers, qui amenoient moult de gens. Et commencierent à crier, Launoy, Launoy. Car ainsi estoit ordéné. Et ainsi comme ilz cheuauchoiēt par la ville, & les gens d'icelle ville leur gettoient l'un vn pestel, l'autre vn mortier, pour vengier leur honte, & crioient moult fort: Tray, Tray, pour esueiller leur gens. Et adonc les femmes embracerent leurs enfans, & commencierent à crier moult hydeusement. Et aussi faisoient ceulx, qui de ladite ville pouoient eschapper, & aler aux champs, moult grant dueil. Et Bertran, qui le secours auoit amené, auoit auecques lui maint Arbalestrier, & s'en ala tout droit enuers ladite Eglise, où ia estoient entrez les bourgoiz. Mais Bertran & ses gens firent tant, qu'ilz y entrerent bien la valeur de cinq cens, & aucuns de ceulx, qui estoient par la ville, commencierent à piller durement. Et quant les bourgoiz dessusdiz, qui ou clochier de ladite Eglise estoient, virent le meschief, si crierent aux François, qu'ilz rendroient la tour. Et adonc l'en se cessa de nul hō-

me blecier. Et puis Monsieur Bertran manda les
» bourgoiz de la ville, & leur dist ainsi: Seigneurs,
» vous rendrez vous au Duc de Normendie, qui
» est Regent, & ainfné filz du Roy? Se vous le vou-
» lez ainsi faire, & lui baillez hostages avecques
» loial serement, vous aurez voz biens & herita-
» ges sauuez. Et ceulx, qui ne le voldront faire, ie
» leur donray congié à trestouz entierement. Mais
» ilz n'emporteront ioyaulx ne argent, ne chose
» qui vaille, excepté ce qu'ilz auront vestuz tant
» seulement. Or m'en donnez tantost responce.
» Car nos gens sont moult en grant de piller sur
» vos biens. Et quant les bourgoiz oyrét ainsi par-
» ler Bertran, si orent doubte de perdre leurs biés,
& leurs grans heritages. Car il fait grant mal de
guerpir sa terre. Si se assentirent d'estre loyaulx
subgiez du Roy nostre Sire, & de mondit Sei-
gneur le Regent. Et quant ce vint au serement li-
urer, ilz requirent aux Seigneurs, qui là estoient,
que Meullenc fust assaillie. Car se elle contraire,
ceulx de Mante ne pourroient durer. Et on leur
out en conuenant, mais que Roleboise peust e-
stre gangnée. Maiz qui Bertran eust voulu croif-
re, on fust auant alé à Meullenc. Mais lui & nos-
diz gens retournerent à Roleboise. Et moult e-
stoit le Chastellain courroucié de Mante, qui
ainsi estoit gangnée. Et aux François crioient
souuent, que faussement l'auoient prise. Mais
Bertran & ses gens lui firent vne enuoie moult

forte de frayre & de lancier. Et le Chastellain & ses gens estoient dedens ladite tour, qui iettoient contreuail pierres & grans cailloux, pour eux defendre. Et dura l'assault iusques à complie. Et moult bien se il porta la Commune de Rouën à cel assault, qui moult fu grant, combien que on n'y conquist adonc riens. Donc manderent engins, qu'ilz firent amener à charroy. Et quant le Capitaine du chastel les vit appareiller, il requist que à Bertrā il peust parler. Laquelle chose lui fu octroyée. Et y vint, & fu pris appointemēt, qu'il rendroit ledit fort, & vuideroit la tour parmy certain argent qu'il en deuoit auoir. Dont fist ledit Chastellain chargier tantost tout son auoir, & chacun de ses gens aussi. Et Bertran s'en ala logier dedens ladite tour. Et cellé nuit donna vn moult riche soupper. Et lors orent conseil ensemble, de enuoier deuers le Duc de Normēdie, pour sauoir se il lui plairoit, se celle tour fust abatue, comme ilz auoient voulenté de faire, afin que iamais ne fust besoing de y guerroyer. Lequel en fu d'accort. Et ainsi ladite tour fu minée, versée, & abatue és fossēz. Et adonc Bertran conseilla, que on alast à Meulenc. Et leur dist: Seigneurs, vous sauez que Meulenc est vn fort lieu, & assis sur Saine: & a fait à ceulx de Paris des maulx assez. Si le nous fault auoir. Car nous auons icy des mineurs assez, qui tantost auront miné la tour. Et ceulx respondirent, qu'ilz

le feroient à sa volenté. Et avec eulx estoit le Conte d'Aucerre. Si se partirent, & menerent en leur compaignie cinq cens Arbalestriers, & vindrent à Mante, où estoit demouré ledit gentil Chastellain, qui les clefs en gardoit : & tenoit le Monstier, qui moult estoit bien garité entour. En ladite ville, les gens dudit Bertran chargierent trefs, harnoiz, Arbalestes, pauais, & maint escu. Donc s'en ala vn Cheualier droit à Meulenc, & dist à ceulx de la ville, qu'ilz la gardassent bien : & que Bertran, le Conte d'Aucerre, & leurs gens venoient tous armez pour icelle assaillir, & que bien se deffendissent. Quant ceulx de Meulenc oyrent ceste nouuelle, si furent moult courrouciez : & aussi estoient par auant ceulx de Mante, qui ainsi auoit esté prise. Adonc enforcierent leur ville tout autour, & y portoient pierres. & cailloux, hommes, & femmes, & enfans, pour defendre leur ville. Et la tour d'enhault estoit si forte & bien auitaillée, que le Chastellain, qui dedens estoit, ne craignoit riens. Car biē y auoit à viures de pain, & de vin, & de chars salées pour quinze mois, ou plus. Et si auoient ceulx de Meulenc bateaulx, dont ilz gardoient l'eauë. Mais ilz les mirent dedens la ville à sauueté. Et François & Normans s'en venoient par la riuere, qui amenoient maintes nefz bien garnies de pourueances. Apres viennent les Archiers & bombardes de pié. Et puis venoient les gens d'armes

costoiant

costoiant ladite riuiere, qui les dessusdiz condui-
 soient, tant qu'ilz vindrent deuant Meulenc. Si
 coururent entour la ville, pour auiser où le siege
 seroit mieulx seant. Mais Bertran ne s'oublia
 pas, mais regarda la tour qui seoit sur la mon-
 taigne, & la ville ou pendant au dessoubz. Puis
 regarda le pont, que Engloiz & Nauarroiz a-
 uoient forteffié, lequel estoit bel & grant. Bons
 fauxbourgs y auoit derriere, & la ville estoit de-
 uant. Dont appella Bertran le Conte d'Aucerre,
 & lui monstra ce qui lui en sembloit. Et lui dist,
 que c'estoit grant chose d'un pont deffensable
 assis sur telle riuiere. Car qui auroit la tour & la
 ville, si n'auroit-il pas le pôt: & qui en saura bon
 conseil, si ne le cela pas. Dont respondi le Con-
 te à Bertran : Je ne scay à quoy vous pensez. Car
 il semble à voz paroles, que vous auez la tour &
 la ville en vostre commandement. Vous ne de-
 mandez pas comment on y entrera, ainçois vi-
 sez au pont, qui n'est que le moins, & comme re-
 menant. Car se nous poyons prendre la tour &
 la ville, ou que de bonne voulenté on le nous
 rendist, nous en deurions Dieu louer. Ainsi cō-
 me vn creiteur doit prendre de due debte ce
 que on lui offre, & puis plaidier du remenant.
 Mais i'entens bien à vostre vouloir, que tantost
 vouldriez auoir le pont, la tour, & la ville. Se cō-
 uient à tel proye prendre plus d'un ostouer. Et
 pour ce nous y conuient-il saigement vesier. Et

„ fust bon de faire logier nos gens au lés deuers.
„ Paris, où il a de bon Nauarrois, & illec mettre
„ vn droit siege, & puis assaillir bien fort. Et se par
„ assault ne le pouons auoir, nous ferons miner la
„ tour, & la ville aussi. Et apres, se Dieu plaist, nous
„ aurons bien le pont. Sire, se dist Bertran, vous di-
„ tes moult bien. Faites donc sonner la trompette
„ pour noz gens esmouuoir, & donner assault à la
„ ville. Ainsi comme Bertran disoit ces paroles, vn
carreau d'espringale vint à cheoir de lés lui.
Mais il ne meffist ne à soy ne à son cheual. Dont
dist Bertran, qu'il veoit bien, que leenz y auoit
gens, qui n'amoient la Royne, ne le Regent, ne
ne prisoient aussi. Mais au plaisir de Dieu ilz en
auroient briefment leur paiement, que canon &
espringalle ne leur auroit ia mestier, qu'ilz n'eus-
sent assez à souffrir. Ce iour fu ordené entre les
Princes, & autres Seigneurs de l'ost, que le len-
demain on assauldroit la ville. Et ainsi fu fait. A-
donc assaillirent moult fort. Et trayoient Arba-
lestriers tant comme ilz pouoient. Et varlés de
pié les targoient. Dont vindrent assaillir les gens
d'armes avec Bertran aux barrieres, & firent tant
qu'ilz les copperent d'espées & de haches. Et e-
stoit la ville sur le point d'estre prise. Et quant
ceulx de dedens, qui s'estoient deffenduz tant
comme ilz auoient peu, virent, ilz laisserent
leurs deffenses. Et pour doubte de mort, ilz s'en
fouyrent enuers la tour, où ilz auoient mises &

retraites toutes leurs cheuances. Et les aucuns d'iceulx s'en allerent sur le pont, qui poules garanti. Car Bertrā abati d'une hache, qu'il tenoit, la porte de la ville. Puis entrerent dedens lui & toutes les gens, & les autres aussi. Et bien cuidoient gangner la tour. Mais elle leur fu moult fort defenduë. Et quant le Conte d'Aucerre vit, que par assault on ne la pourroit auoir, il ordonna Archiers & Arbalestriers encontre ladite tour: afin que les gens, qui dedens estoient, ne peussent greuer les nostres. Et avecques eulx paouisiens, pour les targier & garder. Et adonc le dit Conte, & Bertran aussi, & leurs gens, encriant, Guesclin, Montioye, saint Denys, Au Roy de France, fusterent la ville bien & fort, en pillant ce qu'ilz trouuoient de bon. Et maint riches hommes y rançonnerent. Et brieuement, ilz firent tant, que le pont leur fu baillé. Et ainsi n'auoient mais à auoir que ladite tour, deuant laquelle Bertran s'en vint, & fist appeller le Chastellain, pour parlementer à lui. Lequel vint tantost aux creneaulx. Et adonc lui dist; Je vous si-

gnifie & commande de par nostre Regent de France, que vous nous rendez la tour. Ou par la foy que ie doy à Dieu, ia decy ne partiray, si l'auray prise auant. Et le Chastellain lui respondi: Sire, ie croy que ainçois que vous peussiez entrer en ceste tour, il vous conuendra apprendre à voler hault. Adonc Bertran fist assaillir ladite

tour. Mais ceulx de dedens ne se esbayssoiēt gaires. Et quant il vit ce, il fist encomēcier vne trefgrant mine, laquelle ceulx de la tour ne pouoiēt veoir. Et estoient iceulx mineurs bien gardez. Lesquelz minerent tant iour & nuit, qu'ilz vindrent dessoubz le fondement des murs, qu'ilz pionnerent moult bien, & firent soustenir sur bonnes estages, & sur grans bans pesans. Donc s'en allerēt les mineurs à Bertran, & lui dirēt que quant il lui plairoit, ilz feroient trefbucher & cheoir ladite tour. Et Bertran respondi, qu'il vouloit que ce fust tantost, Car puis que ceulx de dedens ne vouloient obeir, ce estoit bien raison qu'ilz morussent. Et adonc les dessusdiz mineurs alerent bouter le feu en ladite mine aux merriēs, qu'ilz auoient moult bien oings & engressiez. Et tantost comme iceulx bois furent ars, il chey de ladite tour en vn couron bien la moitié ou plus du costé deuers le mont. Et quant ceulx de leenz virent ce, ilz vindrent aux creneaulx demander rençon, & se rendirent tous à Bertran. Et le Chastelain & tous ses compaignons furent pris. Et les enuoya Bertran en prison à Paris, & si fist abatre le demourant de ladite Tour, & la closture de la ville aussi. Et sur le pont laissierent bonne garnison. Adonc s'en departirent tref tous, & s'en alerent ceulx de Rouen chacun en sa maison, & les Cheualiers aussi, dont plenté y auoit. Et Bertran s'en ala à Paris deuers le Duc.

de Normãdie, qui maint beau don luy dōna. Et de là Bertrans'en ala tout droit à Pontorson, & illec seiourna avecques sa femme, pour la morte saison. Depuis Guillaume de Feleton Cheualier Engloiz dessus nommé le fist adiourner en Parlement à Paris. Mais Bertrans'en ala excuser, disant qu'il ne mesprist oncques en riens enuers ledit Guillaume. Car à tort & sans cause on l'auoit detenu prisonnier, & qu'il auoit bien tenu conuenant. Et se Guillaume vouloit autrement dire, Bertran lui vouloit prouuer de son corps, & tousdiz demandoit le champ. Mais Guillaume le redoubtoit fort. Car Bertran estoit preux, & si auoit moult grant renom. Si s'accorderēt de ceste chose. Et Bertran estoit avecques le Duc de Normendie Regent.

EN icelui temps reuint le Roy Iehan en France, & fu deliuré à plain d'Engleterre, où il auoit esté prisonnier. Et moult reueremment fu receule noble Seigneur de ses vraiz & loyaux subgiez, comme il deuoit bien estre. Et se tint en France & en Normendie vne espace de temps, pour faire assembler des deniers de la rençon qu'il deuoit aux Engloiz. Ausquelz il fist deliurer en la Duchie de Guienne plusieurs citez, bonnes villes, pays, chasteaulx, & forteresses: que par le traictié de sa rençon il leur deuoit faire bailler. Et pour tenir conuenant au Roy Engloiz, retourna à Londres en Engleterre, où le-

dit Roy Iehan, dont Dieu ait l'ame, ala de vie à trespassement en l'an Lxiii. Dont ce fu moult grant pitié. Car pour verité tenir, ledit Prince, qui estoit loyal, pour riens n'en voulust faire faulte. Et auecques ce estoit hardi commelyon, large & courtois à tout homme. Parquoy il fu moult plaint & regretté. Adonc le Royaume y receut grant perte. Adonc s'esmurent Engloiz & Nauarrois ou pays de Normendie à l'encontre du Duc, qui deuoit estre Roy: & s'assemblerent en la deuant dite ville d'Eureux plusieurs des dessusdiz Capitaines Nauarroiz & Engloiz, lesquelz firent & confermerent là endroit leurs aliances: & faisoit tellement courre le pays de Normendie, que moult le greuoient, par especial entour Rouën, & entour Vernon. Mais Bertran se tenoit tousiours assez prez d'eulx ou dit pays de Normendie, & auec lui l'Arche prestre, le Viconte de Beaumont, & plusieurs autres Archiers. Et auoit en ce mois le Duc de Normendie ordonné Bertran son Marechal, pour mener ses conuoiz en bataille. Dont Bertran iura Dieu, qu'il feroit les Engloiz courroucier, ou il feroit vne foiz occis en bataille. Et estoit ledit Bertran à Rouën, lequel manda & assemblea gens d'armes, c'est assauoir Normans, Bourgoignons, Champenois, Picars. Et ainsi comme il estoit là, vne espie vint, qui lui dist, qu'il venoit d'Eureux, où il auoit lessié le Captal, qui auoit auecques lui

compagnie de gens. Et faisoit venir dès lors maint de mauuaise mesnie, qui s'en vouloient aller vers Paris. Et quant Bertran l'oy, si dreça la chiere. Adonc manda à plusieurs nobles Cheualiers secours, qu'ilz y venissent à banniere déployée. Si vindrent à lui le bon Conte d'Aucerre, Messire Baudoyne Dennequin Maistre des Arbalestriers de France, le Viconte de Beaumont, l'Arche prestre, Loys de Heuesquerque né du pays de Flandres, Thierry de Bournouille, qui à la besongne, parquoy ceste assemblée se fist, fu fait Cheualier: Jehan de Cayeu, Guillaume Trinchant de Granuille, Messire Engerran Deudyn vn vaillant Cheualier, le Seigneur de Rambures, le Sire de Sempy, Robert de Villequier, celui de Betencourt, & Robillart de Frontebos aussi, Robert de la Treille, & plusieurs autres Cheualiers & Escuyers, avecques leurs gens. Et moult y auoit noble assemblée. Adonc demanda le Maistre des Arbalestriers, auquel lez on cheuaucheroit, pour trouuer les Engloiz & Nauarroiz. Et le Viconte de Beaumont dist, qu'il faudroit enuoyer des coureurs au deuant. Mais Bertran ordonna, que l'ost des François iroit tout droit au Pont de l'Arche, & lesdiz coureurs à la Croiz saint Lieffroy, & à Cocherel. Et ainsi fu fait. Là peust-on veoir noble Cheualier, maint bacinet luyfant, maint cheual noblement enfilez, & maint sommier troussé, maintes bannie-

res, & maint panon. Et de Rouën y auoit maint bourgeois noblement & bien armez, & maint bon Arbalestriers. Et les conuoierent & festoierent moult ceulx de ladite ville. Et au departir plouroient moult piteusement Dames & Damoiselles. Et Bertran si mena nostre gent, tant qu'ilz furent dedens ladite ville du Pont de l'Arche, où ilz se repouferent, & refrechirent moult bien, & firent referrer leurs cheuaux. Et illec acheptèrent haches, dagues, & espées de plusieurs ouuriers, qui illec les auoient apportées. Et en paioient l'argent tout sec. Puis disoient l'un à l'autre: Ordonnons nous bien. Car nous aurons la bataille ains le tiers iour passé, puis que nous sommes ou conduit de Bertran. Car qui n'a bon cuer, si ne conuerse pas auecques lui pour combattre. Et quant noz gens furent bien apprestez, ilz se font partiz du Pont de l'Arche, & mis sur les champs rengiez & ordonnez, comme pour attendre la bataille. Et Bertran compta ses gens, & estima à xi. cens combatans. Adonc les confortagentement, en disant: Beaus Seigneurs, soions asseurez. Car a Dieu le veu, si nous auions trouuez Engloiz, vous les verriez tantost descoufiz, & fussent deux contre vn. Car Dieu, qui scet le bon droit, pour quoy nous voudrions combattre, si nous aidera. Dont enuoia dix coureurs sauoir où le Capital estoit, & les Engloiz, & s'ilz les trouuoient, que tantost fussent retournez à

Bertran,

Bertran, & à ses gens deuant Cochepele. Et mes-
 noble chose estoit à veoir en plains champs, com-
 me de si poÿ de gens. Car de la clarté des armes
 resplendissoit le pais d'environ. Et maint noble
 instrumens faisoient sonner. Et n'y auoit nul,
 qu'il n'eust grant desir, volenté, & hardement de
 combattre. Car Bertran leur donnoit cuer, qui
 aloit de renc en renc, en disant: Mes enfans, ayez
 volenté de acquerre la gloire des sains creulx,
 où doiuent venir tout loyal Chrestien, qui ou-
 seruice de leur Seigneur, & pour leur pays defen-
 dre veulent exposer leur corps. Si vous prie bon-
 nement, que s'il y a nul de vous, qui se sente en-
 pechié mortel, qu'il se voist confesser aux Cor-
 deliers. Car i'ay oy retrayre à plusieurs Clercs,
 que nostre Seigneur dit en l'Escripture, que pour
 vn pecheur en meurent plus de cent. Et quant
 les gens d'armes oyrent ledit Bertran ainsi par-
 ler, ilz disoient li vns à l'autre: Je vous dy de cer-
 tain, que se Bertran ne sceut bien de vray que
 nous deussions rencontrer les felons Engloiz, il
 ne deist ia telz mos. Si vous prie, que nous alons
 confesser, & soions en estat de receuoir la mort
 s'il le conuient. Car Bertran si nous fera mourir
 ou ressusciter. Adonc s'allerent plusieurs de noz
 gens confesser, & eulx mettre en bon estat aux
 Cordeliers de lez le Pont de l'Arche. Puis se mi-
 rent tous au chemin ensemble en grant volen-
 té de combattre, & d'eulx auenturer. Et tant che-

minerent, qu'ilz vindrent à la Croix saint Lief-
froy. Si se logierent en l'Abbaye, & pour rafres-
chir eulx & leurs cheuaulx. Et leurs varlés alerent
en fourage de ville en ville, pour trouuer vitail-
le. Et quant ilz pouoient trouuer en aucune mai-
son haches ou coignées à copper boys, ilz les
emportoient avecques eulx, & disoient l'un à
l'autre, que mieulx valoit ferir de vne telle ha-
che, que d'espée. Car qui bien en seroit atteint, il
auroit bien Dieu à amy, se iamais pouoit parler.
Et par ces haches furent desconfiz les Engloiz
en la bataille de Cocherel, comme vous orrez cy
apres. Et lors que Bertran & ses gens estoient en
ladite Abbaye, vindrent à lui maint coureur,
qui leur dirent, qu'ilz n'auoient peu trouuer fê-
me ne homme, payfant, laboureur, ne autre, qui
leur sceust compter ne dire, où estoit le Captal.
Mais bien sçauoient de certain, qu'il estoit yssus
d'Eureux, & avecques lui treize cens Engloiz bôs
iousteurs, & cercoient le pays, & bien les auoiet
veuz toute iour. Mais ilz ne pouoient sauoir, où
ilz faisoient leur retraite. Et Bertran respondi,
qu'il ne pouoit croyse, qu'ilz ne fussent près
d'ilec, pour les fourprendre. Adonc renuoya i-
ceulx coureurs courir les bois, & qu'ilz preissent
leur tour par deuers Cocherel, où ilz le trouue-
roient, & lui rapportassent nouuelles. Adonc Ber-
tran se desloga de ladite Abbaye, & disoit que
iamais ne cesseroit, iusques à tant qu'il eust trou-

ué Engloiz, & que les gars* ilz lauoiet la peau, & fussent ores trois contre vn. Et puis dist à ses gés: Seigneurs, aiez bon cuer & hardi. Et s'il y a nul couart, qui ait doubte de sa pel, ie lui donne cōgié des'en aler en sa maison. Car ie scay bien, que nous aurons prouchainement l'estour. Et s'il y a cellui, ne viel ne ieune, qui se mette au fouyr, par Dieu ie le feray pendre par le hasterel. Nenny, nenil, nous viurons ou mourrons avecques vous. Et tant alerent ceste gent, qu'ilz aperceurent Cocherel, dont ilz estoient bien près. Et ilz se arresterent. Et fu en vn iour d'esté, qu'il faisoit moult grant chaut. Et s'en aloit le Duc de Normendie à Rains, pour estre sacrez, lequel deuoit estre couronné à la Trinité ensieuant. Et là estoient Ducs, Contes, & Barons, pour la solempnité de la feste. Et pour ce, les Engloiz auoient aduisé de entrer adóc ou Royaume, pour faire au Roy villenye, & dommage audit Royaume. Et s'estoit venté le Captal, que le Roy & son bernage il deliureroit au Roy Engloiz. Mais Bertran lui changa bien le dez.

En icellui temps cheuaucha ledit Captal, & avecques lui ledit Iehan Iouel, & Pierre de Saquainuille dessusnōmez, & d'autres Cheualiers, & Escuiers plusieurs. Et prenoient leur chemin parmy les bois, & maint coueurs auoient. Mais ilz ne sauoient rien de Bertran, ne Bertran d'eulx aussi. Et noz gens, qui la riuiere d'Eureulx auoiet

passé quant ilz choisirent Cocherel, vn petit ha-
 mel, si s'arresterent en vn pré, comme dit est,
 pour eulx refreschir. Atant vindrét les coureurs,
 qui estoient dix, & dirent qu'ilz auoient esté en
 plusieurs parries, escouté, & visé en manieres
 d'espies: mais ilz n'auoient veu homme viuant,
 ne Cheualier, ne Escuier, pour chasser ne faire
 enuoie. Adonc dist Bertran: Je ne scay que dire,
 mais se i'eusse couru, ie ne doubte point, que ie
 n'eusse trouué le Captal & ses gens. Mais ie croy
 que vous doubtez les Engloiz. Vous scauriez
 mieulx trouuer vne grant huche, ou vn coffre
 bien rempli, pour piller les ioyaulx qui dedens
 seroient, qui vostres ne sont pas, que de trouuer
 les Engloiz. Car ie oferoie bien iurer pour vray,
 que ilz ne sont pas loing decy; ne me partiray, si
 en auray nouuelles. Car vecy le chemin qui doit
 aler enuers nos aduersaires. Et il disoit verité. Car
 ilz estoient des Engloiz dedens le boys ou mont
 de Cocherel. Mais ainçois que nosdites gens les
 peussent apperceuoir, Bertran les fist armer &
 ordonner en bataille. Et le Conte d'Aucerre, le
 Viconte de Beaumont, & les autres Barons si fi-
 rent nombrer noz gens à vnze cens, toutes gens
 combatans comme dit est, tous desirans de ba-
 taille. Et moult estoient courrouciez, que les en-
 gloiz ne leur venoient au deuant. Adonc dist
 l'Arche prestre: Seigneurs, se il vous plaist, &
 vous l'acordez, ie merray de ma gent de là ce

mont, pour sauoir se nous verrions apparoir Engloiz, & se besoing me fourt, ie le vous feray sauoir. Et ilz ont respondu, qu'il auoit moult bien parlé, & aussi se ilz auoient besoing qu'il le secourust. Et il leur a creanté, que si feroit-il. Ainsi s'en départi donc, puis s'en repenti. Car il reuint à tart, ainsi comme vous orrez. Et tout ainsi comme il fut assuré, vint vn Herault, criāt tant comme il pouoit: Beaus Seigneurs, tenez vous en ordonnance. Car vecy les Engloiz venir à banniere desploïée: & tantost les verrez, sans gaires demourer. Et quant Bertran l'oy, si leua la chiere, & dist à sa gent: Beaus Seigneurs, soiez assurez. Car nous aurons aujourdui, se Dieu plaist, vne noble iournée. Huy verra l'en les bōs, & ceulx qui voudront acquerre honneur & bōne renommée. Et saura l'en qui bien s'aidera d'espée & de lance. Et en disant ces paroles, ilz ont veu sur la montaigne à l'issue d'un bosquet la banniere du Captal leuée. Et quant Bertran la vit, il en a Dieu loé, & grant ioye en demena. Puis fist mettre toutes ses gens à pié, & ordonner en conroy bien ferrez. Et disoit, que ces gens seroient tous leurs, ains la vesprée. Lors lui dist le Viconte de Beaumont: Sire Bertran, tenons nous en ce val, & regardons Engloiz en leur estat. Car de monter en hault, nous pourroit-il bien venir mal. Nous n'y monterons pas, dist Bertran, mais attendons icy noz ennemiz à pié, iusques à tant

„ qu'ilz soient à nous venuz. Je donne au Roy no-
„ stre Sire à son estraine de sa noble Royaulté ce-
„ lui, que on appelle le Captal.

ENTRETANDIZ estoient sur ladite mon-
taigne les Engloiz, qui monstroient leurs ban-
nieres & leurs lances à noz gens, qui les gardoiēt
„ en bas. Adonc dist le Captal: Que ferons-nous,
„ beaus Seigneurs? Veez-là noz ennemis, qui se
„ doubrent. Et bien est vray, que se nous ne des-
„ cendons, nous ne pouons d'eulx approucher.
„ Car ilz ne monteront pas çà dessus. Dont dist
„ Pierre de Saquainuille: Se nous descendons là
„ deffoubz, noz gens seront lassez, & en aurons le
„ pire deux contre vn. Mais nous attendrons s'il
„ vous plaist, que en autre place soit l'aventure
„ trouuée. Et Iehan Iouel dist, que bien auoit dit:
& qu'ilz fussent deux ou trois iours en celle pla-
ce. Car assez auroient à viures, & François se-
roient tous affamez. Et de ce fu le Captal d'acort.
Et quant vint à Soleil reconssant, Bertran assem-
bla le Conte d'Aucerre, le Besgue de Villaines,
le Viconte de Beaumont, le Maistre des Arbale-
striers, & tous les autres notables Cheualiers de
„ l'ost, & leur dist: Seigneurs, ie voy bien, que ces
„ Engloiz, qui là dessus sont, si tendent à nos affa-
„ mer, ne point ne descendront encontre nous. Et
„ se nous montons sur la montaigne encontre
„ eulx, nous nous en repentirons, & ainsi pourriōs
„ perdre nostre temps. Si leur manderons, se vous

l'acordez, que nous leur liurerons place demain à matin. Et ilz lui respondirent, que moult bien auoit dit. Mais huy est trop tart, & Soleil reconfant. Si est bon de y enuoier matin droit à Soleil leuant. Celle nuit se firent noz gens bien garder: mais pou auoient à viure, dōt il leur desplaifoit. Et le landemain droit à Soleil leuant, les Engloiz regarderent les François, & eulx aussi. Car bien cuidoient les vns des autres, de chacun des deux parties, que de nuyt s'en deussent estre fouys. Mais nennyl. Car les vns veoient bien les bannieres des autres bien à plain. Adonc enuoya Bertran vn sien Herault en l'ost des Engloiz, pour place deuifer, lequel cheuaucha tant, qu'il vint deuant le Captal, & puis lui dist ainsi: Sire, „ Bertran, & tous ses compaignons vous mandent „ de par moy, se vous voulez auoir bataille, ou „ non. Et se elle vous plaist, tout maintenant vous „ liureront place sans arrester, oultre celle riuere „ deux traiz d'arc, lequel qu'il vous plaira. Et se ce „ ne voulez faire, alez encontre Bertran du Gues- „ clin le preudomme, vous Iehan Iouel, & Pierre „ de Saquainuille, ou tiers champions, pour vous „ couvrir de cop de lance, c'est assauoir de fer de „ glaiue. Et celui qui sera abatuz pourra là des- „ soubz liurer place à sa deuise, où il & son com- „ paignon s'en retourneront à leur hostel, & lair- „ ront ladite place. Et quant le Captal oy le He- „ rault, qui ainsi parla, il se tut tout coy, & ne son-

„ na mot. Puis dist ainsi: Gentil Herault, ie ne le
„ vous celeray ia, ie cognois biẽ Bertran & savou-
„ lenté. Mais ie vous dy que quant le iour vendra,
„ que il y aubataille entre nous & ses gės. Ie as-
„ sembleray à lui par Dieu qui tout crea, & si des-
„ cendray aussi quant il me plaira, mais il n'est pas
„ temps. Car i'entens vn secours, qui sans faillir
„ me vendra. Sire, ne vous en vantez ia. Car ce n'est
„ pas par nous, se il n'y a bataille, que Monsieur
„ Bertran l'a depieça moult desirée. Adonc descē-
di le Herault de la montaigne, & vint aux Fran-
çois, & leur dist la responce dudit Captal. Ainsi
demoura la chose toute la nuit en cest estat. Et
furent là endroit noz gens deux iours & deux
nuis en ce point: & n'auoient que mengier. Si les
appressa moult la faïn, & Engloiz auoient des
viures assez. Car bien y auoit, qui leur en appor-
toit. Et noz gens n'en pouoient nulz auoir. Car
noz gens ne s'osoient mettre au chemin, pour
doubte desdiz Engloiz, qui si prés estoient. A-
donc noz gens, qui bien eussent mengié lait &
fromaige sans pain, enuoierent en fourrages
leurs varlez. Mais ilz ne trouuerent chose, qui
leur fust prouffitable, excepté enuiron deux cės
haches, qu'ilz prindrent des villains en village,
lesquelz les en vouloient porter. Mais pour tant
que iceulx villains les vouloient requeurre, &
eulx mettre à deffense, iceulx varlés les tuerent
tous & mirent à mort, & emporterent lesdites
haches,

haches, qui puis en orent grant besoing à labat-
 taille. Ainsi auoient noz gens tref-grant faulte
 de viures, & tant que par necessité vrgente ilz
 mengoient chars de cheuaulx en lieu de beufs &
 de moutons. Et ainçois que fust le tiers iour, plu-
 sieurs se pasmerent pour fain qu'ilz auoient.
 Dont s'auisa Bertran, & leur dist: Ie me suis au-
 sé comme nous le ferons. Nous monterons tre-
 stous à cheual, & ferons trapasser tout nostre
 harnoiz & sommage, que les varlés merront de-
 uant. Puis passerons ceste riuiere, & ferons sem-
 blant que nous nous en fuyrons. Et quant les En-
 gloiz nous verront ainsi deslogier, ilz cuyderont
 que nous nous en vucillôs fouyr de grant paour.
 Si descendront à val, & lors nous retournerons à
 eulx à force de cheuaulx, bannieres desployées:
 & soyons trestous prest. Et que on le die & fasse
 assauoir à tous les compaignons. Et i'ay à Dieu
 en conuent, que se on le fait ainsi, ie croy que
 nous les desconfirons. Et le fauldra ainsi mander
 à l'Arche prestre. Et de ce furent tous d'acort. Et
 que partir les veist de place, il cuidast bien que
 iamaïs n'en deussent pié retourner. Adonc les
 Engloiz, qui leur partemēt apperceurent, l'ale-
 rent dire au Captal; dont il out grant merueille.
 Car il dist, qu'il n'auoit oncques mais oy com-
 pter, que Bertran se daignast departir de place.
 Et les Engloiz, qui sur la roche estoient montez
 pour mieulx veoir noz gens, lui dirent derechef,

que pour certain ilz s'en aloient, & qu'ilz auoiēt
 veu les varlés à tout les males & fommiers, qui a-
 loient deuant. Et les gens d'armes aloient derrie-
 re, pour les garder. Adonc dist le Captal: Il nous
 fault aualer, pour récontrer Bertran. Car ie vueil
 auiourd'huy deshonnouer. Et se assener le puis,
 ie le mettray en tel point, que iamais ne s'osera
 monstrier deuant Prince. Moult auoit grant io-
 ye le Captal. Mais Pierre de Saquainuille estoit
 courroucié sans de ce que on aualoit. Lors dist
 vn Engloiz, qui Manchion de Blancbourg auoit
 nom: Iamais ne me creez, se Bertran ne retour-
 ne tantost, comme nous approcherons de lui. A-
 dōc respondi Jean Iouel vn Engloiz moult oult-
 trecuidé. Vous faites folie de ainsi parler. Ne vo⁹
 esmayez point ainsi. Et se vous vous doubtez de
 lui, si n'y mettez le pié. Car qui point d'argent
 n'a, il n'a au marchié que faire. Conuiét-il pour
 vn homme plain d'oultrecuidance perdre sens
 & honneur? Tel redoubte Bertran, qui ne le cō-
 gnoist. Et en guerre gist auanture. Car li vns y
 pert, li autres y gaangne. L'vn y prent santé,
 l'autre maladie. Et tel desconfit hyer sa partie
 aduerse, qui auiourduy perdra les membres, &
 la vie. Adonc se tut Manchion de Blancbourg.
 Mais autre chose pésoit. Non pour quāt heoit-il
 durement Bertra, pour ce que deux siens cousins
 lui auoit occys en Bretagne. Ainsi s'aualerent
 Engloiz, qui disoient l'vn à l'autre, que Bertran

s'enfuyoit. Mais il ot moult grant ioye quant il les vit deualer. Et dist à Thibaut du Pont, qui estoit de lés luy. Nous tendons à la ray, vecy les oyseaux prins. Adonc fist sonner sa trompette si haultement, que les plus lointains l'oyrent. Et adonc s'en retournerent trestouz reste leuée, & firent sonner plusieurs autres trompettes. Et quant Engloiz virent la retournée, ilz furent esbahiz comme bestes. Et Pierre de Saquainville dist: Bertran nous a donné du lart. Moult fu dolent le Captal & ceulx de sa compaignie. Et voulentiers fussent remonte en la montaigne, mais ilz n'auoient loysir. Car la chose estoit trop hastée. Car aussi tost comme Engloiz furent deualer, noz gens se monstrerent deuant eulx tous, rengiez & ferrez en ordonnance de combatre. Adonc le Captal dist à ses gens: Seigneurs, ne nous doubtons point, mais montrons au iour bon semblant contre noz ennemis. Car espoir, qu'ilz font leur mescheance. Nous sommes plus de gent, & si auons assez de viures, & moult de remenant. Dont nous sommes plus appers, plus puissans, & plus fors. Et François ont longuement ieuné, pourquoy ilz sont plus foibles & recreuz, ne ie ne prise point leur force. Car ilz sont tous affamez. Mais par leur beubant, pour ce que ilz cuident que on lez syeue, ilz sont retournez en monstrant fier semblant. Prenons vne soppe en vin. Car nous ne fauons quant nous l'arons mais

„ ensemble. Mais se ie puis, ie challengeray ma
 „ vie, ne ilz ne me prendront point comme lieure
 „ en fuyant. Et par semblable dist Iehan Louel. Et
 entretandiz comme Engloiz beuoient de bon
 vin, noz gens passerent la riuiere d'Eure, qui en
 burent à leur voulenté. Et les fuyuoiet plusieurs
 femmes, qui moult les confortoient de boyre.
 „ Et leur dist Bertran: Or auant fillettes, la plus
 „ pouure de vous sera riche à ceste foiz. Et Bau-
 doyn Denequin dist, qu'il s'esmeruilloit moult
 où estoit l'Arche prestre. Mais pour neant le di-
 soit. Car on auoit dit à l'Arche prestre, que noz
 gens estoient desconfiz, pour ce qu'ilz auoient
 passé la riuiere. Et ce fu la cause, pourquoy il ne
 reuint point. Mais plusieurs de les gens retour-
 nerent.

*De la bataille de Cocherel faite par Bertran & les au-
 tres François, en laquelle le Capital & les dessusdiz
 Engloiz & Nauarroiz furent tuez, & descon-
 fiz. Et apres ce Monsieur le Regent donna à Bertran
 la Conté de Longueuille.*

CHAPITRE XI.

AINSI comme François & Engloiz estoient
 l'un deuant l'autre tous armez & appareil-
 lez, pour combattre en la plaine de Cocherel, en-
 tre la riuiere d'Eure & vne grant montaigne, qui

ioint au bois; le Captal de Buich, lequel estoit Capitaine d'iceulx Engloiz, comme dit est, aparcut que la greigneur partie de ses gens n'auoient volenté de combattre, pour ce que ladicte montaigne, qui derriere eulx estoit, les arguoit trop fort. Car ilz n'eussent peu foyr le besoing leur en fust. Ledit Captal, qui bien sauoit les faiz appointier, & attendoit le secours d'un Escuyer, qui lui deuoit amener six cents bacinets, enuoya en l'ost des François un Herault: entour lequel, quant venu y fut, tous les Barons s'assemblerent pour oyr qu'il vouloit dire. Si leur dist les paroles qui s'ensuiuent, ou les semblables: Seigneurs, le Captal de Buich, le Bascon de Mareul, Jehan Iouel, & tuit li Cheualiers Engloiz m'enuoient deuers vous, & vous mandent, que par tres-bonne amour, & sans nul mal penser, ilz vous donneront de leur vin se vous en voulez. Car ilz sceuent bien, que vous n'avez pas gramment à boyre ne à mengier: ne aussi ne vous est pas grant mestier de vous liurer bataille, ne de vous faire mechainier. Et s'il vous plaist par respit retourner arriere, ilz vous en lairont aler vostre chemin, & s'en retourneront aussi, sans vous adomagier en rien. Si vous vueillez conseiller sur ce. Car aussi bien pourrez vous perdre en la bataille, comme gagner. Adonc respondi Bertran au Herault: Vous fauez tresbien preschier, & pour ces paroles ie vous donray un coursier & cent florins. Et

» vous direz à vostre retour par delà, que nous i-
» rons à eulx, s'ilz ne viennēt premiers à nous. Car
» se Dieu plaist, ie mangeray encore nuyt du Cap-
» tal vn quartier: ne ie ne pense mais huy à men-
» gier d'autre chair. Et quant le Herault l'entendi,
il lui sembla que ce fust à dire, que se icelui Cap-
tal estoit prins, il paieroit les fraiz de Bertran &
de ses hommes. Si fu le dit Herault moult esmer-
ueillie de ceste response. Puis prist congie audit
Bertran, & le mercia moult du don, que fait lui
auoit. Et ala relater audit Capital, & aux Engloiz
ce que le dit Bertran lui auoit respondu. Adonc
dist le Capital, que nuls ne fust esbahi, mais se
mist en courroy, que trop auoit-on attendu.
Lors commença la meslee d'une partie & d'autre,
des varlés François contre les varlés Engloiz, de
dagues, de cousteaux, & de bastons affaitiez. Et
battirent tant l'un l'autre emmy le pré, que le
sanc leur failloit par bouche & par nez, & en plu-
sieurs autres parties du corps. Mais les varlés Frā-
çois auoient bonnes haches d'espreuue. Parquoy
les varlés Engloiz furent desconfiz, les aucuns
d'iceulx naurez & abatuz, & les autres tuez, &
leurs cheuaulx aussi. Et quant Bertran le sot, si en
ot tref-grant ioye, & dist aux Cheualiers Fran-
çoiz, que c'estoit vn bon signe: dont Dieu fust
loé & beneist, & que la iournée seroit pour eulx.
Et quant ladite bataille des varlés fu finée, moult
volentiers se feussent desfengiez les engloiz.

Mais ilz se gardoient de mesprendre. Car les François estoient sur les champs si noblement armez, & de si belle monstre, qu'il sembloit que ce feussent droiz Enges. Adonc se party des Engloiz par le gré du Captal vn Escuyer des leurs, qui vint demander sa iouste d'un cop de glayue contre vn des nostres. Et plusieurs en y auoit, qui bien y voulzissent aler. Mais Bertran ne le vult acorder, fors que à vn Escuyer, qui auoit nom Rolant du Boys, lequel tout armé ainsi comme il appartenoit monta à cheual, & vint iouster contre ledit Engloiz, en telle maniere qu'il luy perça toutes ses armeures, & le naura bien auant en char. Et aussi fist l'Engloiz lui dessoubz l'esselle. Mais pour tant que le cop de Rolant fu pesant, il conuint ledit Engloiz à trebucher, & en emmena son cheual ledit Rolant. Mais icellui Engloiz fu secouru & emporté des siens. Et moult estoient les Engloiz doulent, tant pour ceste cause, comme pour la dessusdite desconfiture de leurs varlés. Et dirent, que sans plus des-crier ilz assembleroient. Et le Captal leur dist, quilz ne se hastassent pas, & que tout à tant ilz vendroient à eulx. Mais ledit Captal par sa malice fist mettre sa table emmy le pré, où il estoit, & du pain & du vin dessus, & plusieurs chappôs. Et ce faisoit-il pour arguer nos gens. Mais Bertran les tenoit ensemble sans separation, & aprouchoient Engloiz tout doubcement sans.

noy se faire, les Archiers deuant eulx. Lesquelz
commencierent à traire, & les engloiz contre
eulx aussi à l'aproucher. Mais ce ne dura pas lon-
guement. Car si tost comme le trait fu failly, les
gens d'armes se assemblerent, qui se combati-
rēt à force de glaiues, d'espées, & de haches. Et moult
fu forte & cruelle la bataille. Et Bertran y vint
assembler de grans cops. Et aussi faisoiet de l'au-
tre lez, le Bascon de Mareul, Jehan Iouel, & Pier-
re de Saquainuille, & autres Cheualiers & Escu-
yers de l'un lez & de l'autre. Et crioient les vns
Guesclin, les autres Aucerre, & les autres Beau-
mont. Si y estoit Messire Baudoyne Dennequin,
qui moult bien s'y portoit. Et Thibaut du Pont
tenoit à deux mains vne espée, & feroit sur En-
gloiz comme forcené. Mais son espée rompy en
la presse. Mais vn Breton seruiteur, qui apres lui
estoit, lui bailla vne hache grāt, & pesant, & du-
re. Si en fery vn Cheualier Engloiz, qu'il rencon-
tra en son chemin, en telle maniere que le cop
lui coppa & lui abati la teste ius. Là reconforta
l'estour, & moult s'y prouua puissamment Ber-
tran, en criant Guesclin. Et disoit aux nostres: Or
" auant mes amis, la iournée est à nous. Pour Dieu
" souuiengne vous, que nous auons vn nouueau
" Roy en France. Que aujourduy la Courronne
" soit honnourée par nous. Adonc prindrent noz
gens grant courage en eulx, & tres-fort assailli-
rent Engloiz. Mais le Captal, qui confortoit les
Engloiz,

Engloiz, tant cōme il pouoit, y fiſt ce iour merueilleuſe proeſce. Tant que en toute place eſtoit ſa force redoubtée. Car moult eſtoit hardi & plain de grant vaillance. Et ſe il euſt eſté aidant à la Couronne de France, on peuſt bien dire que ce fuſt flour de Cheualerie. Mais pour le bon ſeruiſce qu'il fiſt aux Engloiz, il mourut plus vilainemēt en vne priſon, où moult priſt de deſplaiſance. Mais ce iour porta en ladite bataille puiſſamment ſa lance. Et auſſi firent du coſté des François le Conte d'Aucerre, le Cheualier Vert qui ſon compaignon eſtoit, le Viconte de Beaumont, le Sire d'Ennequin nommé Baudoyne Maistre des Arbaleſtriers de France, le Beſgue de Villaines, le Sire de Sempy, le Sire de Rambures, & Meſſire Enguerran Deudin, qui ne doit pas eſtre obliez. Ces Seigneurs cy ſ'y porterent tref-eſpeciaulment, & tous les autres moult bien generaulmēt. Mais Engloiz ſ'y porterent moult puiſſamment, tant que à vne empreinte ilz occirent de noz François le Sire de Betencourt, Regnault de Bournouille, qui en la place fu fait Cheualier, Iehan de Serarpot, Iehan de Cayeu, Pierre de l'Epine, Guillaume de Trenchant, & pluſieurs autres Eſcuyers François: dont ce fu grant dommage. Et le Baſcon de Mareul cryoit comme tout enragié: Où eſtes vous alez, Bertrā? „ Vous cuidiez à matin auoir trouué poucins. „ Mieulx vouldiſt, que vous feuſſiez accordez à „

„ nous. Et quant Bertran l'entendi, il assembla audit Bascon comme vn lyon creté, & le fery en telle maniere qu'il l'abaty à terre emmy le cháp. Et là fu tellement atourné ledit Bascon, que on cuidoit que iamais n'en deust releuer. Mais il fu tantoist secouru d'Engloiz. Et entour lui commença l'estour grant & merueilleux. Moul s'y porterent tous les François, grans & petiz, & par especial ledit Bertran & les dessus nommez. Et moul se doubtoient Engloiz. Car ilz perdirent moul de leurs gens. Mais moul les confortoit le Bascon de Mareul. Et aussi faisoit le Captal, qui souuent regardoit, se vn secours lui vendroit de sept vingts glaiues, que il attendoit. Mais ilz vindrent trop tart, ainsi comme vous orrez cy-apres. Si se combatoit tellement ledit Captal, qu'il faisoit rens * entour lui. Et Bertran de l'autre partie, qui tousiours prioit que le Roy en son ioyeux auenement peust oir bones nouvelles de ladite bataille, qui moul estoit dure & aspre: & moul y ourent à souffrir les François. Car ilz perdirent tout à vne foiz deux nobles Barons, qui par leurs hardiesses estoient trop abandonnez sur les Engloiz: c'est à sauoir le Viconte de Beaumont, & Messire Geuffroy d'Ennequin, lequel fu occis du Bascon de Mareul. Dont moul fu dolent Bertran, & la Baronnie aussi. Mais le Conte d'Aucerre, & le Vert Cheualier, donnerent tel assault audit Bascon, qu'ilz

se liurerent à mort en la place. Dont les Engloiz orent moult les cuers pensans. Et tantost apres Iehan Iouel se fery & bouta si auant és François, qu'il fu nauré à mort, & fu lessié comme pour mort. Adonc vindrent à nos gés deux coureurs, de deuers les champs, qui leur dirent, qu'ilz ne se doubtafset point, & qu'il leur venoit de secours sept vingts combatans. Dont François furent à merueilles resioys: & moult leur en reuindrent les cuers. Et combien que ledit secours ne venist pas à eulx, mais à leurs aduersaires; ce nonobstât ilz se bouterent tellement as Engloiz, & de si grant force & raideur, qu'ilz les firent à celle foiz tous ressortir, & leur occirent de leur gens Robert du Sart vn Cheualier Engloiz, qui par auât faisoit moult à redoubter, Glaissenyen l'Ale-
mant, Iossequin, & Pierre de Londres, qui nep-
ueu estoit à Chandoz. Et entretandis que noz gens maintenoient ainsi la bataille par le conseil de Bertran, se party d'eulx Eustasse de la Houf-
foye, qui en amena avec lui deux cens lances, & se vindrent mettre derriere vne haye, où auoit plusieurs grans buissons, en vne pièce de terre, où iadis auoit eu vigne, qui lors estoit en friche. Et tant firent les nostres, qu'ilz percierent ladite haye, & se mistrent derriere les Engloiz. Puis se ferirent en eulx moult rudement, en escriant Guesclin: & leur leuoient leurs armeures. Si y boutoient glaiues & espées, & les tresbu-

choient par terre bien durement. Car ledit de la Houffoye, & feldites gens auoient l'auentage de la montaigne, & si auoient le doz des engloiz deuers eulx. Lesquelz ne se pouoient retourner pour eulx deffendre, mais versoient l'un sur l'autre, & crioient fort. Car moult estoient corrociez & doulens. Et le Captal veoit bien cest encombrer. Mais il ne s'osoit retourner, pour ce que Bertran le lui defendoit, avecques lui Thibault durôt vn hardiescuyer, lequel vint aherdre à deux ledit Captal par la cheuechaille du haubert. Et les autres François aussi si l'appresserent moult fort. Mais il tenoit vne dague en sa main, dont il se defendoit moult fierement. Mais ledit Thibault le tenoit tellement, qu'il ne pouoit nullement eschapper. Et là receut tant de cops, & fu si vilainement batu, qu'il ne veoit ne entendoit. Et lors lui dist icelui Thibault hautement à clere voix: Haa! Sire, rendez vous. Il vous en est besoing. Certes, vous estes mort, si plus y tardez. Voire, ce dist Bertran, qui bien entendoit à le tenir, i'ay en conuenant à Dieu, que se tantost ne se rent, ie lui bouteray mō espée dedens le corps. Et quant ledit Captal l'oy, si dy: Haa! Or voy-ie bien qu'il demeure souuant de ce que le fol pense. Beau Sire, ie me rends à vous, puis que ainsi va. Et Bertran le receut, & en prist la foy. Pierre de Saquainuille aussi a rendue sa main, en disant qu'il se rendoit. Briefment tous les engloiz furent desconfiz, & mors, ou priz. Adonc se cui-

dierent bien l'ost des François reposer, quant vne espie vint à grant haste dire à Bertran, & aux Seigneurs qui là estoient, qu'il venoit contre eulx sept vingts glaiues courant moult fort. Haa! Dieu, ce dist Bertran, ie cuidoye de vray que ce fust l'Arche prestre, qui ainsi venist. Il nous a tourné le doz au besoing moult laide-
 ment. Et vn sien Escuier, qui à lui estoit, respondi: Sire, par Dieu on dist à l'Arche prestre en ma-
 presence, que vous & toutes voz gens estiez desconfiz. Non fuy, Dieu mercy, ce dist Bertran. Or auant, mes amis, il nous conuient hastiue-
 ment combatre les Engloiz, & les enclorre en telle maniere, qu'il n'en puist vn tout seul re-
 tourner à sauueté. Mais nos gens osterent à tous leurs prisonniers leur bacinet: & s'ilz ne leur laisserent costel ne espée, ne autres armeures defen-
 sables, dont greuer les peussent. Et ce firent-ilz, pour ce qu'ilz ne sauoient pas bien leur pensée, & se parauanture ilz changioient leurs propos. Puis se mirent nosdites gens ensemble en tresbonne ordonnance, & alerent assaillir les Engloiz, qui contre eulx venoient. Et quant ilz virent noz gens ainsi ordenez, ilz aperceurent bié que leurs gens auoient perdue la iournée. Si cuidierent fouyr, mais ilz ne purent. Car ilz furent tellement enclos, que bien pou en eschappa, qu'il ne conuenist icelui iour mourir à l'espée. Et Bertran dist: Alez-vous en, foles gens. Deables

„ vous ont bien mis en ce pays. Et maudit soit-il,
„ qui si grant assemblée en a fait. Car le Royaume
„ en est bien encombrez, ne oncques mayz n’ot
„ Roy en France, puis que Crestienne fu, qui trou-
„ uast sa terre ainsi peuplée de ainsi mauuaise gét,
„ comme ceulx-cy sont. Mais se ie vy long temps,
„ elle en sera deliurée. Et l’Escuyer, qui ledit se-
cours auoir amené aux Engloiz, s’en retourna au
chastel de Nonencourt, dont party estoit para-
uant. Mais en son chemin au retour, il deuesti vn
tunicle que vestu auoit, semé de broderie d’ar-
gét: & s’affubla d’un sac qu’il trouua en vn mou-
lin. Et quant il fu venu audit chastel, & ledit Cha-
stellain le vit retourné en tel habit tout seul, &
sans aucun de ceulx qu’il auoit amené, si lui de-
manda, comme il aloit. Et il lui respondi, mau-
uaiselement: & que le Captal, & Pierre de Saquain-
uille estoient prins: & le Bascon de Mareul, Jean
Iouel, & tous leurs autres gens mors, ou feruz à
mort. Et quant le Chastellain l’oy, tout le sanc
lui mua. Et incontinent eust fait mourir ledit
Escuyer. Mais tantost vn autre vint là, qui à la
derniere bataille auoit esté, lequel conferma la
parole du premier message. Mais entretandiz
que les François combattoient & desconfissoient
le secours dessusdit derrain venu, & qu’ilz e-
stoient partiz de la place, où ilz auoient eu la vi-
ctoire, plusieurs villains du pays vindrent des-
pouiller les mors. Et quant les gens d’armes s’en

retournerent, iceulx villains s'enbrouerent bien tost pour doubte de mourir. Et iceulx, qui pourrent estre attainz ourent mauuais paiement. Mais noz gens prindrent le Viconte de Beaumont, le Sire d'Ennequin, qu'ilz emporterent pour eulx enseuelir & donner sepulture, qu'ilz orent mout honorable. Et plourerent maintes lermes Cheualiers & Escuyers des plus preux de l'ost François. Puis cerchierent nosdites gens entre les mors, tant qu'ilz trouuerent Iehan Iouel, qui ledit iour auoit esté tenu pour mort, qui ne l'estoit pas encores. Mais il ne valloit gaires mieulx. Si le firent trousser sur vne charrette, & aussi cerchierent, qu'ilz emporterent auecques eulx les autres bons Cheualiers de nom, & Escuyers de pris, qui mors estoient en la place. Puis firent monter le Captal, Guillaume de Granuille, Iehan Dauy, & tous les autres prisonniers, dont moult y auoit de nobles & de riches. Et cheuaucherent sur le soir tous noz dessus diz François, tant qu'ilz vindrét à Vernon. Et moult auoient grant fain tous les mieulx vanez. Et entretandiz que noz gens entroient en ladite ville, ledit Iehan Iouel mourut. Si le firent mettre en terre, puis s'en alerent en la ville de Rouën. Et firent sauoir par lettres au Roy nostre Sire, ainsi que auenu estoit, & les noms des prisonniers qu'ilz tenoient, en la cité de Rains, où il deuoit estre consacrez le iour de la sainte Tri-

nité lors prouchain aduenir, qui fu l'an de grace
MCCCLXIV. Le Ieudy prouchain precedent fu
ladite bataille deuant Cocherel. Et pour certain
audit Sacre auoit tref-grant planté de Ducs,
Contes, Barons, Cheualiers & Escuyers, & au-
tres Gentilz hommes. Mais le Roy nostredit Sei-
gneur fu sacré le Dimenche apres ladite feste de
Trinité. Lors vint-on dire au Roy les nouuelles
de ladite victoire & prinse du Captal, & Pierre
de Saquainuille, & autres prisonniers. Et quant
le Roy le sceut, si en mercia & loagrandement
nostre Seigneur, qui telle honneur & telle grace
lui auoit faite en son ioyeux aduenement: &
prioit pour ses Barons; que Dieu les lui voulzist
sauuer. Car moult leur sauoit bon gré de ceste
besoingne: & par especial sur tous autres à Ber-
tran. Et leur mada par ses lettres, qu'ilz teinssent
en bonne prison ses ennemiz. Et ilz si firent. Car
ilz les mistrent ou chastel de Rouën. Si vous dy,
que la feste du Sacre si fu moult efforcée pour
ces bonnes nouuelles. Là estoit le Duc de Bray-
bant oncle du Roy, le Duc Aubert Conte de
Haynau, & le Duc de Bourbon frere de la Roy-
ne. Et apres le Sacre, le Roy s'en vint à Paris,
où il fu receu en grant honneur, 'que ie ne vous
pourroye dire. Mais gaires n'y arresta, ains s'en
ala à Rouën, où il trouua les nobles Barons, dont
il fu moult honnouré & conuoyé. Apres ce cō-
manda à decapiter Pierre de Saquainuille, lequel
estoit

estoit né du Royaume, & auoit esté aduersaire du Roy, comme dit est. Puis apres le bon Roy, en qui estoit toute honneur, & qui bien sauoit con-
gnoistre & remunerer le bon seruice de chacun en temps & en lieu, festoya moult ses Barons, & au departir leur donna largement du sien. Car il ne vouloit retenir la poine de aucun. Mais entre les autres il donna à Bertran la Conté de Longueuille, où il auoit plusieurs Nauarrois, qui ne le vouloient receuoir. Mais puis fist-il tant, que le pais lui fu deliuré à plain. Ainsi fu Bertran Cōte, & avec ce estoit Mareschal de toute Normēdie; où le Roy le laissa quant il s'en retourna à Paris. Et bien estoit besoing qu'il y fust, pour garder le pays. Car en Coustentin auoit lors plusieurs forteresses Englesches & Nauarroises, qui moult greuoient le pays de Normendie.

De la prinse de la Valongnes, Carantan & Douure, faite par ledit Bertran & ses gens: & d'une desconfiture faite par eulx sur les Engloiz ou dit pays de Normendie.

CHAPITRE XII.

BERTRAND du Guesclin assembla avecques lui à Rouen plente de bonne gent: & y estoit le bon Conte d'Aucerre, le Vert Cheualier, le Besgue de Villaines, Alain de Beaumont,

qui grant volenté auoit de vengier la mort de feu le Viconte de Beaumont son frere, Oliuiet de Mauny & sō frere Alain, Eustasse de la Houf-foye, & plusieurs autres. Lesquelz se partirent de ladite ville de Rouën pour aller assaillir lesdites forteresses. Et faisoit Guillaume Boitel leur auant garde, lequel trouua en chemin les Engloiz embuschez, qui fierement l'assaillirent. Mais il & les siens se defendirent tellement, que les Engloiz furent desconfiz. Et en mourut bien sept vingts en la place, & le demourant s'en fouyrent à Valongnes. Et quant ilz furent venuz, ilz commencerent à crier aux Engloiz moult affreement, qu'ilz allassent à garant, & que le deable venoit, Bertran du Guesclin, qui ne prenoit homme à rençon. Et quant ilz l'oÿrent, ilz coururent trestouz aux carneaux. Si vous dy, que la ville n'estoit pas forte, ne oncques n'out esté. Mais il y auoit vn chastel moult bien guerité, ouquel auoit vne tour de encien ourage: & entour icelle estoit la basse court. Et tantost ceulx de ladite ville manderent la venue de Bertran à saint Sauueur, & à Caranten, que tenoient les Engloiz. Et Bertran cheuaucha tant, que il & ses gens vindrent deuant ladite ville de Valongnes, où il mist le siege. Puis s'en vint sur le fossé requerre au Chaltellain, qu'il lui rendist le fort, ou se non, & il le prenoit à force, il le feroit mourir, & tous ceulx qui dedens estoient. Et il respondi à Ber-

tran, qu'il n'y mettroit ia le pié, & que du Royne
 de lui ne donroit vn bouton. Et Bertran lui dist,
 qu'il voulust ou non, il auroit le chastel, & si lui
 feroit la teste trancher. Adonc ledit Chastellain,
 qui Engloiz estoit, & moult heoit les François,
 & qui oudit fort auecques ceulx du pays auoit
 bien cent soubdoyers d'Engleterre, fist mettre
 en plusieurs lieux coustes pour le trait, & es au-
 tres cloyes & fiés pour les engins. Car icelui iour
 assaillirent noz gés moult fort. Mais riés ne leur
 valu, dót moult fu courcié Bertran. Celle nuit se
 logierent en la ville, & ot conseil auecques les
 nostres, comment on peust auoir la tour. Si dist
 le Conte d'Aucerre, puis que assault n'y valoit
 riens, qu'il conuenoit que ladite tour fust rom-
 pue d'éging, on minée de mineurs. De cest acort
 furent tous. Si enuoierent à saint Lo querir six
 engins gettans pierres, lesquelz noz gens firent
 getter moult fort contre ladite tour. Mais il ya-
 uoit vne guerite, qui sonnoit vn bacin quant la
 pierre deuoit eschapper. Et puis le Capitaine
 frotoit & essuyoit les murs d'vne blanche touail-
 le, en riant & soy mocquant de nos gens. Et
 quant Bertran, qui moult courcié en estoit, vit
 ce, si fist apprestier des mineurs pour commen-
 cier vne mine. Mais point n'y pouoient miner,
 pour ce que le chastel estoit assis sur roche. Dont
 tint conseil auec les Barons: entre lesquelz estoit
 le Viconte de Rohan, le Sire de Beaumanoir, en

eulx disant qu'il auoit entendu que le Conte de Montfort, avecques lui Jehan de Chandoz, Robert Canole, auoient asseigié le chastel d'Alroy en Breraigne: lequel se pris estoit, le Conte de Bloys auroit tout perdu. Pourquoy, se bon leur sembloit, ilz lairoient ce chastel, qui moult fort estoit à prendre, où ilz estoient deuant. Et quant il les manderoit, ilz yroient. Mais mieulx valoit ainçois de prendre le chastel de Valongnes, où ilz tenoiêr le siege. Car aussi estoit-il moult nuisant au Roy, & audit Charles de Bloys son cousin. Adonc liurerent deux fois assaut audit chastel. Et pour ce que le Chastellain fceut, que les nostres auoient iuré le siege, & aussi que se par assaut estoient pris ceulx de dedens seroient perdus, & auroient les testes coppées. Il parla à ses gens, qui bien estoient d'accort dudit chastel rendre, sauf leurs corps & leurs auoirs. Puis s'en vint ledit Chastellain sur les carneaux, qui acheua de la main. Et Bertran monta à cheual, & ala parler à lui sur les fossez, pour oïr qu'il voudroit dire. Et le Chastellain lui dist, que se il vouloit le chastel acheter, il lui vendroit, à lui liurer lendemain, pour la somme de trente mille frans. Et quant Bertran l'entendi, il dist que on ne se deuoit point rufer, & que ainçois seroit-il deuant vn an tout entier, que ia il en fist bailler vn seul denier: mais il logeroit en la ville où il auoit de bons hostelz, qu'il feroit tres-bien auailier de

tout ce qu'il leur conuendroit pour l'iuier passer:
 puis quant vendroit à l'esté, se il pouoit atraper
 ledit Capitaine, ne les siens, il les feroit tous pé-
 dre. Et combien qu'il n'eust lors que six engins,
 il en auroit assez, ains la quinzaine. Ainçois ne
 demourroit-il engin en toute la Normendie. Et
 se dedens trois iours ne se rendoient, iamaïs ne
 leur feroit amour ne courtoisie. Dont respondi
 le Capitaine, qu'il lui en donroit responce, mais
 qu'il eust parlé à ses gens: lesquelz il assembla, &
 monstra que ce seroit grant folie, de eulx plus
 tenir. Dont s'acorderent aucuns, & la greigneur
 & plus saine partie, du rendre, & les autres non.
 Et par especial y en auoit huit rebelles. Mais le
 Chastellain vint à Bertran, & lui dist: Sire, nous
 vous rendrons le fort, mais que nous nous en
 partons, nous & nos auoirs saufs. Et Bertran lui
 acorda, & faufconduit pour lui & tous les siens.
 Et lendemain à Soleil leuant ouurerent la porte,
 & le pont aualerent. Puis s'en partirent chargiez
 & trouffez d'or & d'argent, ioyaux, & autres
 meubles. Et s'en alerent ainsi, comme ordenez
 paioient parauant, les vns à saint Sauueur, & les
 autres à Chierbourg. Et quant François virent,
 qu'ilz s'estoient ainsi mis à voye, & que on leur
 apportoit les clefs du chastel, si commencierent
 tellement à huer, que on n'y oy pas Dieu ton-
 ner. Si y auoit dudit chastel huit Escuiers armez,
 qui moult furent ar...ez, de ce que ainsi estoient

abontagiez, & que tousiours leur seroit reprou-
ué. Si leur venoit mieulx estre occys ou affolez,
que de laisser ainsi leur dit fort. Adonc de com-
mun accord retournerent & entrèrent dedens:
puis fermerent apres eulx, & se desieunèrent des
viures, dont assez y auoit. Et Bertran cheuaucha,
& plusieurs Cheualiers & Escuiers avecques ius-
ques aux barrieres. Puis escria haultemét, ouurez
la porte. Et ceulx de dedens vindrent aux car-
„ neaux, & dirent à Bertran: Sire, or vous en alez.
„ Car vous vous estes trop tost moquié & gabé de
„ nous, ne iamais en vostre viuant ne entrerez ou
„ chastel. Et Bertran leur respondi: Certes, gars,
„ vous mentirez. Car ie y soupperay encores en-
„ nuyt, & vous ieunerez dehors. Adonc furent les
Archiers moult courrouciez. Si firent sonner
leurs trompettes, & leurs Arbalestriers trayre.
Si assaillirent tous ensemble communément. Et
ceulx de dedens se defendoient de cailloux, &
trayoient d'arcs ceulx qui Archiers estoiet. Mais
trop pou furent pour soustenir tel faiz. Car on
les assaillit deuant & derriere, si qu'ilz ne sauoiet
de quel costé defendre. Puis dreça l'en eschielles
contre le mur, que l'en cuida entamer de mar-
teaux de fer, de piques, & de houes. Mais ilz fu-
rent si espés, que on ne les peut dommager. A-
donc noz gens firent tant, qu'ilz rompirent vn
huis de fer, par où ilz entrèrent en la tour. Et
ceulx de dedens, qui trop furent outrecuidiez,

se mirent à defense. Mais pou leur valu. Car ilz furent prins par force, & les fist-on saillir ius de la tour: puis ourent les testes trenchées, pour tant qu'ilz estoient traitres. Et entretandiz que noz gens se logoient oudit chastel, Oliuier de Mauny emmena plusieurs soubdoyers, & ala deuant le fort de Caranten donner vn si fort assault, que tantost on le rendi. Dont Bertran mercia Dieu, quant il fot ladite prinse. Puis fist venir deuant lui le Capitaine dudit fort, qui estoit nommé Pierre le Doux: & lui demanda comme il peust briefmēt auoir vne forteresse nommée Douure, où il auoit vn fort Moustier. Et ledit Capitaine lui respondi, qu'il alast à la forteresse lancier & assaillir, & crier haultement Guesclin; & pour son cry il les feroit plus esbahiz, que ne feroient vn millier des François. Et quant Bertran l'entendi, si lui dist, qu'il auoit failly à voir dire, mais non pourquant ilz seroient assailliz. Adonc s'en ala Bertran assiegier ladite forteresse, qui bien estoit fermée de murs & de fosses: & la fist assaillir. Mais vn gentil Cheualier Engloiz, qui dedens estoit, nommé Hue de Carualay, lequel auoit avecques soy plusieurs Normans, qui hommes du Roy deussent estre, se deffendi en telle maniere, que riens n'y perdirent ceulx dudit fort. Adonc Bertran fist miner dessoubz les fosses, & le Moustier aussi. Et dura ladite mine, qui tres-grant estoit, moult longuement: & si secre-

tement fu faite, que ceulx de dedens ne s'en pour-
rent apperceuoir, iusques à vn certain iour, que
plusieurs des compaignons de leenz disnoient
ensemble enuiron heure de midy. Si auoit l'vn
d'eulx mis vn pot & vn voirre sur vne fenestre,
qui dedens le mur estoit. Mais pour cause de la
mine, qui dessoubz le dit mur estoit, il commen-
ça si fort à croller, que le dit voirre trembla tant
qu'il en espan di du vin. Adonc aperceurent ladi-
te mine, & contreminerent à l'encontre par le
conseil dudit Hue de Carualay, tant & si effor-
ciément, que lesdiz mineurs & contremineurs
s'entr'encontrèrent, & estoient bien près l'vn de
l'autre. Adonc les mineurs François le vindrent
dire à Bertran, & lui dirent aussi, que qui s'en ai-
deroit, on pourroit bien entrer dedens le Mou-
stier. Et Bertran respondi, qu'ilz auoient moult
bien dit. Adonc s'arma lui & ses gens, & se bou-
ta en ladite mine. Mais ilz firent aler deuant eulx
dix d'iceulx mineurs, pour eulx monstrier: les-
quelz trespercierent tant ladite mine, qu'ilz mi-
strent noz gens dedens le Moustier. Adonc es-
crierent haultement Gueselin, & furent ceulx
de dedens si fourpris, qu'il n'out en eux nulle de-
fense: mais se rendirent tous à Bertran. Adonc
fu mise la banniere sur les carneaulx. Puis fist a-
mener tous les prisonniers en la sale deuant lui,
desquelz estoit Hue de Carualay Cheualier En-
gloiz, & dix autres Engloiz de sa compaignie.
Lesquelz,

Lesquelz, eu sur ce bon conseil, ourent leurs vies sauues, & furent mis à rençon. Mais tous ceulx, qui estoient nez du pais de Normendie, qui ou- dit fort furent trouuez, pour l'offense que faite auoyent, orent chacun la teste coppée emmy la- dite ville. Puis alerent noz gens mengier. Et se reposerent iusques au soir, qu'ilz departirent l'auoir entr'eulx. Puis orent conseil entr'eulx, qu'ilz yroient asseoir saint Sauueur, qui est sur la mer. Mais landemain leur vindrent nouuelles, qui les en destournerent. Car vn message vint de par le Duc Charles de Bloys, qui moult reueraul- ment salua Bertran tout premierement, & puis tous les autres Barons; & puis leur dist, comment le Conte de Montfort auoit mis le siege deuant le chastel d'Alroy. Pourquoi le Duc Charles leur prioit & requeroit, comment ilz lui voul- zissent secourir & aidier à leuer ledit siege, & cō- battre ledit de Montfort. Car il ne tendra que en vous. Et se il vous plaist venir, mon Seigneur vous fera tous riches, & vous fera partir tout ce qu'il a vaillant. Si vueillez tous auoir pitié de lui, grans & petiz, que il soit par vous aidiez à gar- der le bon droit que il a. Lors ledit Bertran res- pondi audit message, qu'il deist à son Seigneur; Que tous ceulx qui là estoient presents, desquelz icelui Bertran se faisoit fort, yroient tantost à lui, & ne lui faudroient ne pour mort, ne pour vie. Dont s'en parti le message, auquel il donna

vn destrier. Puis appella les Seigneurs, qui là estoient, & leur montra moult courtoisement, comment le Conte de Montfort assembloit gés pour auoir la bataille en Bretagne contre Charles de Bloys: en l'aide duquel il nous cōuient aler. Car nous en aurons honneurs s'il plaist à Dieu. Si se accorderent tuit, & dirent que tantost ilz vouloient partir pour y aler.

Du siege, qui fu mis par le Conte de Montfort deuant le chastel d'Alroy en Bretagne, & de l'assemblée qui se fist pour ledit siege leuer, & cōbatre ledit de Montfort.

CHAPITRE XIII.

APRES ce que le Conte de Montfort eut asseigié le chastel d'Alroy, lequel auoit en son aide Iehan de Chandoz, Robert Canole, & Hue de Carualay, Cheualiers Engloiz, & d'autres gens d'armes, & Archiers nez du pays d'Engleterre trefgrant multitude: lesquelz estoient en la ville logiez tout entour ledit chastel, & auoient ledit siege iuré, se à force n'en estoient leuez. Ceulx de dedens enuoierent pour secours deuers le Duc Charles leur Seigneur, lequel estoit à Guingant, où il auoit fait son mandement. Auquel vindrent le Conte d'Aucerre, Bertran du Guesclin, Charles de Dynant, le Visconte de Rohan, ceulx de Beaumanoir, Eustasse

de la Hossfoye, Oliuier de Mauny, Guillaume de Launoy, Guillaume Boytel, Guillaume de Brou, le Vert Cheualier, Loys de Chaalon, Philippe de Beauieu, Guerart de Frontigny, Henry de Pierrefort, Haymart de Poitiers, le Sire de Pois de Sauoie, & maint autres Cheualiers & Escuiers de plusieurs pays. Et de Iugon y vint moult belle compaignie, avec le Moyne de Bethune, qui maint iour auoit esté page de Bertran. Mais par sa voullanté l'auoit-il mis en honneur. Et ainsi ledit Mōsieur Charles assembla tant cōme il pot de gens, puis les mena au chastel Iosselin. Et illec furēt nōbrez à quatre mille tous defensables. Et là peust-onveoir maint escus, glaiues, & panons, bānieres, & destriers, espées, haches, & arbalestes. Et landemain se partirent dudit chastel Iosselin, & s'en alerent à Lonuaux Abbaye. Mais tantost vne espie l'ala dire au Conte de Montfort, lequel dist quant il le sot, que moult lui ennuyoit, que pour eux deux conuendroit tant de bons Cheualiers & Escuiers mourir, & estre affolez. Et dist, que moult lui en pesoit, ainsi lui en voulzist Dieu aidier: & qu'il voudroit bien que le Duc Charles fust d'acort avec lui, en telle maniere, qu'il laissast audit de Montfort la moitié de la Duchie de Bretagne paisiblement, par telle condition, que s'il n'auoit hoir de sa femme, ladite moitié retourneroit au Duc Charles apres le trespassement dudit de Montfort. Et Iehan de Chandoz

„ lui dist: Vecy vn bon traitié, & par mon conseil
„ vous lui enuoieriez ceste offre ; afin que on ne
„ puiſt pas dire, que vous vouliez autrui desheri-
„ ter pour vous auancier, & que vous ayez meil-
„ leur cuer de combattre contre lui, ou cas qu'il le
„ refuſeroit: ains mettez poine de pacifier avec
„ lui. Car vous eſtes tous d'vn lignage. Si ſeroit bõ
„ laiſſier le maltalent. A ces paroles le Conte de
„ Montfort enuoya vn ſien Herault deuers le Duc
„ Charles de Bloys, pour luy requerre qu'il voul-
„ zift ordener vne place, où leurs conſaulx peuf-
„ ſent eſtre assemblez, pour les mettre à accort.
„ Adonc s'en ala ledit Herault tout droit à Lon-
„ uaux deuers Monsieur Charles de Bloys, auquel
„ il compta ſon meſſaige. Et lors lui reſpondi, qu'il
„ en auroit conſeil avecques ſes Cheualiers. Les-
„ quelz ſa raiſon oye, lui dirent: Sire, leſſiez faire
„ la bataille. Voſtre ennemy ſe doubte de vous. Et
„ ſe vous nous voulez croiſre, vous aurez toute
„ „ Bretagne à gouuerner, & verrez tous voz enne-
„ miz tourner en voſtre obeiſſance. Et ſi ferez trop
„ blaſmez, de ainſi laiſſier aler voſtre droit. Mais le
„ Duc Charles, qui pluſieurs fois parauant auoit
„ deprié à Dieu, qu'il lui voulzift aidier, ſelon le
„ bon droit qu'il cuidoit auoir en la Seigneurie,
„ diſt à ſes gens; Qu'il lui peſeroit moult de com-
„ battre: Car il redoubtoit moult le pechié de
„ ceulx, qui par fait & occaſion en pourroiet mo-
„ rir. Mais ſesdites gens lui dirent: Sire, que vous

auez bon droit, comme nous le sauons moult „
 bien. Vous n'y aurez pechié, se nous mourons „
 pour vostre fait. Et nous sommes tous vos soub- „
 doyers, vos amis, & vos champions. Si ne vous „
 deuons louer conseil, qui ne seroit bon & loyal. „
 Car il n'y a celui, qui ne soit preudomme. Adonc „
 Bertran dist, que se bon leur sembloit, il mande-
 roit au Conte de Montfort, que il se partesist
 d'Alroy, qui estoit du propre heritage dudit
 Monsieur Charles de Bloys. Ou se non, il seroit
 combatu dedens quatre iours. Si s'en alaist à Mō-
 fort, qui sien estoit. Et de ceste chose furent les
 Barons d'acort, qui leur dite responce chargie-
 rent audit Herault. Lequel le Duc Charles appel-
 la lors, & lui demanda se il sauoit sur quel point
 le Conte de Montfort vouloit traitier avecques
 lui. Et il lui dist, que bien sauoit, que il seroit de
 lui, par lui baillant la moitié de la Duchie, com-
 me dit est dessus, & par la maniere & condition
 dessus dite. Et en eust lors esté d'acort ledit Char-
 les pour l'onneur de Dieu, & pour guerre esche-
 uer. Mais il fu de par sa femme tiré à part de ses
 hommes, qui lui dirent : Sire, pour Dieu que „
 voulez-vous faire? Vous n'avez pas cuer de vail- „
 lant Cheualier. Car ainsi comme homme re- „
 creant & failly, voulez lessier aler ce qui de droit „
 vous appartient à cause de vostre femme. Car nul „
 Cheualier n'est digne de terre tenir, se il ne la „
 defend à l'espee, quant besoin en est. Et ainsi le „

„ monstre Caton en son Liure, se de son conseil
„ voulez vser. Et vous sauez aussi, comme vous e-
„ stes de grant lignage. Si ne deuez pas à vostre po-
„ uoir souffrir, que par mendre de vous soiez abes-
„ sié ne subiugué. Et se le Conte de Montfort a fait
„ venir Engloiz deçà la mer pour vous guerrier, &
„ le Royaume de France aussi, si vous deffendez, &
„ ne le lessiez pas ainsi deposseder vostre pays. A-
donc respondi Charles, qu'il creoit le conseil
que donné lui auoient. Mais vn songe, que son-
gé auoit, le faisoit moult esmerueiller, qui tel e-
stoit, que il veoit vn Faucon pelerin venant
d'outremer, & maint Espreuiier enuiron lui.
Puis montoit en hault en l'air, & vn Aigle sem-
blablement acompaignee de plusieurs autres oi-
seaux. Mais ledit Faucon en volant approchoit
dudit Aigle, lequel s'aualoit pour soy repouser.
Mais le Faucon descendi sur lui en telle manie-
re, qu'il le fist cheoir à terre, & puis le tint aux
ongles, & de son bec lui tira la ceruelle, & ainsi le
„ mist à mort. Sire, dist l'un de ses Barons, qui à lui
„ parloit parauant, vous estes le Faucon qui vain-
„ cra, & vendrez au dessus de voz besongnes. A-
donc par le conseil d'icelui, Monsieur Charles
donna congïé audit Herault, & derecief en con-
firmant la premiere response, lui relata de mot
à aultre ce qu'il deuoit respondre au Conte de
Montfort. Lequel Herault fist son rapport. Et
icelui entendu, Ichau de Chandoz dist, que par

la foy que il doit à Dieu, ne au Roy d'Engleterre, ne au Prince de Galles son ainfné fils, qui là l'auoient enuoyé, iamaïs par son conseil accort n'en seroit fait. Mais fust bien, de ordonner leurs gens, afin de receuoir leurs aduerfaires se ilz venoient à eulx. Puis dist: Or verra l'en auïourduy, „ en qui sera proefce, & qui conquerra honneur. „ Maudit soit-il, qui s'en fuyra. Et Canole apres „ ce dist, Que en icelui iour le verroit Bertran, & le Conte d'Aucerre, qui bon Cheualier estoit. Et adonc assembleroit bonté sur autre. Mais son cuer lui disoit bien, & de pieça auoit dit, que la Duchie demourroit au Côte de Montfort. Ainsi disoient entre eulx. Et dedens le chastel d'Alroy les gens du Duc Charles estoient à grât melaïse de fain. Car planté y auoit de soubdoyers, bourgeois, femmes, enfans, qui n'auoient que mengier. Et par grant souffreté auoient mengié leurs cheuaux, & regrettoient souuent leur Seigneur. Et lui signifïerent par signe de feu, qu'ilz monstroient en plusieurs lieux entour le dongon, que plus ne se pouoient tenir. Et quant les coureurs dudit Charles, qui deuant cheuaüchoient, l'aperceurent, si lui alerent dire à Lonuaux l'Abbaye, où logié estoit en vn parc de bois lui & sēs gens. Et quant il le sot, si fu moult desroiez au cuer. Mais vn sié Arbalestrier, qui Breton estoit, le reconforta, & lui dist que se il pouoit exploiter, ilz feroient bien brief tout ce

que Charles leur voudroit mander. Car il tray-
roit oudit chastel plusieurs quarreaux d'arbale-
ste, à chacun desquelz auroit ataché vn breuet
seellé, contenant la venue dudit Charles & de ses
gens, afin qu'ilz se tenissent encores vn pou. Et
le Duc respondi, qu'il auoit bien parlé. Adonc
icelui Arbalestrier se parti sur l'anuytié, seure-
ment monté, & l'arbaleste au col. Et cheua cha-
rant, qu'il vint à vn gué, où on auoit plusieurs
foiz abeuuré cheualx. Et quant il apparceut le
feu, qui ou chastel estoit, il mist en coche vn car-
rel bien empané: & commença à traire si fort,
qu'il attaint ledit feu, & fu ledit carrel trouué, &
landemain fu baillé au Chastellain. Et quant il ot
leu ledit breuet, il manda les soubdoyers, & leur
„ dist: Charles de Bloys nous mande, qu'il vient à
„ nous, & que nous tenons ce chastel, qui ainsi est
„ affamé, iucques au iour saint Michel, qui sera
„ bien prouchainement. Et se dedens lors il ne se
„ mōstre aux Engloiz, que nous fassions du chastel
„ ce que nous voudrons. Lors dist vn Cheualier: Il
„ souffist bien, mais s'il vous plaist nous ferons vn
„ traitié avecques le Conte de Montfort: Parmy
„ lequel nous lui promettrons rendre ce chastel le
„ landemain de ladite feste saint Michel à Soleil
„ leuant. Et de ce lui baillerons bons ostages, mais
„ qu'il nous reconforte de sa vitaille. De ce furent
ceulx du chastel d'accort. Adonc s'en ala le Cha-
stellain à la porte, & fist signe aux Engloiz, que
on

on venist parler à lui. Donc Robert Canole ala-
 soy-mesme aux barrieres, & lui demanda qu'il
 vouloit. Et le Chastellain lui compta le traitié
 dessusdit, que faire vouloient. Mais que on leur
 baillast des viures comme dit est, par leur argent
 paiant, & non autrement. Et Robert Canole lui
 respondi: Chastellain, vous sauez bien, que nous
 attendons la bataille, & que Charles de Bloys &
 ses Barons viennent pour nous combattre. Mais
 non pourquant ie parleray de ce fait au Duc. Car
 vous estes bonnes gent. Si est bien raison, que on
 vous donne bonne responce. Ce iour leur fu o-
 troié ledit respit. Et ilz liurerent bons Cheua-
 liers Gentilz hommes en pleiges. Et aussi les En-
 gloiz leur liurerent ou nom dudit de Montfort
 pain blanc & bis, vin, & autre vitaille. Et ce mes-
 mes iour Charles de Bloys party del'Abbaye de
 Lonuaux, avecques lui quatre mille hommes
 d'armes, tous soubdoyers hardiz. Et tant esploi-
 tierent à pié & à cheual, qu'ilz virent le chastel
 d'Alroy. Et quant ceulx dudit chastel les appar-
 çurent, ilz mirent en hault sur le dongon vne
 banniere blanche. Et puis firent corner les me-
 nestereulx, tant que ceulx de ladite ost Monsieur
 Charles les oyrent bien, & virent à plain ladite
 banniere. Adonc dist Bertran, que c'estoient bõ-
 nes gens. Et pria, que Dieu voulzist donner vi-
 ctoire à leurs gens. Et ce que ceulx dudit chastel
 auoient ainsi fait, segnesfoit que prouchaine-

ment ilz deuroient estre gectez de poine, ou ilz
feroient du tout exilez. Iceille nuyt se logierent
lesdites gens Charles deuant ledit chastel, lez vn
petit bras de mer, en vn port de bois bien garniz
d'arbres. Ouquel auoit par dedes vn moult beau
manoir pour eulx rafreschir. Et entre iceulx &
leurs aduersaires, n'auoit que vn pré, & vn ruis-
sel; ouquel la mer ressortissoit aucunesfoiz. Et se
ordonnerent chacun comme pour le landemain
auoir bataille. Et enuoierent de leurs coureurs
ennemiz, dont moult orent grant ioye. Et lors se
auancierent de eulx armer plus vistemment que
deuant. Car bien euidoient en icelle nuyt auoir
la bataille. Et le Conte de Montfort dist à ses
„ Cheualiers: Seigneurs, ie vous prie, alons les as-
„ saillir. Ie voy mon ennemy, qui m'a deffyé. Si lui
„ vueil courre sur à l'espec. Car ie auray la Duchie,
„ ou ie y lefray la vie. Et moult desiroit de eulx
„ courre seure endroit Soleil couchant. Mais Oli-
„ uier de Clïçon lui dist: Sire, or ne vous hastez
„ pas. Car li vns n'est pas sage, qui n'a mesure en
„ foy. Vous auez tous iours sagement ouuré iuc-
„ ques à cy. Mais ores a prime vient le fort. Nous a-
„ uons bel parlé à eulx, & leur fait moult grant of-
„ fre, & nous submiz en toutes offres & raisons,
„ comme bonnes gens. Si nous conuient d'ores en
„ auant combattre. Mais noz ennemiz si se sont mis
„ en ce parc à garant. Si y auroit grant meschief à
„ l'entrer dedens. Et mieulx nous vaut attendre

que ilz s'en departent. Et d'autre part ilz sont
maintenant venuz. Et se nous les assaillons si
chaudement, ilz pourroient tantost dire, que
nous les aurions pris, lassez, & recreus. Et Robert
Canole conferma sa parole, en disant: Je loasse
bien qu'ilz feussent assailliz, eulx yssuz dudit
parc. Car ilz sont bien deux contre vn. Et ledit
Oliuier si dist: Je n'y donroye rien. Car i'ay plu-
sieurs foiz oy dire, Que souuent & en maintes
places est le plus grant nombre desconfit. Et
mieulx valent vn pou de gent bien ordonnez,
quant ilz s'entraiment loyaulment & de foy, que
ne font tant de gens assemblez de plusieurs par-
ties, qui à paine sont d'accort, quant tant en y a.
Car l'un se met derriere, & l'autre deuant. Et bié
voudroye, qu'ilz feussent encore deux mille
plus qu'ilz ne sont. Si verrions par deça nostre
ennemy. A ce conseil s'acorda le Conte de Mōt-
fort & toutes ses gens. Et les François, qui ou
parce estoient, cuidoyent pour vray enuiron mié-
nuyt estre assailliz. Si se armerent, & alumerent
tresgrant clarté. Là vint Charles de Bloys, &
Bertran avec lui, qui les enuoyerent chacun en
son retrait. Celle nuyt fist le guet pour eulx
Guillaume de Launoy, & en sa cōpaignie maint
bon Arbalestrier. Et vindrent au matin pour es-
pier Engloiz, qu'ilz veoient cheuauchier par
delà la riuere. Et aussi auoient eulx fait ladite
nuyt à faloz & à brandons, pour costoyer la ri-

uierc. Dont commencierent à corner, tromper & grailloyer. Mais les François estoient tous armez de pié en cap. Ne oncques eulx ne virent gens mieulx appareilliez. Si alerent leurs coureurs pour gangner l'eauë. Et Engloiz vindrent à l'encontre, & s'entr'approchierent sur vn petit fossé. Mais les François gangnerent sur les Engloiz maint noble destrier, & maint riche prisonnier. Et quant Iehan de Chandoz le sceut, il fist crier sur peine de perdre la teste, que nulz ne leur deffendist plus le pas. Et dist au Duc: Sire, ie vous prie que vous laissiez commécier François à nous assaillir: & nous tenons ensemble sans nous desrouter. Car on voit souuent, que il meschiet à celui qui premier assault.

De la bataille, qui fu deuant le dit chastel d'Alroy entre Monsieur Charles de Bloys avecques ses gens & soubdoyers, d'vne part, & le Conte de Montfort & ses gens, avecques Engloiz, d'autre part.

CHAPITRE XIV.

LORS s'armerent d'vn lez & d'autre, & fist le Conte de Montfort vn sien parent armer d'vne armes pareilles aux siennes propres. Et portoit les Ermines tout plainement. Et Olivier de Cligon, qui moult auoit bonnes gens

d'armes, fist leuer sa banniere. Et par semblable Chandoz, & Canole. Et mistrent les Archiers Engloiz tous premiers, qui bien se appointierent pour trayre. Adonc s'escrierent: Huy verra-l'en „ proesce, & hardement. Et commencerent à „ tromper & à corner. Et d'autre part Charles de Bloys avecques ses gens, dont les Cheuetaines, Cheualiers, & Escuiers plus notables sont cy deuant nommez, se mistrent sur les rans tous armez de pié en cap, comme dit est: & passerent l'egue, qui petit estoit. Puis descendirent de leur cheuaux, & se mirent à pié. Et prindrent place à leur auantaige aussi tost les vns comme les autres; les bannieres & les panons deuant. Et à l'aproucher tromperent fort des deux lez. Dont commencerent des deux pars à traire. Mais ce fu pour neant. Car tous estoient bien armez. Et si se tenoient ferrez, les glaiues és poings, dont ilz boutoient sur les escuz moult fierement, & tres hardiement. Et fort se combatoint. Mais Hue de Carualay, qui moult estoit fier, s'en vint à Chandoz, & lui dist tout bellement: Sire, ie voy „ bien que ceulx de delà sont fors, & nous assail- „ lent hardiement. Faites tenir la bataille, & ie „ m'en iray par ce petit val. Et emmerray avecques „ moy cinq cens hōmes chacun la lance au poing. „ Puis m'en retourneray, & vendray assaillir nos „ ennemiz par derriere, en telle maniere que vous „ les verrez tous encombrez. Et Jehan de Chan- „

dos dist, qu'il auoit bien parlé. Adonc ledit Hue s'en party sans arrester, & prist auecques lui les cinq cens hommes dessusdiz, qui auoient chacun vne bonne hache tranchant en son poing. Et quant ilz furent en la valée, ilz osterent leur cuiſſez pour plus legierement aler. Ne point ne furent aparceuz des gens dudit Charles. Car il y auoit grant foison de genestres, entour quoy ilz se mussoient par derriere. Et ceulx du chastel d'Alroy veoient bien du dongon où ilz estoiet. Et prioient tous à Dieu, qu'il voulzist aidier au Duc Charles leur Seigneur. Atant vint parmy ladite bataille Oliuier de Cliçon, tenant en sa main vne hache acérée: lequel se bouta entre ses ennemiz. Et fery vn Escuier de Iuguon sur son bacinet, tellement que il l'abbati à terre. Et puis les gens dudit Oliuier le ferirent de glaiues & d'espées, tant qu'ilz le tuerent. Dont Bertran fu moult marry. Et adonc se fery és Engloiz, dont il abati foison. Et Guillaume Boitel lui tenoit compaignie. Et moult y furent bon champion le Vert Cheualier, Eustasse de la Houssoye, & Guillaume de Launoy. Et de l'autre costé Robert Canole, qui auoit droit cuer de Lyon, s'y portoit moult bien auecques Chandoz, & les autres Engloiz, en l'aide du Conte de Montfort. Mais entre les autres le Conte d'Aucerre, qui tant estoit bon Cheualier, y fery le iour habondamment sur Engloiz; & moult s'y prouua ce

iour. Si auint par cas de meschief, que vn Escuier le fery d'une espée de Bordeaux parmy la visiere en telle maniere, qu'il lui creua le fenestre oeyl. Adonc s'en cuida icellui Conte retourner à tout ledit cop. Mais vn Engloiz vint à lui, qui derechief le fery. Et le sanc lui commença fort à descendre, qui tout l'augloit. Lors vn Cheualier lui dist, qui bien le rauisa: Haa, Conte d'Aucerre, pour Dieu ne vous laissez occyre: mais vous rendez tantost, ou vous estes mort. Lors ledit Conte d'Aucerre lui bailla l'espée, & se rendy prisonnier. Dont moult ennuya à Charles de Bloys, quant il le sot. Et pour certain aussi fut-il moult regreté des autres François. Et Bertran du Guesclin mena sa bataille contre Oliuier de Clisson, & Charles de Dynant contre Robert Canole. Et Oliuier de Mauny portoit vne hache, dont il feroit moult fort par la bataille, puis escrioit Mauny. Et se doubta moult le Conte de Montfort au commencement. Mais Iehan de Chandoz le reconforta, & lui dist, qu'il ne s'esbahist point, & qu'il auroit la victoire, qui à celle iournée lui vendroit. Et autel lui dist Robert Canole. Et vn sien cousin, qui les siennes armes portoit, comme dit est cy deuant, ou les semblables, ala moult orgueilleusement parmy la bataille, pour son Seigneur aidier, en escriant Bretagne, où es tu Charles de Bloys, viença, ie la te chalenge. Et quant Charles l'oy, fis'en hontoia.

moult fort. Car il cuida que ce fust son aduersaire, qui se disoit estre Duc, pour ce que icelui Cheualier portoit autelles armes. Et pourtant s'auança à venir encontre lui. Et Charles tenoit vne hache d'acier, qu'il empoigna à deux mains, & en fery ledit Cheualier sur son bacinet, tellement qu'il le trespucha à terre. Puis monta desfeure lui. Et ses gens aussi lui vindrent aidier. Et de l'autre costé Iehan de Chandos, Robert Canole, & Oliuier de Clyçon, vindrent pour secourre ledit Cheualier. Et plusieurs copsy ot feruz de glaiues & d'espées. Mais le dessusdit Charles fu à force releué, & ledit Cheualier illec occys. Et quant Charles le vyt, si escria haultement „ Bretaigne, Ore est mort icellui de Montfort, „ par qui i'ay esté ainsi greué. Car ie le cuidoie biē „ auoir tué. Et tantost fut ceste chose comptée audit Conte de Montfort, comme Charles auoit tué ou champ son cousin, qui ses armes portoit: & se vantoit qu'il auoit tué ledit Conte. Adonc icellui Conte, ces paroles entendues, se bouta moult fierement en l'estour. Et quāt ledit Charles l'aperceut & recognut aux armes, si fu moult dolent. Car il vit bien, que à lui auoir failly. Lors se commença ladite bataille moult fort. Et bien s'y prouuerent sur tous les autres François le Viconte de Rohan, le Sire de Beaumanoir, & Bertran du Guesclin. Moult auoit Charles de Bloys bonnes gens, & bien ordenez. Et eussent vaincu

vaincu le iour la bataille, se ne fust l'empeschement qui leur seuruint par derriere, de Hue de Carualay, & cinq cens Engloiz auecques lui, desquelz est dessus faite mention; qui assaillirent au dos les gens au Duc Charles, en les ferant tous ensemble de haches à deux mains, où ilz donnerent maint grans cops. Et quant Bertran le vit, il & ses gens retournerent contre eulx, qui ont leur mort iurée. Et sur ses aduersaires fery maint cops d'une hache à deux mains. Et là ot bataille tref-dure & tref-cruelle. Tant que chacun, ou la greigneur partie, auoient la chair chargée de sanc & de sueur. Oliuier de Cliçon entre ceulx de sa partie s'y porta tref-puissamment, que grāt merueille estoit du veoir. Et tenoit en sa main vn martel. Mais qui il atteignoit à cop, n'auoit pouoir de releuer. Et quant il apparceut la bataille, qui se despeçoit, & dessembloit, il dist à haulte voix: La iournee est à nous. Et Iehan de Chandoz s'y contint moult vaillammēt. Et aussi Charles de Bloys, auecques les gens qu'il auoit, assembla au Conte de Montfort, le Viconte de Rohan, & Charles de Dynant. Mais le Vert Cheualier se prouua tref-vaillamment, & si abbati la banniere du Conte de Montfort emmy le pré. Mais par Robert Canole fu tantost redrecée. Hue de Carualay, & Gautier Huet, & leurs gens mirent icelui iour à mort maint vaillant hommes. Et queroient Bertran, qui en l'estour estoit,

comme tout desué; & crioyt Nostre Dame. Et
deuant lui tuoit & abatoit Engloiz à merueilles;
& estoit tout taint de sanc & de sueur. Et tref-
fort y feroit d'un pesant martel d'acier, que il
tenoit. Et quant Iehan de Chandos l'aparçut, il
requist & commanda à ses gens, qu'ilz assem-
blassent à lui. Adonc l'assaillirent deuant & der-
riere de glaiues & d'espées. Tant que par force
de bouter l'abatirent à terre. Mais celui de la
Houssoye, Charles de Dynant, & le Vert Che-
ualier le redrecerent tantost. Et en la presence
de Chandoz ledit Charles ala ferir Richart de
Cantorbye, qui son beau frere estoit à cause de
sa femme: & lequel icellui Chandoz auoit moult
chier. Tant qu'il lui abaty la ceruelle, & à terre
le fist tresbuchier. Dont ledit Chandoz fu trop
courroucié: & dist à haulte voix à ses gens; Que
moult lui deuoit ennuyer, se vengier ne s'en po-
uoit. Adonc Bertran du Guesclin, qui reculer ne
se daignoit, ala assembler avec ledit Chandoz: &
Beaumanoir contre Gautier Huet moult bon
Cheualier Engloiz, lequel fu tellement feru des
François de glaiues & de haches, qu'ilz le abati-
rent par terre. Et eust esté illec occys, se ne fust
Oliuier de Clyçon, qui moult faisoit à doubter.
„ Lequel le secourut, puis escria haultemēt; Beau-
„ manoir, Beaumanoir, vous ne pouuez cōtrester.
„ Rendez vous tantost. Car vostre bataille est se-
„ parée. Car miēx vous vaulzist aidier au Duc,

que d'estre à Charles, pour greuer vos amiz. Et quant Beaumanoir l'entendi, il ne daigna respondre, tant pource, comme pourtant que icellui Oliuier lui dist, que il attraperoit icelui iour le Viconte de Rohan & lui; mais mena sa bataille d'autre-part. Adonc releuerent les Engloiz ledit Gautier Huet, & abatirent à terre le Moine de Bethune, & occirent Huon de Iuguon. Dont se commencierent forment à deschirer les gens au Duc Charles, qui là estoit si courroucié, que plus ne pouoit estre. Et le Conte de Môtfort le poursuiuoit tousiours de près, pour lui enserrer. Car il lui sembloit, se il le pouoit prendre, que il pourroit à tousiours mais posseder le pais. Et Chandoz aussi ne tendoit, fors comme il peust prendre Bertran. Car bien lui sembloit aduiz, que se Charles & lui estoient priz, la guerre seroit finée à tousiours. Et pour ce, par tout où il le veoit, il le faisoit fort assaillir & empresser. Et Bertran, qui moult estoit hardy vassal, & de fiere ieunesse, se deffend tellement, que nul si assaillant ne pouoit auoir la maistrise de luy. Dont regarda par la bataille, & vit ses gens qui trop appeticoient, & ly plusieurs s'enfuyoiet. Adonc lui souuint de sa femme, qui bien lui auoit enchargié, qu'il ne se combatist en quelque maniere que ce fust, mais que en certains iours, que elle lui auoit denommez. Lors se aduifa Bertran, que en icellui iour, que la bataille fu faite, lui e-

estoit..... Et dist que sa femme lui auoit prophetié verité. Dont commença moult piteusement à regreter Charles de Blois, en disant que auourduy perdrait Bretaigne. Et entretādiz ledit Charles estoit enuironné & assailly de Cheualiers Bretons & Engloiz, de hache & de glaiue. Et fu sa banniere gettée à terre, & lui prins par le bacinnet. Et adonc vn Engloiz faux tirant & cruel le fery traitement de vne dague parmy la bouche, tant que d'autre part lui fist passer demy pié. Et quant ledit Charles senty le cop, il s'estendi à terre, bati sa coulpe, & se commanda à Dieu, en disant: Vraiz Dieu, pardonnez moy la mort des
„ bonnes gens, qui cy meurent pour moy. l'ay
„ guerrié long temps oultre ma volenté, & par
„ l'ennortement de ma femme, qui tousiours m'a
„ donné à entendre que i'auoie tref-bon droit.
Tantost l'en ala dire à Bertran la mort dudit Charles. Et quant il le sot, il le plaint moult: en disant, que le plus preudomme, qui au siecle fust, estoit mort, & que malgré sien & à force il auoit guerrié. Lors dist Bertran, qu'il ne prisoit riens sa vie, & qu'il amoit mieulx morir que viure. Dōt se combati comme vn droit ennemy, tant qu'il n'ot mais ne hache ne espée. Et quant l'ehan de Chandoz le vit ainsi surpris de ses gens moult asprement, vint à lui. Adonc Bertran, qui estoit las, traueillié, & nauré, crya à haulte voix, qu'il se rendoit pris. Dont fu liuré à Chandos. Et aussi

furent prins le Vicôte de Rohan, le sire de Beau-
 manoir, & Charles de Dynant. Et briëfmët, tous
 furent mors ou pris, excepté aucuns qui s'enfuy-
 rent. Car les varlés François durant icelle batail-
 le se prindrent aux varlés Engloiz, qui gardoient
 leurs cheuaux & sommiers: & les getterent par
 force du champ. Mais ilz furent enchassiez des
 Engloiz de toutes pars, iucques bien pres de Vá-
 nes. Et apres ce retournerent iceulx varlés Fran-
 çois pour leurs maistres trouuer. Et quant ilz
 furent coisiz des Engloiz, adonc furent assailliz,
 & liurez à mort. Et de leurs maistres les grei-
 gneurs estoïët prisonniers, & autres occys. Heu-
 reux fu, qui en eschappa. Adõc demenerët ceulx
 du chastel d'Alroy grant dueil. Car ilz veoient
 les mors & les naurez sur les champs. Et le Conte
 de Montfort s'arresta ou champ, avec lui Chan-
 doz, & Oliuier de Cliçon, qui moult estoit tra-
 uueillez & ensanglantez. Et si y estoit Gautier
 Huet, & d'autres assez. Et entretandiz qu'ilz se
 repositoient vn petit, les mors furent desueltuz de
 leurs armeures, & de leurs pourpains, en telle ma-
 niere qu'ilz demouroiët tous nus. Adonc le Côte
 de Montfort mercia les siens à haulte voix, de ce
 qu'ilz lui auoient aidié à vaincre & occire ses
 ennemis mortelz. Mais de Charles lui pesoit
 moult, ce disoit. Car se il fust demouré en vie,
 ilz se fussent accordez, & deuenuz bons amis.

ensemble. Et pieçà l'eussent esté, se ne fust le cō-
seil dudit Charles. Et Jehan de Chandoz dist, que
bien deuoient Dieuloer. Car on n'auoit onc-
ques mais veu desconfire Bertran, lequel il te-
noit prisonnier; ne iamais ne le lairroït aler iuf-
ques à tant que le Conte eust paix avecques le
Roy de France tout à sa volenté. Lequel Conte
commanda à ses gens, que ledit Charles de Blois
fust mis ou champ. Si le rendroit aux bourgeois
de Guingant. Dont le quirent Cheualiers & Es-
cuïers, qui les mors regardoient tous vn à vn.
Mais oncques ne le porent trouuer. Si s'en re-
tournerent le dire au Conte de Montfort, lequel
iura, que plus auant n'yroit, iusques à tant qu'il
l'eust trouué. Et si ne l'auoit oncques veu que
troiz foiz en sa vie, ce disoit. Donc vint ou chap,
& le trouua couchié le visaige contre Orient, &
tantost le recognut. Et auoit la hayre vestue, & la
corde ceinte. Adonc commença le Conte de
Montfort à pleurer, & à soupirer moult ten-
drement, en disant: Hay! Charles, or appert bié,
que par mauuais conseil vous m'avez guerrié.
Dieu le vous pardoint. Adonc le fist mettre en
biere, & couvrir, & puis porter à Guingant: où il
fu de ceulx de la ville sollempnellement receu,
& à grant procession, puis enseuely & mis en ter-
re. Et depuis fist Dieu plusieurs miracles pour
lui, dont on vous en dira aucuns cy apres, quant
temps & lieu fera.

CE iour entrerent le Conte de Montfort & ses gens ou chastel d'Alroy, qui lui fu rendu. Et de là Iehan de Chandoz en emmena Bertran du Guesclin à Niors. Et le Conte d'Aucerre demoura prisonnier à Robert Canole, qui puis le deliura. Tantost furent portées les nouuelles de ceste desconfiture au Roy nostre Sire, qui moult en fu courroucié, & moult regretta Charles son cousin: & apres, Bertran, & ses autres amis, desquelz il se attendoit estre aidiez & secouru se besoing lui en fust. Car moult donnoient à faire à son Royaume les Roys de Nauarre & d'Engleterre; ne il ne sauoit où trouuer loyauté. En cest estat fu vn espace de temps, durât lequel le Côte de Montfort enuoia deuers lui, & en suppliant, qu'il lui pleust à lui laisser ladite Duchie de Bretagne en paix, & il le seruiroit loyaulment, & lui feroit hommage, comme son homme lige, & loyal subget. Adonc le Roy pour apointier & respondre de ceste chose, enuoia en Bretagne vn noble Prelat Per de France, lequel estoit Archeuesque de Rains, & extrait de lignage de Craon. Auquel il donna & ottroia pouoir de la paix faire & confermer. Car il ne vouloit point auoir de guerre aux Bretons. Car trop en auoit-il sans cause à ceulx de Nauarre & d'Engleterre. Adonc ledit Archeuesque, lui venu ou dit pais de Bretagne comme Embaxadeur du Roy, monstra au Conte de Montfort en la presence de ses Ba-

rons, qui là estoient assemblez, Que bien fust de
apaïsier la discension d'entre lui & la Duchesse
de Bretagne, à qui son Seigneur & mary auoit
esté occis en la bataille. Pour lequel, entre les au-
tres miracles, que plusieurs personnes notables
auoient veuz & sceuz de certain puis son tref-
passement, en estoit nouuellement auenu vn tel,
Que celui, qui lui auoit donné le cop de la mort,
s'en vanta vne foiz par sa folie, & tantost enra-
gea & yssy du sens. Adonc ses amis le prindrent,
& le porterent lié comme vn larron à la tombe
dudit saint Charles à Guinguant. Auquel ilz sup-
plierent deuotement, & firent oblacion pour
leur dit parent. Et tantost iceluy forsené fu re-
mis à son sens, & incontinent s'agenouylla de-
uant la dite tombe, où il fist ses oraisons moult
deuotes. Et à ladite Eglise rendy soy & tous ses
biens, & y vsa toute sa vie. Ce miracle & plusieurs
autres y auindrent. Dont à tant ie m'en deporte,
& reuiens audit traité & accort, qui fu fait en
ceste maniere: Que la Duchesse tendroit certai-
ne quantité de citez, villes, & chasteaulx en la
Duchié de Bretagne. Et le Conte de Montfort
en seroit Duc en sa vie, & en feroit hommage au
Roy de France. Et parmy tout ce, les prisonniers
seroient deliurez en payant leurs rançons en de-
niers comptans. Par ainsi furent deliurez le Con-
te d'Aucerre, Bertran, & tous les autres. Et apres
ce, ledit Conte de Montfort, qui auoit receu les
feaultez

feaultez & hommages de ses Barons, s'en ala à
 Paris, & fist hommage au Roy. Mais puis en def-
 failly, dont il fu moult hay, & dechacié de ses
 gens, & s'en ala en Engleterre iucques à vn cer-
 tain temps, comme cy apres sera plus à plain es-
 clarcié. Et Bertran du Guesclin, apres ce que de-
 liuré fu, s'en ala en ladite ville de Paris deuers le
 Roy, qui moult luy fist bonne chere. Et le Cap-
 tal, qui pris auoit esté à Cocherel, comme dit est
 deuant, deliura au Roy certains chasteaulx, qu'il
 detenoit pour son Seigneur. Et parmi ce sa ren-
 çon lui fu quittée, & fu bien amy du Roy, & de-
 tenu de son conseil. Et traicta de la paix enuers
 le Roy de Nauarre, qu'il tenoit pour son Sei-
 gneur: tant que par respic y fu par plusieurs foiz.
 Et en ce contemple y ot plusieurs parlemens &
 traictiez entre le Roy de France, & celui d'En-
 gleterre. Mais acort n'y pouoit estre trouué. Et
 en icellui temps regnoit ou pays de Guienne le
 Prince de Galles ainsné filz dudit Edouart, le-
 quel setenoit à Bordeaulx, & subiugoit le pais
 dessusdit, & seignorissoit tref-excessiuement.
 Car il ne tenoit compte de homme, de quelque
 estat qu'il fust. Et pour ce, par sondit excez &
 oultrage perdy-il depuis ce la Seignourie & pos-
 session dudit pais, comme plus à plain sera cy a-
 pres desclarié. Ce temps durant fu faite la paix
 du Roy de Nauarre avecques le Roy nostre Sire,
 ou chastel de Vernon. Lequel de Nauarre donna

au Roy nostredit Sire vn cuer de fin or, en segne-
fiâce d'amour & de loiaulté qu'il lui deuoit por-
ter. Et adonc iura Bertran, que se par luy estoit la
paix brisée, oncques si mauuaise ne fu faite. Et
lors dist Bertrá, qu'il vouloit aler en Cyppre ai-
dier au Roy, qui tref-bon Chrestien estoit, & de
nouuel auoit prise la cité d'Alexandrie sur les
Sarrazins en icellui mois. Et se vouloit croisier
pour aler oudit pays de Cyppre, & de là en Gre-
nade qu'il pensoit à conquerre, & d'en estre
Roy.

*Du commencement & cause de la guerre d'Espengne,
meüe entre le Roy Pietre, contre Henry, que
l'en disoit Bastart d'Espengne.*

CHAPITRE XV.

MAIS vne guerre l'en destourna, qui dedens
Espaigne commença lors entre le Roy Pie-
tre & Henry, qui depuis fu Roy. Et dy, que icel-
lui Pietre estoit de tref-mauuaise nature, com-
me il apparut à ses euures, & par especial à sa
mauuaise fin. Il auoit espousée vne tref-noble
Dame, laquelle estoit suer germaine de la Roy-
ne de France, qui lors estoit, & du Duc de Bour-
bonnoiz leur frere. Leur tierce suer fu femme
du Conte de Sauoye. La quarte est femme du
Conte de Harecourt, & la cinquiesme du Sei-

gneur de Lebret. Et sont extraictes de la droite ligne de Monseigneur S. Loys. Si vous dy de certain, que ladite Roynne d'Espengne estoit moult belle & bõne, & tres-vraye preude femme. Maiz son mary ne conuersoit point auecques elle, si comme à boire, mengier, ne au coucher. Et du tout auoit delaissiee sa compagnie, pour amour de vne autre Dame, qu'il maintenoit en peché d'adultere, laquelle estoit Dame de Castre, & auoit icellui Pietre tellement enforcelé par poisons, qu'il ne pouoit viure ne durer, se tousiours ne la veoit. En cest estat fu ainsi long temps, & auoit vne tres-mauuaise coustume, que de toutes choses quelconques il se cõscilloit aux Iuifs, qui en sa terre demouroient, & leur descouuroit tous ses secrez, & non pas à ses prouchains amis & parens charnelz, ne à aucuns autres Chrestiens aussi. Si estoit bien droict que homme, qui de tel conseil vsoit à son escient, en deust auoir mauuaise consequence. Car Dieu paye les ouuriers ou tost ou tart, chacun selon ses demerites. Et pour la fole-plaisance, & amour desordennée, que icelui Pietre auoit à sa concubine, il auoit tellement acueilly en hayne la Roynne sa femme, qui tant estoit benigne Dame, que bien vouldist qu'elle fust morte & trespassee de ce siecle, ne luy chausist de quelle mort. Et la fist secrettement empoisonner de venin. Et ce nonobstant ladite Dame luy estoit tousiours douce,

encline, & obeissante. Et pour ce, les nobles Barons du pais blasmerēt plusieurs fois audit Roy ses folies. Et mesmement l'en reprist son frere ledit Henry, lequel combien qu'il fust tenu des gens pour bastart qu'ils le cuidoient: ne pourquant il estoit hoir legitime, & né en loyal mariage, ainçois que ledit Pietre, comme il fu depuis sceu. Moul't l'amoit & honnouroit chacur, pource qu'il estoit vray Catholique, & moul't charitable à tous pauvres, & qu'il amoit & soustenoit iustice. Et moul't s'auança des gēs de plusieurs estaz, tant de grans comme de petiz. Si que pour le bien de sa personne chacun desiroit, & souhaidoit qu'il fust Roy en lieu de Pietre, qui trop se faisoit hair. Et estoit lors ledict Henry Conte de Trichemare, à cause de vne vaillant Dame qu'il auoit espousee. Et demouroit à Burs avec le Roy Pietre, qui sa Court y tenoit. Et auoient demouré ensemble maintes années. Tant qu'il auint que ledit Henry fu prié & requis des Barons d'Espaigne, comme il monstraft derecief au Roy son frere qu'il faisoit trefmal, de ainsi acointier Iuifs, & eslongner les Chrestiens. Et aussi luy pria la Royne, comme il luy voulzist blasmer sa deffaulte, de ce qu'il tenoit icelle, qui du sang royal estoit yssuë, tout ainsi comme vne fole esgaree: qu'il ne deust pas. Car ladite Royne, ainsi comme dit est, estoit fuer de Duc, de vne Royne, & de deux Contesses. Adonc luy respō-

dy Henry: Dame, par la Vierge Marie, ie en suis “
 moult doulent. Et plusieurs fois i'en ay reprins “
 & blasmé, premierement à luy & à moy, & feray “
 encore ains qu'il soit nuyt. Et se il ne vueil amé- “
 der sa vie desordenee, ie me doubte bien que “
 Dieu ne l'en paie. Et non pourquant ie le lui “
 diray, & me deust bannir de son Royaume. Car “
 il se fait hair de tous les Barons de sa Court. A tāt “
 s'en ala Henry au Palais, où le Roy son frere e- “
 stoit, lequel parloit en Conseil à plusieurs Iuifs, “
 entre lesquelz n'auoit aucun Chrestien. Et adōc “
 se mist à parler aux Cheualiers Espaignolz. Et “
 quant il vit qu'il fu temps & heure, il s'aprocha “
 du Roy, & le salua. Et le Roy, qui moult estoit “
 faintif, ressalua aussi lui moult laschemēt. Adōc “
 Henry lui commença à dire: Comment est-ce, “
 noble Roy? Vous ne vous maintenez pas ainsi “
 comme le Roy de France, qui tant est noble, “
 doux, & courtoiz: & comme fist nostre bō pere, “
 qui tout son viuant guerria les Sarrazins, prinst “
 & asseigaleurs Chasteaux. Et decy iusques en “
 Grenade conquist le pais, dont il desconfist le “
 Roy, lequel s'en fouy. Et aussi par luy desconfist “
 en bataille le Roy de Belmarin, & ses deux fils “
 prins, & grant planté de Sarrazins. Mais vous ne “
 leur faictes nulles guerres, ains leur dōnez treues “
 & respiz, pour l'or & pour l'argent que vous en “
 auez. Mal vous donnez garde d'un fort, qui est “
 trouué ou liure de Brutus, dont Merlin a parlé “

entre ses Propheties, & le Cord'Auignon aussi:
si comme m'a dit vn message cler ne de vostre
Royaume, que ainsi est trouué en l'art d'Astro-
nomie, Que vne Aigle naistra, ou est nez de Bre-
tagne perite, qui vendra en Espagne à grant
compaignie d'oyseaux, qui auront moult dures
plumes. Et trouuera vn felon Roy mescreant, or-
gueilleux, & conuoiteux: lequel sera desconfit
en bataille, & perdra toute sa Seigneurie. Et sôt,
à comparaison d'icelui Aigle, à l'Estournel. Car
quant il se part de aucun arbre, où il a esté assis,
& s'en cōmence à vouler; tous les autres oyseaux,
qui entour lui sont, lui tiennent compaignie, &
s'en veulent avecques lui, & à lui s'umilient. Et
quant il vient à vn colombier, où il a plusieurs
coulons, tous les coulons s'en vont, que nulz n'y
en demeurent. Si vous prie, Sire, or regardez
que ce puet estre. Vous estes sages homs, mais
vous ne le monstrez pas. Si vous dy bien, que ice-
lui Estournel segnesie le dit Aigle, qui par tout
où il vendra, se rendront à lui citez, villes, cha-
steaux. Et les coulons seront ceulx, qui lui en ap-
porteront les clefz. Et le sieuront tous oyseaux
par tout où il voulera. Si le vous dy pour vostre
bien. Car ie seroye courroucié, & pou auroye
d'honneur, se vous perdez le vostre. Si regardez à
vostre fait, & vous auisez; & si ostez tous ces luifs
d'avecques vous, & crecz, amez, & prisez tous
voz Barons. Car li homs n'est pas fires de son

pays, qui est hais & despité de ses gens. Et d'autre "
 part auisez vous du pechié que vous faites enuers "
 Madame vostre femme, qui tant est bonne, lo- "
 yal, & gentil Dame, & extraire de si bon sanc, & "
 de si noble, comme de Monseigneur saint Loys. "
 Si vueillez vostre vie amender, & auoir doubte, "
 que icelui Aigle ne soit auolé en ce pays pour "
 vostre pechié. Si vous en confessez. Car ie vous "
 dy pour vray, que ledit Aigle est nez: & a esté veu "
 ou Royaume de France, qu'il deliure de plusieurs "
 mauuais: & plus ne vous dy. Car ie vous en ay as- "
 sez dit. Adonc respondi Pietre par tres-grant fe- "
 lonnie, & comme tout forsené: Haa! faux ba- "
 start, desloyal filz à putain, & traictour prouué, "
 ie croy que vous vouldriez bien que ie feusse "
 mort. Car se i'estoye tué ou occys, vous cuide- "
 riez estre Seigneur d'Espaigne. Mais ia ne plaise "
 à Dieu, que telle Royaulté viengne à bastart. Si- "
 re, ce dist Henry, or ne vous courrouciez pas. "
 Car ie ne vous en parleray iamais en mon aage. "
 Et s'il vous en vient bien, si le prenez. Adonc lui "
 dist le Roy Pietre: Bastart, or vous en alez bien "
 tost decy. Ie vous banniz du Royaume d'Espen- "
 gne. Et se decy en auant y estes trouuez, ie vous "
 feray deffaire comme traictre. Là y auoit vn Iuif "
 nômé Iacob, lequel dist à Henry, Que bien estoit "
 assoté, de auoir blasmé le plus noble Roy, que "
 on peust trouuer: & qu'il l'auoit tât courroucié, "
 qu'il le pouoit bien apercevoir, & bien tost s'en

alast qu'il ne le comparaſt. Et quant Henry l'oy,
" tout le ſanc lui mua, & lui diſt lors: Faulx Iuiſlar-
" rō enuenumé, vous & voz cōpaignōs auez bien
" enchanté le Roy. Mais foy que ie doy à Dieu, qui
" fu par ceulx de voſtre lignage pené en la Croix
" pour vengier la ſiēne mort, & ce qui eſt par vous
" depité, iamais ne forconſeillerez le Roy. Adonc
tray vn couſtel bien affilé, & aherdi Iacob parmi
la cheueſaille, & lui lança parmy les coſtes. Tant
qu'il lui perça le cuer & le foye, & abati à terre.
Et puiz eſcria, que s'il y auoit leenz hōme quel-
conques par qui il fuſt touchié, il lui donroit du-
dit couſtel parmi le corps, ſans nul deſpiter. A-
donc le Roy ſe leua moult courroucié, & com-
me tout enragé, & tira vn couſtel, dont il vouloit
par tref-grant yre aler ferir ſon dit frere. Mais vn
ſien Cheualier le retint, qui ſe miſt au deuant de
lui, & diſt que pour Dieu il ſe deportaſt. Et Hen-
ry s'en party, & deuala les degrez. Puis s'en vint à
ſes gens, & leur diſt, Qu'ilz ſellaſſent bien toſt ſes
cheuaulx, & qu'il auoit piſ fait que celui, qui ioue
aux dez. Et Pietre ſe faiſoit tenir, qui eſtoit fier
comme vn lion. Et diſoit à ſes gens, qu'ilz eſtoiēt
tous larrons, quant ilz ne lui auoient laiſſié occi-
re ce garçon. Et ſes Cheualiers lui dirent, qu'il ſe
apaiaſt: & ſe Henry s'eſtoit meſſait, qu'il le lui
voulziſt pardonner. Car il eſtoit ſon frere, & hō-
me de renom; & bien pouoit caſſer vn pot en ſon
" hoſtel. Se il a mis à mort vn Iuiſ, ne vous en ſoit à
riens.

riens. L'ame ira deuant nostre Seigneur Iesus
 Christ. Et pleust à Dieu, que tous ceulx de vostre
 Royaume feussent en autel point. Faites hucher
 vostre frere, & lui pardonnez vostre maltalent:
 & nous vous en prionstous. Et Pietre dist, que
 riens n'en feroit: ainçois le feroit bannir d'Es-
 pengne. Et si fist-il depuis. Et fist pendre celui,
 qui l'auoit defendu. Et ainsi perseuera & regna
 ledit Pietre vne espace de temps, tousiours de
 mal en pis.

*Du trespassement de la Royne d'Espengne femme de
 Pietre, & comme il fu sceu que Henry estoit
 droit heritier dudit Royaume, & ledit
 Pietre riens n'y deuoit auoir.*

CHAPITRE XVI.

OR vous dy que Pietre, qui trop heoit sa
 femme la Royne, & sans aucune iuste cau-
 se, par hayne l'auoit plusieurs foiz fait empri-
 sonner. Mais elle s'en estoit guerie par bon re-
 mede. Et toutesfoiz pour elle eslongner, lui a-
 uoit assigné certaine terre, pour soy gouuerner,
 & soustenir son estat. Dont elle reçut les hom-
 mages dudit país. Ouquel demouroit vn Iuif
 trefriche, qui moult noble reuenue auoit & te-
 noit: combien qu'il en payast rençon au Roy
 Pietre. Lequel Iuif vint faire hommage comme

les autres à icelle Dame, comme il est de coustume en tel cas. Il la baïsa comme son homme. Et quant il se fut retrait, la Dame fist tantost chauffer de l'eauë, & en l'aua sa bouche & son visage. Et puis dist à ses gens à haulte voix, qu'ilz n'amoïent pas son honneur, quant ilz l'auoient laissé baïsier à vn tel chien, matin puant. Et commanda qu'il fust pendu. Mais il fu rapporté au faulx Iuif, lequel quant il le sceut, monta tantost à cheual, & s'en fuy tât comme il pot vers le Roy Pietre. Auquel il compta le fait dessusdit, & comme la Dame le vouloit faire pendre quant elle sceut, qu'il estoit Iuif. Et pour ce s'en ala deuers ledit Roy à reffuge, & se il ne le gardoit, il seroit „ honny. Adonc respondi Pietre, On vous en gar-
„ dera. Mais ie voy bien que la Dame n'aymera ia-
„ mais homme, où ma plaïssance soit. Et bien scay,
„ que elle pourchassera la mort de moy mesmes.
„ Et pour ce il la conuient faire morir. Mais ie
„ vouldroye bien qu'il fust fait si cellément, que
„ on ne sceust dont la mort fust venue. Si que qui
„ bon conseil y faura, si ne le cele pas. Sur ce dist le
„ Iuif: Ie vous en conseilleray bien, il conuiendra
„ la Dame estaindre en son lit. Si n'y parra ne plaie
„ ne cop, & bien en cheuirons. Car elle sera four-
„ prise. Et Pietre dist, que benoist fust il qui l'en
deliureroit. Et ce faulx Iuif assembla avecques
plusieurs autres Iuifs, & par sa malice ala aussi
comme à myenuyt, où la Dame demouroit. Et

hurta à l'uis, en disant que on lui ouurist. Et tantost la chamberiere vint, laquelle lui demanda qui il estoit. Et tantost ledit Iuif lui respondi: Nous sommes au Roy Pietre, qui icy nous en-
 uoye. Car bien croy qu'il venra encores huy cou-
 cher avec Madame. Et se Dieu plaist il y aura
 bonne paix. Adonc ladite chamberiere ala de-
 uers ladite Dame, qui ses Heures disoit: & lui dist
 que Dieu auoit apaisié son mary à elle, & qu'il a-
 uoit enuoyé les Iuifs deuant soy, qui là estoient.
 Adonc la vaillante Dame, qui de la grace diuine
 estoit inspirée, quant elle entendit ces paroles, si
 commença à pleurer moult tendrement. Car el-
 le sentoit * bien prouchainement auenir. Dont
 la chamberiere ot grant pitié. Et dist, que elle
 n'ouueroit pas l'uis, iusques à ce que elle lui com-
 mandast. Mais la Dame lui dist: M'amie aban-
 donnez l'uis. Car ie vueil receuoir mort au gré
 de nostre Seigneur, qui pour nous mourut, & à
 lui obeir. Auquel, & à sa benoïste mere icelle
 Dame se recommanda lors moult deuotement,
 aussi aux douze Apostres, & generaulment à
 toute la Court de Paradiz: en depriant à Dieu,
 qu'il donnast ioye & honneur au Duc de Bour-
 bon son frere, & à toutes ses suers, & au Roy
 Charles de France. Adonc entrerent les felons
 Iuifs en la chambre de la Royne, qui en son lit
 s'estoit boutée, & affublée d'une moult riche pe-
 lice. Et tenoit en ses mains vn Sautier & vn cier-

ge. Et quant elle les apperçut, si leur demanda
qui à celle heure les auoit enuoyez en sa cham-
bre. Et toutesfoiz bien pensoit, que ce eust esté
Pietre, qui point ne l'amoit. Et ilz lui respondi-
rent: Dame, il vous fault mourir. Car le Royle
veult ainsi. Dont dist la Dame: Ie voy bien que
priere n'y vault rien enuers vous. Or me vueille
nostre Seigneur aidier ainsi vraiment comme
i'en ay bon mestier. Adonc commencierent Da-
mes & Damoiselles à demener grant dueil, &
moult merueilleux; & à lermoier & plourer
moult fort, en déchirant leurs cheueux. Et di-
soient tref-piteusement: Haa! Beau Sire Dieu,
quel douleur & quel meschief, quant on fait au-
iourduy mourir la plus france Royne, & la plus
courtoise Dame, & mieulx creant en Dieu, que
l'en peust trouuer en ce monde. Adonc leur dist
la Dame Royne: Mes amis, vueillez vostre dueil
delessier. Car ie m'en vais en Paradis avecques
nostre Seigneur, qui vueille aduertir Pietre, qui
sans cause m'a traictiée à mort. Car il ne scet que
il fait. Car vne fole lui a donné de son mestier.
Donc prindrent les Iuifs toutes celles, qui vou-
loyent faire noyse & crier, & les aualerent en vn
celier parfont: & quatre en firent mourir, pour
leur murdre plus celer. Puis prindrent vne grant
coite pesant la charge d'un sommier, & la lan-
cierent sur la Dame, & lierent les deux coites en-
semble d'une corde, & si pendirent à chacun

corron vn mortier. Puis firent vuidier hommes & femmes hors de ladite chambre, laquelle ilz fermerent. Puis s'en partirent, & s'en allerent bouter en vn fort chastel assis sur vn rochier. Ainsi fina la Dame, comme vous l'auiez cy oy. Et le landemain fu trouuée trespassee en son lit, tenant en sa main vn Sautier. Puis fu enseuelie & enterrée dedens vne Eglise. Dont ledit Pietre n'acoutoit riens, mais par couuerture fist crier & publier, que on n'auoit pas fait déuier la Dame de son gré, ne de sa volenté. Et aussi fist bannir publiquement ceulx, qui ce auoient fait. Mais il n'ala pas asseigier le chastel, où ilz estoient retraiz, comme il le fauoit bien. Mais ourent leur paix ainçois qu'il fust demy an. Du trespasement de la Dame furent plusieurs doulenz, & mesmement les Iuifs en blasmerent le Røy en son absence, & l'apelloient Tiran.

OR vous dy que Henry estoit à Trichemarre, dont il estoit Conte à cause de sa femme. Et là assembla grant gent pour aler contre Pietre. Si auint que vn Iuif riche & puissant, lors demourant à Burs depuis le trespassemēt de ladite Royne, auoit veu plusieurs beaux miracles. Parquoy il estoit inspiré de la grace de Dieu, & se parti du Roy Pietre qu'il auoit long temps serui, & bien fauoit sa naissance. Si s'en vint à Henry, & fist assembler maint Cheualier, Prelaz, & autres Clerz. Et puis leur requist, que ilz le feissent ba-

ptizer. Et ilz si firent. Puis leur dist: Seigneurs,
ie monstreray experte raison, pour quoy Henry
mes Sires, que veez là, doibt estre Roy d'Espen-
gne. Ie serui long temps son pere deuant Arcala,
où il fiança la belle Donne qu'il menoit tous-
iours avecques lui. Et engendra en icelle ledit
Henry, & trois filles qui sont par deça. Et pro-
mist à icelle Dame, qu'il moult aymoît, que ia-
mais n'auroit autre femme. Mais elle ala de vie à
trespasement. Apres ce, le Roy espousa vne au-
tre Dame, qui de lui ot quatre filles toutes en-
fuiuans, sans porter nul filz. Dont le Roy fu
moult courroucié. Et dist la Royne, & iura sur
Dieu, que se elle n'auoit vn filz la premiere foiz
que elle gerroit d'enfant, que iamais en sa vie
son corps ne l'aimeroit. Puis auint que ladite
Royne fu ençainte, & se deliura de vne fille. Et
tantost en lieu de celle fu porté & mis le filz d'un
Iuifs si secretement & celeément, que oncques
le Roy n'en sot riens, qui bien le cuidoit auoir
engendré. Et tantost fist baptizer ledit enfant,
qui estoit assez bel; & ot nom Pietre. Et à ceste
cause a esté indeuément couronnez, & Henry
si n'a pas la couronne, qui auoir la deust. Quant
ceulx qui là estoient, entendirent ces parolles, si
en orent grant merueilles. Et iurerēt li plusieurs,
que iamais ne lui fauldroyent. Et quant Pietre le
sot, il maudist le Iuif, & le doubta forment. Mais
non pourquant il assembla foison gens d'armes,

& tant fist & pourchassa par belles promesses, & plus par beaux dons d'or & d'argent, qu'il tourna deuers lui la greigneur partie des gens, qui parauant aidoyent à Henry ; lequel auoit lors moult pou de gens, pour son droit garder. Et tel l'amoit de bon cuer, qui ne lui osoit aidier. Car les riches ont tousiours le plus de depport. Si cheuauchoit ledit Pietre moult fierement contre Henry, & le fist tant dechacier par ses gens, qu'il lui conuint vider le Royaume d'Espengne, où il lessa sa femme & ses enfans. Et s'en ala en Arragon deuers le Roy, qui lui fist grant hōneur. Car moult l'auoit cher. Donc lui conta comme Pietre filz de Iuifs estoit, & n'auoit aucun tiltre de droit ou Royaume d'Espengne : & auoit dechassié & banny il, qui Roy en deust estre. Et ledit Roy respondi à Henry. Je croy bien „ que vous dites vray. Mais ledit Pietre ne puis-je „ guerrier. Et se vous voulez hebergier avecques „ moy, ie vous donrray vostre estat honnorable- „ ment à loy de Cheualier. Dont dist Henry, qu'il „ se pensoit en telle maniere appointier & alier à ceulx d'Espengne, que le droit qu'il auoit lui pourroit bien aidier. Ainsi demoura ledit Henry long temps en Arragon. Et quant Pietre le sot, si en ot le cuer moult yrié : & fist escrire vnes lettres, qu'il enuoya audit Roy d'Arragon, contenant en substance de paroles ceste forme : Nous „ Pietre Roy de toute Espengne, Seigneur souue- „

„ rain del'onneur de Portugal & d'Arragon, vous
„ faisons sauoir que forment & mauuais gré vous
„ fauons , que vous tenez & receptez auecques
„ vous nostre ennemi Henry le bastart , que nous
„ heons de tout nostre cuer. Car comme faux trai-
„ ctour il a enchanté ma gent, & se veult faire Roy
„ par l'abusion d'un Iuif, qui me het. Mais Dieu
„ scet bien comment il en est. Si sachiez, que se
„ plus le souffrez en vostre terre contre nostre
„ vouloir, & mandement, nous yrons en Arragon,
„ où nous merrôs d'Espengne si grant assemblée,
„ qu'il vous conuiendra fouyr hors de vostre pais.
Et presenta lesdites lettres le message dudit Pie-
tre au Roy d'Arragon en sa ville de Perpegan,
où estoient auecques lui sa femme, vn leur filz, &
leur fille. Et quant il out veu les dessusdites let-
tres , tout bassement il appella Henry , & lui
monstra ce que Pietre lui auoit mandé. Lors dist
Henry, qu'il ne vouloit pas que par lui eust au-
cun encombrier: & pour ce s'en yroit prouchai-
nement. Maiz Dieu le voulzist vengier de Pietre
ainsi vrayement , que la hayne qu'il auoit à lui
estoit pour loiaulté tenir & faire , & pour iuste-
ment ouurer.

Comment

Comment Bertran fist absoudre les gens de grandes Compengnes, qui escommeniez estoient : & puis les mena en Espengne avecques plusieurs Cheualiers, & Escuiers François, en l'aide & secours de Henry, & à l'encontre du Roy Pietre.

CHAPITRE XVII.

TANTOST apres ce que Henry fu chassie d'Espengne & d'Arragon, vindrent en France nouuelles du trespassement de la Royne d'Espengne. Dont le Roy & la Royne furent moult courrouciez, & le Duc de Bourbon aussi. Et moult fu blasmé ledit Pietre de vaillans Cheualiers, de ce que ainsi fauslement l'auoit fait mourir par traison. Et en ce contemple couroit parmi le Royaume de France vne tres-grant & innumerable multitude de peuple, qui grant Compengne se faisoient appeller. Et y estoient Engloiz, Gascoings, Henuyers, Alemans, & autres gens, & de plusieurs & diuerses nations. Où moult auoit larrons & murdriers, qui roboient le pais, & rençonnoient, & tât faisoient de persecutions & de maux, que on ne les pourroit raconter. Et pour obuier & resister à leur folle emprinse, le Roy CHARLES, qui moult amoit son peuple, & secourir le vouloit, assembla son grant & estroit Conseil. Ausquelz il monstra ceste

chose, pour auoir aduis comme on en peust ordonner pour le mieulx, sans auenturer ne mettre en peril de mort ses nobles Barons & tout son Royaume à iceulx malfaiteurs, sans combattre. Car il, qui estoit tressages sur tous autres de fondit Conseil, & de sa personne plain de grant hardiesse, doubtoit pour ses Barons les mauuaises fortunes de bataille, qui peussēt auenir. Et pour ce voulzist bien, quoy qu'il deust couster, qu'ilz fussent hors de son Royaume, & s'en alassent en Espengne contre le faulx Pietre mescreant, qui sa belle suer auoit fait mourir, comme dit est. Et BERTRAN dist au Roy, qu'il en deliureroit biē son pays, ce lui sembloit, mais qu'il peust parler à eulx. Car il les emmeneroit auecques lui sur les Sarrazins en Grenade, & en Cyppe, pour aidier au Roy, qui n'agaires auoit conquis Alexandrie. Et tantost que Bertran ot prins son appointement auecques le Roy nostredit Seigneur, il enuoya vn sien Herault deuers lesdites gens de Compengne, pour auoir vn saufconduit pour aler parler à eulx. Lequel Herault les trouua logiez assez près de Chalon sur la Soosne. Et tantost qu'il fu venu à leur logeys, il fu recogneuz à son tunicle. Puis le menerent parler aux Capitaines, ainsi comme requis les auoit. Lesquelz il trouua assis au disner. Et s'adreça premier à Hue de Carualay, Mathieu de Gournay, Nicolas Scambourc, Robert Scot, Gautier Huet, Bric-

quet, le Bourc de Elames, le Bourc de Pierre, le Vert Cheualier, & Iehan d'Eureux. Aufquelz il fist son message. Lesquelz respondirent tous, qu'ilz le vouloient; & lui firent bailler le saufconduit. Et ledit Hue de Carualay dist, que voulentiers verroit Bertran, & lui donroit de son vin. Et fu celui, qui premier ottroya le saufconduit. Et tantost ledit Herault s'en retourna à Bertran, lequel parti incontinent, & cheuaucha tant qu'il vint en l'ost de ladite Compengne, & le salua. Et ilz s'enclinerent contre lui. Et Hue de Carualay, qui moult estoit vaillant Cheualier Engloiz, le vint acoler, & l'appella amy & compaignon. Mais Bertran respondi, qu'il n'y en auoit nul, à qui il ne voulzist faire ce qu'il lui plairoit. Et Carualay lui respondi, & iura Dieu, qu'il yroit auecques lui par tout, où il lui plairoit guerrier tout homme, excepté le Prince de Galles. Cellui seruiroit-il sur tous autres. Et Bertran respondi, que autre chose ne vouloit-il pas. Adoncon fist apporter du meilleur vin, dont Gautier Huet seruy Bertran. Lequel ne le vult prendre, mais lui dist que ce seroit pour lui. Toutesfoiz n'y ot oncques Cheualier, qui voulzist boyre, iucques à tant que Bertran ot beu. Apres boire, leur dist: Seigneurs, ie vous diray pourquoy ie suis icy de par le Roy de France, qui son peuple gardast volentiers. Et se vous me voulez croyre, ie vous feray tous riches. I'ay grant vou-

„ lenty d'aler aidier au Roy de Cyppre, ou en Gre-
„ nade, pour greuer les Sarrazins. Et se vous vou-
„ lez venir avec moy, le Conte de la Marche, Oli-
„ uier de Mauny, ses freres, & autres Cheualiers
„ qui se veulent traueiller pour sauuer leurs ames;
„ ie vous feray tres-loyal compaignie: & avecques
„ ce bailler de l'argent du Roy deux cents mil flo-
„ rins, & auoir du saint Pere absolucion de tous
„ voz pechiez. lequel nous fera aussi bailler de son
„ thresor. Et puis yrons parmy Espégne, pour gre-
„ uer le Roy dā Pietre, qui a fait vn villain murdre.
„ Sur lequel Roy nous pourrons grandemēt gan-
„ gner & prouffiter. Et aussi est le pays plantureux.
„ Si nous vault mieulx ainsi faire, & pour nos ames
„ sauuer, que de nous dampner & donner au dea-
„ ble. Car trop auons fait de pechiez & de maulx,
„ comme chacun puet sauoir endroit foy. Et tous
„ nous conuendra finer. Adonc respondi Hue de
„ Carualay: Bertran du Guesclin, si m'aist Dieux,
„ moy & mes compaignons de foy ne vous faul-
„ drons ia. Et ainsi le vous promets, ou cas que le
„ Roy de France, que nous ne heons pas, n'auroit
„ guerre à mondit Seigneur le Prince, de qui ie
„ suis homme. Et Bertran respondi, que ainsi le
„ vouloit. Et dist à Hue, qu'il demandast aux au-
„ tres Cheualiers & Barons, se ilz en estoient d'ac-
„ cort. Et Hue de Carualay, qui tres-vaillant Che-
„ ualier estoit, & moult courroucié de la guerre
des deux Roys, parla lors aux Capitaines Bretôs,

Engloiz, Gascoings, & Nauarrois, & à leurs gens. Telz y ot, qui de ceste requeste furent liez, & les autres doulenz. Car en icelle assemblée auoit plusieurs pillars & droiz tirans, qui n'auoient pitié de tuer, ardoir, ne rober hommes, femmes, & enfans. Et si doubtoient les poines & ahenz, qu'il leur conuendroit traire à passer les montaignes & les destroiz. Et le pays de Frâce leur sembloit doux & delitable : & y trouuoient bons vins & bonnes viandes. Et disoient les aucuns: Que ferons-nous à Rome, quant nous trouue-
 rons le saint Pere sur les champs? Mais nonob-
 stant ce tous bons Capitaines dudit ost s'acorde-
 rent à Bertran, iusques à vingt cinq des principaux. Ausquelz il print congie, & leur dist, qu'il les manderait quant il seroit temps & lieu, pour venir deuers le Roy, qui leur feroit bonne chiere, & n'eussent doubte aucune. Car Bertran dist, que oncques n'auoit fait ne pensé trayson. Et ilz dirent, que bien sauoient sa loyaulté, & qu'ilz se fioient plus en lui, que en tous les Prelas, qui estoient en Auignon, ne en France. Mais Bertran leur requist, que les fors qu'ilz tenoient en France leur fussent deliurez. Et ilz lui octroierent. Adonc print ledit accort escript & seellé, & s'en ala à Paris, où il trouua le Roy, & lui dist, Qu'il enuoiroit hors de son Royaume celle mauuaise gent guerrier sur les Sarrazins, pour sauuer leurs ames. Et cōment les Capitaines vendroient

à Paris se il plaisoit au Roy. Et le Roy dist qu'il le vouloit bien, mais que ce fust tout secretement. Car il ne vouloit pas que ceulx de Paris s'esmeussent à aler encontre eulx. Que pour la plainte des gens iceulx Capitaines pourroient estre effrayez. Ausquelz le Roy ne vouloit qu'amitié, puis qu'ilz estoient Cheualiers de renom, & que à luis estoient acordez. Puis furent mandez, & vindrent au Temple à Paris, où ilz furent noblement festoiez & disnez. Et leur donna le Roy de beaux dons, afin de nourrir amour & paix. Et là vindrent à eulx, pour eulx acointier, & faire cognoistre l'un l'autre, le Conte de la Marche, le Besgue de Villaines, le bon Mareschal Daudrehem, Oliuier de Mauny, Guillaume Boitel, Guillaume de Launoy, Caraenloet, qui depuis tua Chandos, & plusieurs autres Cheualiers & Escuiers, qui tous iurerent de faire le voyage. Et Bertran mena toutes ses gens à Chalon sur la Soosne, & de là les arouta vers Auignon. Et ainsi deliura de ces gens le Royaume de France, dont il fu moult amé du peuple. Et quant le Pape entendit, que ceste grant Compengne aloit deuers lui, qui le pays de Prouence pourroient bien gaster & destruire, si enuoya tantost deuerseulx un sages homs Cardinal, sauoir qui ilz estoient, & que eulx aloient querre en ces parties là. Et biē leur dist, que si tantost ne vuidoient le pays, il les escomenyroit de tout son pouoir. Adonc icelui

Cardinal alla ouudit message bien à enuiz, & en grant doubte. Tant ala, qu'il vint à culx. Puis demanda, à qui il deuoit parler, & soy adrecier cōme message du saint Pere. Et vn Engloiz lui respondi, qu'il trouueroit bien à qui, & bien fust-il venu. Puis lui demanda, s'il apportoit point d'argent. Et quant le Cardinal l'entendi, si en fu tout courroucié. Adonc vindrent encontre lui Bertran du Guesclin, Ernoul Daudrehem Marechal de France, le Conte de la Marche, Huet de Carualay, Iehan d'Eureux, Gautier Huet, Robert Scot, Oliuier de Mauny, le Vert Cheualier, & plusieurs autres, qui l'enclinerent & honnourerent haultement. Mais telz y estoient, qui sa vesture voulussent bien auoir robée. Apres ce, ledit Cardinal fist le message du Pape, ainsi comme enchargé lui estoit. Et le Marechal, qui moult estoit sage, & si preudōme, que l'oriflambe lui auoit esté baillée en garde, respondit audit Cardinal: Sire, vecy vne gent, qui ont esté ou Royaume de France, où ilz ont fait des maulx & persecutions plus de vint fois que on ne vous pourroit dire. Ores se sont acordez de aler sur les Sarrazins. Et les cuidions mener en Cypre. Mais nous auons entédu, que le Roy en est trespaslé. Et pour ce les voulons mener sur les Sarrazins en Grenade. Si supplions tous à nostre saint Pere, qui est Lieutenant de Dieu, que tout premierement il nous absoille de paine & de coul-

pe: & apres, qu'il nous fasse deliurer deux cens
mil frans pour nostrevoyage faire. Quant le Car-
dinal l'entendi, tout le sanc lui mua. Et dist, Sei-
gneurs, le nombre est trop grant. Quât est d'ab-
solutio[n], vous l'aurez, de ce n'en doubtez ia.
Mais de l'argent ne respon-ie pas. Et Bertran lui
dist: Sire, il conuient auoir en present tout ce
que le Marechal demande. Car ycy en y a moult
qui d'absolucio[n] ne parlēt point, & trop miculx
aimeront auoir de l'argent. Car nous les faisons
preudommes malgré eulx, & les merrōs en exil,
afin qu'ilz ne fassent mal à nulles gens Chrestie-
nes. Et quant ilz auront de l'argent largement, si
se tendront-ilz à enuiz de mal faire. Et pour ce,
dites au saint Pere, que nous ne les pouons autre-
ment emmener. Et le Cardinal dist, qu'il yroit,
& sa responce leur feroit briefment sauoir. Or
vous haltez, dist Bertran. Com plus demourrez,
& plus y aurez de dommage. Car nous yrons lo-
giet en Villeneufue. Adonc ledit Cardinal pria
humblement à Bertran, qu'il ne consentist en
aucune maniere, que on fist mal au pays. Et Ber-
tran respondi, qu'il ne promettoit pas, qu'il les
en peust tous garder: mais il en feroit son
plain pouoir. A tant s'en party icelui Cardinal,
& s'en ala en Auignon, où les gens desiroient
moult à oyr des nouuelles. Et auoient tout fer-
mé, & se tenoient aux portes & aux murs. Et le
Cardinal dist à aucuns d'iceulx, qui lui en en-
queroient:

queroient: Nous aurons bonne paix, se nous a-
 uons de l'argent. Et puis ala au Pape relater la
 confession des gens de la grât Compengne, qui
 requeroient absolucion. Et le saint Pere respon-
 di, qu'ilz l'auroient: mais que pourtant ilz vui-
 dassent le pays. Mais le Cardinal dist, que auec-
 ques ce il leur conuendroit bailler deux cens
 mille frans. Ce tint le Pape à grant merueilles.
 On a accoustumé, ce disoit il, de nous donner
 grans dons d'or & d'argent en la cité d'Auignon
 pour absoldre les gens. Et il conuient que nous
 absoillons ceux-cy à leur deuise. Et encor que
 nous leur donnions du nostre, c'est bien contre
 raison. Adonc le Pape par le conseil dudit Car-
 dinal fist assembler à conseil les plus riches &
 plus puissans bourgeois, lesquelz assirent vne tail-
 le sur ceulx de la ville grans & petiz, selon sa fa-
 culté, qui ne montoit que à cent mille frans. Et
 atant s'acorda Bertran, & les autres Barons de
 Frâce. Et entretandiz que on la cueilloit, le saint
 Pere estoit en son Palais, qui veoit ceulx de l'ost
 aler en fourrage, & mener en leur logeis beufs,
 vaches, moutons, berbiz, poulaille, vins, pain
 blanc & bis. Haa! Dieu, ce dist le Pape, commēt
 ceste gent ouurent de mal en pis, & se donnent
 de poine pour aler en enfer. Et le Conseil du Pa-
 pe assemble la finance. Puis enuoierent le Pre-
 uost du Pape à Villeneuve, lequel dist à Bertrā:
 Sire, l'auoir est tout prest, & l'absolucion escrip-

te & scellée. Et Bertran, qui bien auoit entendu, comme les pauures gens de la cité en auoiēt esté
” tailliez & greuez, lui demanda: Dictes moy, fre-
” re, & ne me le celez pas. Dont vient ce tresor?
” l'a prins le Pape en son tresor? Et il lui respondi
” que non, & que le commun d'Auignon l'auoit
” païé, chacun sa porcion. Lors dist Bertran: Pre-
” uost, ie vous promets, que nous n'en aurons de-
” nier en nostre vie, se il ne vient de l'argent du
” Pape, & de son riche Clergié. Et voulons, que cet
” argent cueilly soit rendu à ceulx qui l'ont païé,
” sans ce que riens perdent du leur. Et dites bien
” au Pape, qu'il le leur fasse rendre. Car se ie sauo-
” ye que le contraire fust, il m'en peseroit. Et euf-
” se ores passée la mer, si retourneroy- ie par deça.

Adonc fu Bertran payé de l'argent du Pape, & ses gens derechief absous, & ladite absolucion premiere derechief confirmée. Adonc firent charger & trousser leur harnoiz, & s'en alerent à Thoulouse la cité, où le Duc d'Aniou estoit, qui moult les honnoura, & donna maint beau don aux Cheualiers. Puis pria en conseil à Bertran, si cher comme il l'amoit, que il alast aidier à Henry à l'encontre de Pietre, qu'il trouueroit en Aragon, où il gastoit le Royaume. Et que sur lui, qui ne croit pas la loy Chrestienne, il vengast la mort de la bonne Roïne d'Espengne. Et Bertran lui respondi, que il en feroit tant, qu'il s'en apparceuroit. Dont prinst congié Bertran du no-

ble Duc. Et tant cheuaucherent lui & ses gens, qu'ilz vindrent pres d'Arragon, où dam Pietre estoit venu à tout grant compaignie d'Espaignolz: qui en son chemin faisoit tout ardoir & exiller. Et mesmement à son frere Henry fist-il maint domage. Et lors estoit le Roy d'Arragon à Perpegan en son chastel, où il faisoit son mandement pour auoir aide. Et Pietre auoit par force conquis en son Royaume plusieurs chasteaulx grans & fors. Et le Conte Henry si estoit à Chasteaublanc, qui est en son heritage, où il se gardoit, & sa femme aussi. Et auoit avecques maint Espagnol, pour lui aidier encontre Pietre. Et quant il oy nouuelles de la venue Bertrá, & des bons Cheualiers qu'il amenoit avecques lui, il ala encontre eulx par vn saufalant. Et si tost comme il les approucha, il enclina premieremét Bertran, & tous les autres; & eulx lui aussi. Et tantost Bertran l'ala doubcement embracer, & lui promist & iura, que iamais en France ne retourneroit, iusques à tant qu'il l'auroit couronné du Royaume d'Espengne, qu'il deuoit auoit par droit mieulx que son frere Pietre le mescreant, qui sa courtoise femme auoit fait murdrir en trayson. Et pour ce estoit là venuz, pour lui punir. Et Henry dist, que Dieu lui fust en aide aussi vraiment, comme mestier en auoit tref-grant. Adonc mena ledit Bertran & toute sa compaignée logier ou dit Chastelblanc. Mais tantost

les nouuelles furent portees à Perpegan au Roy d'Arragon, comment il estoit venu en sa compaignie. Et tantost ledit Roy, qui grant ioie en ot, enuoia deuers lui quatre Cheualiers, pour lui deprier qu'il venist deuers lui, & amenast les gens qu'il auoit, & il lui feroit prouffit & hōneur. Adonc ledit Bertran & les Cheualiers alerent en ladite ville de Perpeigan deuers ledit Roy, qui moult les honnoura & festoia. Puis les fist disner, & apres menger les mena en sa chambre. Et leur dist; Beaux Seigneurs, vous estes venuz deça pour aler en Grenade. De ce m'a l'en pieça parlé. Mais par Dieu, qui crea le monde, vous ne pourriez faire meilleur voiage, que de destruyre Pietre, qui m'a tant courroucié. Car il est desloyal, & n'a point de foy. Car il ayme Iuifs, & Sarrafins. Et oncques pire ne fu. Et si a fait fauslement mourir sa femme, qui tant estoit bonne: & bannir son frere pour le bien qu'il lui monstroït. Lequel deust estre Roy d'Espengne mieulx quē ce traître là. Car ledit Henry fu engendré du Roy ALFONSEN la riche Donne qu'il tenoit pour sa femme. Car il l'auoit fiancée. Et si engendra aussi en icelle Dame trois filles moult belles, lesquelles Pietre mist en prison quant il enchassa Henry; pour ce qu'il estoit commune renommée de ceste chose, ainsi comme vn Iuif lui rapporta. Et pour icelles filles esprouuer, les fist mettre entre les lyons, qui moult estoient cruelz. Mais ilz fu-

rent touscoys, comme aignelets. Et n'y out onc-
ques celui, qui par mal touchast à aucunes d'icel-
les. Et ainsi furent sauuées & deliurées de peril.
Et que ce soit verité, nous le vous affermons ain-
si. Donc dirent les Cheualiers, que c'estoit beau
miracle. Et promistrent au Roy, qu'ilz aideroiēt
& conforteroient Henry : & s'il plaisoit à Dieu,
ilz chasseroient Pietre hors d'Espengne, & ven-
geroient la mort de la Royne. Et le Conte de la
Marche leur en pria aussi, pour ce qu'elle estoit
de son parenté, & du sanc de Bourbon. Et le Roy
d'Arragon dist, que à ce commencement leur
feroit present de cent mille florins d'or, & s'il
leur feroit deliurer des viures assez pour eulx, &
pour leurs cheuaulx. Et ilz dirent, qu'ilz en iroiēt
piller sur les Espaignolz, où ilz auroient le debat
à eulx.

DE LA se party vne espie, qui ces paroles es-
cōuta. Lequel exploita tant, qu'il trouua le Roy
Pietre, & lui dist: Sire la blanche Compengne est
venue par deça, lesquelz viennent des parties de
France. Et ont chacun croix blanche sur l'espau-
le. Et le Roy demanda, qui les conduisoit. Et le-
dit espie lui respondi, que c'estoit Bertran du
Guesclin. Et quant le Roy l'oy, tout le sanc lui
mua, & estraint les dens, & esroulla les yeux: &
par grant hair deschira sa barbe. Adonc lui de-
manda vn Iuif, que il moult aimoit, nommé A-
braham: Sire, dites nous comme va la chose. Et

„ le Roy lui respondi: Si grant mal m'auendra,
„ que ie pardray Espengne, & m'en conuendra
„ foir. Et l'Aigle est venuz, qui m'en dechassera.
„ C'est Bertran du Guesclin, qui me doit desconfi-
„ re, & mon frere Henry couronner à Burs: lequel
„ fera Roy d'Espengne, & tendra ma terre. Adonc
„ chey ius de la grât douleur qu'il eut. Et puis dist,
„ que à grât tort l'auoit dechassié. Car passé a plus
„ d'un an lui auoit bien c'est affaire dit. Adonc
„ icelui Iuif le reconforta, & lui dist: Sire, ne vous
„ esbayssiez. Car vous ne verrez ia aucun, que vo-
„ stre terre perdez ainsi. Car ainçois qu'ilz aient
„ conquis Burs, ne Toulete, ne Sebile la grant,
„ qui est si bien fermée, ne Tudelle aussi, pourrez-
„ vous bien auoir secours, pour resister à eulx. A-
„ donc dist Pietre: Je suis moult effroïé. Plus ne
„ vueil arrester icy, maiz m'en retourneray. Car
„ ie n'atendroye Bertran pour tout l'or du monde.
„ Adonc fist commander à ses gens, que tout fust
„ troussé dès la nuyt. Et eulx si firent. Et le lende-
„ main droit au point du iour s'en partirent, pour
„ aler à Burs, & le sierent Arragon, que ainsi a-
„ uoient gasté. Et s'en vindrent à Maguelon vne
„ bonne ville fermée, où il a bon chastel, & siet à
„ l'entrée d'Espégn du lez deuers Arragõ. D'ilec
„ s'en alerent à Borge, & à S. Domin, & de là à Ber-
„ uesque: & fist moult bien garnir lesdites villes, &
„ plusieurs chasteaulx d'enuiron. Et d'ilec ala Pie-
„ tre en la cité de Burs, où l'en a coustume de cou-

ronner les Roys d'Espengne. En icelle ville y auoit moult de belles bourgoises, & si y auoit Iuifs & Sarrafins, que Pietre creoit. Donc les Chrestiens estoient moult doulens, & moult heoient ledit Pietre. Lequel fist tresbien garnyr la ville, & derriere & deuant haucier les murs, & les fossez d'enuiron aparfondir. Car moult doubtoit la venue de Bertran, & des autres Barons. Lesquelz au partir d'Arragon prindrent chacun la croix blanche. Et pourtant les appelloit-on LA BLANCCE COMPENGNE. Et bien estoient pourueuz de vitaille, qu'ilz menoient à charroy & sommiers. Adonc Bertran demanda à Henry, par où on pourroit entrer en Espengne, pour plustost trouuer Pietre. Et il, qui sauoit le país, lui respondi, qu'il conuendrait aler à Maguelon, qui estoit l'entrée d'Espengne, à l'issue d'Arragon. Et Bertran respondi: Or alons dont briefment, si le conquerrons. Tant cheminerent, qu'ilz vindrent deuant ladite ville, où ilz se logierent. Adonc Henry s'en ala iusques aux barrieres, & appella le Capitaine, lequel y vint, & le rauisa, & puis lui dist: Sire de Trichemare, que faites vous, ne que demandez icy? Je vous demande la ville comme droit Seigneur d'Espengne que ie suy. Et il respondi à Henry: Retournez-vous en derriere. Car ou Royaume n'avez qui vaille vn denier, ne à vous n'obeyrons en riens. Par ma foy, dist audit Capitaine, si vous en repentirez. Et ilz

respondirent, qu'ilz n'y comptoient neant. Adonc s'en retourna aux Barons de l'ost, & leur dist le respons dudit Capitaine.

Comment Bertran du Guesclin & la blanche Compaignie prindrent d'assault, ou nom du Conte Henry trois bonnes villes fermées en Espengne, c'est assavoir Maguelon, Borge, & Beruesque, avecques les chasteaux d'icelles.

CHAPITRE XVIII.

TANTOST que Henry ot rapporté en l'ost, que ceulx de Maguelon ne s'estoient voulu rendre à lui, & Bertran dist, que ladite ville seroit assaillie: si ordonnerent canōs, & canoniers qui iceulx getteroient, & puis Archiers & Arballestriers pour traire, & varlés pauoisiers pour iceulx targier. Et puis firent copper grant foison d'arbres, de buisōs, & d'autres bois pour emplir les fossez. Puis s'armerēt & appareillerēt tref-biē, cōme bons assaillans: & drecierent contremont bānieres & panons. Là y auoit Bretons, François, Engloiz, Normans, Liegoys, Brebançons, Flamens & Gascoins. Car il y en auoit de plusieurs langues tref-grant nombre. Là estoient le bon preudomme Mareschal d'Audrehem, Hue de Carualay, qui bon Cheualier estoit, Gautier Huet, & son frere Ienson, Guillaume Boitel, le
Sire

Sire de Beauieu, & maint autres Cheualiers, qui firent sonner trompes & trôpettes moult haultement. Adonc commença l'assault grant & fier. Et ceulx de dedens se deffendoient moult fièrement : & gettoient chaux viue, & poinçons. Et n'y auoit homme ne femme, ne varlet ne garçon, qui ne fust à la defense. Et Bertran crioit : Assaillez hardiement. Car nous les arons, & trouuerons là dedens Iuifs & Sarraïns. Adonc l'en commença fort à getter & à lancer bois dedens les fossez. Tant qu'ilz furent aempliz & razez iusques aux murs. Et trayoit-on si dru aux carreaux pour greuer les Espaignolz, qu'ilz n'osoïent bouter la teste hors. Mais Guillaume Boitel fist aler sa bataille iusques au mur, qu'il fist troüer à picques & à hoes. Tant que lui & ses gens entrerent par le trou dedens. Et Bertran du Guesclin ne s'y faignoît pas. Et tellemēt furent effraiez les Espaignolz, qu'ilz se bouterent dedens le chasteel. Lors alerent nos gens fuster la ville, laquelle ilz prindrent à vn auesprement : & emprisonnerent Iuifs & Sarrazins tant qu'ilz en porent trouuer. Illec seiournerent trois iours, & puis y lessierent le Capitaine, & s'en partirent. Si alerent logier à deux lieuës d'ilec deuant vne ville nommée Lorge. Et Héry cheuaucha iusques à la barriere, & demanda le Capitaine : lequel y vint. Si lui requist, que la ville lui voulzist deliurer, comme à leur droit Seigneur qu'il estoit. Et le dessus-

dit Capitaine lui dist, que entrer n'y pouoit. Car Pietre son frere, que il amer deust, leur auoit defendu sur les membres coper. Et bien sauoit que il estoit vn Roy, qui moult doubter faisoit, & qu'il les pourroit faire mourir, se il trespassoit son commandement. Seigneurs, dist Henry, ie vous en garderay bien. Car i'ay les François en mon commandement. Et ne partirōs de cy, quoy qu'il doye couster. Si aurons la ville, comme nous auons fait Maguelon. Et ledit Chastellain lui dist: Or lessiez vostre sermonner. Car vous n'y entrerez ia que ie puisse. Dōt fu Henry moult courroucié, & relata audit Bertran la respōce, & aux autres Barōs; qui iurerent, que la ville seroit assaillie. Adonc se ordonnerent & appareillerēt chacun, grans & petiz, pour assaillir, à vn Ieudi matin. Donc firent trayre Archiers & Arbalestriers, & les fossez aemplir par les varlés. Et ceulx de dedens se deffendoient moult fort, & gettoiet pierres & cailloux sur noz gens, lesquelz entrerent ou fossé; & à hoes, picques, & leuiers, despecierent les murs. Tant qu'ilz y attacherent les eschielles de cordes, où plusieurs monterent à mont. Mais vn chastel y auoit en la ville, où il auoit Iuifs & Sarrazins, qui d'eauë chaude eschaudoient noz gens. Mais noz gens firent tant, qu'ils entrerent en ladite ville. Et y ot vn Normant, qui mist la banniere Bertran sur le mur. Puis escria à noz gens: Venez auant. Car la ville sera

tātost prise. Puis cōmença ledit assault, tellemēt que noz gens s’y bouterent, tant gens d’armes comme Arbalestriers, tout à cop. Et tantost alerent ouurir l’vne des portes, par où leurs cōpaignons entrèrent. Adonc Espaignolz crierēt, qu’ilz se rendoient:& vindrent crier mercy à genoulz, & lès femmes aussi. Et Henry les y reçut. Puis assaillirent le chastel, qu’ilz prindrent, & tuerent Iuifs & Sarrazins tout à fait. Mais aux Chrestiens ne toucherent-ilz. Car Henry leur pardonna. Et à Bertran donna ladite ville auecques la Conté, tout ainsi comme elle se cōporte; qui est alsise en la Duchié de Moulines, dont Bertran fu Duc apres ce. En icelle ville seiournerent nosdites gens, pour eulx reposer;& firent les nauires appareiller. Puis s’en alerent mettre le siege deuant Beruesque, qui est vne moult forte ville, fermée de deux paires de murs bien haults, & garnie de plusieurs Espaignolz hardiz, qui aymoient & doubtoient Pietre. Et quant Henry vint à eulx parler, ilz ne tindrent oncques compte de lui. Toutesfoiz il leur dist:Seigneurs,vous “
estes foles gens, qui ne me receuez à Seigneur “
luige. Car vous sauez que mon frere vit de mau- “
uaise vie, & ne croit pas en Dieu. Et se vous me “
voulez receuoir, ie vous ay en conuenant de dō- “
ner franchise à vostre voulenté. Et ilz respondi- “
rent, qu’ilz n’en feroient neant. Et quant Henry
entendi leur responce, si fu moult doulent. Et

„ Bertran lui dist: Henry, ces gars ne vous doub-
 „ tent point; mais ie les vous rendray bien brief.
 Adonc fu ladite ville asseigée tout entour. Et
 quant noz gens furent vn petit seiournez, si se
 adouberent. Et gouuerna Bertran la premiere
 bataille, qui fu deuant vne porte, où il fist leuer
 sa banniere, que Iehan du Bois porta. Et puis le
 Conte de la Marche la sienne, le bon Mareschal
 d'Audrehé aussi, & Hue de Carualay. Et là estoïent,
 Alain de Mauny, qui bon coureur estoit; & Yuō
 de Launoy Breton Bretonnant, qui deux champs
 de bataille auoit outrez: Iehan de Beaumont, &
 son frere Alain, & plusieurs Engloiz & Bretons,
 qui firent sonner leurs trompettes pour donner
 assault. Et ceulx de la ville se mussoient aux
 murs & aux carneaux, pour defendre l'en-
 trée. Et quant ils virent nos gens rengiez
 & ordonnez, ilz les maudirent moult fort,
 & qui en la contrée les auoit fait venir. Et e-
 stoient les Iuifs à vn des costez de la ville. A ce
 lez s'ala logier Hue de Carualay & ses gens en-
 droit la Iuifrie. Et tellement y assaillirent, qu'ilz
 percierent le murs en plusieurs lieux, & y firent
 de grans trous à marteaulx d'acier. Et par la las-
 cheté & fausseté des Iuifs, entrerent dedens. Et
 là auoit vn Breton Bretonnant, qui mist la ban-
 niere Bertran sur le mur. Adonc commencerēt
 nos gens à monter par eschielles de corde sur les
 murs: & crioient les vns Guesclin, & les autres

Carualay: les autres la Marche, & les autres Audrehen. Puis disoient aux Espaignolz. Traytres, " tous y mourrez. Et les Espaignolz leur disoient: " Alez en * Noromale, où vous fustes nez. Donc " estoit Bertran au dessoubz de la montaigne, mais il assailly si hardiement, qu'il vint charpenter aux barrieres de vne cognie. Et cryoit tant comme il pouoit: Assaillons ces renoiez. Et ceulx " d'enhault gettoient queuës toutes plaines sur nos gens, si qu'ilz les abatoient. Mais tantost se releuoient, & les aloient assaillir. Et dirent plusieurs Cheualiers & Escuyers de bonne vie, qui en terre de Surie auoient esté deuant Satalie, & deuant Alexandrie, & depuis recorderent en plusieurs lieux; Que oncques mais ne furent à si fort assault, ne on ne cuidast pas que la ville deust estre prise en deux ans tous entiers, se ne fust par famine, ou par ietter des gros engins. Mais noz gens desiroient tellement à icelle, que oncques mais on ne vit si en grant d'assaillir. Tousiours estoit le bon Bertran à la porte deuant, & avec lui Oliuier de Mauny, & ses freres, qui ses cousins estoient. Et celui de la Houssoye, qui fu enuoyé és fossez, dont il ot le bras rompuz. Et aussi y estoit le Sire de Beauieu, & plusieurs Cheualiers & Escuyers François & Engloiz deuant nōmez, qui assailloient moult fort, & faisoient les fossez aemplir. Mais les deffendeurs raualerent laide- ment noz gens, de grans merriens qu'ilz tresbu-

choient ius des murs, & de tonneaux plains de cailloux. Car qui en estoit attaint, il estoit mort sans remede, & aloit par terre. Et quant le Conte Henry, qui estoit logiez deuers les marés, vit la grant proesce & honneur, qui estoit en Bertran, & és nobles Barons, ses gens coururent à l'assault comme tous desfuez, & ramperent contremont le mur. Puis mirent la banniere Henry à cousté. Adonc entrerent noz gens de tous costez en la ville. Mais Bertran & les siens ne demourerent pas derriere, ne Hue de Carualay, & ses Engloiz aussi. Et quant ceulx de la ville apperceurent nos gens, & virent leurs bannieres & panons leuez, ilz s'en alerent mucier en caues & en celliers. Et les aucuns saillirent des murs és fossez, & les autres se gettoient à genoulz. Là ot grant criz gettez de femmes & d'enfans. Dont s'en alerent noz gens en la Iuifrie. Si trouuerent la porte & le portis fermé. Mais par force abatirent ladite porte, où ilz ferirent maint cop. Et Hue de Carualay & ses gens leur reuindrent de l'autre lez par dessus les murs, où ilz estoient entrez. Adonc furent Iuifs laidement atrappez. Illec auoit vne tour moult ancienne, où plusieurs Iuifs se retreyrent. Et ainsi comme il y en montoit trois, vn Escuier des nostres les syeui de prés, tant qu'il entra apres eulx. Mais il fu abatu d'un mortier pesant, que l'en getta sur lui. Ne pourquant il se releua hastiement, & abati icculx Iuifs en montant les de-

grez. Adonc fu ladite tour assaillie. Et fist apporter Bertran de la gresse, & oindre tresbien luy de la tour, & le feu bouter. Et ainsi furent iceulx Iuifs eschaudez & estains, & le vaillant Escuier, qui s'euiz les auoit: dont ce fut grant pitie. Par telle maniere fu conquise Beruesque, & tous les Iuifs tuez & mis à mort. Et tant en y auoit, que noz gens marchoiert par dessus, & se rendirent Espaignolz plainement. Leenz se logierent nosdites gens moult noblement. Mais de ladite cité yssirent hastiuement deux bourgeois, qui moult estoient doulens: & exploicterent tant qu'ilz vindrent en la cité de Burs, où ilz trouuerent Pietre en son Palais. Et avec luy estoit Ferrant de Castre, qui l'amoit loiaument. Car Pietre tenoit sa suer, & lui auoit proumis de l'espouser. Adonc iceulx bourgeois le saluerent moult courtoisement. Et Pietre leur dist, que bien feussent ilz venuz. Puis leur demanda, comment le faisoient sa bonne gent de Beruesque. Et ilz lui respondirent: Sire, on y fait mauuaisement. Car Bertran du Guesclin, où tant a hardiesse, & Henry vostre frere, & les autres, qui sont avecques eulx, nous ont liuré vn assault si fort & si merueilleux, que oncques tel ne fu, ne iamais ne fera: & ont conquis nos murs, où ilz sont montez comme singes ou chaz, & toute la ville ont prise à leur commandement; & ont occis Iuifs & Sarrazins, & de voz hommes assez, & à foison. Quât

„ Pietre l'entendi, si leur dist: Vous mentez fausse-
„ ment. Car par assault n'a elle pas esté prise, ains
„ auez euz l'or & l'argent pour icelle liurer à mes
„ ennemiz, ausquelz vous l'avez vendue, comme
„ faulx traitours. Et pour ce vous feray mourir.
„ Adonc parla l'autre bourgeois, qui dist: Sire, par
„ la Vierge Marie il n'y ot oncques traison faite
„ ne deuifée, ne oncques or ne argent n'en fu pro-
„ mis, ne receu. Mais par force d'assault de hardies
„ gens d'armes & d'Archiers & d'Arbalestriers
„ trayans à la voulée, qui leurs vies n'espargnoient
„ point, ne ne doubtoient estre bleciez, naurez,
„ ne traueilliez, a esté nostre ville conquise. Ne en
„ ce pas n'a cité ne ville, tant soit bien close, qu'ilz
„ n'eussent prins par assault, ains la quinzainé pas-
„ sée. Je croy que ce sont ennemis, qui d'enfer sont
„ venuz. Vous n'avez ville, ne chastel, ne cité aussi,
„ qu'ilz ne conquierent ainçois vn an passé. Et
„ quant Pietre l'oy, si leua la chiere, & dist: Faulx
„ traicte, filz à putain, vous auez fauslement mé-
„ ti. Et ce que cy auez deuifé, auez controuué par
„ la finance que vous en auez receuë. Si en ferez
„ traynez & péduz. Mòult fu courroucié Pietre,
„ & dist à Ferrant de Castre, qui estoit son affin: Or
„ suis-ie bien perdu par Bertran du Guesclin, qui
„ est venuz par deça; & croy bien que le sort sera
„ accomply, qui dist, Que vn Estournel vendra du
„ pais de Bretaigne, qui les autres esmouuera, &
„ prendra les haultx eoulombiers & les coulons,
qui

qui dedens seront. Bien a le deable apporté ce „
 Bertran, qui m'est venuz destruire, pour aidier „
 Henry le Bastart à mettre sus. Ne ie ne scay vra- „
 yement, que ie deuiengne. Adonc commanda, „
 que on pendist les deux bourgeois dessusdiz, les- „
 quelz furent liurez à certains sergés, qui les me- „
 nerent au bois tous nus, où Pietre les fist pendre, „
 qui assez tost apres en fu courroucié. Car il vint „
 des autres bourgeois de ladite ville, qui les nou- „
 uelles confermerent. Et si fu ladite prise sceüe, „
 & esclandrée par tout le pais. Et quant Pietre „
 sceut la verité de tout l'assault, que Bertran y a- „
 uoit fait, & Henry son frere, qui pourchassoit à „
 lui tolir son Royaume à l'aide des autres Barons, „
 il se tint tout coy, & ne dist vn mot pour riens „
 quelxcōques. Mais Ferrant de Castres, qui sages „
 Cheualiers estoit, le reconforta de tout son po- „
 uoir. Adonc Pietre appella vn Iuif nommé Ia- „
 cob, & son frere Iudas, & vn autre Iuif qui A- „
 braham auoit nom, & leur dist: Seigneurs, ie „
 vous tien pour sages, conseillez moy. Car il en „
 est bien besoing, & temps. Adonc lui respondi „
 vn felon Iuif, qui Armacher estoit nommez: Si- „
 re, vous diray verité, & ne le vous celeray-ia. A „
 ce que ie puis voir & conceuoir, vous n'estes pas „
 seurement en la cité de Burs, que vous tenez: & „
 trop mieulx feussiez à Toulette, dont les murs „
 sont grants & hauts, & le chastel fort & puissant; „
 & là vous garderons moult bien. Si cōmandez „

à vos bourgeois & foubzmanans de ceste ville,
qu'ilz la gardent moult bien iusques à vostre re-
tour. Et leur dittes, que vous voulez aler à Tou-
lette pour apaisier la discension, qui y est entre
les bourgeois. A ce conseil s'acorda Pietre, & mād-
da tous les bourgeois de Burs. Puis leur dist : Mes-
bourgeois de Toulette m'ont escript, en suppliāt
comme ie vueille aler par delà, pour apaisier cer-
tain descort qui est entr'eulx : & pour ce y yray.
Si les mettray à paix, & espoir en feray- ie à plu-
sieurs copper les testes. Si me gardez bien Burs
ma bonne cité. Et se François y viennēt, ne vous
en doubtez pas. Car ie vous amerray assez se-
cours de Seuille & d'ailleurs, où i'ay mandé mes
gens. Adonc lui respondi vn bourgeois, qui bien
estoit enlangagé : Sire, il est aduis à vostre gent,
que vous creiez petit conseil, de ainsi laisser vo-
stre bonne ville. Car il y a, passé a cinq cents ans,
& depuis le temps Challemaine, qui tant ot de
renom, qui en ce pais fu, où il cōquist chasteaulx
& citez, que tous les Roys d'Espengne ont esté
appellez Chrestiens, & couronnez en ceste ville,
où vous nous voulez lessier. Et me doubte bien,
que se vous en departez, & vos ennemiz la vien-
nent assieigier, que vous ne la perdez, se brief se-
cours n'a de vous. Lors dist Pietre : Ne suis- ie pas
nommé & courōnez Roy d'Espengne ? Ne puis-
ie pas bien parler à mes gens, & dire tous mes se-
crez ? Par la foy que ie doy à tous mes amis char-

nelz, se pour vn pou ne fust, ie vous toulisse la vie. Sire, dist le bourgeois, vous le pouez faire. " Mais ie ne vous dy que pour vostre honneur, & " bien, & loyaulté. Grans mercy, dist le Roy, qui " aduisé s'estoit, ie vous feray mon Viguiier, & " pourrez faire toute vostre volenté. Et l'Espai- " gnol, qui estoit riches homs, luy dist: Sire, ie fe- " ray tant, que vous en louerez. Mais en son cuer " proposa, que se Héry & Bertran venoient deuât ladite ville, il leur en rendroit les clefs. Donc s'en parti Pierre de la ville de Burs, avecques ses amis en qui il se fioit le plus. Et avec lui estoit Ferrant de Castre, qui emmenoit sa suer. Et si y furent trois Iuifs, Abraham, Iudas, & Manecier. Tant exploicterent, qu'ilz vindrent à Tolette, où Pierre fu moult bien festoyé & bien receuz. Mais de Burs se parti vne espie, qui vint à Beruesque dire à Henry, que Pietre estoit ainsi parti d'icelle cité, pour aller en ladite ville de Toulette. Tantost le raconta à Bertran, & dist qu'il leur en conuen- droit aler. Et Bertran respondi, qu'il le merroit en icelle ville, où il le couronneroit. Et si fist-il depuis ce, ainsi comme vous orrez conter cy apres. Lors fist-on crier en la ville de Beruesque, que chacun se appareillast pour mouuoir lande- main à aler deuers la cité de Burs. Dont firent trousser lances, harnoiz, armeures, artilleries, tantes, paueillons, torches, & toutes autres manieres de vesselle, tant de cuisine, comme au-

tres, à eulx nécessaires; & aussi pains, vins, & chars, tant en charroy comme à somniers, par tres-bonne ordonnance, se partirent assez matin. Et conduisoit l'auant garde le Marechal d'Audrehen, lequel auoit avecques luy Oliuier de Mauny, & ses freres, Bretons, Hue de Caruallay, Nicolas Scambort, Jehan d'Eureux, Gautier Huet, Cheualiers Bretos. Et l'arrieregarde estoit avecques Monsieur Bertran, lequel en estoit conduiseur, le Conte de la Marche, le Sire de Beauieu, Guillaume Boitel, Guillaume de Lannoy, Henry de saint Omer, & plusieurs autres Cheualiers.

*Comment les citez de Burs & de Toulette se rendirent
au Conte Henry, sans attendre siege ne assault,
tantost qu'ilz oyrent dire que Bertran &
la blanche Compengne venoient
deuers eulx.*

CHAPITRE XIX.

EN la cité de Burs vindrent certaines nouvelles de la venue Henry & de Bertran, & de l'autre Baronnie. Si firent tâtost emparer leur ville, fermer leurs portes, & aualer leurs coulenches. Puis sonnerent la cloche de la cômune, & se asâblerêt Espaignolz sur la chaussée. et là y auoit avecques les Chrestiens grant foison de luifs &

Sarrazins. Et ausli y estoit l'Euesque de ladite cité, qui au conseil auoit esté mandé. Car il estoit tref-bon clerc. Et quant ilz furent tous ensemble, ledit Euesque leur commença à dire en ceste maniere: Seigneurs, nous sômes icy venuz pour auoir aduis de nous gouuerner sagement. Car vous veez la douleur, & le grant encombrer, que nous entendons à auoir prouchainement. Et le Roy Pietre nous a laissez, pour ce qu'il craignoit le fait. Adôc parla vn Espagnol, qui moult ot hardiesse, & dist: Seigneurs, vecy vn estat qui n'est pas bon. Car nous sommes icy ensemble de trois loïs & de trois estaz differens. Si n'est pas chose, qui doye plaire à nulle gent. Pourquoi il vault mieulx que Iuifs voy sent d'une part à conseil, & Sarrafins d'autre. Et quant ilz auront conseillié, ilz nous rapporteront veritablement ce que bon leur en semblera. Et de ce faire furent tous d'accort, & dirent que sagement auoit parlé. Adonc se separerent en trois parties, & firent les consaulx secretement, où chacun respondi son aduis. Et l'Euesque de Burs, qui estoit demouré avecques les Chrestiens, fist iurer les plus sages & souffisans de tous sur le sacrement, & sur les saintes Euangiles de Dieu, qu'ilz tendroient secret ce qui là endroit seroit dit. Et quant il en ot pris le seremens, si leur dist: Seigneurs, par ma foy il me semble, selon raison, que Pietre n'est pas digne en nulle maniere de tenir le Royaume.

„ Car il est incredule, & a erré contre la foy long
„ temps a, & n'a de foy ne que vn vieil chien. Car
„ il fait gens mettre à mort sans iugemét, & maint
„ preudomme a destruit sans cause. Et aussi fist
„ murdrir sa femme en trayson. Si vous promets,
„ qu'il nous vauldroit mieulx auoir vn bon Che-
„ ualier, & de bon gouuernement, qui tenist &
„ gouuernast le Royaume, & qu'il fist droit & loy;
„ que de obeyr à vn tel grant, plain de fausse vie.
„ Et vous sauez que le Conte Henry vient ycy, le-
„ quel fu filz à la riche Donne, & engendré du bon
„ Roy, qui icelle fiança, & puis ot compaignie à
„ elle. Et nous trouuons que en ce cas nul ne les
„ pouoit separer. Henry est nobles homs & hardi,
„ & se nous le receuons, & tous s'y accordent, nous
„ lui ferons iurer qu'il nous maintiendra à l'ancien
„ vsage, ainsi comme fist Oliuier le filz Lion de
„ Bourges. Car ou temps qu'il régna, fu Espen-
„ gne afranchie, qui puis a esté asseruie laidement.
„ Ores en dictes chacun son aduis. Car i'en ay dit
„ le mien. Adonc s'acorderét tous sans aucun des-
„ dit à couronner Henry. Er quant ledit accort fu
„ fait, ilz manderent les Sarrafins, & leur dist l'E-
„ uesque, qu'ilz racontassent leur aduis. Adonc
„ dist vn Sarrafin sage, auisé, & bien parlant : Sei-
„ gneurs, nostre fait est tel, & ne le vous celeray
„ pas. Nous voulons faire toute vostre voulenté &
„ vostre commandement, comme vous obeissans,
„ pour aidier de corps & de cheuance. Et les Chre-

stiens dirent: Vous auez bien parlé. Nous nous
 tenons à Henry, & au noble Bertran. Et les mes-
 creans dirent, que c'estoit noble conseil. Puis fi-
 rent les Iuifs isnellement mander. Adonc parla
 vn Iuif, qui estoit chargié de la responce faire, &
 dist: Seigneurs, nous ne vous dirons de nostre
 aduis, se tout premieremēt ne nous iurez & pro-
 mettez sur vostre loy, & sur voz loyaultez, que
 se nous voulōs partir de la bonne cité, vous nous
 en lesserez partir à tout nostre auoir sauuément,
 pour aler demourer en Portugal ou en Arragon,
 & illec nous amasser. Et sur ce nous vous dirons
 ce qu'il nous en semble. Adonc leur promistrent
 & iurerēt les Espaignolz à faire ainsi. Lors icellui
 Iuif, qui auoit commencié la parolle, dist ainsi:
 Nous disons, & sommes ainsi d'accort, que vn
 homme ne vault riens, qui fausse sa loy, ne onc-
 ques bon Chrestien ne faussa la sienne. Et se vn
 Iuif amoit ne compaignoit les Chrestiens, nous
 n'y adiousterons nulle foy. Et plus ne vous en
 dirons. Si aiez aduis sur ce. Ceste responce fu
 moult prisée des Espaignolz, & moult leur fu a-
 greable. Car ilz supposerent, que les paroles
 eussent esté dites pour le Rōy Pietre, lequel ilz
 tindrent pour leur ennemy. Et Henry fu escrié
 de toutes pars. A ces paroles firent faire certai-
 nes lettres adreçans audit Henry, contenans cō-
 me il viengne lui & sa compaignie sauuément.
 Lesquelles lettres ilz lui enuoierent par deux

freres Meneurs, autrement appelez Cordeliers. Lesquelz cheminerent tant, qu'ilz vindrent iusques à l'ost, qui estoit logié à douze lieuës de la dite cité de Burs. Et tantost que Bertran les aperceut, il dist à Henry: Vecy deux Cordeliers, que on nous enuoye: & croy que ce soit signe de paix, ou de respit. Sire, ce dist Henry, Dieu nous gart de pis. Adonc l'un des Cordeliers, qui estoit moult preudomme, salua moult haultement la Baronnie, & puis leur dist: Messieurs, loez soit le nom de Dieu souuerain, par qui nous viuons tous. Car toutes les nations de la noble cité de Burs, c'est assauoir Chrestiens, Iuifs, & Sarrafins, & de tous les estaz de leurs loiz se recommandent à vous, & sont prest & appareilliez de receuoir le bon Roy Henry, de lui liurer les clefs de la bonne cité, & le couronner en icelle, par telle condicion, qu'il leur promesttra à maintenir Espengne selon l'ancienne coustume, ainsi comme fist Oliuier le filz Lyon. Adonc Henry les mercia moult, & dist que s'il plaisoit à Dieu il leur tédroit foy & loyauté. Adonc y ot moult grant ioye entre les Barons, & furent promis maint riches dons à icculx Freres. Aufquelz Henry dist: Vous me saluerez mes amis de par delà, & leur dites que ie suis prest de y aler, & de accomplir leurs vولentez demain au plaisir de Dieu, que nous partirons de cy. Adonc firent venir le vin à plenté, & puis icculx Freres congie *, &
s'en

s'en retournerent à Burs, pour dire que trouué auoient. Et le landemain à Soleil leuant les Espaignolz alerent au deuant de leur Seigneur, & de ses gens: l'Euesque & le Clergié reuestu tout premierement, lesquelz faisoient porter croiz & bannieres, entre lesquelz en auoit huit sergens chacun vne lance, où les clefs des portes pendoient. Car en ladite cité n'auoit que huit portes yssans. Et les bourgeois de Burs demourerent en ladite ville si noblement parées & ordenées, comme se fussent Roynes, où elles attendoient leur noble Roy Héry, & le bon Bertran, auquel le Roy auoit donné la Duchie de Moulines, & aussi la Conté de Borge, cōme dit est. En tel estat alerent iceulx bourgeois à l'encontre d'eulx bié quatre lieuës, ou plus, ainçois qu'ilz trouuassent Henry. Et quant il les vit, le cuer lui attendria moult. Adonc leua les mains en merciant nostre Seigneur, en depriant qu'il voulzist ceulx garder de villonnie, qui tel honneur lui faisoient icellui iour. Et à Bertran du Guesclin, & à tous les autres Cheualiers & Barons donnaist ioye & honneur, santé & bonne vie, qui en son aide estoient venuz. Puis s'en vint à Bertran, à qui il tendi la main, & lui dist: Haa! Bertran, de Dieu soiez vous benecist. Car ie suis aujourduy essaucié par vous. Et Bertran dist à Henry, qu'il ne le lairroît pas, iusques à tant qu'il fust Seigneur de toute Espengne. Et le faulx Pietre, qui sa vail-

lant femme auoit fait mourir, n'en tendroit ia
denrée. Adonc se mirent à part des plus preux de
tout l'ost cinquante Cheualiers notables, les-
quelz si tost comme approuchiez furent de la
proceſſion, deſcendirent tous à pié, & vindrent
encontre l'Eueſque, qui à tous donna beneyçon.
Et à Henry, qu'il moult honnoura & feſtoya, diſt
icellui Eueſque, en la preſence de toute la bour-
" goiſie: Sire, nous vous tendrons Roy d'Eſpen-
" gne, & à vous obeyrons: mais que vous nous
" vueillez tenir aux vs & aux couſtumes ancien-
" nes, ainſi comme fiſt noz predeceſſeurs le Roy
" Oliuier, qui fu filz Lion de Bourges en Berry. Et
Henry leur octroya plainement. Lors retourne-
rent chacun d'eulx, & exploicterent tant qu'ilz
vindrent en ladite cité de Burs, où ilz furent
tres-ioyeuſemēt receuz. Et n'y ot oncques cloi-
che en la ville, qui ne ſonnaſt. Et ainſi comme
dit eſt deſſus, les Dames eſtoient moult noble-
ment parées, & les pucelles auſſi. Celle nuit firent
noz gens logiez és fauxbours, & au Palais fu le
Roy Henry, & des plus notables Cheualiers &
Eſcuiers de tout l'ost. Et bien y auoit cent des
plus nobles Dames de la ville toutes de bonne
renommée. Et là y ot riche ſoupper, où chacun
fu bien ſerui. Et icellui iour furent en grant ioye,
& en grant conſolation; & le landemain tout le
iour auſſi. Et Henry manda ſa femme, laquelle
eſtoit moult courrouciée de ce que sō Seigneur

estoit ainsi chassié d'Espengne. Mais quant la Dame sceut l'onneur, que Dieu leur auoit octroyée, & que elle seroit Roïne d'Espengne couronnée; si se reconforta moult icelle Dame, qui moult estoit belle, bonne, & bien aprise. Et prist avecques elle les suers de son Seigneur Henry. Puis monterent en char moult noblement ouuré. Mais quant ilz approchierent ladite cité, la dessusdite Dame fu montée sur vne tref-noble mule moult noblement ensellée, toute dorée de fin or, & ouurée de pierres precieuses, avecques les harnoiz à ce appartenans. Et quant elle fu bien près de ladite cité, on le vint dire secretement à Bertran. Lors monta sur vne mule, qui lui auoit esté donnée. Et Hue de Carualay avec luy, qui lui auoit iuré foy, Oliuier de Mauny, Iehan d'Eureulx, Gautier Huet. Et yssirent lors de Burs pour aller à l'encontre d'icelle Dame, laquelle ilz rencontrèrent ausi comme à demie lieuë d'ilecques. Et tantost comme elle approcha d'eulx, elle descendi ius de sadite mule. Et ausi ilz mirent pié à terre, & vindrent à l'encontre d'elle. Adóc Bertran l'ala embracier, & doucement la salua, & lui dist, qu'il lui failloit remonter. Et elle dist, que non feroit, & que bien deuoit aler à pié avecques ceulx, qui ainsi la faisoient seruir & honnourer. Car n'agaires estoit pouure femme, qui n'auoit que donner, & toute nue; & maintenant l'auoient faite riche & tref-

bien reuestue, & tāt auoit de beau parler en foy,
qu'il plaisoit moult, & embellissoit aux Cheua-
liers. Et disoit chacun d'eulx, que elle estoit bien
digne de tenir Royaume. Puis la firent remon-
ter, & remonterent chacun d'eulx ausi. Et les
suers de Henry commencierent moult à regar-
der Bertran, & dist l'vne dicelles: Le voy merueil-
les, que ce Bertran, dont i'ay pieça oy parler, est
treslait, qui bien le regarde: & si l'ay oy tant hon-
nourer & prifier. Et la secōde dist, Dieu le vueil-
le sauuer. On doit mieulx amer bonté que beau-
té. C'est le plus vaillant & le plus eureulx, & auen-
tureux de batailler, & de cōquerre chasteaux &
villes, qui soit par deça la mer. Et la tierce suer si
dist: Or auisez, il a bien courrage d'omme, &
chiere de sanglier, les poings gros & quarrez
pour porter espée; & bien est taillié d'estre fort
pour soustenir & endurer grans paines. Dieu lui
doint à honneur finer de cest siecle. Et si fist-il
ausi, comme vous orrez en la fin de ce Liure.
Quant la Royne entra en la cité de Burs, qui e-
stoit noblement accompagnée tant de ses gens,
comme des Cheualiers dessus nommez; les bour-
goises de ladite cité, dont grant foison y auoit,
& de tresbelles, & bien vestues & parées, vindrēt
encontre elle, & la receurent moult honnoura-
blement. Puis la saluerent, en disant, Que bien
fust venue leur Royne & leur Dame. Et elle leur
dist: Mes amies, grans mercys: vous me trouue-

rez bonne, se Dieu plaist. Puis monta le Roy a-
 destre de deux hardiz Cheualiers, & vindrent au
 Palais, lequel estoit paré & pourtendu de riches
 draps d'or & de soye. Celui iour qui estoit de Pas-
 ques, au tel comme quant nostre Seigneur res-
 suscita, fu sacré & couronné ledit Henry, & la
 Royne aussi, à ioye & à honneur. Et moult y ot
 riche disner de bons mès, & des meilleurs vins
 du Palais, & du país. Ce iour y ot maint instru-
 ment sonné, & maint beau don & beaux veste-
 mens y reçurent Menestreaux & Heraulx. Moult
 y ot grant ioye demenée. Et le Mardi prouchain
 apres ensuiuant le Conte de la Marche fist chan-
 ter plusieurs Messies pour l'ame de la Royne d'Es-
 pengne derrainement trespassee, en l'Eglise, où
 icelle Dame auoit esté enterrée.

EN ce contemples'en parti vn Espagnol de
 Burs, & s'en ala droit à Toulette deuers Pietre,
 qu'il trouua ou chastel, & auoit avec lui Iacob,
 Salmon, Helie, Dauid, & Morissier, & plusieurs
 autres Iuifs. Et si y estoient Ferrant de Castre, &
 plusieurs autres Cheualiers Chrestiens. Donc lui
 raconta le messaige, comme Henry son frere a-
 uoit esté couronné à Burs, & la cité rendue sans
 siege ne assault, à lui, à Bertran, & à la blanche
 Compengne. Helas! dist Pietre, ie perdray toute
 materre par ce larron Bertran. Et dist Ferrant de
 Castre: Vecy mauuaise besongne. Lors dist vn
 Iuif nommé Dauid, qui estoit Astronomen: Si-

re, i'ay regardé à plusieurs signes merueilleux.
Mais ie treuve, aussi comme Nabugodonosor
perdi son Royaume, vous perdrez le vostre; mais
non pas à tousiours. Car encores reuendrez vous
en seignourie, & arez vengeance de voz ennemiz.
Car l'aigle sera prins, & mis en prison, par le vol
d'un Faulcon, qui vendra en vostre aide. Et ce a-
uint depuis. Et Bertran estoit à Burs avec Henry.
Adonc prindrent les nostres ensemble vn acort,
qu'ilz se departiroient incontinent de là; & y-
roient en Grenade, qui est trop plus loing. Et
quant Henry l'oy, si en fu trop doulent, & man-
da les Cheualiers des plus souffisans. Et quant ilz
furent venuz, si leur dist en suppliant: Seigneurs,
pour Dieu ne me laissez icy. Car ie n'auroye rié
fait. Pietre reuendrait sur moy à si grant effort,
qu'il ne me laiseroit cité, ville, ne chastel. Vous
ne pouuez aller faire meilleur voyage, que de
conquerre ce pais d'Espengne. Car assez y trou-
uerez Iuifs, & Sarrafins, sans plus loing aler. Si
les tuez & occiez à vostre voulenté, & receuez &
departez à vos gens ce qu'ilz y conquerront. Car
ie n'en vueil à mon prouffit, qui vaille vn seul
denier, iusques à ce que i'aye getté & enchassié
Pietre hors du pays. Adonc vint la Royné, qui
moult tédremét pleuroit. Et leur dist, Seigneurs,
pour Dieu demourez avecques nous, ie vous dô-
ray bons gaages, or, & argent, & quanque i'ay
vaillant. Et ainçois ne me demourra-il cinture,

que vne toute seule, ne vesselle quelconque, & “
 deussè boyre au voyrre, que vous ne soyez bien “
 paiey & contentéz : afin que vous nous deliurez “
 de Pietre ce faux tirant. Car s'il venoit auant, les “
 Espaignolz sont si variables, qu'ilz nous laisse- “
 roient tous coy. Quant les Cheualiers orent oy “
 raconter ces raisons à la Royne, si commencie-
 rent à penser. Mais le Besgue de Villaines leur
 dist: I'ay plusieurs foiz oy lire & recorder, que “
 qui sert & ne parsert, il n'en doit point auoir de “
 prouffit. Et ausi pouons nous yci trouuer Iuifs “
 & Sarrafins, & nos ames sauuer, comme de aler “
 en Grenade. Et qui meouldra croifre, nous y- “
 rons tout droit à Toulette, pour assaillir Pietre, “
 & aiderons & conforterons Henry. Et quant la “
 Royne l'oy, si l'acola amiablement, & dist que
 Dieu leur sauuaist tel Cheualier. Et apres dirent
 Bertran, & Ernoul d'Audrehem, que ce faisoit à
 accorder. Et ausi en furent d'accort Hue de Car-
 ualay, Gautier Huet, Nicolas Scambourt. Et le
 landemain firent trouffer leurs harnoys à char-
 roys, mules, & cheuaux: & se mirent au chemin
 pour aler deuers Toulette. Mais vne espie l'ala
 tantost denoncier à Pietre, & ausi que son frere
 y amenoit sa femme avecques lui. Adonc Pietre
 assembla son conseil, & leur dist, qu'il se vouloit
 d'ilec partir. Apres manda les bourgeois, si leur
 dist: Sires, ie voy bié que fortune me queurt seu-
 re. Car mes ennemis m'ont couronné mon frere “

à Burs, ie ne le puis celer. Et scay bien qu'ilz vendront asseigier ceste ville, laquelle est moult bié fermée de murs & de fossez. Et assez y a, pour viure vn an tout entier. Si vous prie & requier, que vous me soyez tous loyaulx, & vueillez bié garder & deffédre la ville. Et ie iray querre secours. Car ainçois que ie ne fusse bien vengé de ceste honte, feroiy-ie aliance au Roy de Belmarin & de Grenade. Si me conuient partir, & eslongner de vous. Et ilz lui dirent, qu'ilz feroient son cōmand, & ladite ville garderoient moult bien: & qu'il pensast d'auancier le secours. Adonc fist chargier Pietre son trefor, où il auoit maint riches ioyaulx. Là fu la table d'or, que l'en ne pourroit prifier, & plioit à charnières en trois, & y auoit tref-grât plenté de pierres precieuses, & de fines perles d'Orient rōdes & grosses, & plusieurs images d'or entaillees des douze Pers de France: c'est assauoir Roulant, Oliuier, & leurs compaignons, comme ilz furent venduz en Roncheuaulx au Roy Marsillon. Entre lesquelles pierres en auoit vne nommée Escharboucle, qui estoit de si grant vertu, que elle luisoit & esclairoit à mienuyt, comme le Soleil fait à heure de midy. Et delez icelle Escharboucle auoit vne tref-belle & noble pierre, laquelle auoit telle dignité, que se elle fust mise en place, où il y eust aucun venin, tantost changast sa couleur, & deuenist noire comme charbon. Puis donna Pietre icelle table

au Prince de Gales en Angolesmes, ainsi comme vous orrez cy-apres. Ainsi s'en ala Pietre avecques son thresor à Cordonne, où il auoit quinze lieuës. Et entra en vne forest, qui de lonc auoit cent lieuës, & quinz e de lé.

OR vous lefray de Pietre, & vous diray de Henry, qui menoit Bertran avecques lui, & les autres bons Cheualiers, à qui il se fioit. Et tant cheuaucherent, qu'ilz vindrent deuant Toulette, dont ilz se logierent assez prez: puis firent courre le país. Adonc s'esmaierent moult les gens du plat país, & se retrayrent tous à Toulette, leurs corps & leurs auoirs. Et le Roy Henry manda ceulx de la cité, qu'ilz enuoiasent parler à lui à saufconduit. Donc assembla l'Euesque la commune de la cité, & parla aux bourgeois les plus sages & discrez, & leur dist en ceste maniere: Beaux Seigneurs, vous sauez bien que Pietre s'en va, qui tout son thresor emmaine, sans en auoir riens lessié. Et me semble que c'est signifié, qu'il ne reuendra plus. C'est vn mescheant Roy, & lui deuroit mesaucenir. Car il ne vult oncques croyre prudomme. Si vous auisez. Car se ses gens, qui viennent encontre nous, nous prennent par force, il ne nous demourra riens. Quant les bourgeois orent oy l'Euesque ainsi parler, ilz furent tous d'accort de eulx redre: & baillerent à l'Euesque les clefs de ladite ville, pour les bailler au Roy Henry. L'Euesque s'en party

tantost accompaignié des bourgeois dessus diz, & vint encontre ledit Roy & les bons Cheualiers, qui auecques lui estoient. Et icelui Roy enuoia au deuant d'icelui Euesque, lequel le salua en disant : Noble Roy, Dieu vous vueille garder, ie vous liure les clefs de la cité de Toulette, de par les bourgeois, qui cy sont, qui tous vous viennent iurer fealtez & hommage en la forme & maniere, que ont fait ceulx de Burs. Et le Roy Henry dist, qu'il le vouloit bien ainsi cōfermer. Puis fist la greigneur partie des bourgeois hosteller és faulxbourgs. Et audit Roy firent maint nobles ioyaulx presenter, qu'il donna & destribua aux nobles Cheualiers, & Escuiers, selon la quantité des dons, & la qualité des hommes. Puis sot Henry, que Pietre estoit à Cordōne, autrement nommée Cordes. Si se mist à voie, pour y aler. Mais ainçois reçut les hōmages de ses hōmes, & prist la possession de la ville & chastel de Toulette, où il laissa la Royne. Puis fist charger des viures largement, pour mengier & boyre. Car ilz deuoient passer par vne tres-grant forest, qui bié auoit quinze lieues de lé, en laquelle auoit plusieurs bestes sauages, si comme ours, lions, liepars, & serpens. Donc approuchierent ladite forest, où ilz trouuerent tant, que les Cheualiers en estoient tous merueilliez. La nuit qu'ilz se logierent, ordonnerent moult bien leurs gens pour doubte desdites bestes. Car qui se descon-

toit pour aller deuant ou derriere, il estoit par-
 duz sans remeide. Et pour ce, chacun s'aguetoit
 le mieulx qu'il pouoit. Ainsi passerent icelle fo-
 rest, laquelle yssoit à vne lieuë pres de Cordes,
 où Dam Pierre estoit. Et quant il sceut que on le
 sieuoit * acoite d'esperon, & que Toulette estoit
 prinse, adonc se commança moult à plaindre,
 que tous les siens lui estoient traictres, & Reli-
 gieux & seculiers; & que ceulx de Toulette ne
 valoient rien. Et moult soubhaidoit à tenir Ber-
 tran du Guesclin, pour en prendre cruelle ven-
 gence. Car il lui sembloit que par lui pardroit-il
 tout son Royaume. Adonc lui dist Ferrant de
 Castre: Sire, ie vous conseille, que vous enuoiez
 deuers Henry vostre frere, pour auoir accort a-
 uecques lui: en telle maniere qu'il tendra de vous
 Toulette, & ceste ville, & Sebile, qui est de lez, &
 iusques à Portugal lui quitterez tout. Et il vous
 rendra Burs, & que vous demourrez Roy d'Es-
 pengne couronné. Et si donrez à Bertran deux
 cens mil liures, pour departir à ceulx qu'il a ame-
 nez auecques luy. Car s'ilz estoient semez & de-
 partiz, iamais ne les verrez rassembler pour ve-
 nir icy. Et seroit toute Espengne vostre, & Hen-
 ry ietté en vostre prison. Et Pietre dist, que c'e-
 stoit verité, & que ainsi seroit-il fait. Lors de-
 manda, qui feroit ce message. Et Ferrant lui res-
 pondi: Deux bourgeois de la ville des plus sages &
 mieux aduisez. Lesquelz Pietre māda tantost, &

puis leur en chargea ce qu'il vouloit que ilz deussent. Adonc s'en partirent iceulx, & vindrēt aux Barōs, qu'ilz trouerēt à l'issue de ladite forest sur vne riuiera, où ilz se rafraichissoient. Lors demanderent Henry & Bertran, & on les leur enseigna. Là se reposoient Oliuier de Mauny, le Besgue de Villaines, Hue de Carualay, Mathieu de Gournay; & estoient bien cinquante Cheualiers tous ensemble. Adonc parla l'un des bourgeois, & leur dist, que le Roy Pietre leur supplioit, qu'ilz voulzissent mettre la pais entre lui & Héry son frere; parmi les conuenances dessusdites, que les dessusdiz bourgeois deuissent. Et d'abondant, se les Barons, qui là estoient, vouloient faire leur voiage en Grenade, ou en Belmarin, contre les Sarraſins, ledit Pietre leur bailleroit trente mil Espaignolz, qui les feruiroient trois mois tous entiers, sans gaaingner or ne argent. Et quant Henry l'oy, si lui mua moult la couleur, & les Barons si le regardoient. Si lui demanda Bertran, qu'il auoit en pensée, & dist, Que ce lui sembloit belle promesse. Voire, dist Henry tout en riant: mais querez qui le tiengne. Et pleust à Dieu, que ceste paix fust ainsi faite & tenue, sans iamaïs recommencier guerre! Mais ie scay bien, ceste offre n'est que traison; & afin que vous vous en departez. Et se Dieu me vueille aidier, ie m'y accorderay, mais qu'il me baille telz ostages comme ie voudray auoir: c'est assauoir sa fille avec-

ques Ferrant de Castre, & cinquante bourgeois de lignée souffisans. Et quant les deux bourgeois entendirent Henry, si lui dirent ensemble, & d'un accord: Sire, ne nous y prenez pas. Car ia n'en entrerons en pleigerie. Et puis dist Henry: Encores vueil- ie, qu'il me fasse liurer Danyot & Turquant, qui sont de son estroit conseil, & où il plus se fie. Car ces deux Iuifs murdriront Madame la Roïne, qui tant estoit gentil, & de loyal lignage. Et pour ce, ie les vueil faire ardoir tous deux par compaignie, comme traictres & meurtriers. Et de tant vous prie- ie, beaux Seigneurs, par fine courtoisie, Que se Pietre s'en fuit au departir avecques ses priuez, que vous me reteignez au departir ces deux felons Iuifs. Et iceulx bourgeois lui octroierent, puis s'en partirent, & alerent à Cordes porter à Pietre la response qu'ilz auoient eüe, & comme Henry vouloit auoir sa belle fille, qui n'auoit que douze ans; laquelle fu depuis femme au Duc de Lenclastre, qui icelle prist par grant amitié, dont il a depuis voulu chalengier le Royaume d'Espaigne. Et avec ce vouloit auoir ledit Henry Ferrant de Castre. Et quant Ferrant l'entendi, si iura tout coïement, qu'il n'y demourroit ia en iour de sa vie. La nuit ensieuant s'appareilla, & ceulx de son amitié avecques lui. Et s'en partirent tout celeément, sans prendre congié au Roy. Si s'en ala à Composterne, où ses richesses estoient. Et

leefsale Roy avecques tout seul. Et quant il vit, que chacun lui failloit ainsi, fu moult esbahy, & non pas sans cause. Adonc Pietre prist le congie des bourgeois, & les commanda à Dieu, & moult leur pria de bien garder la ville. Et en enuoia deuant les deux Iuifs dessusdiz, pour ce qu'il auoit oy dire, que on les lui demanderoit: & prindrent leur chemin à aler tout droit vers Sebile la grât, où le Roy deuoit aler. Et entre ces deux Iuifs auoit eu grant contempt. Mais ilz auoient fait pais ensemble, & estoient d'un accort de liurer Pietre au Roy Henry, quant ilz auroient temps & espace. Et Pietre cheuaucha à tout tant de gés qu'il auoit, & n'oblia pas sa table d'or. Et quant il vint en la cité de Sebile, si y fu moult festoyé. Mais le Roy Henry, avecques les gens qu'il auoit, s'en ala en la cité de Cordes, & en demanda les clefs. Et tantost on les lui apporta, & lui furent les portes ouuertes. Si entra dedens, & les plus notables avecques lui: & dehors en demoura assez. Illec se logierent, & seiournerent huit iours. Entretandiz forent, que Pietre estoit à Sebile. Si se mirent tantost à voye, pour y aler. Et quant ledit Pietre sot, que Cordones estoit rendue, & que Henry l'approuchoit, si fu moult doulent, & moult lui ennuya. Si vous di, que en ladite ville de Sebile auoit trois forteresses, dont l'une fu de Chrestiens, la seconde de Iuifs, & la tierce de Sarrafins. Et Pietre, qui moult estoit courrou-

cié, auoit avecques lui Danyot & Turquant, auquelz il ala dire : Seigneurs, par mauuaise destinee i'ay vsé de vostre conseil, il y a ia maintan passé. Par vous, & par vostre foy a esté ma femme murdrée, & ma loy faussée. Maudite soit l'eure & le iour, que ie vous acointay premier. Car c'est par mon pechié, & ce que vous ay creu, que ie suis ainsi banny & dechassé de ma terre. Si vous banniz tout maintenant de ma chambre, & de ma Cour. Et bien vous gardez, que iamais n'y entrez: mais tantost vous partez de ma cité. Adonc s'en partirent tout coyement iceulx Iuifs, & se mirent au chemin pour aler vers Portugal. Mais ilz furent rencontrez à vn matin ou fons d'vne valée, d'vn Cheualier Engloiz, qui aloit en fourrage, nommé Mathieu de Gournay. Et quant il les apperçut, il tray l'espée, & leur dist : Rendez vous, que Dieu vous maudie. Et ceulx, qui orent paour de perdre la vie se rendirent, en criant mercy. Adonc ledit Engloiz leur demanda, se ilz estoient Iuifs, ou Sarrafins. Et Turquant lui respondi: Sire, nous sommes Iuifs de droite anciscerie. Mais pour Dieu, Sire, que nous ayons les vies sauues. Et nous vous promettons liurer & rendre la cité de Sebile, ainçois qu'il soit demain au soir. Adonc dist icelui Engloiz, Comme pourra ce estre, ne par quelle maistrise? Par Dieu, si vous le pouez faire, ie vous feroie auoir honneur & seigneurie assez. Lors dist Turquant : le vous di-

„ ray comment vous aurez ladite ville. Il y a grant
„ foison Iuifs, qui ont leur ville bien fermée tout
„ à par eulx, & leur porte yssant & entrant tout à
„ par eulx. Et ie yray traictier, & parler à
„ eulx. Et desia en y a plusieurs, qui m'ont en con-
„ uenant de rendre la ville, maiz qu'ilz y demeu-
„ rent sauuément & paisiblement, eulx & leurs
„ biens. Et Mathieu de Gournay dist, que bien lui
plaisoit. Et demáda lequel des deux lui demour-
roit pour pleige. Et Danyot dist, que ce seroit-il.
Adonc furét d'un serement & d'un accort de te-
nir loyaulment le marché. Puis s'en parti Tur-
quant, pour faire le message. Et Mathieu emme-
na à parler l'autre à Henry, qui lui dist que bien
prouchainement auroit la cité : & lui compta la
maniere comment. Et quant Henry l'oy, si ot
„ moult grant ioye, & dist : Haa ! Sire Dieu, se ie a-
„ uoye Sebile en mon commandement, ie auroie
„ toute Espengne & l'environ. Or voila que le des-
fusdit Turquant s'en vint à la fausse poterne, &
hucha aux Iuifs, qui sur les murs estoient, qu'ilz
le leussent passer, & entrer leens. Et tantost lui
vindrent deffermier le guichet. Et quant il fu ou-
tre dedens, chacun le festoia quant ilz l'orent ra-
uisé. Puis fu mandé deuant les Maistres de la loy.
„ Et quát il vit, si les salua, puis leur dist : Seigneurs,
„ vous avez bien mestier sauuer vos vies. Car Dam-
„ Pietre vous a tous menaciez de pendre, ou d'ar-
„ doir, & ne lairra Iuifs en son Royaume : & si nous
a ban-

a bannis sur les membres copper, pour ce que
 l'en nous a trop mauuaisement blasmez enuers
 lui. Si aiez conseil sur ce fait. Quant ils l'oyrent
 parler, tout le sanc leur mua. Puis dirent à Tur-
 quant, & lui prierent, qu'il les voulzist conseil-
 ler, comment ilz y peussent obuier & euader. Et
 Tutquant leur dist: Je viens de procurer pour
 vous de deuers le Roy Henry, où i'ay laissié Da-
 nyot en ostage. Et ay tant fait que vous, & vos
 biens seront sauues, se voulez la porte ouurir
 audit Henry. Il fera ses gens hebergier dedens
 vostre fort. Puis iront toute la ville ardoir, & les
 gens tuer: & Dam Pietre feront-ilz liurer à mar-
 tire. Et les Iuifs dirent, qu'ilz le octroient ainsi.
 Et fu ceste chose accordée d'eulx tous à vn Ven-
 dredi disner, ou enuiron. Et pourtant que leur
 sabbat deuoit estre le landemain, ilz mirent le
 iour de receuoir Henry, & ses gens, au Dimen-
 che ensieuant. Et lors Turquant ala tout racon-
 ter à Mahieu de Gournay, lequel mena les deux
 Iuifs deuant Henry parler à lui, qui lui conterent
 ledit traitié: auquel faire auoit esté vne Iuifue
 moult belle plus que nulle autre Iuifue, avec la-
 quelle Pietre auoit couchié maint nuit, & l'a-
 moit plus que Dame qui fust ou monde, tant lui
 fu priuée: & aussi l'amoit-elle de tout son cuer.
 Et quant elle sceut ceste chose, si fu moult cour-
 roucée, & de nuit yssit hors de la forteresse, que
 nulz ne lui deuea. Car elle estoit moult souffisât

en la loy de Iudie. Si s'en ala au Roy Pietre tout droit en son Palais. Et quant il l'apparçut, si en ot tref-grant ioye, & l'enuoya en sa châbre. Et là elle lui dist tout bassement: Sire, gardez vous. Car vostre mort est iurée. Les Iuifs ont vendue leur ville à vostre frere Henry, & lui doiuent rendre auis, qu'il soit le iour *. Adonc le Roy fu moult effroyé, & lui demanda se elle lui disoit verité, & comment ce pouoit estre. Et ladite Iuifue lui iura, que par le grant Dieu oyl, & que Danyot & Turquant auoient tant fait aux Iuifs, que ilz liureroient la ville. Et d'autre part, qu'il se gardast bien des Chrestieés, & que les plus souffisans estoient d'accort de receuoir Henry son aduersaire. Et quant Pietre l'oy, si lui changa la couleur, & acola la Iuifue, & la baïsa, & puis lui dist, que cinq cens merciz, que tant lui en auoit dit. Et lui promist, que au retourner lui feroit assez de bien, & grant honneur. Et ladite Iuifue s'en retourna vïstement en la Iuifrie. Et les Iuifs, qui bien sauoient, que le Roy Pietre l'amoit, lui demanderēt cōment il le faisoit, & elle leur dist comment il s'en alloit en Portugal. Mais Pietre manda son Conseil, & leur dist, qu'ilz feissent chargier tout son vaillant, & que le landemain à Soleil leuant il se vouloit partir. Et eulx distrent, que si feroient ilz. Puis prist congié des bourgeois, & leur pria que ladite ville gardassent, sans auoir aucune doubte; & il s'en yroit querre se-

cours aux Rois de Grenade & de Belmarin. Auf-
quelz il feroit aliance, & amerroit vn secours si
fort & puissant, qu'il vaincroit tous ses ennemis,
& feroit pendre son frere Henry, Bertran du
Guesclin, & le Mareschal d'Audrehen tout le
premier, & apres destruire tout le demourant.
Les bourgeois lui dirent, que si feroient-ilz. Et
qu'il pensast de retourner au plus brief qu'il
pourroit. Car il trouueroit le Roy de Portugal à
Lissebonne. Adonc Pietre prist vint bourgeois,
desquelz il se doubtoit plus, lesquelz la belle
Iuifue lui auoit encusez. Et leur dist: Beaux Sei-
gneurs, ie vous prie & commande, que vous me
vueillez conuoier. Car ie me fie plus en vous, que
en personne qui viue. Et cilz respondirent, Que
ilz estoiet ses seruiteurs. Et s'appareillerent pour
aler auecques lui. Dont ilz firent folie. Car il les
fist pendre ainçois qu'il fust gueres auant. Et e-
stoit enuiron la mienuyt. Et lors fist telle bruy-
ne, que Pietre & ses gens ne sauoient où ilz a-
loient, ou deçà, ou delà, ne ne trouuoient che-
min ne sente. Adonc Pietre s'esmaya moult du-
rement, & se recommanda plus de cent foiz à
Dieu, & au deable comme tout desesperé. Et ses
Barõs lui disoient: Sire, ayez bon cuer, & Dieu &
sa mere vous secourra & sauuera. le ne scay, dist-
il, comment la fortune en va. Mais ie me tieng à
celui, qui a le plus de puissance, soit de deables,
ou Dieu. Adonc vint deux tonnoirre, qui tonna

tellement, que tous les plus hardiz trembloient de paour. Mais oncques Pietre ne s'en seigna de paour qu'il eust, & moult auoit le cuer courroucié & doulent. Et combien que ses gens lui amonnestassent tousiours bien à faire, il leur disoit qu'ilz se teussent, & qu'il ne creoit pas que Dieu fust tout puissant, ne que aidier lui peust. Et se repentoit, qu'il auoit banny de sa Cour Danyot & Turquant. Et disoit, que c'estoient les deux meilleurs amis, qu'il eust. Donc s'efforça le tonnoyrre plus que deuant, & faisoit tant noir, que l'en n'y veoit goutte, ne ne sauoient où ilz aloient. Donc s'auisa Pietre, & fist ouurir sa table d'or, où l'Escharboucle estoit, & aler au deuant d'eulx sur vne mule. Et dès ce que ladite Escharboucle fu descouuerte, on y veoit ainsi comme à midy. Ainsi s'en alla Dam Pietre cheminant toute nuit, & bien en auoit mestier. Car on le syeuoit de prés. Et pour certain, quant les bourgeois de ladite ville trouuerent les autres penduz, qui leurs compaignons auoient esté, se ilz tenissent adonc Pietre, ilz l'eussent occiz. Et le lendemain, qui fu Dimenche, vindrent Henry & Bertran deuant la cité. Et cilz de dedens firent sonner la boucloche. Et s'appareillerent Chrestiens & Sarrafins, pour eulx deffendre, & s'en coururent aux portes, & dessus les murs. Mais à la fermeture que les luifs tenoient, Danyot & Turquant, qui estoient venuz parauant, firent ou-

urir la porte tout à plain à Henry, à Bertran, au Mareſchal d'Audrehem, & aux autres Barons de l'oſt, & à tous leurs gens. Et furent moult liemēt recueilliz des Iuiſ. Et quant les Chreſtiens ſe virent ainſi trays, ilz vindrent au fort des Iuiſ, & les aſſaillirent. Et les Sarraſins ſe mirent avecques les deſſuſdiz Chreſtiens. Et d'autre part les Iuiſ auoient avecques eulx le Roy Henry, Ernoul d'Audrehem, Hue de Carualay, Mahieu de Gournay, Gautier Huet, le Beſgue de Villaines, qui la forterefſe des Iuiſ deſſendoiet moult fierement. Adonc Bértran diſt à ſes gens: le croy „ que nous ſommes trop d'aſſaillans de ce coſté. „ le loe que la moitié ſ'en yſſent hors, & voiſent „ aſſaillir à la porte de deuant. Et quant ilz le ſau- „ ront, ilz ſe partiront. „

Comme la cité de Senile la grant fu rendue à Henry, à Bertran, & aux autres Barons, tant par aſſault, comme par le moyen de deux Iuiſ, qui leur liurerent l'une des forterefſes de ladite cité, que les Iuiſ tenoient.

CHAPITRE XX.

A Inſi comme Eſpaignolz Chreſtiens, & les Sarraſins aſſailloyent enſemble la forterefſe des Iuiſ, que les Chreſtiens deſendoient, comme dit eſt; Bertran, qui bien veoit, que ſe à

force ilz entroient dedens, il y auroit peril grāt,
„ si appella Turquant le Iuif, & lui dist: Vous sa-
„ uiez tout l'estre de ceste ville. Car vous auez esté
„ tout au tour, & par dedens & par dehors. Prenez
„ de noz gens, & les menez & conduisez là où vous
„ saurez que l'assault nous puisse plus valoir, &
„ prouffiter. Et le Iuif respondi, qu'il feroit son
„ commandement. Adonc les mena du lés, où les
Sarrasins habitoient, lesquelz se combatoient
lors auecques les Chrestiens. Et estoient auec-
ques ledit Iuif, Ernoul d'Audrehem, Gautier
Huet, Mahieu de Gournay, Hue de Carualay,
Caraenloet, Iehan d'Eureux, Thomas d'Argon-
ne, & plusieurs autres vassaulx, qui bien estoient
dix mil. Lesquelz se apprestèrent tous d'assaillir
à la porte, mais ne trouuerent qui la defendist.
Adonc coperēt les barrieres. Et quant les bour-
gois virent le fait, ilz firent vn brief conseil. Et
pour vengier la mort de leurs compagnons, que
Pietre auoit fait pendre, ilz furent d'accort de la
ville rendre. Adonc delessierent l'assault qu'ilz
faisoient au fort des Iuifs, & firent sauoir au Roy
Henry, qu'ilz rendroient les clefs de la cité. A-
donc s'accorderent tous les Espaignolz, & lui
rendirent le Palais, & toute la ville. Et à la prie-
re de Bertran on leur promist, que il n'en mour-
roit ia homme ne femme. Adonc firēt plusieurs
hommages au Roy, & les Iuifs demourèrent en
leur estat comme deuant, parmy certains con-

uenans. Mais le Roy commist Turquant & Danyot à en estre Preuoists & Maistres. En ladite ville se logierent noz gens, mais tantost furent d'accort de poursuir Pietre, lequel s'en aloit querir secours où il pouoit.

Comment Pietre ala querre secours à Lissebonne au Roy de Portugal, qui lui en failly. Et du message que Henry enuoya pour ce deuers le Roy de Portugal. Lequel message gaaigna à Lissebonne, & en apporta avec soy le pris des ioustes.

CHAPITRE XXI.

OR vous dy que Pietre, quant il fu venu à Lissebonne, il ala tout droit au Palais deuers Othon, qui estoit Roy de Portugal. Et quāt il vint deuant lui, il le salua en soy enclinant moult bas. Et ledit Roy, qui de lui tenoit aucunes parties de terres, dont il estoit son homme, mist la main au chapperon, & l'ala tātost releuer. Et lors Pietre lui compta comment Henry son frere, qu'il tenoit pour bastart, auoit son pais conquis, & lui dechacié à l'aide de Bertran, & de la Cheualerie, qui avecques lui estoit. Pourquoy ledit deprioit & requeroit icellui Roy, que comme ilz auoient esté depieça amis & compaignōs ensemble, & guerrié Grenades & autres pais, qu'il le vouldist secourir & aidier contre ses aduersai-

res. Adonc le Roy de Portugal, respondi à Pietre
" en ceste maniere: Sire Roy d'Espengne, i'ay bien
" entendu vostre raison. Mais ie vous dy bien, que
" ie suis vn petit Roy, & mon Royaume tref-petit.
" Si n'ay mestier de mouuoir guerre, ne de faire
" mourir & exiler mes gens. Et d'autre part Henry
" & les François ne m'ont riens meffait. Se vous a-
" uez perdu, ce poysse moy. Voz hommes vous
" heent communément, ne scay la cause. Mais ie
" vous feray telle amitié, que se vous voulez de-
" mourer avecques moy, ie vous ordonneray vo-
" stre estat honnourablement, ne iamais ne vous
" fauldray de chose que i'aye. Mais aurez de mes
" villes & de mes chasteaulx tout à vostre plaisir.
" Et ce que ie vous ay promis ie vous tendray lié-
" ment. Adonc fu Pietre moult courroucié de ce
respons. Et lui sembla que tous lui faulzissent.
Adonc proposa de aler en Engleterre deuers le
Roy, pour ce qu'il scauoit bien que guerre auoit
euë long temps ou Royaume de France. Et com-
bien que lors y eust treues données, toutesfoiz il
supposoit bien, que il n'y auroit point de paix.
" Et le Roy de Portugal lui dist, qu'il ne le conuen-
" droit traueiller à aler si loing en Engleterre, &
" qu'il trouueroit le Prince de Galles à Bordeaux,
" qui plus vous pourroit aidier que homme du
" monde s'il vouloit. Et par lui pourriez vous re-
" couurer tout vostre Royaume. Si vous conseil-
" les à aler deuers lui ou pays de Guienne, & à lui
donner

donner de beaux dons. Et pour certain, se ie auo-
ye vostre fait à faire, ie lui donroye ainçois d'Es-
pengne vn quartier, & du residu deuendroye son
homme, afin de auoir secours. Car il n'a si fier
Prince en tout le monde, ne mieulx taillé de
conquerre terre. Car il ne craint ne Roy ne Em-
pereur. Lors dist Pietre, que c'estoit riche con-
seil, & qu'il le croifroit; & s'en iroit à Bordeaux
deuers le Prince, & se acointeroit tellement d'y-
ne telle armée, que Henry le bastart n'y pourroit
durer, ne Bertran du Guesclin, qui auoit tant de
renom, ne les autres aussi. Et à Mahieu de Gour-
nay, qui estoit venu d'Engleterre pour lui tou-
lir son pais, feroit-il trencher la teste. Ainsi les
menaçoit. Après ce, le Roy de Portugal lui don-
na à disner à sa table, & le fist seruir comme Roy.
Mais Pietre estoit si courroucié en cuer & en
pensée, qu'il ne pouoit mengier. Tantost fist a-
prester vne nef moult richement, & y fist mettre
moult de nobles ioyaulx, & aussi la table d'or. Et
quant la nef fu preste, il entra dedens, & auec-
ques lui vingt cinq Cheualiers, & cinquante Es-
cuiers du pais d'Espengne, & autres qui luifs e-
stoient: puis se firent singler pour arriuer à Bor-
deaux.

OR lesseray à parler de lui, & retourneray au
Roy Henry, qui estoit dedens Sebile la grant, où
il assembla à certain iour à conseil Bertran, le
bon Mareschal d'Audrehem, Hue de Carualay,

le Sire de Beauieu, & Mathieu de Gournay, avecques plusieurs autres Cheualiers & Escuiers. Et dist Henry: Seigneurs, ores est mon ennemy Pierre à Lissebonne, ie en suis tout certain. Ie ne sçay se il trouuera le Roy de Portugal à amy. Se aidier lui vouloit, il mesprendroit. Mais toutesfoiz i'en sceusse volentiers le certain. Adonc le dit Bertran dist: Il nous faut enuoyer vn message, qui portera noz lettres audit Roy, pour sauoir se il veult encontre nous soustenir nostre ennemy & aduersaire. Et ou cas qu'il ce vouldra faire, nous yrons destruire son Royaume, & en ferez couronné Roy. Et de là irons en Grenade, & en Belmarin sur les Sarrafins, & puis en Ierusalem, où nostre Seigneur souffrit mort & passion. Et conquerrons tout ce que Godefroy de Billon conquist en son temps. Et le me semble ainsi, s'il plaist à Dieu que ie ne soie occis, affolé, ou prins en bataille: & que le Roy de France, à qui ie suis subgiet, n'ait guerre aux Engloiz. Car plus volentiers guerriasse Sarrafins que Chrestiens. Mais il nous fault regarder, qui nous enuoyerons deuers le Roy de Portugal, pour sauoir sa volenté. Adonc se leua Mathieu de Gournay, & pria au Roy & à Bertran, qu'ilz le laissassent aller audit message. Car grant volenté auoit de veoir la ville de Lissebonne sur mer, & l'estat du Roy. Lesquelz lui ottroyerent. Lors s'apresta lui dixiesme de ses gens, & s'en ala vers ladite ville,

où il fu vn pou deuant disner. Puis ala descendre en vn hostel, où il se vesti, & ordonna à guise de Cheualier. Apres demâda à son hoste, où il pourroit trouuer le Roy, & s'il estoit au Palais, & aussi se il sauoit aucune nouuelle du Roy Pietre. Et ledit hoste lui respondi, qu'il s'en aloit parmer à Bordeaux deuers le Prince de Galles; lequel se amener pouoit, il auoit esperance de guerrier le Roy Henry, & de recouurer son Royaume. Lors dist Mahieu: Je croy bien que se le Prince veint, & il lui plaist, il pourra bien conquerre & auoir Espengne. Mais ia ne plaist à Dieu, qu'il s'en vueille mesler. Car il me conuen- droit retourner auecques lui, & Hue de Carualay, aussi, qui ont aidie au Roy Henry couronner. Et quant l'oste l'ot oy parler: Sire, vueillez vous auencier. Car le Roy se veult asseoir au disner, où il aura tres-noble feste de vnes noces, qui seront d'un Cheualier & d'une Dame, qui est cousine au Roy. Et demain verrez iouster & tournoyer. Et Mahieu dist, qu'il se essaieroit. Lors s'en tourna vers le Palais, où il auoit feste moult notable & sollempnelle. Et plusieurs Menestreaux y auoit, qui ioüoient moult noblement de instruments. Si trouua ledit Escuier Engloiz, qui bien le recongnut. Car il auoit seruy le Prince, & auoient esté eulx deux ensemble en la bataille de Poitiers. Et si tost qu'ilz furent entrecogneuz, si alerent baisier & acoler l'un l'autre. Et lui dist icel-

lui Escuier, qu'il yroit denoncier au Roy de Portugal, qu'il lui feroit grant honneur, & moult l'auroit chier. Donc s'en ala ledit Escuier deuers le Roy, & lui dist, que leenz estoit venu vn Cheualier Engloiz, nommé Mahieu de Gournay, lequel estoit homme du Prince, pour parlementer à lui, lequel estoit vn des plus vaillans que l'en peust trouuer en tout son pays. Pourquoy il pleust audit Roy à lui faire bonne chiere, & à lui festoier. Et lors icellui Roy enuoia deuers lui tous les Maistres de son Hostel, qui ledit message emmenerent en la chambre du Roy. Deuant lequel il se agenoilla. Mais tantost icellui Roy le prist par la main, & le releua; & bié fust il venu en son país, & qu'il estoit son amy de corps & d'auoir. Puis lui demanda, comment le faisoient Henry, & Bertran, & leurs gens. Et dist, que bien auoient trouué bon pays en Espengne, & fait belle conqueste, se ce fust à leur droit. Mais Pietre en estoit ietté à tort & sans cause.

„ Non est: Sire, ce dist Mahieu. Car nous sommes
„ tous informez qu'il a tort, & vault pis que vn
„ Iuif: & vous le sauez bien. Mais à enuiz le dictes.
„ Et pourtant suis-ie enuoie deuers vous, sauoir se
„ vous voulez aidier ne garentir Pietre. Car se ie
„ sauoie, que ce fust vostre amy, vous me verriez
„ tantost partir de ceste place. Et le Roy lui respō-
„ di: Gentil Cheualier, de ce doy-ie bien estre re-
„ nu pour excuse. Car ie lui deis bien en la presen-

ce de mes gens, que de son fait ne me pensé-je
 point à mesler, ne entreprendre guerre tant com-
 me ie viue. Et Mahieu lui respondi, Qu'il n'en
 vouldroit iapis. Adonc ladite responce faite, le
 Roy s'assist à table, & fist asseoir ledit message,
 qui moult fu bien ferui. Ycellui iour y ot grant
 feste, & grant ioye dedens le Palais. Et y iouoient
 Menestreaux deuant l'espousée. Et Mahieu de
 Gournay, qui bien les auoit entenduz, dist au
 Roy en souffriant. Les Menestreaux de nostre
 pays ne iouent point ainsi, ne en France, ne en
 Engleterre. Adonc le Roy lui dist: Je en ay deux
 en vostre commandement. Mais ie croy qu'il
 n'en soit nulz telz. Et m'a plusieurs fois prié le
 Roy de Belmarin, que ie les lui voulzisse enuo-
 ier. Mais c'est pour neant. Car ie ne m'en dessaisi-
 roie pour riens quelconques. Adonc les fist venir,
 vestuz de si nobles vestemens, que oncques mais
 icellui Mahieu n'auoit veu si riches deuant ta-
 bles de Roy. Et auoit chacun d'eulx vn varlet, qui
 portoit vne cyfoine à son col. Adonc acorderēt
 leur instrumens, & commencerent à iouer ces
 deux Menestreaux deuant le Roy. Et quant Ma-
 hieu de Gournay les oy, si en commença moult
 fort à rire, & soy moquier tout à part lui. Et apres
 leur ieulleffié, le Roy lui demanda, se ilz auoient
 bien ioué. Et il lui respondi: Sire, ie ne vous cele-
 ray pas. Mais ou pays de France & de Normen-
 die, nulz ne porte telz instrumens, se ne sont

„ pouures auugles, ou autres gens querans leurs
„ vies, dont ilz atonnent les gens. Et l'appelle-on
„ ou pays delà, Instruments truens. Quant le Roy
l'entendi, si en fu tref-courroucié, & iura Dieu,
que iamaïs en sa vie ne le seruiroient plus. Tan-
tost leur donna congïé. Mais ladite feste dura
toute iour. Et moult ot grant ioye demenée. Et
le landemain se apprestèrent Cheualiers & Es-
cuyers, pour iouster, ainsi comme le Roy l'ot
ordené. Lequel appella lors ledit Engloiz, & lui
„ dist: I'ay pieça oy dire, qu'il a en vostre pays de
„ tref-bons iousteurs, & que nul n'en y a au lez de-
„ ça, qui de la iouste sache rien, ainsi comme ilz
„ font par delà. Si verroye volentiers, comment
„ ilz le sceuient faire. Car on dit, que ce sont vnes
„ gent, cõtre qui nulz n'a pouoir, & que l'en doub-
„ te moult. Car entre vous auez leur defortune de-
„ mener. Ne sçay qui les vous donna. Moult de
„ maulx auez fait en plusieurs pays. Je ne sçay se
„ Merlin le vous prophetisa. Mais depuis que vo-
„ stre nation fu baptizée en Engleterre, apres la
„ predication de saint Thomas, combien que
„ vous aiez assez regné contre la foy qu'il ensei-
„ gna, tousiours auez eu le meilleur en bataille. Et
quant Mahieu l'entendi, si lui mua tout le sanc,
& lui respondi: Qu'il ne sauoit si vaillant Cheua-
lier, à qui il ne ioustaist. Et se vanta adonc, que il
auoit esté en France, & par mer, & par terre: mes-
mement en la bataille de Poitiers contre le Roy

Iehan. Mais oncques à nul iour n'auoit esté abatu. Et quant le Roy l'oy, si le pris a moult en son cuer, & le tint à hardi. Puis lui dist, que voulientiers le verroit iouster, & qu'il donroit vn pris au mieulx ioustant: c'est assauoir vne mule du pris de cent mars d'argent, & la sceille d'yuoire, qui dessus estoit: de laquelle les garnisons estoient d'or, & de la bride aussi. Et quant Mahieu l'oy, si en ot grāt ioye, & bõ gré en fot au Roy de Portugal, lequel fist mener ladite mule deuant le Palais, afin que chacun la veist, qui veoir la voudroit, où le peuple se assembloit. Dedens ladite cité fu la feste moult efforcée de l'Englois, qui se faisoit si fort vers les Portegalois: & pour le mariage, qui estoit de grant lignée, furent toutes les Dames & bourgoises noblement vestues. Et par especial y en ot cinq cens en vne compagnie, aussi bien parées comme femme pourroit estre ou pays de France: lesquelles estoient aux fenestres du Palais, & aux chambres. Là vindrent emmy la rue Cheualiers plusieurs. Car le iour ne iousta nul autre gent. Et commença la iouste droit à Soleil leuant, pour le chaud qu'il faisoit ce iour en icellui pays. Donc se mirent d'une part soixante Cheualiers, tous d'une compagnie, pour iouster. Et fu ordonné, que l'en iousteroit à deux paires de rens. Ce iour y ot maintes lances brisées, maint escu desbouclé, maint visiere abatue, & maint cheual tumbé. Mais ledit Ma-

lieu de Gournay, qui estoit Engloiz, comme dit
est, iousta si bien icellui iour, que bien cent cops
tous ensuiuans il abati à cheual, & mist à terre.
Dont le Roy fu moult yrié, & dist à soy mesmes;
„ Aide Dieu, s'en yra ainsi cel Engloiz hors de ma
„ terre. Quant il sera oultre la mer, il s'en vantera,
„ & dira, que les Portugalois ne valent riens. Et
l'Engloiz auoit si grant criée, que chacun lui dô-
noit l'onneur. Lors demouroit avecques le Roy
vn Breton de grant renommée, qui estoit nom-
mé la Barre, lequel estoit grant & fort, & auoit
dure eschine, les poings gros & quarrez, & de
grosse taille par bras & par iambes; que ledit Roy
„ appella, & lui dist: Vous auez renommée en Bre-
„ taigne, & ailleurs en maint pays, d'estre preux &
„ hardiz. Auroies tu la char si hardie, que tu osasse
„ iouster à cel Engloiz? Et la Barre lui respondi: Si-
„ re, par la Vierge Marie, se il me deuoit tuer de
„ vne lance, si iousteray-ie à lui, s'il vous plaist.
„ Oyl, dist le Roy. Puis le fist armer & mon-
ter souffisamment. Si se mist és rens, & regarda
ledit Engloiz, qui là endroit auoit abatu douze
Cheualiers. Et quant il apperçut la Barre, qui se
appointoit pour iouster, si cuida que ce fust vn
Portugaloiz, & pour tel lui fist bailler le Roy. Et
quant il vit l'Engloiz, qui tel orgueil demena, il
cueilly force & hardement, & prist en soy grant
air, & proposa de illec viure ou mourir, où il cō-
querroit honneur. Donc broicherent les deux
che-

cheuaux l'un contre l'autre, & s'afficha chacun es
estriefts, la lance ou poing, & l'escu au col. Mais la
Barre l'auisa si bien, qu'il le fery de la lance par-
my la visiere du heaume, en telle maniere qu'il
lui osta à la pointe du fer, & tellement le raen-
contra de corps & de pis, que ledit Engloiz tref-
buscha par terre, & son cheual aussi, si durement,
que il ot au cheoir vn braz rompu. Et fu telle-
ment estonné du cop, qu'il n'oy ne ne parla, ne
ne sauoit où il estoit, & se pasma d'angoisse. Et
quant le Roy le vit, si en ot tref-grant ioye, &
bati ensemble ses paulmes, & par force de rire
lermoia, & dist: Je lui donne la mule. Car il l'a
bien desserui. Et quāt ledit Cheualier fu releué
de pamoysons, lequel auoit grant douleur, on
lui bandale braz. Et les Portugaloiz, dont grant
foison y auoit, le menerent ou Palais moult hō-
norablement, & il leur dist: Seigneurs, i'en ay
bien eu ma part. Car oncques mais ie ne recu si
grant horion, & celui qui le m'a donné n'est pas
apprentiz. Donc le Roy de Portugal lui escria:
Dittes moy, Cheualier, sont bons les Cheualiers
de nostre nation? Sire, dist-il, ie me doy loer de
vous. Car ie attens beau don. Adonc le Roy lui
fist bailler & deliurer ladite mule, comme à bon
champion. Apres fist-on le soupper, où la feste
fu si riche, que grant merueille. Et landemain
ledit Engloiz prist congié, & s'en parti, & fist a-
mener ladite mule avecques soy. Mais au depar-

tir, vn Escuier lui dist tout bassement, comme il auoit iousté à vn Breton nommé la Barre. Et quant icelui Engloiz le sceut, si en fu bien marry, & manda depuis au Roy, (Othon estoit nommé) qu'il lui auoit fait mortelle trayson. Toutesfoiz cheuaucha tant, qu'il vint à Sebile, où le Roy Henry & ses Barons estoient. Puis s'enclina deuant lui icellui Engloiz, qui estoit hardy comme vn lyon. Et les Cheualiers de renom, qui lui virent le braz lié & bandé, lui demanderent où il estoit cheu de son cheual. Dont leur conta toute son auenture. Et quant Bertran oy recorder du Bretõ, qui ainsi l'auoit païé, si lui en fu moult bel. Adonc Henry lui demanda, où estoit le Roy Pietre. Et il lui dist: Sire, il s'en va tout droit à Bordeaux deuers le Prince de Galles, & fera tant s'il puet, qu'il l'amèrra en ce pais. Si vueillez auoit sur ce conseil. Car ie me doubte, s'il y vient, que vous n'en ayez du pis. Car il vendra fort & gaïny de gens. Et Henry respondy, que à enuys le verroit, & que jà ne plust à Dieu, qu'il luy prest vouldenté de y venir. Lors dit Hue de Caruallay au Roy Henry: Sire ie suis bien vostre amy. Maïstant vous dy-ie bien, & ay tousiours dit, que se le Prince vient, à qui ie suis subget, il me conuendra partir de vous, pour luy seruir. Car c'est mon droit Seigneur, ne contre lui ne seroy-ie point armé. Autretel dirent par semblable, Gautier Huet, Ichah d'Eureux, & tous les au-

tres Engloiz. Et le Roy Henry leur dist : Frans Cheualiers gentils, vous le m'auez pieça dit il à plus de six mois. Mais pour Dieu demourrez avecques moy, tant que l'en sache comment la chose ira. Et ilz le lui octroierent. En ce temps y auoit plusieurs chasteaulx, que Iuifs & Sarrafins tenoient. Si y enuoia Henry plusieurs François & Engloiz, ausquelz il abandonna tous les tre-fors qu'ilz conquerroient. Mais Henry demoura à Sebile, avecques lui Bertran, le Marechal d'Audrehem, le Besgue de Villaines, Hue de Carualay, & plusieurs aultres, lesquelz attendoient à oir nouuelles de Pietre, & du Prince de Galles.

Comment deux Iuifs accusez de la mort de la Royne d'Espengne qui icelle Dame auoient fait murdrir, furent ars & bruiz de la foudre du ciel, qui sur eulx chey en vn champ de bataille, où ilz se combattoient l'un contre l'autre. Parquoy tref-grant nombre de Iuifs & Sarrafins se firent baptizer.

CHAPITRE XXII.

ICEL VY temps durant auint que deux Iuifs deuant nommez, c'est assauoir Turquant & Danyot, que le Roy Henry auoit commis de par lui à receuoir des autres Iuifs, qui demourez estoient, par truage le treux à lui appartenât, sub-

iuguerent tres-grandement iceulx Iuifs; & pre-
noient de leur vaillant tout à leur plaine voulé-
té; & plus la moitié qu'ilz ne deuoient, & que
commandé ne leur estoit. Tant que pour ceste
cause ilz furent grandement haiz & accusez de
tous les Iuifs, qu'ilz auoiét fait mourir & estain-
dre la Royne en sa chambre. Et s'en firent tous
partie contre les deux Iuifs deuant diz par ma-
niere de tesmoignage. Et quant Henry le sceut,
si les manda, & fist venir deuant lui. Puis leur dist:
Larrons, murdriers, ie ne sauoye pas que vous
eussiez mis à mort Madame la Royne en sa chã-
bre, & dedens son lit, comme vous auez fait. Si
vous feray pour ce ardoir tout maintenant de-
dens vn feu. Or m'en dites la verité, & ne me ce-
lez pas. Sire, dist Danyot, demandez à Turquant
qui en fist le murdre, & tout le fait. Il est bien ve-
rité, pas ne le celeray, que Pietre m'y enuoya cõ-
me son sergent, & fu iusques à l'uis de la cham-
bre. Mais plus n'en fis, forstant que ie prioye
toufiours à Turquant qu'il se auisast; & plus de
cent foiz lui en requis, & lui disoye; Que trop
mieulx lui en vaulzist fouir, que de commettre
ledit fait. Et quant Turquant l'oy, se dist au Roy:
Sire, ie voy bien, qu'il me conuient mourir. Si
ne me vueillez point gchiner. Car sans aucune
destresse souffrir, ie vous diray comme il en fu.
Sire, par le grant Dieu, où ie croy, moy & Da-
nyot sommes compaignons du fait; & fu la Roy-

ne murdrie par nous, & six autres Iuifs, qui ne
 sont pas icy. Lors lui respondi Danyot: Vous
 mentez. Car ie n'entray oncques en la chambre.
 Mais ie vous defendi plus d'une foiz, & diz, Que
 la Royne estoit condempnée à tort, & que enco-
 res en auroit Pietre villenie. Car la Dame si estoit
 estraitte de noble sanc. Et Turquât lui dist: Haa!
 lierres, comme tu fcais de trichier! Ainsi furent
 longuement en tel procès: tant que Bertran dist,
 que la verité en seroit sceuë ains heure de com-
 plie, & que ces deux en feroient bataille ensem-
 ble, se il plaisoit au Roy & aux nobles Barons.
 Adonc le Roy l'ottroya. Et tantost ledit Bertran
 adiuga la bataille d'iceulx deux Iuifs en la pro-
 pre iournée à combattre. Donc monterent à
 cheual les Cheualiers, & y estoient le Roy Hen-
 ry, le Mareschal d'Audrehem, Hue de Carualay,
 & des plus souffisans bourgeois de la ville. Et les
 autres gens de commun monterent aux portes
 & aux murs, pour veoir iceulx Iuifs combatre.
 Lesquelz furent amenez ou champ armez cha-
 cun d'auqueton pesant, & de coyffe: & si auoient
 coutilles bien trenchant, l'escu au col, & glaiue-
 lot en la main. Entour le cháp auoit grât peuple
 assemblé. Et Bertran, qui gardoit ledit champ,
 dist à Turquant, qui estoit grant & fort. Or pen-
 se de bien faire, & ne te doubte pas. Se tu pues
 mater l'autre Iuif, ie te impetreray ta grace. Car
 Danyot estoit de si hideux semblant. Adonc

leur fu fait vn parquet fermé du costé des Cheualiers, qui regardoient le champ, & de l'autre d'un grant fosse. Dont leur dist Bertran, Qu'ilz estoient bien armez, & qu'ilz alassent ferir ensemble. Lors se sont eslongnez, & Danyot regarda Turquant moult fierement, & tenoit chacun son glaiuelot en la main, dont ilz s'entreferirent chacun deux cops, tant que les fers passerent les escuz. Puis trayrent les coutilles, dont ilz s'entreferirent de grant cops tant sur les testes comme ailleurs. Mais Turquant getta vn tres-grant cop, & assena Danyot sur le bras; tellement qu'il lui perça l'auqueton, & le naura en char, tellement que le sanc en chey sur le pré. Adonc lui dist par ramponne, que il l'auoit tasté de ce lez.

„ Puis l'appella, Traistre, desloyal. Il te doit bien
„ mesauenir, quant tu as ainsi pariuré Dieu. Car tu
„ as murdrie la Royne par ta fausseté. Quant Danyot l'entendi, il getta son escu, & Turquant le sien aussi. Puis s'entreferirent de coustilles de si grant air, qu'il n'y auoit celui, qui n'eust le visage ensanglanté. Apres s'entreprindrent à la luite, comme touz forsenez. Lors dist le Roy Henry à Bertran, & aux autres Barons: Veez là fors
„ champions, & qui fort se sont combatuz. Et ainsi comme iceulx luifs luytoient, & s'entretenoiét à force de braz, & que Danyot s'estoit getté sur Turquât: auint, que en la presence de tous ceulx qui là estoient, ainsi comme il plut à Dieu, que

vne nuée fu veuë ou ciel, aussi clere cōme le Soleil, & aussi reluisant. Et lors chut & descendi sur les deux Iuifs vn tonnoire, & vn orage de temps, dont ilz furent tous ars & bruiz en char & en os. Ne oncques nul mal ne fist aux autres, qui estoient entour eulx. Mais il n'y ot si hardy, qui n'eust adonc grant paour, & s'en foïyrent tous de la place, eulx seignant & reclamant Dieu. Ainsi furent iceulx Iuifs persecutez par la vengeance & punition diuine, que Dieu y monstra, pour le faux murdre qu'ilz auoient fait. Moult en furēt merueillez les haultx Barons, tant qu'ilz ne disoient vn seul mot. Mais pour le miracle on fist sonner les cloiches du Moustier. Et se conuertirent bien seize cens Iuifs de celle nation, & plusieurs Sarrafins. Or vous lefray à parler de Henry & de Bertran, & des autres Chrestiens, qui conqueroient à force oudit Royaume chasteaux & forteresses. Et retourneray à Pietre, qui estoit entré en la mer pour aler à Bordeaux, comme dit est.

*Comment le Roy Pietre ala querre secours deuers le
Prince de Galles en Angolesme ; auquel il
donna illec sa table d'or , avecques plu-
sieurs autres nobles ioyaux.*

CHAPITRE XXIII.

P I E T R E le Roy, qui en la mer estoit, si arriua dedens sa nef au plus prouchain port de la cité de Bordeaux, dont il veoit bien les murs. Adonc fist mettre hors son tresor, & mettre à charroy, avec sadite table: laquelle estoit couverte d'un tres-riche drap d'estrange ouurage. Et enuoya ses fourriers deuant, pour prendre l'ostel. Puis monta sur vn mulet d'Arragõ, & se mist au chemin, avecques lui ses gens. Et en alant fist enquerre & demander, se le Prince estoit en la ville, ou non. Et on lui dist, qu'il estoit en Angolesme. Dont Pietre fu moult courroucié, quant il ne le trouua à Bordeaux, où il entra. Lors enuoya ses dessusdiz sommiers en la ville d'Angolesme, pour prendre logeis pour lui & pour ses gens. Tantost fu denoncié au Prince, que Pietre estoit venu en son pays, lequel on auoit chacié d'Espengne. Lors dist: Je me merueille trop, qui au Roy d'Espengne fait encombrer. Donc respondi Chandos, qui son maistre Conseiller estoit: Sire, ce fait Bertran du Guesclin, & vos meil-

meilleurs Cheualiers d'Angleterre, qui deuoient
aler en Grenade guerroyer les Sarrafins. Et ilz se
font arrestez en Espengne eulx & leurs gés, pour
aidier à Henry le bastart. Et ont en telle manie-
re deschassié Pietre le Roy, que il n'a ville, où il
puisse herbergier, ne homme qui à mengier ne
boire lui donnast. Par ma foy, dist le Prince, c'est
grant merueille, & conuient que ce soit par son
pechié, ou par mauuaise fortune, qui ainsi le fait
aualer. Ainsi s'en merueilloit moult lui & sa gēt.
Puis ne demoura gaires, que Pietre ne vint en la-
dite ville, en moult noble estat; & descendi en
vn hostel, qui pour lui estoit prins & appareillié.
Et incontinent ledit Prince enuoia deuers lui le-
dit Chandos tout premierement, qui le ala visi-
ter en sondit hostel. Et tātost que Pietre le choi-
si, il se leue encontre lui, & lui mist le braz au col.
Puis lui conta tout le fait d'entre lui & Henry son
frere, & quelle gent l'auoient greué. Pourquoy il
auoit perdu son Royaume à tousiours, se le Prin-
ce n'y pourueoit, auquel il estoit venu à remede.
Et Iehan de Chandos lui dist: Sire, par mon ser-
ment se il a voullenté de vous aidier, il n'est Roy
ne Seigneur ou monde, qui vous peust greuer.
Car il est eureux & doubté, & emprent ses be-
songnes ardamment, dont il a souuent eulos &
grace. Et les sages dient, que l'en veoit bien ad-
uenir par bon commencement. Apres ces paro-
les & plusieurs autres, Chandos mena Pietre à la

Cour du Prince, parler à lui en sa chambre, & le tenoit par la main. Et quant le Prince le vit, si se leua encontre lui. Et Pietre lui fist telle reuerance, qu'il n'eust pas faite à Dieu ne à sa mere, en le saluant moult humblement. Et faisoit moult l'humble & le desconforté en faiz, & en parolles. Puis lui compta au long, pour quelle cause il estoit venuz deuers lui, en disant: Sire, vous sauez bien, & ne le vous fault pas dire, cōment le Royaume d'Espengne me vint par droite succession de feu le Roy mon pere: dont Henry le bastart m'a debouté & hors chassié par enuie & faulx engin. Ne oncques n'auint, ce croy-ie, que bastart fust Roy. Car Dieu ne le veult pas. Si m'en vien plaindre à vous, comme au plus souffisant, & de ligne Roial, qui aujourduy soit. Et se ie me plains à vous, ie le faiz à l'espée des Preux, à l'honneur de Cheualerie, cōme à celui qui mieulx me puet aidier, que nul autre. Car ie suis des-herité à tousiours, & mes hoirs aussi; se de vous, qui tant estes preux, courtois, hardiz, & larges, ne suis presentement aidie & secouru. Quant le Prince l'oy, si lui engroissa le cuer, & l'esmurent orgueil & hardement. Puis regarda Pietre, qui tendrement pluroit. Si fu plain de fol pensé & d'oltrecuidance plus que deuant. Donc lui dist: Veez-cy vostre chappel, que vous ostez par vostre courtoisie. Mais ne doubtez pas, que tout ainsi comme ie le remets par bonne amour sur vostre teste. Ie

vous y remettray, soit sens ou folie, la couronne
 d'Espengne, s'il me deuoit couster quanque ie
 pourroye finer, & que ie en deusse mourir en
 bataille. Adonc Pietre ot moult grant ioye, &
 l'en mercia doubcement. Et lui dist en l'audien-
 ce de plusieurs, qui là estoient, qu'il lui en faisoit
 hommage & fealté, & ses hoirs aussi, de degré en
 degré. Dont apporterent les Cheualiers le vin.
 Car nul ne le seruoit *, s'il n'estoit Cheualier.
 Car il estoit si orgueilleux, & tant se prisoit, qu'il
 se tenoit pour le greigneur de la Crestienté: ne
 il ne donnoit du Roy de France, ne des Fleurs de
 Liz, vaillant vn denier. Mais puis lui meschey vil-
 lainement par son orgueil, comme vous pour-
 rez oyr cy-apres.

TANDIS qu'il parloit à Pietre, quatre Espai-
 gnolz firent apporter la table d'or, dont dessus
 est faite mention. Et dist Pietre au Prince: Sire, ie
 vous dōne ce iouel icy en pur don, qui m'eschey
 du Roy Alphons mon pere, & le gaigna mon a-
 yeul, qui l'ot pour la rençon du Roy de Grena-
 de, qu'il tint iadix en prison. Lors dist le Prince,
 qu'il le lui guerredonneroit bien. Et quant le
 Prince ot bien regardée la table, qui donnée lui
 estoit, en laquelle auoit tant de richesses & de
 beauté, si l'enuoya tantost deuers sa femme la
 Princeffe, qui estoit la plus belle Dame que l'en
 sceut lors. Elle estoit en sa chambre, & lui auoit-
 on bien dit comment le Prince auoit promis &

iuré à Pietre, qui là estoit venu, & icelle table dō-
née, qu'il le remettroit en possession du Royau-
me d'Espengne, & en osteroit Henry. Et quant
elle le sceut, si lui en pesa moult. Et dist aux Da-
mes, qui entour elle estoiet, Que le Prince auoit
tort, de aidier à vn murdrier, qui oncques n'ama
la loy de Dieu, & lequel auoit fait femme mur-
drir, la meilleur, & la plus belle, qui lors fust ou
monde. Car elle estoit sage, doubce, loyal, & a-
moit Iesus-Christ. Haa! Dieu, dist-elle, comme
il nous en vendra de mal! & maudite soit l'eure,
qu'il vint par deça. Adonc commença à plorer de
Henry, que elle moult amoit. Maiz son filz la
rapaifa, qui lors estoit bien ieune, & a puis esté
Roy d'Angleterre. Lors vint vn Cheualier, qui
se agenoilla, & presenta à icelle Dame ladite ta-
ble de par le Roy d'Espégné. Et quant elle le vit,
si dist: Vecy beau. Ainsi icelle Princesse, qui
moult estoit sage, prisra pou icelle table, & mau-
dissoit le Roy, qui présentée la lui auoit. Apres
demanda le Prince au Cheualier, qui en auoit
fait le message. Et il lui respondi: Si m'aist
Dieux, Sire, elle n'en fist oncques compte,
mais est tref-courroucée de la venue du Roy,
qui cy est. Voire, ce dist le Prince, ie m'en
apperçoy bien, que elle vouldroit bien, que
ie demourasse tousiours de coste elle en ses
chambres. Ce ne feray-ie pas. Car qui veult
auoir renom d'estre bon & vaillant, il doit al-

Ier souuent au vent & à la pluye, & soy auen-
 turer en bataille : comme fist Roulant, Oli-
 uier, & Oger, & les quatre filz Aymon, Chal-
 lemagne le Grand, le Duc Lyon de Bourges,
 Emon de Tournant, Perceual le Gallois, Lan-
 celot, Tristan, Alexandre, Artus, & Godef-
 froy : dequoy les Menestreaux chantent ces no-
 bles Romans. Et par saint George, en qui ie
 croy, ie rendray Espengne au droit heritier : ne
 ia bastart n'en tendra qui vaille vn seul denier.
 Car ainsi pourroit-on faire à tous autres enfans.
 Et ad ce deussent bien garder tous Princes & Ba-
 rons. Car autant leur en pent aux nez. Adonc
 le Prince fist escrire lettres, qu'il enuoya par
 plusieurs cheuaucheurs ou pays de Guienne, &
 mandoit aux meilleurs gens d'armes & archiers
 de tous ses subgiez, & biens-vueillans, qu'ilz
 venissent à lui montez & armez, tant Engloiz,
 Alemans, comme Guiennois, à Bordeaux, où il
 faisoit son mandement.

Comment le Prince de Galles fist son mandement à Bordeaux pour aler en Espengne, & enuoya par ses lettres deffier le Roy Henry. Par lesquelles il manda tous les Engloiz, qui avecques lui estoient, qu'ilz le laissassent, & s'en venissent audit Prince en ladite ville de Bordeaux.

CHAPITRE XXIV.

GRANT assemblée fist le Prince de Galles en la cité de Bordeaux, & là vindrent en son mandement le Conte d'Ermeignac, le Sire de Lebret, ceulx de Partenay, Iehan de Chandos, le Sire de Pommiers nommé Amenyō, Guillaume de Feleton, Iehan de Felleton, le Seneschal de Poitou, le Seneschal de Bordeaux, & le Conte de Pennebroc : lesquelz amenerent moult belle compaignie de gens d'armes. Et apres vint le Duc de Lenclastre par la mer, lequel amena avecques lui tref-grant nombre d'archiers. Et fut la plus noble assemblée, que l'en eust oncques mais veuë faire de memoire d'omme. Là veist-on roler maint iaseren, forger maint bacinet, & maint fer de glaive, & maint bon cheual essaier. Adonc le Prince enuoya par certains messages ses lettres au Roy Henry, qu'ilz trouuerent à Burs, avecques lui Bertran, qui tant estoit preux, le noble Mareschal d'Audrehem, Hue de Car-

ualay, Mahieu de Gournay, & plusieurs autres, Bretons, François, & Engloiz. Lors presenta les lettres vn des cheuaucheurs au Roy de par le Prince, qui le deffioit, & par icelles, qui illec furent leuës, faisoit sauoir audit Roy, qu'il estoit son ennemy, & mal-vueillant à tousiours pour le desplaisir qu'il auoit fait au Roy Pietre son parent. Et de fait lui cōmandoit, qu'il alast hors du Royaume d'Espengne: ou sinon, il vendroit à si grant effort sur lui, qu'il le destruiroit & feroit mourir, lui & tous les siens. Et en oultre mandoit à Hue de Carualay, & à tous les autres Engloiz, qui avecques ledit Roy estoient, que tantost laissassent son seruice, & s'en venissent deuers ledit Prince à Bordeaux, en poine d'estre reputez pour traictres, & les siens ennemiz, & de perdre leurs terres & fiefs, & de tant comme fait en auoient, il lui en desplairdit. Car ce n'estoit pas de son congié. Et quant le Roy Henry oy la teneur desdites lettres, si lui mua le sanc, & commença à regarder Bertran, qui bien apparçut, qu'il ennuyoit au Roy. Adōc parla haultement à lui, & dist: Sire, j'ay bien oy ce mandement, & me semble merueilleux. Si le Prince, qui est à Bordeaux, nous menace, pour ce n'est-il pas ycy. Et ains qu'il y soit, il pourra bien trouuer vn si pesant encōtre, qu'il lui vaulzist mieulx estre bien loing. L'omme qui pleure pour menaces de plus puissant de soy, ressemble à l'efant. Se

„ noz ennemiz sont fors, auffi sommes nous. Au-
„ cunesfoiz trespuchent les riches, & perdent les
„ outrecuidiez. Maudit soit-il, qui se esbayra. Se
„ ilz sont cent mille, & nous sommes vingt mille.
„ Se Dieu & droit nous veuillent aidier, iamais pié
„ ne s'en retournera d'Espengne. Soions fiers &
„ hardiz. Car qui a bon cuer, tousiours va-il auant,
„ & nous combatons. Et quant Hue de Carualay
„ ot entendu, comment le Prince auoit mandé lui
„ & les autres, si s'en vint à Bertran, & lui dist: Ien-
„ til Sire, il nous conuient departir. Nous auons e-
„ sté ensemble par bonne compaignie comme
„ preudhommes, & auons tousiours eu du vostre à
„ nostre voulenté, que oncques n'y ot noise ne
„ tençon, tant des auoirs conquestez, comme des
„ ioyaulx donnez, ne oncques n'en demandasmes
„ part. Si pense bien, que i'ay plus reçu que vous,
„ dont ie suis vostre tenu. Et pour ce vous pri, que
„ nous en comptons ensemble. Et ce que ie vous
„ deuray, ie vous paieray, ou assigneray. Si dist Ber-
„ tran: Ce n'est que vn sermon, ie n'ay point pen-
„ sé à ce compte, ne ne sçay que ce puet monter. Ie
„ ne sçay se vous me deuez, ou se ie vous doy. Or
„ soit tout quitte, puis que vient au departir. Maiz
„ se de cy en auant nous acreons l'un à l'autre, nous
„ ferons nouuelle debte, & le conuendra escrire.
„ Il n'y a que du bien faire, raison dōne que vous *
„ vostre maistre. Ainsi le doibt faire tout preu-
„ domme. Bonne amour fist l'amour de nous, &
„ aussi

aussi en sera la departie. Dont me poise, qu'il cō-
 uient, que elle soit. Lors le baïsa Bertran, & tous
 ses compaignons aussi. Moult fu piteuse la de-
 partie. Et le Roy Henry prist moult doubcemēt
 congié à eulx, en les merciant des bons seruices,
 que faiz lui auoiēt. Et leur presenta or, argent, &
 ioiaulx. Mais Hue de Carualay dist, que ia denier
 n'en prédroit pour l'amour de Bertran. Et biē se
 excusa de son departement, qu'il faisoit par le
 commandement du Prince son Seigneur. Ainsi
 se parti la Cheualerie d'Engleterre. Et Henry de-
 moura, & avecques lui Bertran, & le Marechal,
 & tous les autres Barons. Ausquelz il demanda
 conseil comment il pourroit resister au Prince,
 qui ainsi l'auoit deffié, à cause de Pietre, qui la
 loy de Dieu auoit renoyée, & sa femme fait
 murdrir, qui tant estoit bonne Dame. Et icelui
 Prince estoit le plus orgueilleux & outrecuidié,
 qui fust en vie, & qui plus auoit greué la noble
 Fleur de Liz. Si prioit Dieu, qu'il lui voulzist
 aidier. Et Bertran dist pour lui reconforter, qu'il
 ne tenoit gaires de compte du Prince. Ne pour-
 quant dist-il au Roy en priué, qu'il ne se fïast pas
 trop és Espaignolz. Car moult doubtoit qu'il
 n'en y eust de coüars. Mais par son conseil ledit
 Roy manda ses gēs d'armes, Archiers & Arbale-
 striers. Et lui vindrent de Sebile la grant vingt
 mille, de Burs dix mille, lesquelz portoient es-
 cus & dardes de Sarragone & de Toulette aussi,

à pié & à cheual. Et ne demoura Espaignoliufques en Arragon, qui n'y venist. Et bien estoient en tout le nombre de soixante mille, qui mennoient à charroy tantes outrefs, paueillons, artillerie, & autres choses pour eulx necessaires. Et fu la premiere bataille chargée au Besgue de Villaines, pour sa vaillance: & la seconde au Marechal d'Espengne, qui avecques soy auoit le Conte d'Ayne nez d'Arragon. Et à l'encontre d'eulx venoit le Prince de Galles, avec lui les deuant nommez, en si grant ordenance, que fort seroit du raconter. Et estoient bien vingt sept mille tous hommes d'armes, sans leurs Arbalestriers, qui estoient Geneuois. Et là veist-on grant noblesce, & grant puissance de gens d'armes, tant de l'un costé comme de l'autre. Et le Prince si enuoia à Nauarre deuers le Roy, pour accorder à lui, qu'il peust passer par son pays. Lequel lui octroia, & fist commander que viures lui fussent deliurez, & aux siens, par paiaint de l'argent. Mais ceulx dudit pays l'eurent mucié tellement, que trespou, ou nulz y en trouuerent. Et par ce fut l'ost dudit Prince affamé, lequel auoit commis à Guillaume Feleton son auant-garde, qui entra oudit pais d'Espengne fourrager à tout cinq cets Engloiz, hardiz & combatans, & accueilloient la proye: c'est assauoir beufs, vaches, moutons & berbiz, combien qu'ilz trouuassent le pais petitement garny. Entretandiz Bertran & le Besgue

de Villaines estoient ensemble. Et leur vint dire vne espie, qu'il venoit de l'ost du Prince, que oncques mais n'auoit veu si fiere gent. Mais ilz n'auoient que mengier, & estoient la greigneur partie d'iceulx tous affamez. Adonc Bertran lui demanda qui faisoit ladite auant-garde. Et il lui dist, que c'estoit ledit Guillaume de Feleton, lequel n'auoit avecques soy que six cents lances. Lors renuoya ledit Bertran ladite espie, & lui commanda que le lendemain lui en sceust rapporter nouuelles à Nadres, en l'ost du Roy Hérry. Y auoit bien avec les Espaignolz xx. mil Geneuois portans dardes, dont ilz eussent combatu toute la puissance du Soudan, ce sembloit. Et auoit dit ledit Besgue de Villaines à Bertran, que ces gens lui sembloient bien suffisans: & qu'ilz auoient tant gens, que le Prince ne deuroit point arrester encontre eulx. Mais Bertran luy respondi: Sire, ie vous iure que le cuer me dit, que tantost qu'ilz verront sa banniere drecée, & se vendra assembler, ilz s'en fuiront, ne ie ne me fie point en eulx. Et par ma foy ie auroye plus chier estre prins en bataille, que le Roy le feust. Car Pietre son frere le feroit mourir incontinent. Et se ie estoye prisonnier, ie pourroye auoir raençon pour or & pour argent: A ces parolles vint à Bertran vn cheuaucheur, qui lui apporta nouuelles des fourriers Engloiz, que ledit Guillaume Feleton menoit & conduisoit.

Comment Bertran du Guesclin desconfit en Espengne l'auant-garde du Prince de Galles , où furent tueꝝ Guillaume de Feleton , qui estoit Capitaine , auecques aultres Cheualiers Engloiz , bien le nombre quatre vingts ou plus , & plusieurs Escuyers & varlès.

CHAPITRE XXV.

GRANT ioye ot Bertran, quant il sot que Guillaume Feleton cheuauchoit ainsi le país. Car moult le heoit, & moult y auoit cause, comme en autre lieu est cy-deuant esclarcy. Dõt appellale Mareschal de France, & le Côte d'Ayne, ausquelz il dist, que bon feust d'assaillir les fourriers Engloiz, qui trouuer les peust. Et eulx en furent d'accord. Adonc Bertran se mist à voye, & fist baissier bannieres, panons, & glaiues, afin qu'il ne feust apperceu. Et si enuoya les cheuaucheurs deuant, pour destourner l'estat des Engloiz; desquelz l'un cheuaucheur, qui le langage des Engloiz sauoit parler, se bouta en l'ost des Engloiz, & entendit que ledit Feleton venoit de fourrage, lequel admenoit bien trois mille bestes, pour reconforter l'ost desdiz Engloiz. Tantost ledit cheuaucheur l'ala dire à Bertran, lequel lors diuisa sa rote en trois parties, & les embuscha lez vn petit boischet. Et ainsi comme

l'une desdites trois batailles cheuauchoit, les
 correurs Engloiz, qui l'apperceurent, alerent di-
 re audit Guillaume de Feleton, qu'il fust sur sa
 garde, & qu'ilz auoient veu vne bataille d'Espen-
 gne: ausquelz il demanda combien ilz pouoient
 bien estre. Et ilz lui respondirent: Ilz sont bien
 autant comme nous. Lors dist ledit Guillaume:
 Se ce sont Espaignolz, ie ne fuiray point pour
 eulx. Ie ne les crains de riens. Car ilz n'ont point
 de hardement. Mais se c'estoient François, ce se-
 roit mauuaise besongne. Se Bertran y estoit, qui
 tant est hardy, il ne me prendroit à raençon pour
 or ne argent. Car trop me het. Et pour ce, ie vueil
 que vous aiez sauoir quelz gens ce sont, & se Ber-
 tran y est, & se ilz quierent bataille. Dõt s'en par-
 ti vn cheuauteur brochant à l'esperon vers la
 bataille François, & le Conte d'Ayne encontre
 lui, qui lui demanda qu'il queroit. Et il dist, Que
 Guillaume de Feleton & Iehan son frere l'enuo-
 yent deuers lui pour sauoir son nom, & se Ber-
 tran estoit en la compaignie. Et il respondi, que
 nenyl. Et quant de soy, il estoit Conte d'Ayne en
 Arragon; & les autres ses compaignons estoient
 Espaignolz, qui queroient à auoir la bataille aux
 Engloiz. Et icelui cheuauteur lui respondi, que
 tantost l'auroient. Et lors s'en retourna aux siens.
 Et lors vn Escuier ala dire à Bertran, qu'il ne se
 meust encore. Et lui compta la responce, que le
 Conte d'Ayne auoit donné au cheuauteur du-

dit Feleton, qui venoit encontre lui, & ne cu-
doit pas que Bertran feust si près. Adonc lesdiz
Engloiz, qui estoient cinq cents lances, vindrent
en tres-belle ordonnance, les'escuz au col, & les
panons leuez, & à l'assembler mirent pié à terre:
& les Espaignolz encontre eulx aussi. Puis firent
sonner leurs trompettes, & s'entr'assaillirēt d'v-
ne part & d'autre. Maiz tant se tenoient cloz &
ferrez de chacun cousté, qu'ilz ne pouoient en-
trer l'un dedens l'autre. Maiz vne chose fist lai-
dement depresser & desassembler. Car Bertran &
le Marechal d'Audrehen vindrent tout assaillir
Engloiz sur le costé, & les desrompirent & des-
pecierent. Tellement que ilz se mirent à fuite
iusques à l'ost du Prince. Et fut tué ledit Guillau-
me en la place, & bien quatre vingts Cheualiers
Engloiz. Dont vint vn Escuier eschappé de ladi-
te bataille en l'ost du Prince, & dist que Bertran
du Guesclin, qui estoit moult doulent que à son
vouloir ne les pouoit greuer, les auoit à matin
espiez, rescoussé leur proye, & leurs gens tuez, &
mesmement Guillaume de Feleton & ses parens.
Et quant le Prince l'entēdi, si en fut moult cour-
roucié. Et Dan Pietre s'en esbaissoit moult, qui
forment maudioit Bertran. Lors demanda le-
dit Prince conseil à ses gens. Et le Conte d'Ar-
meignac lui dist: Sire, nous auons cy assemblé vn
„ ost si grant, que tel ne fut pieça veu. Maiz de tant
„ nous va malement, que nous sommes tous affa-

mez, & ce pays-cy si exilié, que l'en n'y puet trou-
 uer viures quelconques. Et pour certain, se nous
 seiournons ainsi, nous mourrons tous de faim
 ains qu'il soit tiers iour. Et trop mieulx nous
 vouldroit mourir à l'espée. Si faisons demain ar-
 mer toutes nos gens, pour combatre noz enne-
 mis. De ce furent d'accord Iehan de Chandos, le
 Captal de Buch, & tous les grans Seigneurs.

OR vous dy, que Bertrā s'en retourna à Nadres,
 où il fist mener les proyes, & les prisonniers que
 cōquis auoit. Dont le Roy Héry ot moult grant
 ioye, & dist bien que Engloiz auoient eu mau-
 uaise iournée. Adōc sceut par lesdiz prisonniers
 la souffreté, que ceulx de l'ost Engloiz auoient.
 Lors dist Bertran au Roy Henry : Sire, par Dieu
 se croistre me voulez, vous vendrez à honneur, &
 desconfirez voz ennemiz sans combatre. Car ilz
 sont tous affamez; & nous courront sur, ne gar-
 derez l'eure, par grant rage de fain. Si fust bon de
 nous fermer de bons fossez, & de mettre tout le
 charroy deuant nous. Car qui le pourra ainsi fai-
 re, pour les faire attendre troiz iours, ils s'en fuy-
 ront trestous. Et quant nous les verrons ainsi de-
 baratez, si leur courrons sur tout à coup, & il n'en
 eschappera pié, qu'il ne soit attrappé. Donc par-
 la le Conte d'Ayne à Bertran, & lui dist: On vous
 tient pour sage & hardy. Mais c'est sans cause.
 Car vous auez paour, ie le voy tout de cler: ou
 vous n'amez pas le bien & l'auancement du Roy.

„ Ia auons euë vne riche estraine, dont noz enne-
„ miz sôt tous esbays. Et qui m'en voudra croistre,
„ nous liurerons la bataille bien & hardiement.

Quant Bertran l'ot ainsi ouïy parler, si dist à l'au-
„ dience de tous: Par ma foy, se nous combatons
„ demain, nous ferons desconfiz, & auendra grant
„ meschief sur le Roy & sur ses gés. Et sçay de cer-
„ tain, que ie seray mort ou prins en la bataille.
„ Mais pourtant que vous en auez ainsi parlé, &
„ moy tenu pour recreant *, ad ce veu elle sera de-
„ main, & y ferray tout le premier: & au fait verra-
„ l'en, se ie suis traictre ou coüart. Dont dist le Roy
Henry, qu'il en vouloit faire au gré de Bertran.
„ Et il lui respondi: Sire, il ne puet estre autrement.
„ Car puis que ie l'ay iuré, ie le tendray. Et si fist-il.
Et pour certain, qui eust voulu vser du conseil
que Bertran auoit donné premier, le Prince &
les siens eussent esté desconfiz, ne iamais n'en
feussent retournez à sauueté. Celle nuit se firent
bien eschaugueter iusques à lendemain d'une
part & d'autre.

De

De la bataille, qui fuen Espengne entre le Roy Henry & sagent, avecques Bertran & les François d'une part: & le Roy Pietre & ses gens, avec le Prince de Galles & le Duc de Lanclastre & les Engloiz d'autre part.

CHAPITRE XXVI.

QVANT vint à lendemain matin, le Prince de Gallés fist armer ses gens, & ordonner comme pour combatre. Car la grant faim qu'ilz auoient les destaignoit moult. Et chargea la premiere bataille à son frere de Lâclastre, en laquelle auoit trois mille hommes d'armes tous armez de pié en cap, qui auoient leurs cheuaux tous couuers iusques à terre. Et portoit la banniere sur vne mule vn Cheualier, en qui le Duc se fioit, lequel auoit avec lui Hue de Carualay, Nicole d'Aubechicourt, Henry & Gautier Huet, Iehan d'Eureulx, Thomas Daldonne. Moult auoit noble bataille, & en icelle cinq cents archiers Engloiz tous aprestez de traire. Et les mena le Duc deuers Nadres à vn costé. La seconde bataille chargea le Prince à son cousin le Captal, lequel auoit avec soy le Sire de Pommiers nommé Emenyon, le Seneschal de Bordeaux, Gautier d'Aube-cote, & Othon son frere, le Conte de Montleson, le Conte de l'Isle, le Sire de Pons, le Sire de

Mocident, & Focaut d'Archiac, avecques quatre mille hommes d'armes, pour garder au lez deuers Arragon. Et lui dist le Prince: Or avant, beau cousin, aujourduy verral'en vostre proesce combattre sur les Espaignolz. Sire, dist-il, n'ayez aucune doubte. Car ie ne les crains de riens, & plus desire de assembler à eulx, que de mengier ne boire. Adonc fist drecier sa banniere, soubz laquelle estoient quatre mille, tous couuers iusques au talon. La tierce bataille chargea le Prince à Iehan de Chandos, pour tant qu'il auoit serui loiaulment son pere & lui, tant es guerres de France, comme ailleurs, & lui bailla quatre mille hommes d'armes, esquelz estoit le Sire de Partenay, & deux cents Archers, & dist audit Chandos: Ie me fie moult en vous. Car c'est bien raison. Alez apres les autres, & s'il y a nul des vostres qui recule plain pié, si lui faites coper la teste. Et il le promist & iura ainsi. Puis dist à ses gens: Seigneurs, il nous conuient aujourduy traueiller pour auoir à mengier & à boire. Nous sommes tous disnez à ce matin. Et se nous ne cõquerons de l'autrui, nous yrons coucher sans souper. Plusieurs y enauoit, qui soubhaidoient, & disoient l'un à l'autre: Pleust à Dieu que ie tenusse vn hanaps de vin, & trois morceaulx de pain tant seulement, & il m'eust cousté autant comme vingt mars d'argent valent. Mais ilz ne pouoient recouurer de nulz, viures quelxconques. Et e-

estoit la veille de Pasques. Et le Prince vould con-
 duire la quarte & derreniere bataille. Et auoit en
 sa compaignie le Conte d'Ermeignac, & son ne-
 pueu le Sire de Lebret, & le Conte de Pénébroc.
 Puis ala le Prince de renc en renc, quāt il ot tou-
 tes ses gens rengiez & ordonnez, & les mercia
 moult, & puis leur dist: Seigneurs, ie vous prie
 en l'onneur de Dieu, que vous recouurez cuer &
 maniere en vous, & me vueillez aidier loyaumēt.
 Vous auez huy pour moy empris grant poine.
 Mais se elle pouoit estre menée à fin, bien seroit
 employée. Car ie regneroie & auroie seignourie
 sur tout homme mortel. Maiz de tant ie vous
 prie, que vous ne prenez nul Espaignolz à raen-
 çon, de quelque estat qu'il soit; mais que Bertran,
 le Mareschal, & leurs gēs. Seigneurs, dist le Prin-
 ce, obliez vostre faim. Car la viande est à Na-
 dres, dont vous soupperez. Et vecy Pietre le Roy,
 qui vous donra assez or & argent, & ioyaulx, &
 tout ce que vous vouldrez auoir. De ceste parole
 furent moult esioys. Lors dist Chādos au Prin-
 ce: Sire, ie ne voy point Espaignolz ordonnez
 au lez de là. Ie ne sçay à quoy il tiēt. Ie croy qu'ilz
 attendent, que le Soleil soit leué. Donc enuoya
 le Prince vn sien herault nommé Chandos de-
 uers Bertran & les autres, & leur manda, que se
 ilz nevenoient armez sur les champs, que on leur
 courroit sur. Tantost se parti ledit herault, &
 brocha de l'esperon par deuant la maladerie, où

il trouua le Roy Henry, le Conte d'Ayne en Aragon, Bertran, le bon Mareſchal d'Audrechem, Guillaume Boitel, Guillaume de Launoy, le Mareſchal d'Eſpengne ; auſquelz il fiſt ſon meſſage : & puis leur pria qu'ilz ſe auançaſſent de leur donner reſponſe. Herault, ce diſt Bertran, ie croy que vous auez faim. Et qui m'eult creu, vous feufſiez tous affamez. Vous n'auez que mégier. Nous vous en gardons aſſez. Car de croiſre mon conſeil eſt trop tart, & le iour paſſe. Sire, diſt le Herault, il n'y a celui en noſtre oſt, qui n'eult bien toſt mégié deux œufs pelez, ſe il les tenoit. De ceſte parole commença à rire Bertran, puis fiſt apporter le vin, qui volentiers en but, ſans le reſuſer. Apres lui demanda Bertran: Dy moy amis, & ne le me cele pas: que vouldroit bien tel vin par delà? Sire, diſt-il, par Dieu, ne par le iour de Paſques, qui ſera demain, on ne boit point de vin en noſtre oſt, ne buuera, iuſques à demain. Par mon ſerement, diſt Bertran, on dit bien par deçà, que celui qui n'a nulz bien eſpargnez, moult en a ſoufferte. Herault, diſt Bertran, vous aurez la bataille, qui vous couſtera. Lors retourna le Herault porter la reſponce, que trouuée auoit. Et Bertran ordonna ſes gens bel & gentement: & priſt dix mil Eſpaignolz des meilleurs qui y fuſſent, & les arouta ſur vne riuiera qu'ilz auoient au doz; & eſtoient ſi belles gens, qu'ilz ſembloient bien eſtre taillez pour cōquerre tout

le monde delà la mer & deça. Adonc Bertran les monstra au Marechal d'Audrechem, & lui demanda qu'il lui en sembloit. Et il lui respondi, qu'ilz estoient moult nobles gens, & de fier semblant; & que nulz ne pourroit à eux durer. Helas! „ ce dist Bertran, il en yra autrement. Ce sera grāt „ dommage, quant telle gent s'en fuyront. Apres „ vindrent en la seconde bataille les Geneuois, qui estoient vingt mille trayās de dardes. Ceulx vint le Roy Henry recōforter, & leur dist: Pour Dieu, „ bonnes gens, soyez preux & hardiz. Car besoin „ en est. Car vecy le fel Pietre, qui nous amayne vn „ peuple combatant. Et s'il auient, que vous soiez „ vaincuz, par Dieu de Paradiz il vous fera tous „ pendre sans remede, à loy de recreans, & morir „ voz femmes & voz enfans. Adonc s'esmurent „ moult fort à monstrier samblant de bonne che- re. Et Bertran appella le Besgue de Villaines, le Marechal d'Audrechem, & plusieurs autres Frā- çois, qui n'estoient que sept cens en tout, tant Bretons cōme Normans. Et leur dist: Seigneurs, „ tenons nous ensemble, & ne nous boutons point „ avecques ces Espaignolz. Car ce ne sont pas gens „ où ie me fie. Et ilz dirent, qu'il auoit bien parlé. „ Cellui iour, aussi comme à heure de prime, firēt tous aprestet, & firēt sōner leurs trōpettes. Et Ber- trā, qui aloit deuāt, fist premier sonner la siēne si haultemēt, qu'il n'y auoit si sourd, qui ne le peust bien oyr. Et quant ilz orent cheuauchié, ainsi

comme à demie lieuë, si descendirent à pié à l'assemblée de chacune partie : excepté le Prince de Galles, & sa baraille, en laquelle estoit le Roy Pietre. Adonc les Cheualiers Engloiz vindrent bien trois mille tous à vne foiz, portans ars & grans poignée de saiettes, dont ilz traioyent moult dru contre les Espaignolz, qui auoient chacun la lance ou poing, & la targe embracée: & faisoient porter bannieres & panons. Et commencerent l'assault iceulx Archiers Engloiz premierement contre les Espaignolz. Lors y ot mainte enseigne criée. Et n'est pas à supposer, que depuis mil ans en ça telle bataille fust assemblée, ne si tref-grant peuple assemblé à vn seul iour. Car tant seulement d'Espengne, du lez du Roy estoient Lxx. mille, sans y comprendre les François : c'est assauoir vingt mille Espaignolz tous couuers de fer, vingt mille Geneuois, & tref-mille Espaignolz à pié. Et s'approucha d'eulx la bataille du Captal. Et quant Henry l'aperceut, il broicha cheual à coite d'esperon, & s'ala lancier dedens. Et le premier qu'il rencontra fery tellement de cops & de pis du glaiue, qu'il lui perça le cuer, & l'abati à terre. Et puis le second, le tiers, le quart trefbucha aussi; & quant qu'il en rencontra iusques au nombre de dix. Puis trayst l'espée, que auoit forgée vn Sarrazin; & en fery par la bataille, tant que à force de cheual la trefpassa. Ne oncques mais n'auantura ainsi sa vie. Et

quant Bertran auisa le Roy, si dist au Besgue de Villaines: Alons secourir nostre Roy. Là recom-
 mança dure bataille & cousteyse. Mais ilz ne se
 donnerent de garde, quant le Roy Henry re-
 tourna. Et Bertran s'en ala à lui, qui lui dist: Haa! “
 Sire, que voulez vous faire, qui ainsi vous auan- “
 turez, & mettez en peril de mort? Souffrez vous “
 vn petit. Haa! ce dist le Roy, ie ayme trop plus “
 chier mourir, que d'estre emprisonné. Car ie sçay “
 bien, que se ie suis prins, ie suis mort. Si me vueil “
 vengier, telle est ma volenté. Ainsi disoit le “
 Roy, qui en alant & retournant, auoit haulte-
 ment escrié Espengne; en maudissant ses enne-
 miz, auecques lesquelz estoit Hue de Carualay,
 qui moult bien s'y porta. Et aussi fist Gautier
 Huet, qui plusieurs en occist. Et le Prince estoit
 demouré à l'estendart. Mais Chandos assailly les
 Espaignolz, & moult les fist verser de trait. A tât
 vint Bertran, & six cens hommes d'armes auec-
 ques lui, qui se meslerent en la bataille au Duc de
 Lanclastre, tellement, que des plus souffisans
 getterent par terre. Et quant leurs lances furent
 faillies, si allerent aux espoiz, & bonnes espées:
 & tellement se ferirent, que on leur fist place,
 comme à vn troppe de lyons, qui les verroit bien
 crester. Et se tenoient en telle ordonnance, que
 homme né de mere ne pouoit entrer en eulx.
 Bien les vit le Captal, & assez les capta. Mais il
 deffendi à ses gens, qu'ilz n'assemblassent point.

à eulx. Car ainsi comme il dist, les auoit veu à Becherel, passé auoit sept ans, & à Cocherel aussi, où il fu prins. Si vous dy, que en la bataille se cōtint moult bien le noble Bertran, & moult fierement s'y esproouua. Et aussi fist le Besgue de Villaines, où fu grant hardiesse. Le bon Mareschal d'Audrehem, & Guillaume Boitel, chacun s'y combati moult fort. Et Iehan de Chandos de l'autre lez se bouta entre les Espaignolz par grāt fierté. Maiz le Mareschal d'Espengne, qui moult estoit hardiz, vint ferir vn Escuier Chambellan de Chandos, nommé Ernoul de Magdalenc, d'un espoy tranchāt parmy le corps, tellemēt qu'il le passa tout oultre, & l'abati mort à terre. Dōt ledit Chandos fu moult courroucié & doulent, & fist moult fort assaillir ledit Mareschal de lances & de dardes, tellement qu'il fu abatu par terre. Et ilec eust esté occis & mort, quant le Roy Héry le secourut. Car à force de cheual déropi la presse. Et le cheual qu'il auoit pour le iour valoit mieulx pour la bataille, que nul argent quelconques. Tantost le releua à mont, & dist: Haa! gentil Mareschal, comme tu és hardi? Apres ce, fist reculer Chandos, & sa bataille, bien le trait d'un arc. Et pour certain, se tous les Espaignolz eussent esté de son courage, ne Prince, ne tous ses Barons, & parens ne se peussent estre vantez de vray, qu'ilz peussent auoir remis Pietre à la Seignourie. Dont vint le Prince à tref-grant effort, qui

qui faisoit sonner trompettes, challemies, grans trompes d'argent, qui faisoient si grant noise, que on n'y oyست pas Dieu tonner. ** moult vaillamment escartellée de France & d'Engleterre. Et de lez icelle estoit la banniere d'Espengne. Si fist le Prince approucher ses gens de la greigneur presse, & dist que la bataille ne seroit pas faillie sans luy, ne le Roy Pietre remis en possession d'Espengne, iusques à tant que autrement y eust feru d'espée. Et dist à ses gens: Menez moy où il a le plus de gent, c'est contre ceulx là de cheual, qui si se tiennent coy & ferrez. Je vueil combattre à eulx; & me lairront la place, se ie ne suis mort. Ainsi disoit le Prince, en qui auoit moult de fierté. Et se fist mener deuers les gens d'Espengne, qui moult estoient maint millier. Et auoit avecques soy le Roy Pietre, le Conte d'Ermeignac, le Sire d'Alebret, les Seneschaulx de Poitiers & de Bordeaux, le Sire de Mocident, le Cōte de l'Isle, & les Seigneurs de Pons, d'Auberoche, & de la Riolle, avecques Richart de Blayues. Et bien estoient six mille hommes d'armes tous gens d'elite, qui vindrent assaillir Espaignolz, qui estoient dix mille bien armez: & autres dix mille, qui estoient mis à part, pour eulx secourir se besoing en fust. Lors s'en ala le Roy Pietre deuers le Prince, & lui pria, qu'il lui pleust à lui octroier, qu'il commençast la meslée contre ceulx de son país. Car bié veoit, qu'ilz estoient

de Sebile, de Burs, & de Toulette, comme leurs bannieres le monstroient. Si leur vouloit illec monstrier la voulenté qu'il auoit à eulx, pourtant qu'ilz auoient icelles liurées à Henry son aduersaire. Adōc Pietre s'en ala à eulx, qui faisoit porter sa banniere plus hault que nulles des autres. Et se fery dedens eulx, comme tout forcené, en criant haultement; Filz à putain, vous m'avez dechassié de ma terre pour vn bastart. Mais vous en mourrez tous de mauuaise mort, & il en sera penduz à vn arbre. Lors broicha des esperons, pour aler ferir vn Cheualier Espagnol. Maiz quant il ot auisé la maniere du Roy, il ne l'eust pas attendu, pour tout l'or du monde: mais se mist à la fuitte deuers les autres Espagnolz. Aufquelz il dist: Foles gent, veez cy nostre droit Seigneur de loyal mariage: qui se combat à lui, il a bien le sens perdu. Et quant iceulx Espagnolz apperceurent Pietre, si lui tournerent le doz, & commencerent à fouyr iusques à vne riuere. Mais le Prince de Galles les fist enchacer & conuoier de bonnes lances, tant qu'il leur conuint baignier en la riuere, & yceulx noyer, qui ne porent tout boyre. Car leurs cheuaux alerent iusques au font. Et tant en noya sans venir à riué, que l'en peust bien cheuaucher par dessus les mors, que de dix mille n'en reuint pas mil, à port de salut. Et les autres dix mille, qui aidier leur deuoient, se retrairent selon le grauier. Et alerent

les aucuns d'eulx à sauueté dedens vn grant bois. Ainsy se deffrucherēt les Espaignolz. Et là fu vn bien gentil Cheualier Engloiz nommé Gautier Huet, qui ala bouter d'vn glaive les Espaignolz, qu'il vit en l'eauë. Tant que ce iour en fist mourir bien trente ou plus. Et leur disoit: Allez vous en filz à putain, vous ne valez rien. Et avecques lui estoit Hue de Carualay, & Iehan de Burs, qui ledit iour firent effondrer maint Espaignolz en l'eauë; & ceulx qui eschapper porent s'en fuyrent raidement à Thoulette, pour sauuer leurs vies. Et le bon Roy Henry, qui faisoit à doubter, demoura en la bataille, & n'auoit talent de foyr. Mais Bertran du Guesclin, à qui on auoit dit, comment les Espaignolz auoient noé, dist au Besgue de Villaines: Sire, or puet-on veoir comment les Espaignolz se sont portez. Car la greigneur bataille, qui plus faisoit à doubter, s'en est fouye, sans mettre en eulx aucune deffense. Et quant le Besgue l'entendi, si dist: Au deable puissent-ils aler. Car par eulx nous conuendra au iourduy souffrir grant honte. Faites partir le Roy Henry de la bataille, & mettre à garât pour sauueté de sa vie. Car se Pietre le puet tenir, il le fera mourir, & mener aux fourches. Et nous defendons tant que nous pourrons, afin que on ne le nous puis reprouuer, que nous soions pris laschement. Car ainçois que ie me rende, ie leur feray comparer. Et quant Bertran ot entendu le

Befgue, si se rompi la presse à force d'espée, tant qu'il trouua le Roy Henry, & le Marechal, qui avecques lui estoit. Dont print la resne de son cheual, & à force le lui tolli, & l'emmena hors de la bataille. Puis lui dist: Franc Roy, mettez vous à garant. Car vous gens vous ont tray. Car les vingt mille Espaignolz, que vous veistes n'agaires si bien armez, & si beau rengiez en deux batailles, s'en sont fuys l'vne moitié au bois, & l'autre moitié en la riuere, où ilz ont esté noiez. Et est vostre bataille perdue, ie le vous promets, & tout par le fait du fol Conte d'Ayne. Car qui m'eust voulu croifre, il n'en fust pas ainsi. Si vous vucillez sauuer, & ie vous en prie, ou tantost vous ferez pris de vostre ennemy. Et s'il vous tient, il vous fera mourir de villaine mort, comme il feroit vn autre murdrier. Si vous vous en alez tantost. Car il conuient que ainsi soit. Haa! dist le Roy, Cheualier loyal, & que feray-ie de vous, qui si vaillamment m'avez seruy; & puis si vous fauldroye, qui vous ay cy amené? Sire, dist Bertran, ne pensez point à moy. Car i'ay bien defferuy la mort, se Dieu le veult cōsentir. Mais ce n'avez vous pas. Car à tort avez perdu l'onheur de vostre heritage, que Pietre vous a toulu, se Dieu n'en a mercy. Lors dist le Roy Henry: Par Dieu, puis qu'il m'en fault aler, & que l'en m'a ainsi du tout failly, ie m'en yray maintenant vengier à ceste gent. Dont tray l'espée, qui estoit

garnie d'or, & se bouta és Engloiz de si grant force, qu'il rompi la presse. Et entour lui les abatoit à destre, & à senestre. Et ainsi comme tout desué perça les rens. Et Bertran, qui le regardoit, dist au Besgue de Villaines: Sire, vecy vn souffisant Roy, & bien digne de tenir vn puissant Roy-aume. Et Henry aherdi parmy le heaume vn Engloiz, qui le sieuoit, & le lui arracha du chief. puis s'en vint à Bertran, & lui dist: Prenez ce prisonnier, & en faites vostre vouloir. Je ne puis arrester pour plus faire. Alez vous en, noble Roy, le plus hardi de ce monde viuât. Je prie à Dieu tout puissant, qu'il vous vueille garentir; pour quoy Pietre, qui tant vous het, ne vous puist encombrer en chemin. Ainsi s'en party Henry, brochât de l'esperon; & avecques lui quatre Cheualiers, où il se fioit. Et moult estoit courroucié, & disoit: Aide Dieu, doubce Vierge Marie, que m'est-il auenu en ceste place? Or est perdu toute la terre, qui estoit gaaingnée. Donc appella l'un de ses Cheualiers, & lui cōmanda qu'il cheuauchast toute nuit hastiuement iusques à Thoulette, & deist à sa femme, que elle & sa compaignie s'en alassent tout droit pour garant à Trichemare. Et cil respōdi, qu'il en feroit voulétiers le message.

OR vous laisseray à parler de Henry iusques à vne autre foiz, & vous diray du residu de ses gens comment ilz furent desconfiz. Les Geneuois, qui estoient rengiez en bataille, ne tindrent nul cō-

uoy, neant plus que vne beste sauuage, quant elle est bien chassée. Mais les Espaignolz se tenoiēt tousiours derriere, & fuyoient comme font les brebiz, quant le leu les assault. Et la Cheualerie de France tenoient deuant eulx fierement & fermement leur banniere, & crioient Audrehe à haulte voix. Et moult s'y combatoit Bertran, & tous les aultres. N'y auoit nul qu'il n'y ferist. Lors y vint Chandos, qui bien y recongnut noz gens aux armes, & leur cria haultement, & par bonne voulenté: En l'onneur de Dieu rendez vous au Prince, ou tous mourrez à douleur. Et quant Bertran l'entendi, si rabaisa sa visiere, & fery vn Engloiz tellemēt, que à terre le trespucha. Maint Engloiz y tua le Besgue de Villaines, & aussi le noble Mareschal d'Audrehe abbati vne banniere deuant soy, & celui qui la portoit. Mais Espaignolz s'en fuirent tout à fait, & par leur faulte & faintise. Et fu la bataille desconfite sur le Roy Henry & ses gens. Car en fuyans les Engloiz tuoient iceulx Espaignolz par derriere. Et leur escrioit le Roy Pietre: Fausse gent, renoiez, mal vous estes armez encontre moy. Car tous en ferez occis à dueil & à tourmant. Lors s'en vint le Prince de Galles, & avecques lui le Duc de Lancastre, & leurs gens des plus notables tout droit à Bertran, le Besgue de Villaines, le Chastellain de Trie, & le bon Mareschal d'Audrehe. Et leur escria le Prince: Rendez vous, ou ie vous dy

bien, que vous ferez grant folie. Mais ce nonob-
 stant, ledit Bescue se cōbatoit tousiours moult
 fierement. Et le Prince escria derechief; Gentil
 Mareschal, & vous Bertran, rendez vous à moy,
 & ce sera vostre prouffit. Adonc Pietre se mist au
 deuât, & dist: Vee-cy mes ennemiz, par qui i'ay
 perduz mon Royaume. Si m'en vueil vengier
 presentement. Et quant Bertran l'entendi, si vint
 encontre lui, & lui donna vn tel cop de son es-
 pée sur l'escu, que à pou qu'il ne l'abati. Dont
 vint vn Cheualier, qui aherdy Bertran parmy le
 col, & lui dist qu'il se rendist, & que trop y auoit
 mis. Et quant Bertran apperçut entour soy ses
 gens tous prins & tuez, si dist: Le me rens au Prin-
 ce. Car c'est le plus hardi. Et ainsi fu prins ledit
 Bertran, le bon Mareschal, & ne sçay quans au-
 tres. Et quant Pietre le sot, si requist au Prince,
 qu'il lui donnaist Bertran pour son pesant d'ar-
 gent, ledit Mareschal aussi, & le Bescue de Vil-
 laines, pour en faire & accomplir toute sa vou-
 lenté. Et le Prince lui respondi: Je n'en feray riés.
 Car il n'appartient pas. Ilz se sont renduz à moy,
 sauues leurs vies, & sont mes prisonniers. Si en
 sauray bien ordener. Donc appella tout en riant
 le Captal, & lui chargea à garder Bertran. Auquel
 icellui Captal dist: Sire Bertran, or est le temps
 changié. Vous me pristés deuant Cocherel, & ie
 vous tiens maintenant. Lors respondi Bertran:
 Vous ne m'avez pas pris ne conquis à l'espée aussi

” comme ie fis vous. Parquoy i’ay vn point plus a-
” uant. Si vous dy, que tantost que ledit Bertran fu
prins, tout le demourant fu maté & desconfit. Et
y ot plusieurs Espaignolz occys, plusieurs noiez,
& aucuns qui eschapperent en vie. Donc deman-
da le Roy Piètre, où estoit le faux Henry, & que
moult doulent seroit, se on ne le trouuoit. Donc
commanda à ses gens, que ilz le querissent en
plusieurs lieux. Et eulx si firent. Mais gaire ne
demourerent en icelle queste, pour ce qu’ilz es-
toient tous affamez. Et s’en entrèrent dedés Na-
dres communément, grans & petiz auec Pietre,
& ilec trouuerent bien à mengier & à boyre, &
les tables toutes drecées. Mais le Prince demou-
ra sur les champs, où la bataille auoit esté: & fu-
rent apportez à lui & à ses gens plusieurs grans
viures de la ville dessusdite. Adonc le Captal dist
” à Bertran: Beau Sire, vous estes mon amy. Se vous
” me voulez iurer & promettre par la foy que vous
” deuez à la Fleur de Liz, que vous ne partirez
” point de nous, sans prendre congié bon & loial
” du Prince de Galles, à qui vous estes prisonnier,
” & que vous venrez auecques nous, ie ne vous
” mettray point en autre prison. Et Bertran dist:
” Ie le vous promets loiaulment ainsi. Et par Dieu
” ie ameroye plus estre mort, que mon serement
” eusse fausé ne rompu. Et autant vous en dy du
” Mareschal de France. Par foy, dist le Captal, ie
” vous en croy. Vostre lit sera fait de lez moy en

ma chambre. Icelle nuit se passerent ainsi. Et le landemain se misrent tous à chemin avecques le Roy Pietre, pour aler à Burs.

*Comment les citez de Burs, & de Toulette, & de Se-
bile, reuindrent au Roy Pietre. Et des conuenans dont
il failly au Prince depuis qu'il fu parti d'Espengne, &
entré ou Royaume de Nauarre.*

CHAPITRE XXVII.

AINSI cōme le Prince de Galles fu venu de-
uant la cité de Burs, & qu'il parloit de cer-
tains conuenās & promesses, que Pietre lui auoit
fais; l'Euesque de ladite cité, qui estoit grant
Clerc, & moult sages homs, estoit illec present,
& dist au Prince: Sire, ie le vous dy en confessiō, "
& par maniere que nulz ne le sache. Mais se Pie- "
tre auoit iuré sur le saint Sacrement, & tout quāt "
est & puet estre de Dieu, & de sa benoite mere, il "
s'en pariurera. Mais s'il iure par Mahom, pour "
riens n'en mentiroit. Et quant le Prince oyt l'E- "
uesque ainsi parler ** & ne s'en pot tenir. Puis "
dist, Li deables m'ont fait messer de lui. Car ie "
croy que ia bien ne m'en vëdra en la fin. Et pour "
certain non fist-il. Car tant de la faim comme du "
froit que il souffry en ce voyage, certaine mala-
die lui suruint, dont il deuint tout enflé: ne onc-
ques puis ne pot mengier pain par senté, ne plu-

fieurs autres aussi, qui avecques lui estoient. Et telz gens ne sont point à plaindre, qui veulent le pouure peuple exillier sàs cause, & souffrir mesaise; dont bien se peussent passer. Apres ce, le Prince appella Pietre, & lui dist: Par ma foy, les gens du pais d'Espengne se loent petitement de vous. Je suis icy venu pour vous aidier, & vaincre la bataille: & ay pris des meilleurs Cheualiers, si comme Bertran, le bon Mareschal, & le Besgue de Villaines, qui ne sont pas à oblier. Et y ay grâdement pené & traueillié & mon corps, & mes gens. Si conuiét que i'en soye satisfait & recompensez, & mes gens & soubdoyers payez de leurs gaiges, & deffraiez. Vous sauez bien, qu'il est en ma puissance de vous remettre au Royaume, lequel apres vostre decés doibt escheoir à moy & à mes hoirs, comme promis & octroyé le m'auez parvoz lettres seellées de vostre seal. Si vueil tout premierement, que vous vous accordez à voz gens, & apres vous gardez bien de periurer. Car par Dieu, ne par le saint Sepulcre, se ie pouoie aucunement sauoir, que vous vousissiez errer enuers moy, ne boisier vostre serment; estoie-ie en Engolesme, à Bordeaux, ou en Engleterre, si retourneroie-ie deuers vous garny de si grant gent, que vostre pais destruyeroie, & vous feroie morir de mauuaise mort; & vous deusse pourfuir iusques à la mer. Et se ainsi le conuenoit, ie feroie amener des viures si grant planté, que de

long temps n'en conuendroit nul acheter pour
 moy, ne pour mes gens. Sire, dist Pietre, ie ten-
 dray ce que ie vous ay promis, il n'en fault point
 doubter. Et encore feroie- ie plus, s'il vous plai-
 soit à le me commander. Ie vueil, dist le Prince,
 disner en celle ville, & donner à disner à tous les
 bourgeois & bourgoises; & mettre paix & accord
 entre vous & eulx: & le vous conuendra promet-
 tre & iurer à ma voulenté. Sire, dist-il, ie le fe-
 ray tref-volentiers. Puis dist à soy tout bas, que
 nul ne le pot oyr: Par la foy que ie doy, i'en pen-
 se ordener tellement, que vous ne autruy ne s'en
 pourra loer. Et pleust à Dieu, que ie tenisse la ta-
 ble que donnée vous ay, où est l'escharboucle
 luisant; i'amaïs en vostre salle ne le feriez leuer.
 Lors le Prince fist mander en ladite cité, que on
 le laissast entrer lui & ses gens. Et les citoyens l'o-
 ctroierent ainsi. Donc y entra ledit Prince avec
 moult noble Baronnie. Et les bourgoises vin-
 drent au deuant d'eulx, & se mistrent à genoulz
 sur la chaussée, plourans & lermoyans moult
 piteusement, en criant mercy au Roy Pietre, qui
 par grant desdaing les regardoit de trauers, &
 tout rougissoit. Mais le Prince le mena avecques
 lui à la mere Eglise, qui estoit fondée de Nostre
 Dame: & là oyrent la Messe sollempnelle. Et lors
 furent apportées par le Clergié sur vn autel plu-
 sieurs dignes reliques, que Challemaigne le Roy
 y laissa, quant il vint d'Espengne. Et y auoit du

corps Monsieur saint Iacques grant partie. Et lors iura Pietre en la presence du Prince, & la Baronnie, que à homme ne à femme il ne demanderoit riens quelconque, pour offense que faite eussent. Mais que iamais ilz ne mentissent leur foy enuers luy. Ainsi fu la paix confermée, & Pietre remis en la seignourie. Lequel donna moult noblement à disner au Prince, & à ses gés dedans le Palais de Burs, où ilz seiournerent, & furent ensemble huit iours en grant consolation.

V N iour s'en vint Pietre deuant le Prince, à qui il se humilioit moult par fainte, & faulx semblant, & lui dist: Sire la mercy de Dieu, & devous, vous m'avez fait secours bel & bon & puissant, tant que suis en possession de mon Royaume. Or ne vous puis paier ne satiffier à vostre voulenté, se ie n'ay ainçois finance. Et vous avez icy tresgrant foison gent, qui ne trouueront aucuns viures, ne garnisons. Car le pays est mengié & exilié. Si vous vouldroie supplier, qu'il vous plust à faire seurer & departir vous gens, & vous tenir où il vous plaira, & bon vous semblera. Et ie iray pourchassier le tresor, dont ie vous ay fait mention, & le vous enuoieray, qu'il ne s'en fauldra denier. Et par ainsi nous demourrons tousiours amis & compaignons. Quant le Prince l'entendi, si cuida que il deist vray, sans penser trayson. Si lui respondi, que tantost en auroit conseil.

Donc trait à vne part ſon frere de Lanclaſtre, le Conte d'Ermegnac, Iehan de Chandoz, le Cap-
 ptal de Buich, Hue de Carnalay, le Sire de Mou-
 cident, le Conte de Pennebroc, & pluſieurs au-
 tres. Et leur diſt: Seigneurs, vous veez & ſauez, „
 que nous ſommes icy en vn pays tout affamé, & „
 le Roy Pietre a ſa beſongne acheuée. Si nous „
 vueil donner congié par telle condition, que „
 nous yrons vers Nauarre, à Tudelle, ou ailleurs, „
 ſe bon nous ſemble: où nous trouuerons des vi- „
 ures & des vins bien plantureuſement. Et ledit „
 Pietre vendra à nous à certaine iournée, & ap- „
 portera en monnoye d'or la finance qui nous eſt „
 promiſe, & deuë pour nos gaiges & ſoubdées. Si „
 me donnez certain conſeil ſur ce. Et ilz reſ- „
 pondirent, que ſa vouldenté en deuoit bien eſtre
 accordée. Et en concluſion ilz louerent & con-
 ſeillerent le partement. Car grant enuie auoit de
 retourner chacun en ſon lieu, l'vn pour veir ſa
 femme, l'autre pour veir ſa mere, & auſſi pour
 eulx reposer & aiſier. Et moult auoit chacun
 d'eulx la char penée & traueilliée de faim, de
 froit, & de ſoiſ. Adonc le Prince & les plus no-
 bles Barons allerent donner la reſponſe audit
 Pietre, & lui octroierent ſa requeſte. Puis firent
 chargier leur harnoiz & vitaille à charroy; & à
 Bertran baillerent bon cheual, au Marſchal
 d'Audrehem, & au Beſgue de Villaines auſſi. Biē
 furent ordonnez tous les priſonniers. Mais Ber-

tran ne se baiſſoit de riens quelconques, ne n'en
 laiſſoit à boire ne à mengier. Car il ne varioit
 point, ne changoit ſon courage. Souuent mer-
 cioit noſtre Seigneur, & lui ſupplioit, qu'il lui
 pleuſt donner pouoir de ſoy vengier. Car il n'o-
 ſoit parler au Prince, ne lui requerre qu'il fuſt
 mis à finance, pour ce que ledit Prince auoit le
 cuer ſi gros encōtre lui. Mais Hue de Carualay,
 „ qui moult amoit Bertran, diſt au Prince: Sire,
 „ vouſtenez Bertran, qui eſt vn loyal Cheualier,
 „ mais n'eſt pas riches homs pour payer grant fi-
 „ nance. Pourquoi il auroit bien meſtier de grace.
 „ Diſt le Prince, Or leſſiez ce eſter. Ie n'ay que fai-
 „ re du ſien. Mais mauſgré ſoy lui feray alongier ſa
 „ vie. Car ſ'il eſtoit deliuré, il voudroit touſdiz
 „ guerrier, & eſtre en bataille. Et ie l'en vueil de-
 „ porter, & faire viure en paix. Aſſez lui feray don-
 „ ner à boire & à mengier. Et quant ledit Hue l'en-
 „ tendi, ſi fu tref-courroucié, & diſt vn ſoir apres
 ſoupper à Bertran, qu'il ne pouoit trouuer voye
 de ſa deliurance; & la reſponſe que le Prince lui
 auoit faite. Et Bertran reſpondi, qu'il en leſſe-
 roit à Dieu cōuenir, qui ouurier eſtoit. Car auſſi
 bien le pouoit-il deliurer comme empescher. Si
 vous dy, que quant le Prince fu venu à Nauarre,
 à Tudelle, & ou pays d'enuiron, il ne trouua nulz
 viures. Car touz auoient eſté conquieuilliz, Par-
 quoy ſes gens & lui meſmes furent touz affamez:
 en attendant la venüe du Roy Pietre, qui de cō-

uenans lui failly. Car il n'y ala, ny enuoya autre pour lui. Et quant le Prince apparut sa faulte, si le tint pour faulx, & pour traictour. Et moult se repent de ce que aidé lui auoit. Donc vult retourner sur lui, pour soy vengier. Mais les gens le lui desconseillerent, en disant, que s'il retournoit lors, son peuple seroit perdu & destruit: mais alast-on à Bordeaux faire garnisons pour cinq ou six mois à viure, & puis pourroit-on retourner en la saison prouffitable. De ce fule Prince d'accord. Et se mist au chemin pour aller tout droit à Bordeaux. Mais moult menaçoit Pietre de lui toulir la teste à son retour. Et ledit Pietre s'envint deuât la cité de Toulette, & mada aux citoyens, qu'ilz se rendissent. De eulx rendre furent les aucuns d'accort, & les autres non. Mais en fin furent tous d'accort, qu'ilz se rendroient. Et parmi ce Pietre leur pardonna leur meffait. Mais depuis en fist-il telle & si grant vengeance, que ceulx qui ainsi s'estoient rendus s'en repentirent moult. Et apres ce que Toulette fu ainsi rendue & accordée, s'en vint deuant Sebile la grant, où les gens estoient moult desconfortez. Car moult doubtoient la cruaulté de Pietre. Toutesfoiz allerent au deuant de lui les bourgeois de la ville, Chrestiens, Iuifs, & Sarrafins: & crioient tous moult piteusement mercy. Et fist-on grant feste contre sa venuë. Et faisoient iouer tous les Menestreux de plusieurs instruments; &

galées peintes & ouurées mener sur la chaussée sur roës. Et briefmēt on lui faisoit tout honneur & solempnité que l'en pouoit faire. Et se r'alierent à lui tous les Cheualiers nobles du pays d'Espengne dulez deuers Galice. Et avec iceulx Ferrant de Castre au mandement dudit Pietre vint. Duquel ie lesseray à parler presentement, & vous diray du Roy Henry.

Comment le Roy Henry party de Trichemare lui troiesiesme, vestus en tapinages comme pelerins, & alla deuers le Roy d'Arragon, qui ne le recognoissoit, quant se fist à lui congnoistre. Auquel il porta grant honneur, & presenta deux cens hommes d'armes infiques à trois mois.

CHAPITRE XXVIII.

EN ce temps estoit le Roy Henry à Trichemare avec sa femme, lequel en vn certain iour recommanda sa terre à garder à l'Archeuesque de Burs, qui lui promist de le seruir loyaument en ladite garde. Lors ledit Henry se vesty en habit de pelerin, & prist congié de la Royne, qui moult tendrement ploura. Puis se mist à la voye lui troiesiesme sans plus. Car moult se doubtoit de trayson, & il auoit bien cause. Tant chemina qu'il vint à Perpegnant en Arragon, sans ce qu'il fust aucunement recongneuz. Et tantost
vint

vint à lui vn Arragonnois bon Cheualier, qui lui dist & demanda, s'il venoit de saint Iacques le Baron. Et il lui respondi, que oyl. Puis enquist où estoit le Roy Henry, & comment lui estoit. Et il lui dist, à Trichemare, comme entendu auoit, & qu'il auoit perdu tout l'eritage d'Espagne. Car ses hommes lui auoiét failly. Dist l'Arragonnois. Ilz ne vallent denier. Car ilz ont fausement tray leur droit Seigneur. Parquoy il a perdu maint bon Cheualier loyal. Dôc pria que Dieu voulzist conseillier le bon Roy Henry, & aidier à Bertran du Guesclin, & au bon Marechal. Et lui demanda se eulx estoient prisonniers, & le Besgue de Villaines. Et il lui respondi, que oyl, & qu'il le sauoit de certain. Dist le Cheualier d'Arragon: Je croy que le Prince de Galles & ses plus prouchains parens & amis se repentét maintenant, qui sont venuz aidier au Roy Pietre à l'encontre de Henry. Par ma foy, dist Henry, ie croy qu'il n'a receu du Roy ne obole ne denier. Lors dist l'Arragonnois, se ilz auoient besoing de mengier, il les merroit au Palais, & leur donnoit du meilleur vin en l'onneur de Dieu & de saint Iacques, qui voulzissent enuoyer recourance au bon Roy Henry. Lequel dist, que ce faisoit à mercier, & que voulentiers & en bon gré le prendroient. Adonc icellui Cheualier les mena au Palais, & les fit asseoir à disner, en telle place que le Roy d'Arragon les veoit bien de sa

table. Lequel enuoya presenter audit Henry son plat & son mez. Lequel s'en vint apertement deuers lui, & le salua. Et icelui Roy, qui point ne le recognoissoit, n'auisa lui aucunement. Mais lui
„ demanda; Pelerin, où voulez vous aler? Et Henry lui dist, à Paris: & qu'il estoit sergent d'armes
„ du Roy. Et le Roy lui dist, Veuillez moy re-
„ mander à lui. Et ledit Henry lui dist: J'ay à par-
„ ler à vous secretement à part. Ledit Roy respon-
di, qu'il le vouloit. Adonc s'ala acouter sur vne fenestre. Et Henry se vint encliner deuant lui, &
„ puis lui dist: Haa! noble Roy, ie ne me puis ne
„ me vueil plus celer enuers vous. Le suis Henry,
„ que tant foliez amer, le pouure Roy d'Espan-
„ gne, qui a tout perdu, & n'a mais riens. Et lors le
Roy l'ala releuer. Et pourtant qu'il lui desplai-
soit, que autre honneur ne lui auoit faite, lui de-
manda pourquoy il ne l'auoit plustost dit. Et il
lui respondi, que bien auoit cause. Mais qu'il a-
uoit à lui si grant affinité, qu'il l'auoit meu de
son estat descourir. Et dist, qu'il alloit deuers le
saint Pere, & aussi deuers le bon Duc d'Aniou,
pour auoir secours. Et le Roy d'Arragon lui de-
manda lors, où estoit la Royne. Et il lui respon-
di, où il l'auoit laissiée, & comment il auoit or-
dené, que le siege seroit mis deuant Toulette lui
retourné. Dist le Roy d'Arragon, ie vous aide-
ray à vostre retour de deux cents hommes d'ar-
mes iusques à trois mois tous entiers, & sans y

riens despendre du vostre. Et le Roy Henry l'en mercia, en disant, que de tel amy lui deuoit souuenir.

Comment le Roy Henry ala oudit estat à Bordeaux veoir Bertran du Guesclin, qui y estoit en prison, & parla à lui. Mais à fin, qu'il ne fu accusé au Prince de Galles.

CHAPITRE XXIX.

LORS prist congié le Roy Henry du Roy d'Arragon, & se mist à la voye oudit estat, l'escharpe au col, & le bourdon en la main. Et dist, qu'il yroit veoir à Bordeaux Bertran du Guesclin, le Besgue de Villaines, & le Marechal d'Audrehem. Mais moult lui desloyerent ses gens, & disoient que ce ne seroit pas sens à lui. Car se il estoit par aucune auenture apperceuz, neant seroit de sa vie. Mais nonobstant leur deslouement, il iura & afferma, qu'il yroit, s'il plairoit à dieu. Et si fist-il. Et y entra le iour d'une Scésion. Et se herberga en vn hostel, où il souppa, & iut la nuit en grant doubte. Et ceulx, qui auecques lui estoient, voulzissent bien auoir esté ailleurs. Toute ladite nuit pensa, comment il peust parler à Bertran. Et le landemain se vesti en son premier estat, sans soy noblement parer. Puis s'en ala ou Moustier nostre Dame pour oyr Mes-

fe, & les gens avecques lui. Et furent moult regardés de plusieurs Cheualiers & Escuiers, qui en la bataille de Nadres auoient esté, les aucuns d'iceulx avec Bertran, & les autres de l'autre lez. Lesquelz apres ladite Messe vindrent deuers le Roy Henry & ses compagnons, & leur dirent: « Haa! pelerins, vous venez d'un pays, où nous auons eue pouure encontre. Par ma foy, dist Henry, i'ay esté en la place, où le fait auint, dont vous parlez. Adonc recognut illec un Escuier, qu'il auoit veu plusieurs foiz armez avec Bertran. Si le tira à part, & lui demanda comme le faisoit ledit Bertran, & les autres Barons, & s'ilz estoient point mis à finance. Et ledit Escuier lui respondi, que ledit Marechal & le Besgue auoient des amis plusieurs, & fineroient bien, ce pensoit. Et pauvres Cheualiers & Escuiers, qui prison tenoient, iroient pourchasser leurs reançons tout à pié, ou mal montez. Mais Bertran y demourroit toujours, ce lui auoit-on compté. Car on n'osoit demander ne requerre au Prince sa deliurace pour argent. Dist le Roy Henry à cellui Escuier: Pourroit-on parler à lui par nul tour? Qui estes vous, dist-il, qui le demandez? Estes vous de la Duchie de Bretagne? Adonc Henry le mena en son hostel pour parler à lui en priué, & plus secretemēt. Et lui dist: Mon amy, ie vous ay plusieurs foiz veu avec Bertran. Si vous prie, que vous celez ce que ie vous diray. I'ay grant destresse & cour-

roux de cuer, qui cy m'ot amené. Et vous dy, que ie suis Roy d'Espengne, le celer n'y vault riens. Adonc ledit Escuier lui supplia de aler ou sien hostel pour parler à lui plus secretement. Et le Roy lui octroya. Adonc icellui Escuier l'y mena, & puiſt diſt à la ſiène hoſteſſe: Dame, vecy pelerins de mon païs, qui ſont tref-bonne gent. Si vous prie, que vous me faſſiez trayre du meilleur vin tantost. Et elle diſt, que ſi feroit-elle. Lors ſe aſſirent à table, & donc le Roy Henry ſi demanda derechief, comment il peuſt parler à Bertran. Et ledit Escuier lui reſpondi, que bien brief le ſauroit, & qu'il yroit parler à lui ſ'il pouoit, par quelque voye. Adonc ſe miſt à chemin, tant qu'il vint à l'uis de la chambre Bertran, où il trouua le portier, auquel il diſt: Sire, ie ſuis vn priſonnier mis à finance, & me conuient aler querre ma réçon. Si vouldroie bien, s'il vous plaſoit, parler à Monsieur Bertran, pour ſauoir ſe il vouldroit riens mander en Bretagne. Et icellui portier lui reſpondi: Bien y parlerez, maiz que vous me donnez bonnes chaufſes. Il ne vous cōuient fors que demander à Bertran. Car c'eſt vn homme, qui ne ſait riens reſſuſer. Et pleuſt à Dieu, que iamais n'iſiſt de priſon, & ie le deuſſe garder tout mō temps! Sire, diſt l'Escuier, chacun ne le vouldroit pas. Mais plaſe vous moy leſſier parler à lui; & ie feray tant que vous m'en ſaurez gré au retour. Or alez, diſt le portier. Car ſe vous ne le

„ faites, ie ne vous lairay pas entrer ceans vn autre
„ foiz. Et lors entra en ladite chambre, & s'enclina
„ deuant Bertran. Et quant il l'aperceut, si l'appel-
„ la moult doubcement, & lui dist: Mon amy, que
„ venez vous cy faire? Bien pense, que vous venez
„ querre de l'argent, dont à present n'ay point.
„ Mais s'il plaist à Dieu, que ie puisse yssir de cy, ie
„ aideray & conforteray vous & tous mes autres
„ seruiteurs: & vous remerray au plaisir de Dieu
„ en place, où nous trouuerons recourance. Sire,
„ dist l'Escuier, qui sagement sauoit parler, ie suis
„ venu deuers vous pour vne autre besongne. Le
„ Roy Henry est en ceste ville, qui m'enuoye de-
„ uers vous. Et quant Bertran l'oy, si leua la chiere,
„ & dist que grant folie auoit en pensée ledit Roy.
„ Car se le Prince sauoit sa venue, il estoit perdu
„ sans remede. Et d'autre part, il ne sauoit com-
„ ment parler à lui. Et ledit Escuier dist à Bertran:
„ Le sçay bien, qui voudra donner largement au
„ portier, il le lairra entrer ens. Et Bertran dist, que
„ point d'argent n'auoit: mais il enuoieroit icellui
„ portier en la ville deuers vn Lombart, qui lui fai-
„ soit sa finance. Adonc appella ledit portier, qui
„ volentiers y vint, prest de faire son plaisir, pour
„ le prouffit qu'il en attédoit auoir. Et lui dist Ber-
„ tran: Amis, i'ay mestier de vous. Il y a en ceste
„ ville vn pelerin, que i'ay moult chier. Car il est
„ mon bourgeois, & mon homme. Lequel vient de
„ prier le bon Baron saint Iacques. Le lui donnasse

voulentiers à mengier ceans. Mais ie n'ay point
 d'argent pour le festoier. Toutesfoiz il y a en ce-
 ste ville vn Lombart, qui ne me fauldra pas, ce
 pense-ie. Vous yrez de lez lui, & porterez de moy
 certaines enseignes. Si lui direz, qu'il m'enuoie
 quatre cens florins, dont vous aurez cent à vo-
 stre retour; afin que ie vous tienne loial, secret, &
 sans point varier. A ce fu ledit porteur d'accort,
 disant que bien auoit besoing d'un tel prison-
 nier. Lors ala audit Lombart, qui lui deliura la-
 dite somme, qu'il apporta à Bertran, lequel lui
 en bailla cent florins, ainsi comme promis lui a-
 uoit. Tantoist le disner fu appresté. Et entra leens
 le Roy Henry aussi comme à heure de midy. Et
 s'entre-acolerent il & Bertran, & puis parlerent
 ensemble. Et lui compta Henry, comment il a-
 loit deuers le saint Pere, & par deuers Monsieur
 le Duc d'Aniou. Et Bertran lui pria, qu'il le re-
 commandast humblement à eulx. Et par espe-
 cial dist à Monsieur d'Aniou, qu'il ne depriast
 aucunement au Prince pour la deliurance dudit
 Bertran, ne ne lui enuoiaist maille ne denier. Car
 le Prince estoit le plus orgueilleux, qui oncques
 fu nez de merc. Car oncques pour priere ne s'e-
 stoit voulu amolir. Mais nonobstant ce, ledit
 Bertran esperoit vne foiz à auoir deliurance.
 Lors vint l'ostesse dudit Bertran, qui estoit vail-
 lant Dame & loial, & luy dist: Monsieur, venez
 vous seoir quant il vous plaira, tout est prest, &

serrez bien seruiz. Adonc s'alerent asseoir, & moult largement furent ordonnez de viande, & de bons vins. Entretandiz le portier dessusdit, qui son propos auoit mué, appella sa femme à part, & lui dist: Dame, i'ay grant souspeçon, & me doubte, que icellui pellerin ne pourchasse aucune trayson. Et pour ce ie en vueil aler auertir le Prince, afin qu'il enuoie enquerir de son fait. On prent bien tel argent, qui tourne à confusio. Et quant la Dame l'entendi, si ne sonna mot; mais tantost en vint accointier Bertran, en lui disant, qu'il fust sur sa garde, & que son mary le vouloit aler accuser deuers le Prince. Quant le dit Bertran l'entendi, qui auoit le cuer hardi comme vn droit lion, si s'en vint par grant maltalent deuers le dit portier: & lui donna tel cop d'vn baston, qu'il le fist aler à genoulx. Puis lui toli les clefs, & ouury l'uis. Si mist dehors le Roy Henry, & les siens, ausquelz il donna congie. Lors s'en partirent, & l'escuier avec eulx, qui là les auoit amenez. Et Bertran referma l'uis vistemment apres eulx, & retourna au portier, qu'il auoit tres-bien enfermé en vne chambre, & le baty si bien d'vn baston, qu'il ne fu gary de huitaine. Et se ne fust son Chambellan, il l'eust tué tout mort. Puis lui dist Bertran: Traitre, Dieu vous puist crauāter. Le pelerin, qui s'en va, si estoit mon parent, & lui donnois à boire de mon vin liement, & par bonne amour. Et pour lui festoier, vous ay donné

donné cent flourins de mon or: & puis si le vou-
lez faussement trair. le say bien, que se on l'eust
rauisé, il eust eu detresse de prison: & sçay de cer-
tain, que son partement en fust retardé. Tant le
demena, que par belles parolles, comme de fait,
icellui portier fu du tout à son commandement.
Mais à tant vous le fferay de Bertran.

*Comment le Roy Henry ala pour auoir secours deuers
Monsieur le Duc d'Aniou, qui lui donna toute sa
vesselle d'or & d'argent, & lui ayda de certain nom-
bre de tres-bonnes gens d'armes à mener en Espe-
gne.*

CHAPITRE XXX.

SI vous dy, que quant le Roy Henry se fu par-
ti de ladite ville de Bordeaux, il changa son
habit, & s'en ala par le país de Languedoc, ius-
ques à tant qu'il vint à Besiers, où il trouua vn
gentil Cheualier frere au Besgue de Villaines:
lequel assez tost le recognut, quant vn petit l'ot
regardé. Puis se vint encliner deuant lui, & lui
presenta son corps & son auoir, apres ce qu'ilz se
furent entresaluez, & que le Roy Henry lui ot
compté son fait & estat. Et l'ordonna icellui Che-
ualier à son pouoir le mieulx qu'il pot. Puis le
conuoya de ladite ville de Besiers iusques à Vil-
leneufue lez Auignon, où le Roy Henry trouua

Monſieur le Duc d'Aniou en ſa Chappelle. Si
oyrent eulx la Meſſe enſemble. Et apres ledit ſer-
uice, ledit Monſieur le Duc emmena icelui Roy
en ſa chambre, & ſ'aſſirent eulx deux ſur vn lit.
Ilec lui compta icelui Roy de mot à aultre le
meſchief & ennuy qu'il auoit eu par le Prince de
" Galles, & ſes gens. Par ma foy, diſt le Duc, nous
" ſauons de certain, que le Prince ne nous ayme
" point. Son pere a long temps guerrié & traueil-
" lié le Royaume de France à tort & ſans cauſe. On
" le ſcet bien, mais dure fortune l'a ſouſtenu con-
" tre nous. Car ceulx qui nous deuſſent auoir ai-
" dié, nous ont tourné le dos, nous ne ſauons com-
" ment, fors que par trayſon, dont maintes gens
" ſont ſourpris. Or eſt ainſi, que le Roy Iehan no-
" ſtre trefchier Sire & pere fiſt vne paix avecques
" noz deſſusdiz ennemiz aduerſaires: laquelle, ſi
" comme ie croy, ne dura pas longuement. Car
" c'eſt paix nourrie en maltalent, en orgueil, & en
" conuoitiſe. Et auſſi le Prince eſt indigné enuers
" nous, comme tref-orgueilleux qu'il eſt: pour ce
" que nous voulons voſtre bien, & que noz gens
" ont eſté avecques vous, & vous ont aidé, c'eſt
" aſſauoir Bertran du Gueſclin, le bon Mareſchal,
" & pluſieurs autres. Si ſommes moult doulens de
" voſtre deſtourbier. Mais ſ'il plaift à Dieu, vous
" pourrez bien auoir mieux. Et ſe nous y pouons
" mettre aucun remede, nous vous ferons ſecours
" & aide aſſez prouchain. Et lors icelui Roy lui en

rendi grans mercis. Puis alerent disner liément ensemble. Et fist le Duc de tel appareil, & si noble disner, comme se le Roy de France son frere y eust esté en sa propre personne. Et y auoit de riche vesselle d'or & d'argent, si grant planté, que tous ceulx d'environ estoient merueilliez du regarder. Et mesmes icelui Roy se merueilloit moult, dont cel auoir venoit si abondamment. Moult furent bien seruiz de plusieurs viâdes. Mais ainçois qu'ilz fussent desseruiz, mondit Seigneur le Duc dist au Roy: Noble Roy, ie vous „ donne de commencement à vostre bien venue „ toute la vesselle d'or & d'argent, dont nous auôs „ esté seruiz. De ce don fu Henry ioyeux. Car be- „ soing en auoit quant alors. Si en mercia moult le Duc. Puis monterent à cheual, quant il fu temps, pour aler vers le Palais du Pape, qui est bel, fort, & plaissant. Tant cheuaucherent, qu'ilz furent venuz vers le Palais. Et adonc estoit le Pape en Consistoire, lequel quant il sot la venue de ces deux Seigneurs, enuoya au deuant d'eulx plusieurs Archeuesques, & Euesques, & autres Prelaz & Clers. Au deuant desquelz aloient aussi plusieurs sergens d'armes; lesquelz menerent les dessusdiz Monsieur le Duc & Roy Henry en la châbre du Pape eulx entretenants main à main. Si saluerent le Pape, qui leur dist; Bien-veignez „ enfans. Et leur dôna sa beneïçon. Mais de ce que „ là endroit fu dit entr'eulx ne saurez riens par

moy. Mais vueil retourner à Bertran, & à ses cōpaignons, qui estoient prisonniers à Bordeaux.

Comment Messire Ernoul d'Andrehem Mareschal de France & le Besgue de Villaines furent deliurez de prison, où le Prince de Galles les auoit tenuz à Bordeaux. Et du retour que icellui Besgue fist en Espenigne avec ledit Henry, par l'ordonnance de Monseigneur d'Aniou.

CHAPITRE XXXI.

OV temps dessus dit, auint en vn certain iour, que le Prince de Galles māda à venir deuant soy le Besgue de Villaines, par le moyen des amis, que icelui Besgue auoit à la Cour. Lequel y vint, & s'enclina en le saluāt, & ceulx d'environ lui. Et là estoient les deux Seigneurs de Clifton & d'Alembret, Iehan de Chados, Hue de Carnalay, & plusieurs autres Cheualiers & Escuyers. Et quant le Prince vit le Besgue, il l'appella en disant: Venez-ça, estes vous icelui Besgue, qui tant auez greuez & traucilliez noz gens? I'ay maintes fois maudit l'eure, que vous fustes oncques nez. Et le Besgues, qui estoit faiges & bien aduisez, lui respondi: Sire, ie suis vn petit Cheualier, vous le sauez bien, & n'ay pas force ne puissance de vous greuer. Si me poise, que sans raison vous plaingnez de moy. I'ay seruy le Roy de France mō

droit Seigneur & aduré, de tel petit pouoir com-
 me i'ay. Et pour certain se ie eusse peu, ie vous
 eusse volentiers greué, pour effaucier l'estat de
 mōdit Seigneur, ainsi comme tout preudomme
 doit faire. Beau Sire, dist le Prince, vous parlez
 moult sagement. Et se les bons Roys Philippe &
 Iehan son filz derrainement, trespassee eussent eu
 planté de Cheualiers en leurs temps, comme telz
 troist tiens- ie enfermez ceans en prison, ia le Roy
 Edouart mon pere n'eust passee la mer pour ve-
 nir en France: mais y eust eu paix & amour entre
 les deux Roys. Et lors icelui Prince mist tantost
 à finance icelui Besgue, & le Mareschal d'Audre-
 hem. Mais Bertran demoura tout seul en prison,
 iusques à vn certain temps apres. Et ledit Besgue
 apres sa deliurace s'en ala tout droit en Auignō,
 où il trouua le Duc d'Aniou, qui grant honneur
 lui fist, & lui donna maint beau don. Adonc y
 ot vn certain parlemēt fait pour le voyage d'Es-
 pengne, & prinst le Duc plusieurs soubdoyers à
 gages, qu'il enuoya avecques ledit Roy Henry,
 & icelui Besgue. Lequel Roy à tout le plus de gēs
 qu'il pot assembler, vint à l'entrée d'Espengne,
 & mist le siege deuant la ville de Salamanque.

*Comment Sallemarque & Madric villes fermées en
Espengne se rendirent au Roy Henry tant par amour
comme par assault, & du siege qu'il mist deuant la ci-
té de Toulette, qui moult longuement y dura.*

CHAPITRE XXXII.

A PRESCE que le Roy Henry fu venu en Es-
pengne, il mist le siege deuant la ville de
Salemanque, qui estoit moult forte; & fist si fort
assaillir, que icelle ville se rendi à son plaisir.
Tantost enuoya vn message deuers la Roynne sa
femme, qui estoit à Borge, & lui escriui de son
estat la certaineté. Et quant elle l'oy, le cuer lui
souleua de ioye, & moult en loüoit nostre Sei-
gneur, & Monsieur d'Aniou, pour lequel elle
prioit. Car moult les auoit resconfortez. Adonc
manda la Dame tous ceulx, qui lui estoient obeyf-
sans, & y vint l'Archeuesque à banniere desplo-
iée. Et adonc icelle Dame manda par ses lettres à
ceulx de Toulette, que tantost se rendissent au
Roy Henry leur Seigneur: & se point detenoient,
tous feroient mors honteusement. Mais vn Cha-
stellain, qui le chastel gardoit de par le Roy Pie-
tre, assembla les bourgeois de la cité, & bien leur
dist & iura, que s'il y auoit nés vn, qui se tournast
en aliance du Roy Henry, ne qui donnast à lui
conseil fauorable, qu'il le feroit pendre aux cre-

neaulx, voyants tous les autres. Adonc iurerent & promistrent communément petiz & grans, qu'ilz ne se rendront ne pour mort, ne pour vie: ainçois auront eulx mengié la char de leurs cheuaulx. Et ledit Chastellain auitailla son chastel de plusieurs viures largement. Et tantost fot le dit Henry la responce de ceulx de Toulette, & comment ilz estoient rebelles enuers lui. Et adóc iura le Roy par sa foy & serment, que ainçois il tédroit le siege toute l'année entiere, que ladite cité ne fust prise & affamée. En ce contemple se rendi la ville de Madric au Roy Henry, lequel assemblea les gés du plat pais, & au Besgue de Villaines bailla son auant-garde à mener. Et adonc par conseil s'en vint deuant Toulette, & demanda cité à auoir, laquelle lui fu refusée par ledit Chastellain, qui Espagnol estoit. Et adonc le Roy Henry iura le siege à tousiours sa vie durât, & que iamais n'en partiroit se le Roy Pietre ne venoit deuant: & quant il y seroit ores venu, si ne mouueroit-il, s'il n'estoit ainçois desconfit par bataille. Adóc le Besgue ordena vn siege par delà la riuiera, au lez deuers Cordes, où les forests estoient; dont il fist trancher plusieurs arbres, pour enfermer lui & ses gens, mais que sans plus les chemins, par où les viures leur deuoient venir. Lequel Besgue auoit avecques soy le bastart de Bierne, Regnault de Limousin, Thomas Pynel, qui bonnes gens auoit. Et par deça l'eauë le

Roy mist vn autre siege, lequel auoit avecques soy Pietre Ferrant, le Conte de Gayrion, le Conte d'Ausenne frere dudit Henry, le Conte dam Pietre Goufaille, Pietre de Sarmonthe, le Maistre de saint Iacques, & l'Archeuesque de Foulette, qui icelle cité auoient delessiee pour l'amour du Roy Henry, qui moult longuement y tint le siege & par froit & par chaut, tant que de dedens furent touz affamez, & mégoient les chars de leurs cheuaulx. Et moururent par rage de faim Iuifs & Sarrafins, plus de trente mille. Et quant ilz virent ce, si enuoyerent au Roy Pietre pour auoir secours. Lequel leur mada, qu'ilz se tenissent bien comme bonne gent, & que prouchainemēt l'auroiet tel que Héry feroit cōbatu & getté hors de son pais: & que icelui Pietre vouloit aler en Grenade & en Belmarin, pour auoir secours des Roys d'iceulx pais, ausquelz il se alieroit. Et en ramerra avecques soy par deça la mer tous les Sarrafins dont il pourra finer. Mais cy endroit vo⁹ lairray de lui iusques à vne autre foiz, & vous parleray de Monsieur Bertran.

Comment

Comment Bertran se mist à finance à cent mille doubles d'or, que le Prince amodera à soixante mille, dont la Princesse lui donna dix mille. Et le residu deuoit payer à certain iour, ou retourner en prison à Bordeaux: durant lequel temps il ne se pouoit armer.

CHAPITRE XXXIII.

VN iour estoit le Prince de Galles leué de son disner, & entré en chambre de retrait avecques ses Barons, lesquelz auoient esté seruiz de vin & d'espices. Si commencierent à parler de plusieurs beaux faiz d'armes, d'amours, de batailles, & de prisons: & comme saint Loys pour sauuer son ame fu prins en Thunes, où il fu rachepeté de fin or pesant en balance. Tant que le Prince dist, qui ne s'en sceut garder: Puis que vn bon Cheualier esprouué en bataille est pris en bon fait d'armes, & qu'il s'est rendu, & iuré à tenir prison; il ne s'en doit partir nullement sans le congié de son maistre. Et aussi on ne lui doit pas tant demander du sien, qu'il ne se puist vne autrefoiz armer. Quant le Sire de Lebret entendit ceste parolle, si la commença à noter, & lui dist: Noble Sire, ne vous vueillez courroucier enuers moy, se ie vous relate les paroles que i'ay oy dire de vous en vostre absence. Par ma foy, dist le Prince, ie deuroye pou amer aucun mien homme

„ seant à ma table, se il ouyoit dire aucune parolle
„ contre mon honneur, & il ne m'en auifast. Sire,
„ dist icelui de Lebret, on dit que vous tenez en
„ vostre prison vn Cheualier, dont ie sçay bien le
„ nom, lequel vous n'osez deliurer. C'est veoir, dist
„ Oliuier de Cliçon, ie en ay oy parler. Adonc iura
le Prince, & se vanta, qu'il ne sauoit Cheualier
ou monde, se son prisonnier fust, qu'il ne le les-
fast bien finer pour son auoir. Et cilz de Lebret
„ commença à dire: Comment obliez-vous donc
„ Bertran du Guesclin, qu'il ne s'en puet aler? Et
quant le Prince l'entendi, si lui changa coleur.
Et fu si tempté d'orgueil, d'ire, & de desdaing,
que par despit commanda que Bertran lui fust a-
mené; auquel il vouloit acorder, en despit de
tous ceulx qui parlé en auoient, & qu'il ne paye-
roit réçon, fors que il meismes se voudroit tau-
xer. Donc y alerent certains Cheualiers, lesquelz
trouuerent Bertran, qui pour foy desduire, &
oblier son ennuy, parloit à son Chambellan.
Lesquelz Cheualiers le saluerent. Et Bertran se
leua encontre eulx, qui beau semblant leur mon-
stra, en disant qu'ilz fussent les tres-bien venuz.
Puis commanda à son dit Chambellan, qu'il ap-
portast du vin. Et iceulx Cheualiers respondirēt,
qu'il appartenoit bien qu'ilz eussent le vin grant,
bon, & puissant. Car bonnes nouuelles, ioyeuses,
& plaifans lui apportoint de bon cuer, & de lié.
Adonc l'un d'iceulx Cheualiers, qui estoit sages

& discret, lui dist, Que le Prince le mandoit à a-
 ler deuers foy, & pensoit qu'il seroit ordené &
 mis à rençon, par l'ayde & moien des amis qu'il
 auoit à Court, lesquelz plusieurs estoient. Que
 dites vous, dist Bertran? Je n'ay ne maille ne de-
 nier, & si doy assez plus de dix mil liures, que l'en
 m'a prestez, & que l'en m'a acreu en ceste ville,
 tandiz comme i'ay esté prisonnier. Et l'un d'eulx
 lui demanda: Comment l'avez-vous ainsi aloüé?
 Je vous en respondray, dist Bertran, i'en ay beu,
 mengié, donné, & ioüé aux dez. Vn peu d'argent
 est tost despendu. mais j'auray tost payé, se ie suis
 deliuré. Et tel espargne le sien, & l'a bien enfer-
 mé, qui pour moy aidier m'en prestera mes clefs.
 Et vn sergent, qui l'entendi, dist: Sire, vous a-
 uez bon cuer, il vous semble que tout ce que pé-
 sez doye auenir. Par ma foy, dist Bertran, tu as
 raison. Car homme desconforté ne vault neant
 que maté & desconfit. Et les autres disoient, que
 c'estoit vn homme faé. Car il estoit assésuré à tou-
 tes hurtes. Dóc fu mené en la chambre, où estoit
 le Prince de Galles, & avecques lui lehan Chan-
 dos vn Cheualier loyal & preudomme. Et qui
 l'eust voulu croistre, on se fust pieça acordé de la
 guerre. Car il donnoit de moult bons consaulx.
 Et aussi estoit Oliuier de Cliçó, qui moult estoit
 preux, hardi, & cheualereux, Hue de Carualay, le
 Conte de l'Isle, le Seneschal de Bordeaux, le Sire
 de Pommiers, & autres Cheualiers plusieurs.

Deuât leſquelz Bertrã vint veſtu de vne cote de
grifeſt. Et quât le Prince l'apperçut, ſi ne ſe pot
tenir de rire, de tant loing cõme il le choiſi. Puis
lui diſt: Or auât Bertrã, cõmêt vous va? Et Bertran
à l'approucher l'enclina vn petit, & reſpondi: Si-
re, quant il vous plaira, il me ſera mieulx. Et ay
oy long temps les raz & les ſouriz: mais le chant
des oyſeaulx non ia pieça. Ie les yray oyr quant
voſtre plaſir y ſera. Bertran, diſt le Prince, ce ſe-
ra tantost ſe vous voulez: il ne tẽdra que en vous,
mais que vous vueillez iurer & faire loial ſere-
ment, que iamais encontre nous ne les autres ne
vous armerez; ne auſſi pour aidier à Henry d'Ef-
pengne. Toutes fois que ce voudrez iurer, nous
vous deliurerons tout à plain, & payerons ce que
acreu auez: & en oultre vous donrõs dix mil fleu-
rins pour vous remonter, ſe ce voulez faire, ou
autrement vous ne ſerez point deliuré: Sire, diſt
Bertran, ma deliurance n'auienda dõc. Car ain-
çois que ie m'y accordaſſe, iarroit mon corps en
prison tant comme ie pourroye durer. Ne ia ſe
Dieu plaſt ne ſera reprouché à mes amis. Car par
Dieu, qui le monde crea, ie ſeruiray de cuer en-
tier ceulx que i'ay ſeruis, & à qui i'ay eſté de mon
commencement. C'eſt le bon Roy de France, &
les nobles Ducs d'Aniou, de Berry, de Bourgon-
gne, & de Bourbon; auſquelz ie l'ay en conue-
nãt. Mais leſſiez moy aler, ſi vous plaſt. Car trop
m'auez tenuz en prison à tort, & ſans cauſe. Et

vous diray comment i'estoie party de France, moy & toute ma gent, en propos de aler sur les Sarraſins. Et ainſi l'auoie promis à Hue de Caruay, en intétion de acquerre ſauuement. Et pourquoy dōc n'y aliez vous tout droit ſans arreſter, diſt le Prince? Ie le vous diray, diſt Bertran, qui haultement parla. Nous trouuaſmes Pietre, qui de Dieu ſoit maudit & confondu, lequel auoit pieça fait morir par tres-faux murder la noble Royne extraite de la noble lignée de Bourbon, & du ſanc Monsieur ſaint Loys: laquelle Dame eſtoit voſtre couſine du meilleur coſté que vous ayez. Si m'areſtay là endroit, pour en prendre vengeance, & pour aidier à Henry; pour ce que ie ſçay bien & croy fermement, qu'il doit tenir le Royaume, & eſt droit Roy & vray heritier d'Eſpengne. Et auſſi pour deſtruire & mettre à fin Iuiſſ & Sarraſins, dont trop y a en ces parties. ***. Or eſtes venuz par grant orgueil. ou païs d'Eſpengne à tout voſtre effort, & par conuoitiſe d'or & d'argent, & de tenir le regne apres la fin de Pietre, qui regne fauſſement. Ou quel voiage, vous auez tout premierement greué voſtre ſanc, & deſtoubé moy & mes gens. Si vous en eſt auenu, que quant vous auez ainſi deſtruit voz amis, & vous & voſtre gent auez eſtez tous affamez & ſouſtenuz grās peines & trauaulx. Si vous a Pietre trompé par barat, & par tricherie. Car il ne vous a tenu loiaulté ne conuenant: dont ie lui

„ ſçay bon gré par ma foy. Quant Bertran ot com-
te ſa raiſon, le Prince leua la chiere, & ne ſe pot
tenir, qu'il ne deïſt, que par ſon ame Bertrá auoit
raiſon. Et les Barons dirent tuit, qu'il auoit dit
verité. Et adonc y ot grant ioye demenée entour
& enuiron. Et diſoient de Bertran les vns aux au-
„ tres: Veez-là vn bon Breton. Mais le Prince l'ap-
„ pella, ſi lui diſt: Vous ne m'eſchapperez pas ſans
„ payer bonne rençon. Et encores me deſplaïſt-il
„ dont vous auez tant de grâce. Mais on dit, que ie
„ vous ay detenu priſonnier, pourtant que ie auo-
„ ie doubte de vous. Et afin que chaſcun en yſſe de
„ ſouſpeçon, & ſache bien que ie ne vous crains, ne
„ ne doubte, ie vous deliureray par payant rençon
„ ſouffifant. Sire, diſt Bertran, ie ſuis vn pouure
„ Cheualier, de petit nom, & ne ſuis pas extrait,
„ que ie puiſſe recouurer de plenté de aide. Et au-
„ tre part, ma terre eſt engagée pour monteure de
„ cheuaux, & ſi doy bien en ceſte ville dix mille
„ flourins. Si me vueillez faire raiſon, & moy deli-
„ urer. Où irez vous, beau Sire, diſt le Prince, qui
„ vous lairra aler? Sire, ſe m'aiſt Dieux, diſt Bertrá,
„ ie yray où ie pourray recouurer ma perte. Et plus
„ ne vous en dy. Si m'en leſſiez eſter. Or vous au-
„ ſez, diſt le Prince, combien vous me voudrez
„ donner de rençon. Car voſtre voulenté me ſouf-
„ fira. Sire, diſt Bertran, ie croy que vous ne dai-
„ gnerez fauſſer voſtre raiſon. Et puis qu'il vous
„ plaïſt rapporter à mon vouloir, ie ne me doy pas

tauxer trop bas. Si vous donrray & feray bailler
 par madeliurance cent mille florins nommez
 doubles d'or. Et quant le Prince l'entendi, si lui
 mua la couleur, & commença à regarder tous ses
 Cheualiers, en disant. Se scet-il bien gabber de
 moy, de ce qu'il m'offre telle somme? Car ie le
 quitteroie pour le quart. Bertran, dist le Prince,
 vous n'en pourriez finer, ne ie ne vueil pas tāt. Si
 vous aduisez derechief. Sire, dist Bertran, puis
 que tant n'en voulez, ie me mets à soixante mille
 doubles, ne ia n'en aurez moins, se pourtant me
 voulez quitter. Oyl, dist le Prince, ie en suis d'a-
 cort. Adonc lui dist Bertran haultement: Sire,
 Prince Henry se puet bien vanter, & de vray,
 qu'il mourra Roy d'Espengne, quoy qu'il doie
 couster, & me prestera la moitié de ma rençon,
 & le Roy de France l'autre. Et se ie ne pouoie a-
 ler ne enuoier deuers ces deux, si le gaingneroie
 ainçois à filler toutes les fillereſſes, qui en Fran-
 ce sont, que ce que ie demourasse plus entre voz
 mains. Et quant le Prince l'oy, si dist: Quel hom-
 me est-ce cy. Il ne s'esbahist de riens en fait ne en
 penser, neant plus que s'il eust tout l'or, qui soit
 ou monde. Il s'est mis à soixante mille doubles,
 & ie l'eusse volentiers quittié pour dix mille. Et
 moult s'en merueilloient aussi tous les Barons.
 Or suis-ie deliuré, dist le gentil Bertran. Et Chã-
 dos lui demanda, où seroit prinſe la finance. Si-
 re, dist-il, i'ay de bons amis, que ie trouueray,

„ i'en fuis tout certain. Par ma foy, dist Chandos,
„ ie en ay grant ioye. Et se de moy auez mestier,
„ tant vous en dy, ie vous en presteray dix mille.
„ Sire, dist Bertran, la vostre mercy. Mais ainçois
„ que ie vous requiere de riens, ie essaieray les gens
„ de mon pais. De ceste chose ala la nouuelle par-
my la cité de Bordeaux. Et disoient les gens l'un
à l'autre, que ce estoit bien euvre d'ennemy d'un
Cheualier prisonnier, qui auoit esté pris ou pais
d'Espengne, qui si estoit rençonné à soixante
mille doubles d'or. Adonc veilliez aler grans &
petiz, bourgeois & gens de plusieurs mestiers vers
l'ostel au Prince, pour veoir Bertran. Et quant
les Cheualiers dudit Prince virent le peuple ain-
si assembler, & sceurent la cause de leur venue, si
amenerent ledit Bertran appoier à vne fenestre,
lequel en rioit moult fort. Et quât il fu choisi du
„ cômû, les gës disoiët l'un à l'autre: C'est vn droit
„ ennemy, maudit soit l'eure que il eschappe vif.
„ Il a fait maint mal, & fera encore pis. Et les autres
„ disoient: Auons nous icy musé & baillé, & nostre
„ mestier delessié à faire, pour veoir & regarder vn
„ tel Damoisel. Ia Dieu ne le beneie. Car c'est vn
„ lait Baceller, & mautailé de paier la rençon à
„ quoy il est mis. Où le puiseroit-il, dist li autres?
„ Il n'en paiera ia vn seul denier du sien, mais le
„ pillera sur le plat pays. Et ceulx, qui miculx con-
„ gnoissoient Bertran, leur disoient: Or ne plaidez
„ pas tant, en vfant de telles parolles. Car il n'a
meil-

meilleur Cheualier ou monde, ne qui mieulx fa-
 che guerrier. Et n'est si fort chastel, tant soit as-
 sis sur haulte roche, que tantost ne se rende, se il
 vient deuant pour le assaillir; ne il n'a ou Royau-
 me de France si pouure homme, ne femme, qui
 ne se taillast pour lui aidier s'il l'en requeroit,
 ainçois qu'il demourast prisonnier. Ainsi en di-
 soient les gens, chacun à sa deuise. Mesmes la
 Princeesse, qui estoit femme dudit Prince, quant
 elle en oy parler, vint à Bordeaux, pour veoir
 quel vassal ce estoit; & parti d'Angolesmes, où
 elle estoit, avecques elle Iehan de Chandos, qui
 moult amoit Bertran. Et quant la Dame le vit, si
 le festoia moult bel, & lui porta grant honneur
 par le conseil du Prince, qui mandé le lui auoit.
 Puis fist icelle Dame apporter vin & espices, que
 elle lui presenta: & apres dist à Bertran, que elle
 vouloit volentiers, que à sa bienuenue elle le
 allegeroit de dix mille doubles, que elle lui don-
 noit. Et Bertran l'en mercia, lequel apres ce prist
 congié d'elle, & souppa la nuit à la Cour du Prin-
 ce, & apres se party de Bordeaux, pour aler que-
 rir & pourchasser sa rençon. Et fu eslargi par tel-
 le condition, que dedens certain iour, & sur sa
 foy, il deuoit porter, ou enuoyer sa rençon de-
 uers le Prince, ou retourner en prison. Et aussi
 icelui temps durant il ne se pouoit ne deuoit ar-
 mer. Et sur ce lui fu baillé saufcōduit, & le cōuoia
 par grant amour Hue de Carualay, qui au depar-

„ tir lui dist: Bertran, nous auons esté compaignōs
„ ou pais d'Espēgne par delà de prisons & d'auoir,
„ dont ie ne comptay oncques à vous. Et sçay bien
„ de pieça, que ie suis vostre tenu, dont ie voudray
„ auoir aduis. Mais de tout le moins, ie vous aide-
„ ray icy de trente mille doubles d'or. Ie ne sçay,
„ dist Bertran, comment il va du compte, mais
„ que de la bonne compaignie; ne ie n'en vueil
„ point compter. Mais se i'ay mestier, ie vous prie-
„ ray. Adonc baisierent li vns l'autre au departir.
Et n'ot gaires Bertran cheuauchié, quant il en-
contra vn Escuier trotant à pié comme vn gar-
son, lequel auoit plusieurs fois seruy ledit Ber-
tran. Auquel il vint, chapperon aualé, & le salua.
„ Puis lui dist: Haa! Sire, Dieu soit loé, quant ie
„ vous voy sur les champs. Et Bertran, qui bien le
„ reconnut, lui demanda où il aloit. Sire, dist-il, ie
„ reuois tenir prison à Bordeaux, aussi comme rai-
„ son est. Car ie ne puis encores finer de ma régon.
„ Et combien te faut-il, dist Bertran? Sire, il me
„ fault cent frans. Ce n'est pas moult, dist Bertran.
„ Auecques ce t'en faut-il cinquante pour auoir
„ vn bon cheual, & autres cinquante pour toy ar-
„ mer. Adonc commanda Bertran à son Chambel-
„ lan: Baillez lui deux cens frans, que ie lui donne.
„ Il est bon homme d'armes, & le congnois bien.
„ Si me vendra seruir quant i'en auray besoing.
„ Sire, dist l'Escuier, Dieu vous doint bonne vie &
„ longue. Vous m'avez deliuré d'un tref-mauuais

glouton , qui bien m'a tenu l'espace de trente " iours les grezillons es doiz, & les fers aux iambes. "

Après, lui demanda Bertran, dont il venoit. Et il lui respondi, qu'il venoit de Tarrascon: deuant laquelle ville le Duc d'Aniou estoit logié, que la Roynie de Naples guerroyoit, comme presentement vous orrez.

Comment la ville de Tarrascon se rendi, tantost comme Bertran vint deuant icelle, lequel n'estoit aucunement armé, mais que tant seulement il tenoit vne verge en sa main.

CHAPITRE XXXIV.

TANT cheuaucha Bertran, qu'il vint en l'ost de Monsieur le Duc d'Aniou deuant Tarrascon, où il fu tantost recongneuz, & denoncié audit Seigneur, qui vint encontre lui. Si le salua, & lui demanda, comment il estoit. Bien, Sire, dist Bertran, qui ne s'effraioit de riens; mais que ma rençon fust païée. Et icelui Duc respondi, qu'il n'y demourroit pas pour trente mil frans, lesquels, se besoing, il lui bailleroit tantost. Dont Bertran le mercia. Après lui dist le Duc, commét la Roynie de Naples le guerroyoit, qui vouloit tenir encontre lui Arle-le-Blanc, & plusieurs autres villes fermées, chasteaux, & forteresses. Sire, dist Bertran, si les conquerrez, ne ia ne partiray "

d'auecques vous, tant que vous les ayez. Apres
ledit Bertran conta à Monsieur le Duc, commēt
il estoit rençonné à foixante mille doubles d'or,
& qu'il ne cuidoit iayssir hors de prison. Et Mō-
sieur le Duc respondy: le le pensoy assez. Et quāt
de vostre rençon, nous en finirons bien. Tandiz
comme ilz parloient ensemble, se party de l'ost
vne espie, qui entra en la ville de Tarraſcon. Le-
quel dist aux Capitaines & aux bourgeois, que
Bertran estoit deliuré de prison, & venu en l'ost
du Duc d'Aniou, où il auoit amené deux mille
hommes d'armes, tant Bretons, comme autres
gens, qui ne crespnoient nulle deffence. Et les
bourgeois respondirent, que mal fust-il venu. Et
moult furent tous courrouciez & esbahiz de sa
venue. Et durant icelui siegē vindrent au secours
du Duc, pour amour dudit Bertran, Oliuier du
Guesclin son frere, Oliuier de Mauny, & Henry
de Mauny son frere, Alain de Mauny, petit
Chambray, Alain de la Houſſoye, & son frere,
& Lescouet, qui amenerēt plusieurs gēs d'armes,
lesquelz Bertran festoya moult, & leur dist que
les merroit en Espengne, mais qu'il eust païée sa
rençon: & tāt leur donneroit villes & chasteaulx
à conquerre, qu'il les feroit tous riches. Moult fu
grant le siegē deuant Tarraſcon, laquelle est as-
ſiſe sur la riuierē du Rosne. Et d'autre part Mon-
sieur d'Aniou auoit auecques soy plusieurs Che-
ualiers, & autres gens d'armes, tant Bretons, com-

me de diuers pais. Et y estoient le Bourc de Biere, Perrin de Sauoye, laquet de Bray, le petit Mesclin, le Forfené du Vis, le Borgne de Melun, le Bourc de Rabastain, le Bourc de Rinandes, & Guillaume le Baueux. Et auoit icelui Duc fait faire vn pont sur ladite riuere deffensable, & edifié sur bateaux pour resister aux gens de plusieurs gallées, qui venoient de par ladite Roïne au secours de ladite ville asseigiée, & estoient bien enuiron soixante vaisseaulx, lesquels il cōuint retourner, voulzissent ou non, en Arle-le-Blanc. Et le Duc faisoit assaillir ladite ville, tant comme il pouoit. Et auoit dix huit groz engins dreciez deuant icelle: lesquels gettoient grans pierres pesans. Et s'en vint Bertran aux Maistres, qui iceulx engins faisoient getter, & leur dist: Gettez apertement, nous aurons tantost la ville, se vous me voulez croistre. Et ceulx respondirent volentiers, & que voyrement l'auroient-ilz, puis que venuz y estoit. Toute iour dura l'assault, qui plusieurs autres iours auoit duré, que oncques ladite ville ne se vult rendre. Mais Bertran monta à cheual tout desarmé, & sans espée ceindre: mais tenoit en sa main vne espée seulement, & s'en alla iucques aux barrieres. Puis leur escria à haulte voiz: Folle gent, faites moy tantost venir vostre Capitaine, & sans point arrester, ou par Dieu vous l'encomparez. Tantost fu portée la nouuelle en la ville. Adonc vindrent à

la porte ledit Capitaine , & plusieurs des greigneurs bourgeois. Ausquelz Bertran dist: Pour Dieu, Seigneurs, creez mon conseil, & aiez pitié de vous, de voz femmes, & de voz enfans, & autres amis. Car se vous ne vous rendez de bonne volonté, i'ay vœu à Dieu & à S. Yue, que ie y feray si longuement, que par force de assault vous auray: & à tous les riches bourgeois feray trancher les testes. Et le demourant, c'est assauoir la moyenne gent, femmes & enfans, & autres pouures feray vuider de la ville, sans or, & sans argent, tous nuz comme ilz nasquirent. Si vous conseille, que vous vous rendiez au noble Duc d'Aniou frere au Roy de France, qui bien vous puet garantir. Et lessiez la Royne de Naples, qui de son pays ne vous puet garentir. Et afin que vous, & voz amis n'en soiez destruis, ie le vous dy pour le mieulx. Si m'en respōdez vostre volonté demain dedans heure de prime. Ie vous cōment à Dieu. Adonc le Capitaine s'en rentra dedens la ville, où moult auoit grant noise. Et disoient l'un à l'autre: Vray Dieu de Paradis, vecy dures nouuelles. Il conuendra que sa volonté soit faite. Car il n'est chastel tant fort, qui ne se rende à lui. Donc assemblerent en ladite ville les gens de chacune paroisse à part soy. Et en la fin furent tous d'accort, qu'ilz se rendroient. En ce temps auint, que les Prouenceaux vindrent à banniere desployée encontre ceulx de l'ost. Et se

tenoient sur vne grant montaigne, dont ilz tra-
 yoient fierement carreaux à la voulée. Mais leur
 trait ne leur valut riens. Car ceulx dudit ost mō-
 terent tantost contremont ladite montaigne, &
 les reculerent bien le trait d'une arbaleste. Et ilec
 furent desconfiz par Oliuier de Mauny & ses
 gens. Et le landemain enuiron heure de prime,
 ceulx de Tarracon enuoyerent quatre de leurs
 bourgeois plus notables deuers Monsieur le Duc
 d'Aniou, qu'ilz trouuerent en sa tente. Lequel
 auoit lors avecques soy la fleur & eslite de toutes
 ses gens; c'est assauoir les deuant nommez, & avec
 iceulx Robert le Conte, Regnault d'Oridon,
 Vvaulyn Papeillon, & le Bourc de Diion. En la
 presence desquelz iceulx bourgeois se vindrent
 agenouiller deuant mondit Seigneur le Duc, &
 le saluerent moult humblement. Apres parla le
 plus sage d'eux pour les autres, en disant: Noble
 Seigneur de haulte extraction, les bourgeois &
 bourgoises de la ville de Tarracon vous pre-
 sentent par nous les clefs de ladite ville, pour y
 entrer à vostre bon plaisir: & vous suppliēt tres-
 humblement, qu'il vous plaise à eulx pardonner
 l'offense, qu'ilz ont faite encontre vous. Et quāt
 Monsieur l'entendi, si ne leur respondi de grant
 piece. Car receu auoit grant perte & grant dom-
 mage, pour auoir la possession d'icelle ville. Mais
 Bertran lui deist: Monsieur, ie vous prie en l'on-
 neur de Dieu, que vous leur pardonnez. Bertran,

„ ce dist le Duc, ie les vous donne en don. Car par
 „ vous se font-ilz rendus. Si en faites vostre vou-
 „ lenté. Or auant, dist Bertran, faites bailler vostre
 „ panon: si sera mis sur ce panon là sus. Adonc Ber-
 „ tran entra en ladite ville, & fist mettre icelui pa-
 „ non sur vne tour, qui estoit à l'entrée, & puis ou-
 „ urir les portes. Si venoient au deuant de Mon-
 „ sieur le Duc, plourans moult tendrement, les
 „ plus notables & honnourables femmes de la vil-
 „ le. En laquelle mondit Seigneur se herberga icel-
 „ le nuit, & landemain s'en parti, & y lessa Capitai-
 „ ne feal. Auquel ordonna telle gent, & tant com-
 „ me il lui plut, & bon lui sembla. Puis ala Mon-
 „ sieur le Duc mettre le siege deuant Arle-le-Blác.
 „ Mais ceulx de dedens furent acordez à lui par
 „ certain traitié, moyennant finance d'or & d'ar-
 „ gent. Apres y ot certain parlement entre les
 „ Cheualiers, qui ilec estoient venuz & assemblez.
 „ Ausquelz Bertran dist plainement: Seigneurs, il
 „ me conuient faire tant, que ie me puisse armer, ie
 „ pers mon étps, & ne tiét que à argent. Et pour ce,
 „ prie à tous mes amis qu'ils m'aident, & ie leur ré-
 „ dray en Espengne. Car ie ne fineray iamais, si au-
 „ ray remis le Roy Henry en sa Royaulté. Et i'ay
 „ entendu d'un pelerin venant de saint Iacques,
 „ que ledit Roy & la Roynes sa femme sont au sie-
 „ ge deuant Toulette. Et sont avec eulx le bon Ar-
 „ cheuesque, & le Besgue de Villaines, & ses enfás,
 „ qui m'attendent. Si vueil aler premierement en
 „ Bretagne,

Bretaigne, veoir le Seigneur de Craõ, & mes au-
 tres amis, & par especial mes gens, qui sont à la
 Roche-derien; & de là m'en retourneray à Bor-
 deaux pour tenir conuenant, dont ie ne faudray
 ia tant comme ie viue. Dist Monsieur le Duc:
 Vous auez bien parlé, ie vous aideray de vingt
 mille presentement, & exploicteray tant enuers
 le Pape, qu'il vous aidera d'autres vingt mille, &
 Monsieur le Roy de soixante mille. Et ainsi sera
 vostre rençon payée. Et en oultre, se aucun be-
 soing vous suruient, que ie le sache, ie vous ai-
 deray de tout mon pouoir, tant comme ie auray
 denier. De ce le mercia Bertran, lequel pria à ses
 cousins germains, Oliuier de Mauny & son fre-
 re, qu'ilz fussent tous prests, pour venir au iour
 & lieu, où il les manderoit. Et ilz respondirent,
 qu'il n'y auroit point de defaute. Puis print Ber-
 tran congié de Monsieur le Duc, & à tous les Ba-
 rons; & en fist apporter auecques soy les vingt
 mille florins dessus diz, dont il ne rapporta à
 Bordeaux, qui vaulzist vn seul denier, ainsi com-
 me vous orrez. Car il donnoit & departoit en
 chemin tout le sien, comme vn droit Alexandre
 en courtoisie & largesse; & par especial aux po-
 ures Cheualiers, & Escuiers venans de prison,
 nez de France & de Bretaigne. Esquelz il trouua
 premierement dix descirez & mal vestuz, les au-
 cuns d'iceux pouurement montez, & les autres
 cheminans tous à pié, lesquelz venoient de Bor-

deaux; où rançonnez auoient esté, & oudit chemin s'estoient assemblez, & entr'accompagniez, en reuelant premieremét l'vn à l'autre leurs miseres, & pouuretez, que soustenuz auoient. Et bien disoient les aucuns, que iamais en Espen-gne ne retourneroient, & les autres disoient que si feroient eulx; mais qu'ilz sceussent que Ber-tran y fust premierement reuenu. Car il les au-roit tantost remontez, armez, & remis sur: & dommage estoit, qu'il n'auoit assez argent. En disant ces parolles, & autres, entrerent iceulx prisonniers dix en vne hostellerie. Si appellerent l'oste, & requirent à auoir du vin. Et il leur de-manda, dequoy ilz le payeroiét. Dist li vn d'eulx:

„ Dequoy vous doubtez vous? Il y a cy assez Che-
„ ualiers & Escuiers, pour vous bien paier. Donc
„ respondi l'oste, qui estoit sage & rusé: Seigneurs,
„ où auez vous lessiez voz esperons dorez? Je eusse
„ biē herbergié voz cheuaux. Encores ay-ie foing,
„ auene, & estable assez, pour nourrir cinquante
„ cheuaux l'espace de dix mois, ou plus. Haa! beaux
„ hostes, dist vn Escuier, ne vueilliez pas faire deri-
„ sion de nous. Nous venons de Bordeaux, où assez
„ auons eu de mal avecques Bertran du Guesclin,
„ qui est hors de prison, lequel s'est rençonnez à
„ soixante mille doubles d'or, dont plusieurs sont
„ esbahys, où telle & si grant finance pourra estre
„ prise & trouuée. Dist icelui hoste: Il en aura assez.
„ Car encores ay dix cheuaux labourās mes terres,

& bien cinq cents moutons gras, avec autant de porceaulx. Et si ay en mon cellier bien trente tonneaux de vin. Mais par Dieu, qui fu pené en la croix, ie les vendray pour aidier à Monsieur Bertran, se il en a besoing: & tous les draps aussi, que ma femme achepta quant nous fumes mariéz. Et pour l'amour de ce que vous auez parlé de lui, ie vous feray seruir de pastez & de rost, & vous donray du meilleur vin que i'aye. Et se demourer voulez, ie vous coucheray bié. Car vous me parlez du meilleur Cheualier, qui aujourduy soit ou monde, plus hardi, plus redoubté, plus eureux, & mieulx fortuné, plus courtoiz, mains orgueilleux, & mains conuoiteux, & le mains blasmant autrui. Dont commanda ledit hoste à sa mesnie, que iceulx hostes fussent seruiz. Lesquelz disoient l'un à l'autre que saint Iulien les auoit richement hostellez. Et ainsi comme ilz se oient au disner, Bertran du Guesclin arriua oudit hostel, & ses Escuiers avec lui. Et quant les prisonniers le virent, si commencierent à dire generaulment li vn à l'autre: Vecy Bertran, qui se vient logier ceans. Lors se leuerent à l'encontre de lui, qui de present les recognut. Et nonobstant ce, il leur demanda: Seigneurs, d'où venez vous, & qui vous a ainsi mal appareilliez? Il semble que vous veniez de chassier, ou que murdriez vous ayent desrobé. Car ie ne vous vy, puis que vous estiez à la bataille de Nadres, bien montez

de cheuaux, & armez comme bons soubdoyers.
Vous estes tous bonnes gens d'armes, & bien
vous recognois. Ne il ne semble pas que vous
veigniez de piller, dont ie vous ayme mieulx. Si-
re, dist l'vn d'iceulx, nous fufmes prins deuant
Nadres, & ne le pouons nier, & puis menez à Bor-
deaux, & illec enferrez & gehynez long temps,
comme se nous feussions larrons, murdriers. Or
sommes mis à finance. Et pour ce que nous n'a-
uons de quoy payer nostre rençon, il nous con-
uient retourner en prison, pour acquitter noz
foiz & noz seremens. Car si m'aist Dieux, nous
n'auons deniers. Et pour l'onneur de vous nous a
donné à menger l'oste de ceenz. Quant Bertran
l'entendi, si ala accoler ledit hoste, puis s'assit
de lez les autres. Lesquelz se leuerent tous, disans
qu'il n'appartenoit pas à vn tel Prince de foy tant
abesfier. Seigneurs, ce dist Bertran, or lefsiez en
paix. Ie vueil mengier auecques vous. Car i'en ay
eu grant besoing. Vous auez eu perte par moy.
Et par moy, se Dieu plaist, serez recouurez. Et
quant il fu assis lez eulx, il enquist de leurs auan-
tures; & leur demanda combien d'argent il leur
conuendroit bien pour leur deliurance. Adonc
parlerent l'vn à l'autre par maniere de collation
ou auis, qu'il leur conuendroit bien payer qua-
tre mille frans à Bordeaux. Hé dist Bertran, c'est
legier à finer. Puis vous en fault-il deux mille
pour vous monter & armer, & mil pour payer

voz despens, pour aler & venir. Et si en fault
 donner à nostre hoste autres mil, pour tant qu'il
 vous a fait bonne chiere pour l'amour de moy.
 Donc commanda Bertran à son Chambellent,
 que tantost deliurast ilec huit mille flourins, sans
 en faire plus parler. Si s'enclinerent, & prièrent à
 Dieu, sauuer le voulzist. Et Bertran leur dist:
 Seigneurs, ie m'en voiz tout droit en Espengne.
 Ie vous commande que vous y vengnez tantost,
 comme vous orrez dire que ie y seray. Car ie fe-
 ray le Roy Henry possesseur du Royaume, & de-
 struiray Dam Pietre. De ceste parole ourent grât
 ioye. Car Bertran les promettoit à les mettre en
 haulte honneur par conquest. Et l'oste le mercia
 moult doubcement, en lui disant: Monsieur les-
 siez vostre argent sans moy aucune chose bailler
 à ceste foiz. Car ie en ay encores à vostre com-
 mandement. Et Bertran lui respondi, qu'il ne lui
 en parlaist plus, & que iamais n'é auroit denier de
 retour. Car il auoit, ce disoit-il, encores dix mil-
 le flourins: qui lui sembloit assez pour faire son
 voyage iusques à Bordeaux, mais ainçois vouloit
 aler en Bretaigne. Et icelle nuit reposerent tous
 oudit hostel. Quant vint le landemain, iceulx
 prisonniers prindrent congié dudit Bertran, en
 disant, qu'ilz estoient du tout ses obeissans. Moult
 tendrement souspiroient au departir, & lui de-
 mandoient se aucune chose lui plaisoit à mader
 à Bordeaux. Aufquelz il respondi, que non. Et

landemain les prisonniers dessusdiz retournerent deuers leur maistre à Bordeaux, lequel estoit Cheualier d'onneur du Prince. Lequel quant il les vit en si bon arroy, & si bien ordenez en si brief temps, doubta en son cuer, qu'ilz ne fussent larrons, murdriers, & robeurs, qu'ilz eussent acquiz par larrecin & roberie. Si les menaça moult fort, en disant, qu'il les feroit executer, comme de trainer & de pendre. Puis les ala encuser & denoncier au Seneschal, qui deuant soy les „ manda, & leur dist: Vous iurastes n'agaires, quāt „ vous fustes reçõnez, que pour paier vostre rençõ „ vous cõuendroĩt vèdre voz heritages. Et encores „ n'estes vous alez en vostre pais, mais estes ia re- „ tournez. Si cõuient sauoir où vous auez trouuez „ finâce en si brief tēps. Donc lui cõpta l'un d'eulx, comment ilz auoient trouué Bertran, & du don qu'il auoit fait à eulx, & à leur hoste, comme dessus est dit. Et quant icelui Seneschal l'entendi, si en pris moult Bertran en son cuer: & dist bien en son cuer, que oncques mais n'auoit oy parler de tel Cheualier, puis l'eure qu'il fu nez. Moult de foiz s'en seigna, pour ce qu'il le tenoit à grant merueille, & le vint raconter en plain disner au Prince & à la Princesse, qui mengoient en sale, & en la presence de tous les assistans; dont icelle Dame ot moult grant ioye, & ne plaigny ce que elle auoit donné à Bertran. Et le Prince dist, que se Bertran perseueroit ainsi, comme il auoit en-

commencié, oncques si puissant Cheualier ne monta à cheual. Et que encores maudioit-il l'eure qu'il l'auoit deliuré. Et si fist-il puis, ain-si comme cy apres porrez oyr s'il vous plaist.

Comment Bertran fu du tout deliuré de prison, & s'en reuint en Espengne deuers le Roy Henry, qui auoit asseigiée la cité de Toulette deuant dite.

CHAPITRE XXXV.

DE DENS le pays de Bretaigne entra Bertran, & vint deuers le Seigneur de Craon, le Visconte de Rohan, Robert de Beaumanoir, Charles de Dinant, & l'Euesque de Rennes. Et aussi firent plusieurs Barons de Bretaigne Bretonnâr, qui lui promistrent tous, que sans faillir lui aideroient. Et puis s'en ala à la Roche-derien, qui sienne estoit, où l'en lui fist semblable promesse. Et ordonnerent vn iour nommé, auquel ilz enuoyerent à Bordeaux certaine finance pour s'adite rençon, dont ilz ne faillirent pas. Donc s'en vint Bertran à la Rochelle, où il trouua plusieurs Cheualiers & Escuiers, qui prisonniers estoient, mal vestuz, & pouurement montez. Lesquelz Bertran festoya moult bien à son pouoir, & dōna tant à eulx, comme à autres semblables, toute sa finance. Tellement que pour bref conclure, il ne lui en demoura qui vauzist vne seule

obole, quant il fu venu à Bordeaux, où il trouua le Prince en sa sale, & avecques lui lehan de Châdos, & Hue de Carualay. Aufquelz le Prince dist par esbatement : Or vient ma rençon. Et ilz respondirent qu'il n'apportoit rien. C'est veoir, dist le Prince, regardez quel compagnon, il n'acoute à tout le monde qui vaille vne feue. Puis dist tout bassement: Bien reuiengne. Car quant il aura bien payé, il ne sera plus mon prisonnier. Apres lui demanda, en quel pays il yroit. Sire, dist Bertran, en vostre prison. Car se Dieu me doint pardon, ie n'ay ne croiz ne pille. Par ma foy, dist le Prince, ce n'est pas bien pour vous. Estes vous si fol, que vous donnez tout vostre argent à ces autres prisonniers, & vous nous demourrez tout seul? Nous vous en prisons mains. Quant ferons-nous payez de vous? Sire, ce dist Bertran, au plaisir de Dieu. Et pourriez vouloir, ne le vous celebrayia, que de ce payement ne veüssiez denier. Et de ce que ie donne ne vous vueille challoir. Te le doy bien faire à ceulx, qui sont mes champions. Ainsi demoura Bertran, & assez tost apres auint que toute la rençon fu enuoyée à Bordeaux, & plus qu'il ne deuoit. Et quant on le nonça au Prince, à vn certain iour qu'il seoit à son disner, en sale, où Bertran disnoit avecques les Cheualiers, si en ot moult grant merueille, & demanda dont cel auoir venoit. Sire, dist vn de ses gens, ne puet chaloir de l'enquerir. Mais faites le recevoir.

voir. Lors dist le Prince: Se chacun fait ainsi, ie seray bien payé, & si donroye assez. Ainsi Bertran du bel remenant qu'il ot, fist mainte courtoisie: & fist tant, que en la cité de Bordeaux sur la mer, on ne lui demanda qui vaulzist vne seule pomme. Puis s'en party, & s'en vint deuant le chastel de Brest, où il manda sa gent. Et vindrent à lui son frere Oliuier du Guesclin, Oliuier, Héry, & Alain de Mauny, celui de la Houffoye, Guillaume de Launoy, Thibault de Pauye, Alain de Beaumont, petit Mesclin, Caraenloet, & Yvonnet de Launoy. Et bien estoient mil combattans de tres-bonnes gens d'armes. Lesquelz se acheminerent parmy Rancheuaulx, tant qu'ilz vindrent à Molines en Espengne, où Bertran fu moult festoyé & honnouré.

*Comment Dam Pietre, pour auoir secours du Roy
de Belmarin, & prendre sa fille à femme,
renoya la loy de Iesus-Christ.*

CHAPITRE XXXVI.

BIEN auez cy deuât oy, cōment le Roy Héry Basseiga la cité de Toulette, deuant laquelle il estoit encores en ce temps cy, & aussi la Roynne sa femme, qui auoient auecques eulx le Besgue de Villaines, & le bon Archeuesque, qui plusieurs foiz sauua la vie audit Henry, lequel fai-
sf

foit assaillir ladite ville. Mais nullement ne se vouloient rendre, pour ce qu'ilz auoient iurée la defense, par l'induction du Chastellain & Capitaine, cōme dit est : & aussi pour le secours qu'ilz attendoient de leur Seigneur Pietre. Si vous dy, que pour ce que icellui chastele estoit maistre de la ville, ledit Chastellain n'alloit nulles foiz en ladite ville, qu'il ne fust retenir en hostage troiz, ou cinq des plus souffisans bourgeois oudit chastele, pour doubte qu'il ne fust retenu des citoiés, esquelz il ne se fioit pas tresbien. Et lors estoit Dam Pietre en la cité de Sebile, lequel estoit nouuellement reuenu du Royaume de Belmarin, où il auoit pris aliance avecques le Roy dudit pays, en telle maniere qu'il deuoit prendre à femme l'une de ses deux filles, laquelle qu'il plairoit audit Pietre. Lequel aussi deuoit renouer la loy de Iesus-Christ, & deuenir Sarrafin. Et par ainsi ledit Roy de Belmarin lui promist à enuoyer à son aide au port de Toulette son Amiral, & dix mille Sarrafins bien armez. Si auint que ceulx de ladite cité, qui bien esperoient le secours, proposerent que tantost comme ilz sauroient la venuë de Pietre, l'une partie ysteroit pour aler à l'encontre, ou deuant de lui : & l'autre partie demourroit pour garder la ville. Et moult estoient affamez. Si se auanturerent yfsir au lez deuers Cordonne, en vne certaine nuit, pour laquelle le Besgue de Villaines eschauguetoit, qui

apparçut leur yssuë droit enuiron le point du iour. Adonc se mist parmy vne vallée entr'eux & la ville, pour les enclorre: puis remonta sur vne montaigne, & vint descendre tout à cop sur eux, en escriant son enseigne. Et ainsi furent encloz & enuironnez, & tous ceulx qui estoient yssus mors ou prins. Adonc s'estourny le commun de la ville, & s'arma chacun. Car la porte estoit ouuerte, & les chaïnes laschées. Et vindrēt ceulx de l'ost à bannière desployée iusques à la barriere. Et mesmement le Roy Henry tenoit vn arc en sa main, dont il lançoit aux Espaignolz, en leur escriât: Foles gens, enragez, autresfoiz auez esté de ma partie, & ores me refusez. Mais vous en mourrez tous à douleur. Car ia Pietre ne vous en fera à garant. Et se ie vous prens par force, ie feray ardoir tous les Iuifs & Sarrafins. Et tant fist Henry par sa Cheualerie, que à force rebouta ses ennemis dedens leur porte. Et quant le Chastelain, qui anciennement estoit en la tour, vit que Henry les contralyoit ainsi, si fist getter sur lui pierres & cailloux, & lui escria: Par ma foy, Henry, ce ne vous vaut riens. Car ainçois aurons nous mengiez toutes les bestes, qui sont ceans: & apres mengerons li vns l'autre par rage de faim, se le Roy Pietre ne meurt entretandiz, ainçois que à vous nous rédons. Lors recommença fier assault, qui dura iusques à Soleil couchant, auquel se trouua moult bien le Roy Henry, & ausi fist le

Besgue de Villaines, qui hardi Cheualier estoit. Mais ladite ville estoit close tout autour de fort murailles, & de parfonds fossez. Et ceulx de dedens se retrayrent, qui attendoient le secours de Pietre. Mais le landemain matin ledit Besgue manda tous les Cheualiers de l'ost, & fist drecier fourches à encrouer tous les prisonniers, en despit de tous ceulx de la cité, & pour les courroucer. Et ainsi comme on faisoit iceulx prisonniers prendre, l'un d'eulx qui riche bourgeois auoit esté, requist aux gens du Roy Henry, qu'ilz le feissent parler à lui, & pour son grand prouffit & honneur. Et lesquelz le menerent deuant ledit Roy, qui tantost lui demanda, pourquoy ceulx de la cité lui estoient si cōtraires, lesquelz auoient esté n'agaires à lui. Sire, dist le bourgeois, ie le vous diray. Il fu vray, que apres la bataille de Nadres, le Roy Pietre nous prist, pour ce que nous n'auions aucun confort de vous. Et adonc nous iurasmes, & fismes le serement, grans & petiz, que iamaiz audit Pietre ne fauldrions. Et si sçay vne autre cause, qui nous a tenu si orgueilleux contre vous, laquelle ie vous diray, se vous me voulez respiter de mort, & autrement non. Adonc lui octroya le Roy, mais qu'il deist verité, il auroit la vie sauuée, & ne mourroit point. Lors icelui bourgeois dist au Roy: Sire, gardez vous de Pietre, ou il vous deceura. Car le Roy de Belmarin lui enuoie vn secours de dix mille Sarrafins des plus fors de

la terre, lesquelz viennent par la mer: & brief-
 ment arriueront, se arriuez ne sont par deça. Et
 ledit Pietre vient par terre, qui avecques soy a
 vingt mille hōmes, lesquelz amaynent avecques
 eulx vitaille pour boire & mengier, & cheuau-
 chent toute nuit, & non de iours: mais se repo-
 sent & prennent leurs logeys en boys & forests.
 Car bien vous cudent soupprendre & deceuoir.
 Quant le Roy Henry l'entendi, si lui mua tout le
 sanc, & dist au bourgois, que bié s'en garderoit.
 Tantost enuoya vn message deuers Bertran, qui
 estoit à Molines, & lui escriui ces nouuelles. Et
 quant Bertran oy lire les lettres, si dist à ses gens.
 Il nous fault aler aidier au Roy Henry nostre a-
 my, encontre le faulx Pietre nostre ennemy, qui
 les Sarrafins a amenez en cest pays-cy. Et Oliuier
 son cousin, & les autres Bretons respondirent,
 que grant volenté en auoient. Adonc monte-
 rent sur leurs cheuaulx, armez & ordenez com-
 me bonnes gens d'armes, qui moult estoient en-
 talentez de combatre. Lors fist Bertran sauoir
 au Roy Henry sa venuë, & comme lui & ses gens
 alloient deuers Toulette. Et aussi enuoya ses
 cheuaucheurs deuant, pour espier l'ost du Roy
 Pietre.

*De la seconde bataille, où Bertran vint au secours du Roy
Henry, qui desconfit Pietre, & vingt mille
Espaignolz Chrestiens, & vingt
mille Sarrafins & Iuifs.*

CHAPITRE XXXVII.

OR vous dy que Dam Pietre, lequel estoit parti de la cité de Sebile la grant, & emmenoit avecques soy dix mille Espaignolz Chrestiens, & autres dix mille tant Sarrafins comme Iuifs, qu'il auoit gettez d'icelle, cheuaucha tant qu'il vint au port de Toulette, où il trouua les dix mille Sarrafins venuz par mer du Royaume de Belmarin, lesquelz l'Admiral lui presenta, en disant qu'il tenist bien les conuenans qu'il auoit au Roy de Belmarin cy deuant desclairiez; c'est assauoir qu'il deuoit renoncier à la loy Chrestienne, & prendre la loy Sarrafine; & aussi la fille dudit Roy à femme, laquelle il deuoit faire Royned'Espengne. Et Pietre respōdi; le le desire moult, „ mais or me vueillez aidier & conforter, parquoy „ ce faulx bastart, qui ainsi menuist, puis estre mis „ à fin. Et n'en doubtez, dist l'Admiral, que nous le „ vous liurerons, & puis fera mené en Belmarin „ deuers le Roy, qui en fera faire iustice comme „ d'un larron. Lors dist Pietre, ie m'y accort. Nous „ cheminerons ennuit, & demain leur courrons

fur à Soleil leuant. A ce se accorderent tous,
 mais assez tost oyrent estranges nouuelles. Car
 Bertran le suiuiot au dos, qui bien sauoit leur
 embusche; & manda au Roy Henry, qu'il venist
 bien tost encontre lui. Lequel se parti auant iour
 du siege de Toulette, où il leffa l'Archeuesque,
 pour le garder. Et aussi y fist demourer la Royne
 sa femme. Puis se mist au chemin tout coyemēt,
 & sans sonner trompette, & manda par ses mes-
 sages à Bertran, qu'il venoit, lequel auoit la nuit
 reposé à deux lieuës pres de Pietre & de ses gens,
 sans ce que nulz d'eulx en sceust rien. Et ledit
 Pietre, qui s'estoit auencié pour surprendre Hé-
 ry deuant Toulette, qui est à dix lieuës près du-
 dit port de mer, auoit fait logier ses gens sur vne
 riuere; quant vne espie lui vint dire, qu'il se gar-
 dast, & que le Roy Henry cheuauchoit encontre
 lui. Et quant Pietre l'entendi, si n'ot en lui que
 courroucier, & maudissoit son frere, en le appel-
 lant faux larron, bastart, qui d'Espengne le vou-
 loit chacier. Et dist Pietre, que à lui vouloit as-
 sembler, & moult estoit hardi Cheualier, & de
 grant courage, pour acheuer bataille. Adonc fist
 sonner trompes, nacaires, & bugfines; & s'en alla
 enuers Toulette monté sur vn destrier de Surye,
 plus courant que nul autre, lequel auoit esté au
 Roy de Damiette, & puis à celui de Belmarin,
 qui audit Pietre l'auoit donné. Lequel cheuale-
 roit de diuerse couleur, & nulle foiz n'estoit las-

fé, ne pour trauail ne s'estanchoit. Et fu ceste bataille à vn Mercredi enuirō heure de disner. Et là veissiez deux freres desirans de exillier l'vn l'autre. Et à l'assembler des deux costez baissierent les glaiues, & drecierent contre mont bannieres & panons. Mais le Roy Pietre broicha de l'esperon tout parmi la bataille, de si grant force, que ce qu'il encontroit il trespuchoit. Et quant le Belgue de Villaines l'apperceut, il vint à l'encontre de lui, la hache en teste, & le fist despasser & retourner, voulzist ou non. Et là commença d'vne partie & d'autre fiere bataille, & y furent trespuchez maint panon, & maint Cheualier. Mais le Roy Henry y abatoit Sarraïns à destre & à senestre, & pour certain qui cheoit il estoit mort, se tantost n'estoit secouru. Si se deffendoient les Sarraïns en assaillant les Chrestiens de lances, de dars, & de faussars esmouluz. Et tellement y feroit l'Admiral de Belmarin, que chacun lui faisoit place. Et eust esté le Roy Henry desconfit, quant Bertran du Guesclin y furuint, avecques lui son frere Oliuier, Oliuier de Mauny leur cousin, & son frere Alain, & avec vn gentil Escuier nommé Caraenloet, avec leurs gens: lesquels escrierent Guesclin haultement. De leur venue fu Pietre moult courroucié, & le Roy Henry moult ioyeux. Et là y ot forte bataille recomécée, où maint homme fu occis des membres, ou affolé. Mais ledit Henry poursuiuoit l'Admiral,

miral, qui ses gens auoit le iour moult traueilliez. Si demanda à ses gens vne lance, laquelle lui fu baillée ferrée de fer tranchant & agu. Adonc vint broichant encontre ledit Admiral, lequel il fery sur son escu, tellement qu'il perça les armures & corps tout oultre, & abati icelui Admiral tout mort à terre. Là y ot grant noyse & criée de Sarrafins, qui lors se reculerent. Et Bertrand du Guesclin, qui estoit comme tout forsené, abati la banniere du Roy Pietre, & tresbuscha par terre en sa presence. Et Oliuier du Guesclin s'y porta vaillamment, en ferant d'une hache d'acier à deux mains, tant comme il pouoit. Aussi Caraenloet fery d'une hache à deux mains vn Cheualier nommé Iehan du Maynel, Maistre Conseiller du Roy Pietre, & l'assena sur l'espaule en telle maniere, qu'il l'abbati tout mort sur les champs. De ce moult lié le Roy Henry, & le Besgue de Villaines aussi, qui escrioit son enseignee, & dist à Caraenloet: Benoitte soit la mere qui te porta. Et se party lors ledit Besgue de là où il estoit, & se mist au fenestre lez deuers la mer, pour eulx destourner les pors. Et quant Pietre le vit, le sanc lui mua. Car il estoit courroucié parauant de la mort de son dit Conseiller. Si se tint par tout desconfit. Et ainsi, tant par son aduis, comme par le conseil d'un sien Chambellan, qu'ilz partirent de place, & le dist ou fist dire à ses plus priuez, & que tantost se meissent à

garant, se ilz vouloient auoir la vie sauue. Lors se trayrent deuers vn bois, à l'entrée duquel ot tref-mortelle bataille, & moult de genz occis, & moult de cheuaulx tuez & espaulez. Là furent Paiens & Sarrafins tumbéz par terre. Et n'en demoura pas de dix mille, qui estoient, la valeur de cinq cens en vie, & enuiron six cents Espaignolz Chrestiens, bien montez, lesquelz se bouterent en ladite forest avec Pietre, qui en icelle eust esté poursuy & pris. Mais Bertran s'arresta, & fist arrester les siens, pour doubte que en ladite forest n'eust grosse embusche. Mais non pourquant ilz seiournerent là endroit bien l'espace de deux lieuës, & enuoyerent plusieurs coureurs en icelle forest, pour cercher de toutes pars. Et aussi regarderent bien de tous costez enuiron eulx. Et quant ilz apperceurent, que ledit Pietre s'enfuyoit, si l'enchaïsierent à force de cheuaulx. Car il s'en fuyoit tant comme il pouoit, iusques à tant qu'il vint à Montesclore ville fermée, où il fu receu. Mais gaires n'y arresta, ainçois s'en foüyrent lui & sa gent, quant vn pou furent rafraichiz, & se retrayrent deuers la mer, pour doubte de Bertran & des leurs. Mais pour neant y alloient. Car il n'y auoit barge ne bargot, pour ce que les Sarrafins, qui estoient cinq cens demourez du nombre de dix mille, auoient emmené tout leur nauire en Belmarin.

De la tierce bataille d'Espengne entre les Roys Pietre & Henry, lequel y fu seconde fois vaincu, & parauant reffusé à Montjardin, & comme Montesclaire se rendy au Roy Henry: & tout par l'aide Bertran, & des autres François. Lequel Bertran fu adonc fait Duc de Moulines.

CHAPITRE XXXVIII.

TANTOST comme ledit Pietre se fu party de Montesclaire, vint le Roy Henry deuant icelle ville à banniere desployée, & hucha aux barrières à ceulx de dedens, comme ilz parlassent à lui. Et le Capitaine qui estoit en vne belle tour, recognut bien le Roy à sa targe. Si lui demanda qu'il vouloit. Et le Roy Henry si lui dist: Bonnes gens ie vous prie que vous me rendez ceste ville. I'ay gainnée Toulette, & desconfit Pietre & ses gens. le vous ay en conuenant sur ma foy, que ie vous en sauray bon gré, & abatray toutes fausses coustumes, & aux anciennes vous maintendray. Et quant le Chastellain l'entendi, si l'octroya. Adonc furent ouuertes barrières & portes. Et entra dedens le Roy & ses gens, qui icelle nuit se logierent. Et donna le Roy icelle ville au Besgue de Villaines, & à Bertran donna la Duchie de Molines, & la ville de Burs. Et le landemain se deslogierent de Montesclaire, &

môterent sur leurs cheuaulx tous armez, & prests receuoir bataille. Car moult estoient courageux & hardiz. Et le Roy Héry les amonneſtoit moult de conquerre, & leur promettoit qu'il les prouuerroit tous chacun ſelon ſon eſtat, & ainſi comme le Pape fait les Clers de benefice. Si iurerent tous, qu'ilz pourſuiuroient Pietre iuſques à la mer, ainçois qu'ilz ne l'euffent. Et vindrent à vne belle Abbaye & belle place nômée le Port ſainte Marie, où ilz repouſerent iuſques à tant que vne eſpie vint dire au Roy Henry, qu'il trouueroit Pietre en la ville de Montjardin, & qu'il l'auoit encontré deuant les portes de la ville. Donc môterent à cheual pour aler apres. Mais ledit Pietre vint ainçois, & ſes Cheualiers auecques lui, iuſques aux portes de la ville deſſuſdite; d'ôt il trouua la porte bien fermée & verroullée. Et le Capitaine, qui en la tour eſtoit, le reconnut bien; lequel ſauoit bien ſa perte, & ſa felonnie. Si lui demanda qu'il queroit à ce manoir. Et Pietre lui reſpondi: Suis voſtre Seigneur, qui vous prie humblement, que vous leſſiez entrer moy & ma compaignie. Et le Chasteſſain lui reſpondi: Vous parlez de felonnie. Car iamais en voſtre viuant n'y entrerez. Alez vous en decy, Dieu vous maudie. Vous eſtes ſi felons, que chacun renonce à vous. Car vous auez renoncié la loy Chreſtienne. Si n'eſtes pas digne de tenir terre. Et ſe decy ne partez bien toſt, on vous enuoyera vne pierre pe-

fant. Et quant Pietre se vit ainsi refusé à Mont-
 jardin, si fu moult courroucié, & se mist à la voie
 tout le grant chemin. Et n'ot pas cheuauchié
 plus de six lieues, qu'il encontra vn Espagnol
 moult traueillié, & son cheual folé. Auquel Pie-
 tre, qui bien le recognut, & il lui aussi, demanda
 dont il venoit. Et icelui Espagnol respondi, que
 à lui estoit enuoïé de par Dam Ferrant de Castre,
 & les Maistres de saint Iacques & de la Carcelle,
 qui le venoient secourir, à tout seize cents hom-
 mes richement montez & armez. Haa! dist Pie-
 tre, comme ie suis liez! Car grant mestier en auo-
 ie. Car de pres me sieuoient le traïstre Henry &
 Bertran le forsené, où il a plus de hardement en
 tout le barnage, qui est demouré en Espengne &
 en Galice; & Oliuier son frere, & le Besgue de
 Villaines, qui tant sont redoubtez, & plusieurs
 autres, qui me veulent tollir ma Royaulté, & ont
 asseigiée Toulette, qui pour moy seuffre moult
 de peine. Alez à Dam Ferrant, & le me saluez: &
 si lui diêtes, que ie exploitteray tant, que ie le
 trouueray. Ainsi Pietre cheuaucha tant, qu'il
 trouua les dessus diz & leurs gens logiez en vn
 pré, lez vne fontaine: lesquelz auoient fait leurs
 logeys d'arbres feulluz. Et tantost cōme ilz choi-
 firent Pietre, lequel ilz recognurent premier
 pour son cheual, ilz alerent à l'encontre de lui.
 Et ledit Pietre descendi à terre. Puis se plaigny à
 eulx de Henry & de Bertran, qui trop lui auoient

„ fait de maulx. Ce poise moy, dist Ferrant. Nous
„ vous aiderons des gens qui cy sont. Grans mer-
ciz, dist Dam Pietre. Lors se assirent au disner. Et
tantost vindrent là vn cheuaucheur & vn cou-
reur, qui dirent à Pietre, qui de pres verroit deux
cens hommes d'armes des gens de Henry, qui les
venoit espier. Dont ledit Pietre ot grant ioye.
Car ses gens estoient bien deux mille, desquelz
il prist cinq cents, qu'il chargea au Maistre de S.
Iacques, & les enuoya encontre les deux cents
dessus diz. Puis dist à icellui Maistre, que se be-
soing lui suruenoit, que il le lui feist sçauoir. Et
il respondi, que si feroit-il. Adonc mena ses gés
derriere vne haye, & les fist to⁹ descēdre de leurs
cheuaux, & mettre à pié. Et lors venoit Caraen-
loet, qui menoit les dessus diz deux cents hom-
mes, pour happer la proye, espier le Roy Pietre,
& lui toulir son chemin. Si deualerent lui & ses
gens en vne vallée. Et ceulx de l'embusche mon-
terent à cheual, & les crierent au dos, en criant
saint Iacques haultement. Quant Caraenloet
„ l'oy, si dist à ses gens; Nous ne pouons bonné-
„ ment eschapper sans auoir bataille. Et quant il ot
apperceu leur argu, il ordonna ses gens bien &
hardiement. Puis s'en vint deuers les Espaignolz
en escriant Guesclin tant cōme il pouoit à haulte
voix. Et fery le Maistre de saint Iacques si roi-
dement d'un glayue, qu'il lui perça toutes ses ar-
meures, & tellement le rencontra de corps & de

pys, qu'il l'abaty par terre lui & son cheual. Et là fu tellement assailly de glaiues & d'espois, qu'il fu nauré à mort. Et quant Espaignolz le sceurét, si leur en desplut moult. Et assaillirent les François, qui moult fort se defendoient. Et au commencement n'y ot cellui, qui n'abatist le sien ius. Mais la force paist le pré. Car les autres estoient cinq contre deux: qui n'estoit pas iuste partie. Et aussi leur venoit secours. Parquoy les François furent esparpeilliez & reculez iusques à vn au-
noy. Et quant Caraenloet vit comment la chose aloit, si descendi, & entra lui neufiesme tout à pié dedens le boys. Si s'en foüy par ronces & espines, tant qu'il estoit tout deschiré, & que le sanc lui failloit du corps en plusieurs lieux. Et les autres demourerent tous mors sur le champ, que les Espaignolz conquirent: lesquelz en emporterent ledit Maistre de saint Iacques. Tant ala ledit Caraenloet à pié, sans tenir ne voye ne sentier, qu'il vint en l'ost de Bertran, qu'il trouua, & le gentil Besgue avecques lui. Si leur compta son auenture. Et Bertran lui dist: Or vous apaisiez. Car il cō-
uient vne foiz perdre, & l'autre gaaignier. Il n'y a que du bien faire. Lors enuoya Bertran ses cou-
reurs deuers le Roy Pietre, pour auoir son estat; Lesquelz le lui relaterent. Et tantost Bertran enuoya deuers l'ost d'icellui Pietre deux cens hommes d'armes tresbien montez & armez. Et quant icelui Pietre les apparçut, si vint chapplier en-

contre eulx : & avecques lui Ferrant de Castres. Et là commença forte bataille ; où l'auant-garde eust esté desconfite ; quant Bertran y suruint, & Oliuier son frere avec ledit Henry, & maint autre Cheualier, qui vindrent à la requeusse. Lesquelz s'y prouuerent tellement, & par especial le Roy Henry, Bertran du Guesclin, Oliuier son frere, le Besgue de Villaines, & Oliuier de Mauny ; que le Roy Pietre fu desconfit, & getté de place, & s'en fuy parmy les forests, avecques lui trois cents hommes, desquelz estoit Ferrant de Castres, qui moult estoit courroucié de ce que ledit Pietre estoit si bien monté. Car il ne le pouoit aconfuiure ne attaindre, de l'espace de cent arpens de terre. Et estoit icellui Pietre sur vne montaigne deuant tous les autres. Et quant Ferrant le vit, si dist tout bas à soy mesmes, que à tous les deables d'enfer fust Pietre commandé, & qui plus le suiuroit, damné püst-il estre. Adonc se assura, & prist son chemin deuers Galice, d'ot il estoit maistre. Et quāt Pietre, qui cheuauchoit tant comme il pouoit, regarda entour soy, & se vit tout seul ; si se reclama chetis malheureux, & dist qu'il estoit le plus meschant Roy, qui oncques mais fu couronné ; quant il estoit ainsi attrappé par vn bastart. Si commença fort à maudire Bertran, le Besgue, & Oliuier de Mauny, lesquelz le suiuoient. Mais il les auoit esloingnez plus de deux lieues, dont Héry estoit moult cour-

courroucié, pour doubte qu'il ne lui feist encor ennuy & villenie. Tant cheuaucha Pietre, qu'il vint à Montrasent. Mais il n'y osa entrer ne gesir la nuit, ainçois monta és desers, & costoya la haulte mer.

De la quatriesme bataille d'Espengne, où Bertran desconfit les Sarrafsins venuz en l'aide du Roy Pietre. Lequel Roy en allant querir iceulx Sarrafsins, & autres, fu vendu sur ladite mer à vn Iuif.

CHAPITRE XXXIX.

TANT cheuaucha Pietre, qu'il vint à vn port de mer nommé Orbrie, où il trouua maint nef, & entre les autres vne toute chargée pour aler en Saurie. Si dist aux mariniers, que pour Dieu lui sauuaissent la vie, & qu'ilz pouoient plus gaaingner à lui, que en tout l'auoir, dont la nef estoit chargée. Qui estes vous? dist le Maistre de la nef, ne le me celez pas. Et Pietre respōdy, qu'il estoit le plus malheureux qui fust soubz le ciel, & le plus hay du monde. Si lui prioit, que plus ne lui en demandast. Et le marinier dist, qu'il vouloit fauoir sa vie. Car bien lui sembloit qu'il venist de bataille desconfite. Et il respondit, que ce faisoit mon, & ne lui estoit demouré homme nul de ses gēs. Certes, dist le marinier, c'est moult grant folie, & trop mal est la bataille commen-

cée, dont nulz n'eschappe. Lors dist à Pietre, Comment vous appelle-on? il semble bien que vous n'aiez pas esté tousiours oyseux. Car vous auez bon cheual, & bié sentant l'esperon. Amis, dist Pietre, c'est raison, que celui qui a tout perdu, soit adez moquiez. Lors entra en ladite nef vn Iuif neze de Sebile nommé Salomon, lequel reconnut bien Pietre. Et quant le marinier l'entendi, si l'appella larron, glouton, & iura qu'il le feroit noyer. Car il auoit fait murdrir sa femme, & estoit pire homme, qui fust ou monde. Dont il commanda à ses gés, qu'il fust getté en la mer. Car c'estoit le faux traicte, que chacun deuoit hayr. Et aussi comme il auoit perdue sa terre & son Royaume, c'estoit raison qu'il perdist la vie. Adonc l'alerent saisir quatre varlez par bras, & par iambes. Mais Pietre se mist à deux genoux, & commença à plourer en la presence des mariniers, ausquelz il pria & requist, qu'ils voulzissent auiser par quelle rençon il leur eschapperoit; & que tant feroit deliurer à eulx or & argent, que eulx & leurs parens en seroient tous riches. Adonc ledit Iuif dist, qu'il le aचेpteroit, & dōroit l'argent comptant. Ainsi fu Pietre rendu, ne oncques mais ne fu Roy ainsi demené. Et à ce doiuent tous prendre exemple. Car si tost comme fortune veult retourner sa roë, celui qui est mōté au plus hault elle fait descendre au plus bas, comme elle fist ce meschant Roy par son pechié.

Et pour ce fait-il bon auoir son esperance à Dieu & à ses commandements garder.

MAIS au Roy Henry vueil retourner, & à Bertran, & aux autres Barons, qui apres la descōfiture dessusdite faite, retournerent au siege deuant Toulette, où ilz trouuerent la Roïne & le bon Archeuesque, & leurs gens. Et pour certain ledit Henry cuidoit que Pietre ne deüst iamais retourner, mais si fist. Et ceux de l'ost, qui moult estoient ioyeux de la victoire, demandoient se ledit Pietre estoit mort ou pris. Et li autres disoient, qu'il s'en estoit fuy. Mais ceulx de dedens la cité estoient moult courrouciez du secours, qui tant demouroit. Car ilz ne sauoient nouuelles de Pietre, & si auoient grant souffretté de viures. Et pour ce estoient les aucuns d'eulx en propos de eulx rendre, & les autres non, & n'en sauoient quel auis prendre. Car le Chastellain ne se vouloit absenter. Et ne pourquant fu le conseil pris, qu'ilz se rendroient: lequel eust esté tenu, ne fust vn Sarrafin, qui à miennuit entra par vn faux potis. Lequel assembla quant il fu iour le conseil de ladite ville, auquel il dist: Seigneurs, ie vous „ diray nouuelles, dont vous aurez grant ioye. Ie „ viens de la cité de Sebile, & vous mandent par „ moy les gens des trois Loiz qui y sont, qu'ilz ont „ eu certaines nouuelles du Roy Pietre, lequel est „ ou Royaume de Belmarin, & vous salue, & si „ vous mande, que vous ne vous rendez point à „

» Henry, à Bertran, & aux autres François. Car il
» amerra dudit pais tref-grant secours du peuple
» Sarrafin. Et desia en atant enuoyé le Roy de Gre-
» nade, qui sont logiez en ladite cité de Sebile, que
» tous les hostelz en sont plains & deuant & der-
» riere. Et quant le Chastellain entendit ceste pa-
» rolle, si dist à ceulx de Toulette: Or vous tenez
» bien, grans & petiz. Car se vous vous acordez à
» Henry, ie perdray la cité en feu Gregoys. De ce
furent les aucuns moult doulens. Mais Henry
fist charpenter tant d'engins, qu'il en ot douze
dreciez deuant la porte, & assaillirent nosdites
gens ladite cité.

O R vous vueil parler de Dam Pietre, qui che-
uy à son maistre par or & par argent, & fist tant
qu'il vint ou pays de Belmarin, en vne bonne ci-
té nommée Sarmaranc. La nuit se reposa iusques
à landemain iour qu'il se leua moult courroucié,
& par desesperance dist à son Escuier. Que ain-
çois renoyeroit-il Dieu & sa mere, qu'il n'eust
vengence à son vouloir du Roy Henry, qui ainsi
l'auoit dechacié, & aussi bien de Bertran, du Bes-
gue, & Oliuier de Mauny, qui ainsi l'auoient
courroucié. Et quant le Roy de Belmarin, qui
hardi Cheualier estoit, mais trop heoit la loy
Chrestienne, sceut la venuë de Pietre, si lui man-
da qu'il venist parler à lui en son Palais. Lequel y
vint, & salua moult reueremment le Roy, qu'il
trouua accôpaigné de Sarrafins, moult noble-

ment vestuz de riches draps d'or, & autres euures Sarrafinoises. Auquel Roy ledit Pietre fist plainte de Henry & de ses gens, qui ainsi lui touloient son Royaume: & que se icelui Roy ne lui aidait, Pietre n'y auroit iamais riens. Adóc ledit Roy de Belmarin lui dist à haulte voix: Roy d'Espégnie, ie vous cognoiz assez; tousiours auez amez Tartois & Sarrafins, & leur auez par plusieurs foiz porté amour. Et par la foy que ie doy aux loiz qu'ilz tiennent, & celles de Babilonnois, ie ne vous fauldray ia tant comme ie soye Roy, mais que vous vueillez aorer noz Dieux. Et si ay deux belles filles, dont vous aurez l'vne, laquelle que vous voudrez. Adonc vindrent les pucelles entretenantz par les doiz, lesquelles adestroient Payens, en les tenans par les vestemens. Et estoient couronnées de fin or d'Arabie ouurées à grosses pierres precieuses, & à grosses perles. Et moult estoient richement vestues. Si les assist le Roy leur pere ou hault doys. Adonc sonnerent Menestreux plusieurs instruments, & moult y auoit grant noblesse: & telz beubans demenoient à celle feste, qu'il n'est homme Chrestien viuant, qui le peust croistre, se il ne l'auoit veu. Icelles deux filles estoient nommées l'vne Marie, & l'autre Mōdaine, que le Roy Pietre vit presentes. Lors ledit de Belmarin prist vn baston, qu'il leua contre-mont, puis dist ainsi: Roy d'Espengne, or m'entendez. Vn bastart vous a tolu vostre heritage,

„ dōt estiez fieffé. Mais en despit de tous les Chre-
„ stiens, & du Dieu en qui ilz croyēt, que ie ne pri-
„ se rien, ie vous rens icy vostre cité de Burcs, &
„ tout vostre Royaume, & trente mille Sarrafins
„ bien armez, & ma fille Mondaine, qui est tant
„ belle, laquelle vous espouserez à vostre voulen-
„ té. Sire, dist Pietre, ie le vueil ainsi. Car ie suis de
„ vostre loy, & vous ay donné mon cuer, sans pen-
„ ser aucune fausseté. Vous dites bien, dist le Roy
„ de Belmarin, mon filz Alectaire conduira voz
„ gens, lequel n'a pas vingt ans d'aage. Mais il n'a
„ en ce pays si bel Cheualier, ne si bien fourmé de
„ iambes & de membres *. Et quatre oncles Roys
„ Sarrafins, dont l'aîné est le Soudent de Damas,
„ li autres est Roy de Hierusalem, & le tiers Roy de
„ Satalie, qui est de mon costé, & le quart Roy de
„ Grenade, qui tant de courtoisie vous a faite, qu'il
„ a enuoyé oultre la mer vingt mille Sarrafins à
„ Sebile la grant, pour leuer le siege de Toulette.
„ Si conuient vous haster pour secourre ceulx de
„ dedens, qui bien & loiaulment se sont portez
„ enuers vous. C'est voir, dist Pietre, ie leur ren-
„ dray leur bonne loiaulté. Adonc manda le Roy
„ de Belmarin, & fist assembler ses gens, & son na-
„ uire apprestier, & auitailler de plusieurs viures
„ d'eauë doubce, & garnir d'escuz, de bonnes lan-
„ ces, d'espées, de trefs, tantes & paueillons, ban-
„ nieres, panons, artilleries, & tout autres choses
„ pour eulx necessaires.

LORS estoient en ladite cité deux pellerins Chrestiens, nez du pays de Gascongne, nouuellement retournez du saint Sepulcre, nommez l'un d'iceulx Pierre Flouron, & l'autre Iamet de la Riolle, lesquelz estoient logiez avecques les autres Chrestiens, dont en ladite cité demouroient bien trois mille, par truage d'or & d'argent. A aucuns desquelz iceulx pellerins demanderent, pourquoy les Sarrafins faisoient tel appareil. Et ilz leur conterent tout le fait. Dôt lesdiz pellerins furent moult doulens pour l'amour de Bertran; & moult desiroient comme ilz le lui peussent faire sçauoir, afin qu'il fust pourueu pour y obuier. Lors entrerent en la mer, & tant sanglerent au vent & aux estoilles, qu'ilz arriuerent à vn port de mer en Espengne nommé Môt-fusain, où il a vn chastel assis ou sablon. Et ne pourquant ilz aloient en grant doubte, pour ce qu'ilz estoient hommes du Prince, qui le pays auoit fusté villainement. Ouquel chastel auoit vn vaillant Chastellain, auquel ilz allerent demander l'aumosne, pour couvrir leur estat, & celer le pays dont ilz estoient, que les Espaignolz heoiét parfaitement. Et la vint la Chastellaine, qui moult estoit belle Dame, moult vaillant, & de noble lignée; laquelle regarda les pelerins. Si leur dist, que en l'honneur de Iesus-Christ, qui reçut mort, passion, & au tiers iour ressuscita, & vint à vie, que ilz venoient de requérir pour auoir remis-

sion de leurs pechiez, elle leur donroit à soupper à son donion. Donc les emmena, & les fist seruir de vins & de viandes. Et quant ilz ourent souppé, & que tous furent leuez de table parmi la sale, la Dame les trayst, & appella d'une part, & leur enquist des nouuelles de la sainte cité, où nostre Seigneur souffry passion: Dame, dist l'un, nous y auons esté, & dedens Betleen, où il naqui de la Vierge, & sur le mont de Cauuere: & si auons baissié le saint Sepulcre, où les freres du Temple ont tousiours chanté. Puis leur demanda ladite Dame, se les Sarrafins faisoient aux Chrestiens poines me griefts. Nennil, Dame, dient-ilz, se ce n'est depuis vn an en ça, qu'ilz ont oy dire, que en la Chrestienté a vn Chrestien, le plus hardy & le plus redoubté homme, qui soit ou monde: lequel a iuré, que s'il puet mettre paix en France & en Espengne, il yra en Surie conquerre le Royaume. Si en sont iceulx Sarrafins moult doulens & yriez, qui ainsi ont sceu son estat par les pelearins de France. Et ce Cheualier, qu'ilz craignent tant, si est nommez Bertran du Guesclin. Seigneurs, dist la Dame, ie le cognoiz assez. Il est avec le bon Roy Henry d'Espengne au siege deuant Toulette. Et m'a l'en recordé pour vray, que ceulx de dedens ont moult grant famine. Maiz ilz attendent le secours de Pietre, lequel si comme on m'a dit, est getté & noyé en la mer. Maudite en soit l'ame. Car oncques ne fist bien

en

en sa vie. Et les pelerins entendirent ceste parole. “
 Si dist l'un d'eulx: Dame, pour certain Pietre n'est “
 pas mort. Car nous l'auons veu par dedens Bel- “
 marin, vne terre peuplée de Sarrafins, & lui a le “
 Roy présenté sa fille, & baillé son filz avec vne “
 assemblée & grant ost de gens si bien ordonnez, “
 que oncques telz ne furent veuz. Et seront tous “
 prests dedens quinzaine. Quant la Dame l'oy, si “
 fu toute effroyée. Car elle amoit moult le Roy
 Henry, pour ce qu'elle estoit de son extraction
 de par la riche Donne mere dudit Roy. Et fu y-
 rée, que Pietre n'estoit mort, & liée de sauoir ces
 nouuelles, afin de les denoncier au Roy Henry
 son parent. Pour lesquelles nouuelles elle donna
 aus dessusdiz pelerins cinquante doubles d'or à
 leur partement. Et tantost s'en party ycelle Da-
 me lui troisieme sans plus, vestus en guise de pe-
 lerin, & tant chemina qu'elle vint deuant Tou-
 lette en l'ost, où elle trouua la Royne, qui doub-
 cement la recueilly, & lui donna vn riche habit,
 puis la mena en la tente du Roy, où les Barons a-
 uoient esté à conseil, qu'ilz pourroient faire de
 Toulette, qui ainsi se tenoit contre eulx. Et e-
 stoient tous d'acort qu'ilz departiroient leur ost
 en deux parties, dont l'une demourroit audit sie-
 ge, & l'autre yroit asseigier la cité de Sebile, pour
 ce que les gens des trois loys estans en icelle e-
 stoient en propos de prendre Henry à Seigneur.
 Car les vns se tenoient à Henry, & les autres à

Pietre. Et tantost que le Roy vit ladite Chastel-
 laine, si la recognut, & l'acola à deux braz, en di-
 „ sant: Belle cousine, que estes vous venuë faire par
 „ deça? & quel besoing vous amayne icy? Adonc
 lui deuifa le fait de Pietre & de l'armée des Sar-
 rasins, qu'il amenoit pour leuer ledit siege, & cō-
 battre iceulx qui le tenoient, tout en la forme &
 maniere que les hostes pellerins lui auoiēt com-
 pté. Et quant Bertran, qui estoit present, enten-
 „ di ces parolles, si dist au Roy: Sire, ne vous mar-
 „ rissiez point, mais ayez fiance en Dieu, & il vous
 „ aidera, & punira vostre frere, qui a la loy reno-
 „ yée, & lessiez venir qui voudra. Car tant y en
 „ vendra, & plus y en demourra. Ne vous esbaissiez
 „ point. Car ce sont tref-bonnes nouuelles, puis
 „ que les Sarrafins viennent à nous. Il ne nous les
 „ fault ia aler querir en Surye, ne saint Pere à Ro-
 „ me. Car nous le trouuerons à l'uis. Nous & noz
 „ gens demourrons cy, & enuoyerons tousiours
 „ noz espies sur les champs, afin que Sarrafins ne
 „ nous surprennent par leur engin ne de iour ne
 „ de nuit.

A PRES ce que icelle Dame fu moult noble-
 ment renuoyée en son lieu & conuoyée de bons
 Cheualiers, adonc arriuerent au port de Tou-
 lette, qui est à trois lieuës & demie pres, & au
 dessoubz d'icelle ville, vingt mille Sarrafins &
 Payens venuz du pays de Grenade pour secourre
 ladite ville. Et quant noz gens en fourēt les nou-

uelles, si se partirent de l'ost où ilz lessierent la Royne. Mais moult auoient forteffié leur siege pour vne grant bastille qu'ilz auoient fait deuât la porte, & fossez enuiron. Parquoy ceulx de la dite cité ne pouoient yfsir dehors. Si vous dy, que Sarrafins estoient descenduz à terre de lez le port. Mais Bertran leur failly à vn adiournemēt, & avecques soy le Besgue de Villaines, & Oliuier de Mauny, qui moult estoient hardiz. Lesquelz crioient Guesclin, Guesclin, moult haultement, & se bouterent hardement entre les Sarrafins, qui de cene se prenoient garde, & les assaillirent moult fierement; si que à la premiere emprainte en abbatirent bien sept mille, qui illec demourerent tous mors en la place. Et le demourant d'iceulx Sarrafins rentra viftement és nefes & basteaux. Puis drecierent leurs voiles, & se mirent en la mer nageans au vent. Maiz noz gens gaagnerent illec tentes & trefs, & avecques ce ioiaux d'or & d'argent: dont ilz orent grant ioye. Lequel gaing ilz departirent iustement, puis s'en retournerent enuers leurs ost au siege, & firent sonner bien cent tant araines que buisines. Et lesdiz Sarrafins, qui desconfiz estoient, s'en alerent culx rédre à Sebile, deuers le Roy, qui auoit illec amené moult grant planté d'autres Sarrafins dudit pais de Grenade; sans ceulx-cy, qui moult plaignoient leur perte, qui estoient demourez devingt mille Sarrafins. Et ainsi pouoiēt

estre environ treize mille Sarrafins. Et tantost apres ce, se party Pietre de ladite cité de Sebile, avecques son ost & assemblée, qui estoit estimée à soixante mille, qui auoient tant viures & armeures diuerses, que ennuieuse chose seroit de l'entendre, & encores plus de le raconter. Quelc ost auoit plusieurs Chrestiens nez de Sebile & d'environ, & les autres estoient Iuifs & Sarrafins; qui tous s'en alerent enuers Toulette, menaçans le Roy Henry & les siens. Moult demenoit grant * posmée Aleçtaire filz du Roy de Belmarin, lequel conduisoit ledit ost avecques le Roy Pietre, à qui il dist: Par Mahom nous auons assemblez nobles gens avec nous. Mais ilz sont de trois diuerses loiz, dont le moins y a de mon país. Si n'auray ia si grant fiance en ces felôs Iuifs ausi comme i'ay en payens de nostre loy. Et pourtant ie vous dy, que ie vueil que ma bataille, que ie conduiray, soit toute de Sarrafins s'il vous plaist; lesquelz se r'alieront tous à ma banniere. Et vous, qui estes Roy de grant renom, conduisez Chrestiens & Iuifs, qui sont de vostre contrée. Mais de ce ne sera ia besoing. Car tantost comme Henry orra dire, comme nous venons, & en quelle ordonnance, il lairra le siege sans nous liurer bataille. Car il ne nous attédroit pour rien. Dist Pietre, Ne pensez pas là. Car tant cōme il y ait avecques soy Bertrá, ne le Besgue de Villaines, qui a tant de renom, bataille ne nous

sera refusée. Et à ce ne pouons nous faillir. Car “
 Bertran n'en fauldroit pour tout l'or du monde. “
 Si pensez de combattre fort. Là auoit vne espie, “
 qui s'en ala en l'ost du Roy Henry, qui desia sa-
 uoit bien la venuë de Pietre. Lequel espie se a-
 genoilla deuant lui, & lui raconta les parolles en
 present dites, & l'estat dudit Pietre, & de Ale-
 ctaire, qui se vatoit, qu'il se doubtoit, que Chre-
 stiens ne s'en fussent fouyz. Car il ne les prisoit
 riens. A tant se tut, & le Roy Henry parla, & dist
 ainsi: Messieurs & amis, il nous conuient pren- “
 dre conseil sur heure, & qui le saura bon, si ne le “
 cele pas, comment Pietre & les siés puissent estre “
 receuz. Car se il n'est destruit, il me destruyra. Et “
 Bertran lui dist: Ne vous esbahyſſez, que ade * le “
 veu les gens serons tous mis à fin, & vous rendray “
 Pietre bien brief, se vous voulez croistre mon “
 conseil. Adonc le Roy & tous li autres dist, que “
 de Dieu fust-il maudi, qui l'en desdiroit. Sei- “
 gneurs, dist Bertran, or m'entédez ce que ie vous “
 diray. Se nous menons nostre ost encôtre le Roy “
 Pierre, nous prendrons la cité de Toulette par ce “
 point. Car ilz se rafraichiront à leur aise. Et pour “
 ce, s'il vous plaist, nous prendrons les trois pars “
 de cest ost, & la quarte partie laisserōs cy endroit “
 au bon Archeuesque, & assez des gens du plat “
 pais, que nous manderons maintenant. Si cuide- “
 ront ceulx de leens, que ce soient gens d'armes. “
 Puis nous partons au point du iour, & mandons “

„ dés maintenant à tous gens d'armes de bonnes
„ villes & garnisons de chasteaulx, qu'ilz viennent
„ à nous, & sans point arrester soit fait hastiuemēt,
„ & alons assaillir hardiment le Roy Pietre, sans
„ lui riens doubter : & nous descōfironz lui & tou-
„ tes ses gens, & en verrōs fouyr de son costé Chre-
„ stiens, Iuifs, & Sarrafins, se vous me voulez croif-
„ re & vser de mon conseil. Car nous sommes tous
„ Chrestiens, & d'une opinion, qui voulons sou-
„ stenir, foy, raison, & droit. Et noz ennemis sont
„ gens variables & de diuerses loiz. Si soions tous
„ preudommes, & ie vous iure par Dieu, qu'il nous
„ aidera, selon mon entente. Car oncques mais si
„ noble iournée n'auint à gens d'armes. Car tout
„ le plus pouure de nous ie feray riche. Haa! Ber-
„ tran, dist Henry, comme tu es preudomme! Il ne
„ fera ia destruit qui te voudra croifre, & se chacū
„ se vouloit acorder à toy, seroye briefmēt vengié
de Pietre qui tant m'a fait de traison, & mes gens
„ occis & destruis. Adonc parla le Belgue de Vil-
laines, qui dist, oyants tous, Que qui Bertran ne
croifroit, ia n'eust son ame pardon. A ce se acor-
derent tous, & tout ainsi comme Bertran l'ot de-
uisé, ordené, & conseillé, fu la chose faite. Et lais-
ferent audit siege la quatriesme partie de leurs
gens, & grant foison de gens du plat pays, qui fai-
soient grant visaige, ou monstre contre ceux de
la cité. Et le Roy Henry en emmena les trois pars
en certain lieu, où il assembla de plusieurs ses ci-

tez, villes, & chasteaulx, tant de gens d'armes, & de communes comme il pot. Et quant il les ot tous auouez, si les mena si auant, qu'il veoit bien l'ost du Roy Pietre aussi comme à vne lieue d'un chastel nommé Montuel. Puis enuoya deuant vingt cinq coureurs bien montez pour estimer leur ost, & quelles gens ilz estoient. Lesquelz coureurs se mirent en l'orriere d'un boys nommé le boys des Oliuiers. Et quant ilz orent estimé à leur aduis l'ost des Sarrafins, li vn d'eulx dist: Il n'aymera pas sa vie, que ceste gent assauldra, ne à eulx se combatra. Je croy bien que Bertran ne demourra ia vieulx. Il est trop hardi. Il se fera occire ieune. Ainsi en deuisoient les coureurs l'un à l'autre. Et illec auoit un Escuyer Breton Bretonnant, qui voa à Dieu aduventureusement, que iamaïs ne retourneroit deuers le Duc Bertran, iusques à tant qu'il eust iousté un cop de lance au premier homme d'armes qu'il verroit apparant de l'ost du Roy Pietre, fust Chrestien, Sarrafin, ou Iuif. Et s'il ne trouuoit à qui iouster sur les champs, il iroit auant iusques audit ost, cheuauchant. Tantost comme il ot ce iuré, il vit trois Sarrafins, qui s'esbatoient comme coureurs. Mais ilz estoient tref-bien armez. Tantost icelui Escuyer s'adressa enuers eulx, l'escu au col, & le glaïue ou poing, qui baissa & fery un d'iceulx Sarrafins du fer, qui estoit tranchant: en telle maniere qu'il lui perça cuer & corps tout

oultre, & au reffacher brisa foudit glaive. Puis traist l'espée, qui bien trancha, & en cuida ferir l'un des deux autres Sarrafins. Mais l'un d'iceulx nommé Murgalant le fery tellement d'un tranchant glaive, que braz & espée lui abati à terre. Et eust esté illec occis & mort, quant ceulx de l'embusche le secoururent, & lui escrierent que il se tenist bien, & tantost auroit secours. Donc poingnirent leur cheuaux sur les deux Sarrafins, qui commencierent à fuyr quant ilz lesapperçurēt. Mais l'un d'eulx fu occis, & l'autre eschappa, qui auoit cheual bien courant: & ne cessa de courre, tant qu'il fust venu en l'ost du Roy Pierre, où il cria à l'arme, & lui conta les nouuelles des coureurs du Roy Henry, qui estoient logiez ou bois des Oliuiers. Et quant Pietre le sceut, si fist arrester ses gens, & bien dist, que illec attendroit le Roy Henry, & son pouoir, sans aller plus auant, & lui liureroit bataille se il le requeroit.

De la cinquiesme & derreniere bataille d'Espengne, acheuée par Bertran & les siens: où le Roy Pietre fu desconfit, & bien soixante mille Sarrafins & Iuifs, avec partie de Chrestiens. Et du siege mis deuant le chastel de Montueil, où ledit Pietre estoit à garant.

CHAPITRE XL.

PRES du chastel de Montueil, à vne lieuë, ou enuiron, estoit logié le Roy Pietre le mescreant, ydolatre; & avecques soy Iuifs, Sarrafins, & aucuns faulx Chrestiens, desquelz le Roy Hérry sauoit assez l'estat par ses coureurs retournez du bois, qui estoient alez descourir, comme dit est dessus. De là bataille auoir * estoit le Roy Hérry, & en loüoyt Dieu. Et pour certain aussi estoient Bertran du Guesclin, le Besgue de Villaines, Oliuier de Mauny, & tous les autres François, qui se coururent armer vistement & trefhardiment, & se apprestoient en cheminant. Car moult les hastoient Henry & Bertran, qui leur disoient: Seigneurs, auançons nous tant, que nous trouuons Pietre & son effort, & à fin qu'il ne s'enfuye. Car s'il n'est ou mort, ou prins, encores nous greuera-il. Car il a trop de finance, & si est alié avec les Sarrafins, & a renié Dieu & son saint Sacrement: & nous amaine icy les dessusdiz

» Païens, à leur grant descombrier. Car nous les
» desconfirons, & seront tous leurs biens nostres.
» Donc le plus pouure de nous sera riche à tous
» iours, se la mort ne le prent. Et qui y mourra, il
» acquerra sa saluacion. Chacun soit preudomme
» & hardi, sans redoubter la mort. Car vne foiz
» fault-il mourir. Mais on ne scet quant, ne com-
» ment: & se Dieu plaist nous conquerrons aujour-
» duy honneur. Tant cheuauchierent, qu'ilz vi-
rent à plain l'ost du Roy Pietre, où l'en sonnoit
maint cornet, & mainte trompette. Et reluisoiēt
leurs armeures, qui gettoient grant clarté. Là
peust-on veoir maintes bannieres, & maint pa-
non ouuré de soye, maint gonfanon, & maint
bacinet; & oir maint cheual, & maint chamel
hanir. Et quant le Roy Henry les apperçut, si les
» monstra à Bertran, en disant: Or regardez l'ost
» & la grant noblesce de Pietre le desiré, & des gēs
» qu'il amaine sur nous, où il a plus de payens & de
» Iuifs que de Chrestiens. Bien les ay aduisé. Il nous
» cuide destruyre par sa grant cruaulté. Et la ban-
» niere, que vous veez là à vn lyon rampant, c'est
» celle du ieune Roy filz du Roy de Belmarin. A
» celui assembleray-ie aujourduy, que se ie le puis
» prendre sain & viuant, oncques homme charnel
» ne fist aussi belle prise. Car i'en auroye tant **
» sans nombre. Sire, dist Bertran, à quoy pensez
» vous? Concendez vous à l'auoir? ie n'y acompte
» qui vaille vn seul denier. Car foy que ie doy à

Dieu, qui maint en Trinité, si tost comme ie as-
sembleray aux Paiens, ilz ne trouueront en moy
amour ne charité, se ilz ne requierent bataille
tout premierement. l'ay ordonné, que nous fe-
rons trois batailles, dont la greigneur sera ou
milieu, & les autres deux aux costez. Ne ia n'en
eschappera Sarrafin ne Esclauon, que ad le veu,
les gars seront tous attrappé, & ce traicte Pietre
sera tout decoppé par pieces. Dieux vous en vueil-
le oir, dist le Roy Henry. Adonc noz Chrestiens
ordonnerent vne moult forte bataille, que le
Roy Henry mena tref-hardiement: & deux au-
tres batailles mendres, dont Bertran mena l'une
à costé destre, & le Besgue de Villaines l'autre à
fenestre. Et en ces trois batailles n'auoit pas plus
de vingt mille hommes. Et d'autre part, le Roy
Pietre auoit avecques soy tref-grant foison gēt,
bien le nombre de soixante mille, ou plus, com-
me dit est cy deuant. Dont il fist & ordonna cinq
batailles moult gentement rengées; & s'en alloit
parmy les rens en disant aux Paiens: Or auāt mes
amis: or verra l'en comme vous me aiderez à sou-
stenir mon droit. Beau frere Alectaire, vous sa-
uez bien que i'ay en conuenant à vostre pere le
Roy de Belmarin de espouser sa fille vostre suer,
& de prendre & effaucier la loy de Mahom. Et se
Henry le bastart & les siens estoient aujourd'hui
desconfiz, ils n'auroient iamais pouoir enuers
nous. Ilz sont bons à desconfire, vous le veez bié.

Car ilz ne sont que deux encontre six, ou plus,
que nous sommes. Lors dist vn Sarrafin à Pietre,
qu'il ne se doubtaſt pas. Et iura par la foy qu'il
deuoit à ſon Dieu Mahom deſſus nommé, que ſe
il n'y auoit que lui & ſa bonne gent, qui moult
eſtoient hardiz, & leſquelz il n'auoit oncques
veu ſouyr en eſtour; ſi ne ſe doubtoit-il pas que
Henry & les ſiens ne s'en fuiſſent deuant lui. Et
Pietre reſpondi: Il pert mauuaifement, qu'ilz
s'en doiuent fouyr. Ne veez vous pas la noble or-
donnance de ſes gens? Il a auecques lui telz Che-
ualiers, qui ne fuyeroient pour tout l'or du mon-
de: dont l'vn eſt Breton, nommé Bertran du
Gueſclin, lequel tient Henry en puiffance. Ie voy
ſa banniere à vn Aigle de ſable, à vn champ d'ar-
gent, & auec foy maint hardy Breton. Et l'autre,
dont ie voy ſa banniere à vn quartier d'Eſpen-
gne, que Henry lui a donné auecques la Conté
de Riue-Dieu, eſt nommé le Beſgue de Villai-
nes. Et ces deux ne fuyeron point. Mais ſe ie les
pouoie tenir en mon commandement, ie n'en
prendroie nulle rençon. Car ie ſçay bien que s'il
pueuent qu'ilz me feront morir à tourment.
Sire, diſt Aleſtaire, or ne vous doubtez pas. Car
de ces deux Cheualiers vous feray aujourduy
preſent, & les vous rendray mors ou vifs. Et ſe ie
ne meur, tous feront deſconfiz. Dont fiſt ſon-
ner ſa trompette. Et conduiſoit ſon eſchielle en-
uers Bertran, qui bien les vit venir. Si diſt à ſes

gens: Or foyez bonnes gens, mes amis. Car ces gars, qui icy viennent, seront tous nostres. Lors fist sonner sa trompette moult haultement, & commença assez tost dure bataille & horrible, où tel perdi qui cuida gaaingner. Car les osts s'entr'approuchierent. Et le Roy Henry s'en alloit parmy les rens, confortant les gens, en faisant trefhardie chiere, en leur depriant qu'ilz ne redoubtassent pas leurs aduerfaires, pourtant qu'ilz estoient plus grant nombre. Car Dieu & droit lui deuoient aidier, ce disoit, & qu'ilz auroient tantost victoire: mais qu'ilz assaillissent hardiement. Puis ordonna ledit Roy, que Bertran & le Besgue yroient contre la bataille de Sarraſins, & il yroit à l'encontre de Pietre son ennemy. Laquelle ordonnance fu tenuë. Donc firent sonner maintes trompettes, & maint araines; & assemblerent, pour combatre d'un costé & d'autre. Lors creoyent bien les nostres en Dieu. Car il n'y auoit si hardy, à qui le sanc ne remuaſt, & se confessoient l'un à l'autre, & puis diſoiēt leurs oraisons. Mais le Besgue & sa gent ſe auancierent tellement, qu'ilz assemblerent les premiers sur les Payens. Et à l'assembler y ot grant traierie. Et quant le trait fu failly, ſi combatirent main à main. Moult estoit le Besgue de Villaines bien armé, & tout à pié estoit, & ſes gens auſſi, l'escu au col, le glaue ou poing: dont il fery vn Paié nepueu du Roy de Belmarin ſi raidement, qu'il

le perça tout oultre, & toutes ses armeures, & le
rua ius tout mort: puis retira son glaive, & en oc-
cist aussi le second & le tiers, en escriant: Nostre
Dame aye au Roy Henry. Huy verra l'en qui ac-
querra honneur. Lors firent sur Paiens vne telle
enuahie, qu'ilz les reculerēt plus d'un trait d'arc,
voire ceulx de la premiere eschielle, qui estoient
venuz costoiant ledit Besgue & ses gens, qui no-
blements'y porterent. Et lors dist vn Persan à
Aleçtaire, que son cousin estoit mort, que il a-
moit tant. Dont il fu tref-doulent, & moult le
regretta. Adonc mena sa bataille sur ledit Bes-
gue, qui le receut sans point reculer: & fery ice-
lui Sarrafin tellement, qu'il lui perça escu, & ia-
seren. Mais l'auqueton estoit trop fort, & ne
pourquant il l'abati ius emmy le pré. Mais tan-
tost fu redrecié de ses gens, qui assaillirent ledit
Besgue. Mais il se defendoit comme Admiral.
Et toutesfoiz ne lui eust riens valu sa defense,
qu'il n'eust esté mort ou pris: quant Bertran y
suruint, & ceulx de sa bataille, qui crioient Gues-
clin. Et quant le Besgue l'oy, si se conforta, &
cria, Villaines Dieu aye. Et quant Bertran l'en-
tendi, si lui pria qu'il fist mettre sa banniere de
lez la sienne, & que dorenavant eulx deux ne
feissent que vne eschielle. Adonc se adiousterēt
ensemble eulx & leurs gens, & se habandonne-
rent sur Sarrafin, ausquelz ilz combattirent de
glaiues fierement en poussant, & soubtiuelement

queroient le iuints des armeures; & tellemēt es-
coquoient les vns sur les autres, que moult se a-
domagoient. Et d'un costé & d'autre Bertran
crioit Guesclin à sa voix, qu'il ot grant: & le Bes-
gue de Villaines, qui en ferant, disoit: Or auant, "
mes compaignons. Et auoit de lez lui vn sien filz, "
qui le costoit & auanturoit hardiement sur
Sarrasins. Et tant y fist de proesce, que chacun
l'en prisoit moult. Et là endroit le fist le Roy Hé-
ry Cheualier. Moult se portoit bien en ladite ba-
taille Oliuier du Guesclin, Oliuier de Mauny,
son frere Alain, & Henry, & plusieurs autres
bons Cheualiers, & especiaument Bertran. Or
vous dy que Henry, qui auoit noble compai-
gnie, s'en ala deuers Dam Pietre, qui auoit avec-
ques soy grant foison Chrestiens & Iuifs, moitié
à pié & moitié à cheual, tant que à poine les po-
uoit-on nombrer. Et estoit ledit Roy monté sur
l'un des meilleurs cheuaux du monde, tout cou-
uert de ses armes, & aussi estoit armé de vise. Au-
col auoit pendu l'escu au lion, & tenoit le glaue
ou poing. Et quant il vit venir son frere Henry,
si le recognut bien au blason. Car chacun d'eulx
portoit les armes d'Espengne, & s'en disoit estre
Roy chacun d'eulx deux. Et quant vint à l'ap-
prouchier, le fol Pietre cria fierement en sa rai-
son, & dist: Haa! bastart orgueilleux, larron, trai- "
tre, ie te tédrai bien brief en mes laz, & te prou- "
ueray icy, que à tort m'as dechassié de mon Roy- "

„ aume, comme faux que tu es, & de fausse renom-
„ mée. Car oncques nostre pere, à qui Dieu fasse
„ pardon, ne vult tant prifier ta mere, que il la
„ daignast espouser en nulle saison. Pietre, dist
„ Henry, ie me accorde bien que mon pere n'es-
„ pousa pas ma mere, mais il la fiança par bonne
„ entente, presens l'Euesque de Burs, & plusieurs
„ Barons, & puis iut charnellement auecques el-
„ le, dont ie fu lors engendrez. Si le pouoit ma
„ mere tenir pour mary. Car il ne pouoit auoir au-
„ tre femme. Et par ce point cy ie ne suis bastart,
„ ne auoultre. Mais bien croy, que oncques mon
„ pere ne t'engédra. Car tu fu changé ou berseuil,
„ & engendré d'un Iuif, dont tu es filz. Et assez
„ y pert à tes conditions. Car tu ne vueil hanter au-
„ tres gens que Iuifs & Sarrafins, & as renié Iesus-
„ Christ, & sa loy, & aouré Mahom, pour les a-
„ mener de ça la mer, exillier, & gaster sainte Chre-
„ stienté. Et feïs definer villainement ta femme,
„ qui estoit estraitte du sanc de saint Loïs, & fuer
„ de la Roïne de France. Parquoy tu n'es pas digne
„ de porter couronne, ne de tenir terre. Ie le te
„ vueil prouuer. Lors acola son escu, si hurta son
„ cheual des esperons, & abessa son glaïue, & vint
„ encontre Pietre tant raidement comme il pot,
„ & Pietre encontre lui, qu'il ne le refusa pas. Et
„ s'entredonnerent grans cops, si qu'il n'y eust
„ icellui, qui n'eust son escu escartellé. Mais leurs
„ aubers estoient si fors, qu'ilz ne les porent pas
entamer.

entamer. Et Henry, qui estoit fort, se esprouua à bouter tant comme il pot de cuers & de corps; si qu'il fist vuidier au Roy Pietre la selle, & l'abati à terre. Dont reprint sa lance Henry, & cuida ferir Pietre parmy les costes. Mais Sarraïns vindrent là, qui le remonterent, & environnerent Henry; qui se defendoit, & ne daignoit reculer, & crioit son enseigne. Et là vindrent ses gens pour lui aidier. Et là assemblerent les batailles de tous lez, où il ot fort estour & pesant. Oncques mais n'oy parler de tel. Henry auoit noble gent, & de grant valeur; & si estoit trefbõ aux armes. Et de l'autre lez Pietre ioustoit trefbien, & n'auoit point en toute l'assemblée de meilleur fereur. Il tenoit en sa main vne espée tranchant comme vn rasouer, dont s'il cuida ferir Henry, qui se tray; dont il fist grant scens. Ne pourquant il ataint le cheual sur le col, tellemēt qu'il lui trācha la teste, & abati le cheual & homme emmy le pré. Mais Henry se releua tantost, & cria son enseigne. Incontinent ses hommes vindrent à lui, qui lui baillerent vn autre cheual. Si se bouta oudit estour, & crioit: Où és tu le faux Pietre? Se ie te puis tenir, tu mourras à douleur. " Mais ledit Pietre maintenoit fort sa bataille encontre ledit Henry, qui auoit ifnelle gent & hardie: & se tenoient si serrez, sans eux descourre ne ouurir, en poussant contre leurs aduersaires, tant que par force reculerent Pietre & ses gens, voul-

zissent ou non, & en mirent tant à mort que sans nombre, depuis que les batailles furent entremellées. Dont touz les genz Pietre furent touz esbaiz. Car Bertran du Guesclin, le Besgue de Villaines, Guillaume Boitel, Alain de la Housfoye, Thibault des Esteufs, Morelet de Montmort, Estaloni de Fontaines, & Caraenloet, avec maint autre preudomme, desquelz estoient Olivier, Alain, & Henry de Mauny, se porterent si bien en la bataille, que par l'aide de Dieu, en qui le Roy Henry se fioit, ilz getterent & firent fouyr de place Paiens, & Sarrafins, & Iuifs. Laquelle chose tourna au Roy Pietre à tref-grant desplaisir. Et lors appella ses gēs ceulx qui Chrestiens estoient, & leur dist: Seigneurs, ie pers aujourdhuy ma Seigneurie. Car ces Paiens, qui de Dieu soient maudiz, m'ont failli. Et lors le filz du Roy de Belmarin, quant il vit sa gent fuir, si en ot grant dueil au cuer. Mais pour sauuer sa vie, il s'en fuy trauers les champs, avecques lui deux Admiraulx, esquelz il se fioit. Et se cuiderent retraire à vne forest, pour eulx mettre à garant. Maiz ilz furent syeuyz de Bertran, du Besgue, & de plusieurs autres, qui les requistrent de eulx rendre, & de receuoir la loy Chrestienne, & le saint Baptesme. Mais les mescreans Paiens n'y voudrent obeyr, ainçois se deffendirent des brans d'acier, tant qu'ilz occirent des nostres trois vaillans Escuiers. Et adonc furent assailliz

tellement de grans & de petiz, qu'ilz furent occis, & mis sur les champs tous mors, & furent lessiez touz nuz. Et quant Pietre vit qu'il en fut téps, si s'en fouit sur son cheual courant, & avecques lui quatre cents de ses hommes. Et entrèrent en vn chastel seant à vne lieuë d'illec appellé Montueil, ou quel auoit parauant trois cenx soubdoyers. Et ainsi furent sept cens oudit chastel, qui estoit assis sur montengne. Et c'estoit trop. Car leenz auoient pou à viures.

A INSI delaiissa Pietre le champ, dont tous les Sarrafins s'en fuyrent assez tost apres comme recreans. Et quant les Chrestiens de la cité de Sebile les virent ainsi fuir, si coururent apres eulx, & les assaillirent, en gettant dars & faussars. Dôt moult en tuerent, en disant: Faux traictres, vous nous lessiez au besoing. Iamais ne rentrerez en vostre pays, ne iamais au faux Pietre n'obeirōs, ne pour lui n'yrons en bataille. Et par semblable, les Iuifs de ladite cité assailloient & occioyent les Sarrafins fuyans. Mais le Roy Henry, Bertrā, le Besgue de Villaines, & tous leurs amis & bienueillans, chassoient iceulx Sebilois, tant Chrestiens comme Iuifs. Et tant en liurerent à mort, que les champs en estoient tous couuers. Ne oncques mais ne fu veuë telle desconfiture. Car Héry, qui moult le suiuoit de prés au dos, desiroit moult de trouuer Pietre. Et bien disoit au Besgue & à Bertran, qu'il tenoit plus ses especiaux;

Que si Pietre lui eschappoit, trop lui seroit mescheu. Et ledit Bertran respondi, Que ainçois le sieuroit-il iusques à Sebile, qu'il ne l'eust. Par semblable dist le Besgue de Villaines, Guillaume Boitel, Oliuier & Henry de Mauny, Caranloet, & tous les autres Barons: lesquelz cuidoient bié, que ledit Pietre allast tout droit vers ladite cité. Mais vn coureurs vint dire à Bertran, que icellui Pietre estoit entré dedens Montueil, & quatre cens hommes de son tinel. Et quant ledit Bertran l'oy, si en loa Dieu:& tantost l'ala denoncier au Roy Henry, qui grant ioye en ot. Dont fist crier parmy l'ost en poine de la hart, qu'il n'y eust grant ne petit, qui ne le sieuist, ne qui du conquest preist riens quelconques, iusques il auroit pris Montueil. De ce furent les pillarz courrouciez & doulens. Mais le Roy Henry rassembla ses gens, qu'il sceut bien ordonner & induire de aler. Et afin que l'en ne peust riens piller ne rober du conquest, tant qu'il fust retourné, il lessa cinq cens hommes pour le garder. Mais qui deust tuer tous les pillars, si ne se fussent-ilz pas tenuz de toulir & embler. Dont l'en fist puis à maint copper les testes. Mais Henry & les siens dessusnommez, avecques vn bon Cheualier nommé Moradaz de Roinuille, cheuaucherent tant qu'ilz vindrent deuant Montueil, où ilz se logerent. Qui lors leurs veist drecier têtes & trefs, pour eulx logier & ordonner, cuisi-

nes pour appareiller leurs viandes; il sembloit
 bien qu'ilz deussent seiourner dix ans. Et le Roy
 Pietre se vint apoyer aux murs du chastel, & re-
 garda gens d'armes arriuer tout enuiron, & ap-
 proucher dudit chastel, & garder les chemins. Si
 lui commença tout le sanc à muer. Lors appella
 son Capitaine à conseil, & lui demanda se il lui
 fauroit donner conseil, comme il pourroit es-
 chapper de leans. Car se ie pouoye yssir sauué-
 ment, ie amerroye bien brief tel secours, dont ie
 feroie amolir mes ennemis. Et ledit Capitaine
 lui respondi: Je n'en sçay que dire. Se vous vou-
 lez aler au secours, il ne vous conuient pas lon-
 guement demourer. Car nous sommes ceās trop
 pour garder telle ville. Ceans a bien sept cens
 Cheualiers tous legiers, & n'auons pas à mengier
 pour quinze. Et vo⁹ sauez que le chastel, qui n'est
 garny, ne puet tenir. Et adonc se commença Pie-
 tre à dementer à soy-mesmes, en disant: Or ne
 sçay-ie que faire. Je m'estoye icy retrait pour
 moy sauuer. Or n'auons que viure, qui me tour-
 ne à grant ennuy. Et ceulx delà dehors en ont as-
 sez mal. Preu leur puist-il faire. Il pert bien que
 Henry ne m'aime gueres, qui m'a si tost sieuy,
 pour moy trayre à la mort. l'ay faussement ouuré
 de ma compaignie la Royne, & ay creu luifs de
 put affaire, & Sarrafin de fausse loy; & ay brassé
 maint meschief, & fait faire maint mal. Si croy
 bien que se en auray mon salaire. Dont prist

Pietre à regarder enuers l'ost, & veoir fumer ces
cuisines, dont il sentoit le flair, drecier tables, &
bastir maint grant feu, & amener vitailles: si cō-
me pain, vin, & chair: & moult noblement esta-
blir le guet, qui faisoit garder les chemins de
tous costez. Si que on ne laissoit entrer en la vil-
le, qui vaulzist vn seul parisi: ne nulz n'en yssoit
„ qui ne fust priz. Hee! Dieux, dist Pietre, Veez
„ me-cy acroupy. I'ay tant fuy, & si seray attrappé.
„ Car se ce bastart me puet tenir, il me fera mou-
„ rir, si n'est pas engignié. Car aussi fais-ie lui. Je ne
„ me sçay conseiller. Et toutesfoiz me faut trou-
„ uer comme ie puisse trouuer guarison. Ce dea-
„ ble Bertran m'a malement greué, le Besgue de
„ Villaines, & Oliuier de Mauny aussi, avec le po-
„ uoir qu'ilz ont. Car se ilz ne feussent, qui l'ont
„ aidie, ia Henry le bastart n'eust duré à moy. Con-
„ fondu soit-il de Dieu. Il me fust maintenant bié
„ besoing, que ie peusse vouler comme vn oyse.
Et il disoit verité. Car ceulx de la ville auoient
trespeu à viure; & estoient bien cinq cents tous
Cheualiers de nō, sans les autres. Lesquelz Che-
ualiers yssirent aucunesfoiz du commencement
du siege. Maiz ilz furent tellement repoussez, que
tous liez estoient, quant ilz pouuoient rentrer à
sauueté. Et afin que plus visissent pour surpren-
dre ceulx de l'ost, le Roy Henry fist faire entre
ledit ost & la ville vne muraille de terre. Et tant
dura ledit siege, que ceulx de l'ost auoient pou

de viures. Adonc apparçut Pietre, qu'il conuen-
droit, que par famine s'en partist. Adonc assem-
bla les greigneurs & plus souffisans dudit cha-
stel, ausquelz il monstra maintes raisons, & leur
dist que se ilz vouloient garder icelui chastel ius-
ques à quinze iours, il amerroit tel secours, qu'il
en chasseroit tous ses ennemiz. Et ses hommes
respondirent, qu'ilz feroient son command.
Mais se dedens celle quinzaine il n'auoient tref-
bon secours, ilz se rendroient au Roy Henry.
Car ainçois que ledit terme fust passé, ilz n'au-
roient que mengier, ne pain ne chair. Si furent
tous d'accord, que Piette partiroit à mienuit
lui sixiesme sans plus. Icelle nuit fist charger or
& argent, coppes, hanaps, & ioyaulx; pour auoir
soubdoyer qu'il pensoit à amener. Ainsi ordon-
na de son voyage le mieulx qu'il pot, & ne sa-
uoient rien ceulx de l'ost de sa pensée, mais bien
leur auoit-on dit comme ilz auoient grant fami-
ne, & pou à mengier. Si dist Bertran à Henry: Si-
re, ce chastel-cy est moult fort, ia nulz homs ne
l'aura par assault. Si conseille que nous y enuioï-
vn Herault deuers Pietre, pour sauoir sa vollen-
té, & se il tendra le chastel, ou se il le rendra. Car
se il veult venir à mercy, ie vous conseille que
vous le receuez, & lui donnez Duchié, dont il
puisse viure. Car encores pourrez vous estre bõs
amis ensemble. Ceste chose faisoit Henry bien
enuiz. Car il se doubtoit, que Pietre ne le voul-

fist trahyr en la fin. Mais toutesfoiz s'y accorda à la requeste de Bertran. Et fu enuoyé ledit Herault, qui ala iusques aux barrieres, & appella ceulx du chastel, de son chapperon. Et tantost l'en lui demanda, qu'il queroit. Et il respondi, qu'il vouloit parler au Roy Pietre. Et quant ledit Pietre l'entendi, si se auisa qu'il se feroit celer par son Capitaine, & dire qu'il n'estoit pas leanz, pour veoir se Henry se deslogeroit point. Et ainsi le chargea à son Capitaine, lequel appella le Herault, & lui demanda : Amis, que querez vous ? Et icelui Herault respondi : Je le vous diray. Le Roy Henry m'enuoye deça, pour sauoir se Pietre se rendra à lui. Car se il se veult rendre, il le prendra à mercy, ne ia pour chose qu'il ait faite ne receura mort : mais lui donra terre, dont il se pourra cheuir. Et par certain accord se nourrira amour entr'eulx. Ledit Chastellain dist, Je vous en respondray. Pietre n'est pas ceans, & a passé douze iours qu'il se party pour aler querre secours, qu'il amerra tel, qu'il greuera Henry, & ce deable Bertran occira en la fin. Si garderons entretandiz le chastel. Car nous auons assez viures. Quant ledit Herault l'entendi, si lui mua tout le sanc, & s'en reuint au Roy Henry, auquel il compta tout le fait. Et quant il le sceut, si lui fremia tout le cuer de dueils. Car il cuida bien, que ainsi fust. Si lui conseilla le Conte d'Ayne de laissier le siege. Mais Bertran ne s'y accorda point,

point, & disoit bien que Pietre s'estoit fait celer, & supposoit que il n'y fust: mais si monstroit par viues raisons, que le delaisement du siege n'estoit pas bon, & pourroit tourner à tres-grant dommage. Et adonc iura le Roy Henry, que iamaïs n'en partiroit; si auroit ledit chastel, & ce qui estoit dedens.

Comment le Roy Pietre cuidant fuyr par nuyt, surpris du Besgue de Villaines, qui le liura au Roy Henry: lequel fist decapiter, & le corps pendre aux murs dudit chastel, qui lors se rendy.

CHAPITRE XLI.

OV chastel de Montucil estoit ainsi asseigié Pietre le tirant, qui par moult grant malice s'estoit fait celer. Et quant il vit que Henry ne se deslogeoit point, si le party par vne nuit obscure & tenebreuse, dudit chastel, lui cinquiesme sans plus, chargiez d'or & de ioyaulx comme dit est, & pour la cause dessusdite. Et alloient à pié menans tout bellement à la main leurs cheuaulx, en descendant dudit chastel, qui estoit assis sur vne roche pendant, iusques à tant qu'ilz vindrēt aux murs nouvellement edifiez par ceulx de dehors. Si y auoit au pié dudit chastel plusieurs des gens au Besgue de Villaines, qui illec s'esbatoiet: desquelz estoient Moradaz de Ronuille, & son

Eſcuier Coppin. Leſquelz oyrent la frainte de la venue de Pietre, & de ſes cheuaulx. Si alerent dire audit Beſgue qu'ilz auoient oy deualer gens de la grant voye, comme on venoit du chaſtel, deſquelz ilz ne fauoient leur volentez, & auſſi ne les pouoient veoir, pour les grans murs qui deuant eſtoient. Mais toutesfoiz leur ſembloit, qu'il fuſt bon de les eſpier, afin & pour doubte que ce ne fuſt Dam Pietre, qui à mucettes ſ'en vouluſt fouyr. Et quant le Beſgue les ot entenduz, ſi leur diſt tout baz qu'ilz ſe teuſſent, & plus n'en parlaſſent. Dont les remena au lieu, dont ilz venoient. Et iaſoit ce qu'ilz ne ſceuſſent pas de vray, que ce fuſt Pietre, ne qui ce pouoit eſtre; neantmoins il fiſt armer & ordonner ſes gens tous preſts de receuoir bataille, ſe meſtier fuſt. Et iuroient bien tous granz & petiz, qu'ilz garderoient bien & deffendroient le pas, tellement que nulz n'y paſſeroit ſans leur congié. Et à celle heure le guet de dehors auoit fait ſon tour. Si tournoit d'un autre lez. Et quant Pietre apparçut que le guet n'y eſtoit pas, ſi ſe deuala lui, & ſes gens, & finance; tant qu'ilz furent ſur la chauffeé tout en bas. Si trouua vne breſche oudit mur, où il auoit vne voye yſſant aux champs, en laquelle il ſe miſt, & tourna à main deſtre. Et quāt il ſ'y trouua, il mercia Dieu. Car bien cuida eſtre eſchappé, & diſt tout baſſement à ſes gens, qu'ilz montaſſent. Et lors il yint à ſon deſtrier, qu'il a-

planiot doubcement, & mist le pié en l'estrief, & la main à l'arçon. Mais ainsi comme il se escueilloit pour monter, le Besgue de Villaines vint à lui sans clarté ne lumière aucune, & l'embrassa parmi les flans, en disant: Je ne say qui vous estes, mais vous ne m'eschapperez pas, tant que vous aiez païé vostre bien alée à mon vouloir. Et les gens dudit Besgue alerent prendre les sergens, lesquels se mettoient à deffense. Mais ce ne leur valu rien. Ne pourquant le Roy Pietre tira vne dague aigue & tranchant, dont il cuida ferir le Besgue, qui vit icelle dague à la lueur. Si lui couru tantost à la main, & lui esfracha, & puis lui dist haultement: Je ne sçay qui vous estes, ou Roy, ou Admiral, ou Banneret, ou vaillant Escuyer. Mais foy que doy à Dieu de Paradis, se plus vous defendez encontre moy, ie vous mettray à mort. Si vous rendez tout maintenant, & me dites vostre estat sans celer. Haa! gentil Besgue, dist Pietre, ie me rends à vous, me conuient-il morir, & est mon iour venu, où i'ay tant euadé. Sire, qui estes vous? dist le Besgue, qui estoit sage. Helas! dist Pietre, ie suis le plus meschant, qui oncques regnast en ce siecle. Roy Pietre me souloient appeller grans & petiz. Or ne regneray plus au mié cuidier. Car bien croy qu'il me fauldra morir en bref temps. Haa! Sire, dist le Besgue, or ne vous vueillez douter. Car le vaillant Roy vostre frere aura pitié de vous, & si l'en prieront les Princes

„ souffisans. Haa! Bescgue, dist le Roy: ce ne me
„ vaudra rien. Car ie sçay bien que il me mettra à
„ mort, se il me puet tenir. Mais se vous me voulez
„ sauuer la vie, ie vous donray trois citez, & douze
„ grans chasteaulx, avec douze muletz chargiez
„ de fin or. Nennil, nennil, dist le Bescgue, ia à trai-
„ son faire ne me assentiray, mais vous liureray au
„ Roy Henry. Adonc le prist par le pan de sa robe,
pour le tenir plus fermement. Si encontra en sa
voye le Viconte de Roquebertin, lequel auoit
dit audit Henry la prise dudit Pietre. Si demanda
au Bescgue en son langage, s'il lui aideroit à ame-
ner, & que bien le sauroit lier d'vne corde. Et le
Bescgue respondi, qu'il ne vouloit point d'aide
de lui, ne d'autre, pour tenir vn seul homme.
„ Bescgue, dist le Viconte, vous sauez moult d'en-
„ gin. Car vous n'avez pas prins Pietre au comba-
„ tre, ains l'avez attrappé par autre malice, & bien
„ a esté trahy par faux * conuin. Viconte, dist le
„ Bescgue, se vous me voulez mettre trayson seur,
„ ie m'en combattray & deffendray tantost à l'es-
„ pée. Nenyl, dist le Viconte. Car cil n'ayme pas
sa vie, qui entreprenent noyse enuers vous. Donc
fu mené Pietre en la tante Alain de la Houffoye,
qui moult en fulié & ioyeux, & demanda au Besc-
gue, qui l'auoit pourueu de si noble estraine. En
disant, que tel pourroit chassier cent iours en
bois & en forests, qui ne prendroit pas si noble
proye. Et bien auoit trouué coustel pour sa gai-

ne. Et cilz qui en sa maison, ne trouueraia
 auenture, qui le mayne à honneur: mais sera tous-
 iours en poine. Adonc icelui Besgue appella vn
 sien veneur, nommé Gillet du Bois, lequel il en-
 uoya deuers le Roy Héry, pour lui dire la prise de
 Pietre, & que s'il lui plaisoit on le lui merroit en
 sa tente; ou s'il vouloit venir là où il estoit, pour
 en ordonner. Tātost ledit veneur ala ou dit mes-
 sage, lequel trouua le Roy Henry en sa tente, au-
 quel il raconta ce que dit est, & la maniere de la
 prise dudit Pietre, ainsi comme enchargé lui es-
 toit de son maistre: & que s'il plaisoit audit Hen-
 ry, que icelui Pietre fust à lui accordé, à grans &
 petiz plaisoit bien. Car cilz est moult sages, qui
 oncques ne mesprist. Quant Henry l'entendi,
 tout le sanc lui mua. Tantost deuesti son mantel,
 qui estoit d'un gētil diappré fourré d'hermines,
 & le donna audit Gillet pour les bonnes nouuel-
 les, lequel l'en remercia. Puis monta ledit Roy
 Henry tout seul à cheual, sans attendre pair ne
 compaignon. Mais il fu assez tost sieuy de plu-
 sieurs Cheualiers: & tant cheuaucha qu'il vint en
 la tente Alain de la Houffoye, où il trouua le
 Besgue de Villaines, & plusieurs autres Barons,
 qui là estoient assemblez, pour sauoir que l'en-
 feroit de Pietre. Lesquelz Barons ledit Roy sa-
 lua. Mais si tost comme il apparçut ledit Roy
 Pietre, il lui cria à haulte voix: Haa! faux larron,
 traître, fel, & despit, qui tant m'as fait de mal: "

„ Or te voy-ie prins. Et Pietre respondi: Tu ments
„ faux bastart, ie ne suis point traictre. Mais tu l'es.
„ Car tu as faussement regné contre moy à guise
„ d'Entechrist. Et quant Henry l'entendi, si fu es-
„ pris de grant air, & le vout ferir d'une dague en-
„ tre les mains du Besgue, qui lui escria haulte-
„ ment: Haa! Roy Henry, or ne vueillez pas mes-
„ prendre. Car Pietre est mon loyal prisonnier,
„ que i'ay loiaulment pris, & pour tel le vous con-
„ duiz. Se vous l'occiez entre mes mains, vous en
„ aurez mains d'ennuiz. Et qui ses amis pert, il en
„ vault pis. Mais se vous voulez, ie le vous rendray,
„ par telle condition que vous m'en payerez au
„ telle rençon en deniers comptans, comme à tel-
„ le prise appartient. Et s'il est nulz, qui vueille di-
„ re, que Pietre ne soit mon loial prisonnier, sans
„ penser trayson, ne pourchasser malice, & sans
„ sauoir qu'il deust point yssir: mais que de droit
„ auanture Dieu le m'a enuoyé. S'il est nul, qui die
„ le contraire, ie m'en deffendray à l'espée d'acier.
Par troiz fois relata ceste parole. Mais nul ne l'en
contredist, ainçois le vouloient effaucier en hō-
„ neur. Adonc le Roy Henry dist au Besgue: Gen-
„ til Besgue, ie croy sans cuidier, que vous estes vn
„ loyal Cheualier. Ie vous prie que vous rendez
„ Pietre, & ie vous en payeray rençon à vostre vou-
„ lenté, telle comme il appartient pour la prise de
„ sa personne. Adonc lui deliura ledit Besgue. Et
tantost comme Henry le pot empoigner, si le fe-

ri d'une dague trois cops d'estocq ou visaige. Et quant Pietre se senti ainsi appareillié, si aherdi Henry à la luite, & l'enuerfa tellement, que tous deux trefbuchierent. Mais Henry ala dessoubz, qui en fu doulent. Ne pourquant il estoquoit tousiours Pietre parmy le corps, de sa dague. Mais il le trouua armé d'un bō aubert double, & pour ce n'y pot entrer. Et se Pietre eust lors tenu vne bōne dague, iamais Henry n'en fust releué en vie. Si s'efforçoit moult le murdrier de lui toulr sa dague, & formét le petilloit des genoulx. Adōc entra Bertrā en ladite tête, Oliuier sō frere, Oliuier & Henry de Mauny, Guillaume Boitel, Carraenloet, & plusieurs autres. Et commença Bertran à dire: Lessiez vous occire le Roy Henry à tel * vice par un faulx traictre renoyé, qui onc-
ques ne fist bien en iour de sa vie? Lors dist au bastart d'Anyse, qui estoit priué dudit Henry:
Alez aidier au Roy Henry. Car vous le pouez faire. Prenez le par la iambe, & le montez dessus. Lors ledit bastart prist Henry par la iambe, & le tira à soy, en disant: Leuez sus, & vous deportez. Car vous en auez assez fait. Et quant Henry se vit dessus, si se leua tantost sans arrester, & regarda gesir Pietre, qui estoit naurez à mort. Adonc cria à ses gens: Or tost decoulas ce traictour. C'estoit à dire qu'il eust la teste trenchée. Adonc parla un Escuier Espagnol, qui s'en vint à Pietre, qui lui dist: Faulx Pietre, tu feis trancher la

„ teste à mon pere, pour auoir ton delit de ma me-
 „ re, que tu conuoitoies, & me banniz & chassaz
 „ hors du Royaume. Et pour ce, tu perdras par
 „ moy la teste, ne ia par autre main ne mourras,
 „ s'il plaist au Roy Henry. Or tost, dist Henry, de-
 „ liures toy de lui trencher la teste, laquelle tu por-
 „ teras à Sebile, afin que l'en croye mieulx son e-
 „ stat. Et icelui Escuier, sans arrester prist vn costel
 „ cambre tranchant moult raidement, & en tran-
 „ cha la teste à Pietre en la presence de tout le peu-
 „ ple. Puis la ficha en vn long glaiue, & fu portée
 „ au tref Henry, & le corps demoura en la place, &
 „ fu deuestu, & couuert d'un drap de bougeren. Et
 „ quant il fu iour, & Soleil leué, que ceulx du cha-
 „ stel sceurent la prise & mort de Pietre, il se rendy
 „ au Roy Henry. Lequel fist bouter en vn sac le
 „ corps dudit Pietre, & puis pendre à vne des tours
 „ du chastel.

*Comment le Roy Henry enuoya la teste de Pietre en la
 cité de Sebile la grant, qui pour ce se rendi. Et apres
 se rendirent à lui Toulette, & plusieurs autres citez,
 villes & chasteaulx.*

CHAPITRE XLII.

Pvi s fu conseillié au Roy Henry, que chau-
 dement il enuoiaist en la cité de Sebile la
 grant la teste de Pietre: afin qu'ilz se rendissent

& retournassent deuers ledit Roy. Et ainsi comme il fu ordonné, il fu fait hastiuement. Et les bourgeois, quant ilz virent celle teste, si reçurent Héry, & se mirét tuit en son obeissance. Et de ce qu'ilz auoiét offensé lui offrirent amende. Moul noblement y fu reçuz. Si vous dy, que la teste de Pietre fu portée longuement par ladite cité. Si prindrent en hayne ledit Pietre ceulx de la cité, tellement que ilz getterent ladite teste en un fleuve estât en icelle cité, lequel viét de la mer. Ne oncques puis ne fu veu. Et quant Henry le sceut, si en fu moul doulent, & dist à Bertran: Il me va mallement. Car par ce chief eust-on eüe Toulette. Que ces mauuais gens ne voudront croistre que Pietre soit occy, ne mis à fin. Lors dist Bertran: Se ilz ne le veulent croistre, il leur conuendra prouuer à force d'armes. Donc s'accorderēt Henry & les siens, pour retourner au siege deuāt Toulette, que oncques de si merueilleux n'oy parler mez nulz homs. Et auoit ledit Henry moul grant puissance de gent. Si se rendoient à lui Espaignolz de tous costez, & lui apportoint les clefs des citez, villes, & chasteaulx. Tous se rendoient à lui, grans & petiz, excepté Toulette. Quant le Roy Henry fu reuenü audit siege, si l'onnoura moul la Royne sa femme, & aussi fist l'Archeuesque: qui se plaignit à lui de ceulx de la ville. Si encommencierent à deuiser ensemble les Barons de l'ost. Mais ainsi comme Bertran

imaginoit comme la cité seroit prise, vint à lui vn Escuier d'onneur de par le Roy de France, lequel se agenoilla en le saluant. Puis lui dist, que le Roy lui mandoit & prioit, qu'il venist en France à tout les soudoyers qu'il auoit : & en son chemin acueillist tant de gens d'armes, comme ilz pourroient trouuer, & amenaist tout auant soy, sans nul reffuser. Car le Roy auoit grant besoing de secours. Car les Engloiz s'estoient esmeuz, & auoient brisées les treues premierement ou pais de Poitou, où ilz se fortessioient, & couroient le pais; tellement que les marchans n'osoient aler de ville à autre. Et s'estoit vanté Robert Canole, qu'il vendroit à tres-grant effort d'Engloiz, si ne sauoit nulz le meschief, qui estoit ou Royaume. Amis, ce dist Bertran, pourquoy ne assemble le Roy gens d'armes, & ces nobles Communes, de quoy il y a tant, pour receuoir les Engloiz, de quoy il se doubte? Sire, dist l'Escuier, l'en vous a-tent. Et ay oy dire à la Cour, que l'espée vous sera liurée, & serez Connestable toute vostre vie. Car le noble Seigneur de Fiennes si deuient foibles & vieulx, & pour ce a plusieurs foiz requis au Roy, de reprendre l'espée. Adonc presenta à Bertran ces lettres, lesquelles fist lire, & y fu trouué tout ce que ledit Escuier auoit relaté de bouche. Donc commanda Bertran, que on le fist lauer & seoir à table, & seruir à son gré. Puis rescriui & fist rescripre au Roy, & ses lettres chargea au-

dit Escuier, auquel il donna beau don. Puis s'en vint Bertran au Roy Henry, & lui compta ces nouuelles, lequel en ot moult grant courroux. Et depria à Bertran, que par quelque maniere ne se departist d'auecques lui, iusques à ce qu'il eust prise Toulette. Car on doubtoit Bertran, son nom, & sa grace, par tout le monde, où le renom en couroit. Mais il qui auoit grant desir de aler en France, assembla le Conseil pour auoir aduis, par quelle maniere on peust auoir la cité. Et leur dist, que qui sauroit donner bon conseil, qu'il ne le celast pas. Mais ilz n'en sauoient que dire. Et lors leur dist Bertran, Nous ferons drecier deuant ceste ville la banniere qui fu au Roy Pietre, & puis ferons semblant de nous en fuir. Et quant nous les verrons yssus, nous retournerons à cop, & par ainsi pourrons bien rentrer en ladite ville auecques eulx. Ainsi fu accordé & fait. Et quant le Capitaine apperceut ce, si se monstra aux carneaulx, & appella le Roy Henry, qu'il asseura du trait. Auquel il demanda, que celle banniere, qu'il auoit là ordonnée, signifioit. Et Henry lui compta la verité, comme Pietre fu prins & decapité, la teste portée à Sebile, & puis iettée en vn braz de mer. Mais ledit Capitaine ne le vult croistre, ainçois dist que l'en auoit contrefait l'estendart, & qu'il ne rendroit la cité de Toulette à nul homme, senon au Roy Pietre. Et quant Henry l'entendi, si dist par grant air. Ca-

pitaine, entendez ce que ie vous diray. Ie vous iure par Dieu, que se vous ne vous rendez dedens quatre iours, ie vous feray trayner tout autour de Toulette, ainsi comme on fera l'estendart de Pietre. Lequel Henry fist trayner & getter envn fossé. Mais le Capitaine n'y acoutoit riens, ainçois iura & dist au Roy Henry, que ainçois qu'ilz se rendissent par nul tour, mengeroient-ilz de cinq l'un. Et quant Henry & Bertran les entendirent, si furent tous esbahiz de leur cruaulté. Et dist Bertran, que ce seroit grant mauuaistié, de mengier ainsi l'un l'autre. Et pour certain ilz auoient mengié chiens, chaz, cheuaux, iumens, & toutes bestes quelconques; & par grant rage de faim pessioient l'erbe d'entour les fossez. Dont le Roy Henry ot grant pitié quant il le sot, nonobstant toutes choses. Mais si longuement tindrét la cité, qu'il en mourut bien plus de trente mille, tant Chrestiens, cōme luifs & Sarraïns. Et neâtmoins nulz de ceulx du siege, tant fust soubtil, ne pouoit trouuer voie de la cité auoir; combié que par deux foiz se desloigassent, & partissent de place de deux iours, ce ne leur valoit riens. Car ceulx de dedés estoïent trop apais & duiz de guerre. Et Bertran, qui vit ce, requist au Roy Henry le cōgié, & dist qu'il s'en vouloit aler à Paris deuers le Roy Henry son Seigneur, qui mandé l'auoit; auquel il auoit escrit qu'il yroit. Haa! Bertran, dist Henry, ie suis à pié, se vous me laissez sans.

auoir Toulette. Vous estes tant saiges & soubtil, "
 que il n'est forteresse que vous n'ayez tâtost pri- "
 se. Sire, dist Bertran, ce ne sont pas gens, ains sont "
 droiz ennemiz. Ne pourquant i'ay aduisé com- "
 ment on auroit la cité, ce me semble. Vecy l'Ar- "
 cheuesque, qui est preudomme, sage, veritable, "
 & loial. Je conseille qu'il voise en la cité, mais "
 qu'il ait saufconduit, & leur presche tant qu'il les "
 conuertisse à vous, & leur iure & afferme tenant "
 la main au piz, que Pietre est mort & finy. Et se "
 rendre se vouloient à vous, vous les receurez à "
 mercy. Et se ilz ne veulēt ce croistre, vous donrez "
 saufconduit aux bourgeois de la cité de aler à Se- "
 bile, pour en enquerir la verité. Car ces gens icy "
 croient plus en Pietre, qu'ilz ne font en Dieu. "
 Ainsi comme Bertran l'auoit diuisié, fu fait, & "
 s'en ala l'Archeuesque en ladite cité, qui lors fist "
 vne predication, & tellement les doctrina, que "
 tous se rendirent à Henry, saufs leurs corps & "
 leurs auoirs. Lequel les receut à mercy, puis entra "
 en la cité, & dist aux citoiens, que oncques mais "
 n'auoit trouué si bonnes gens. Et au bon Capitai- "
 ne, qui s'estoit si bien tenu, donna & cōferma de "
 nouuel son office, ouquel il le lessa cōme il estoit "
 auparauant. Assez de ioyaux donna le Roy Hen- "
 ry à Bertran, & lui bailla quatre de ses Cheualiers, "
 ausquelz il enuoya en present au Roy de France "
 plusieurs hanaps, coppes, & nefes de fin or. Puis "
 mercia ledit Bertran, en lui disant: Bertrā, moult "

„ auez le cuer vaillant; & par vous suis-ie mis à
„ honneur, & par les bons François. Je ne le celeray
„ ia. Or vous vous en voulez aler en France, & vo-
„ stre frere Oliuier, Oliuier de Mauny, celui de la
„ Houffoye, Caracnloet, Guillaume Boytel, Bille-
„ baut, des Hosteulx, & plusieurs autres Cheualiers
„ & Escuiers, que ie ne nommeray pas, qui moult
„ vaillamment m'ont serui aux armes. Si les paie-
„ ray bien à mon pouoir en or & en ioyaulx, qu'ilz
„ emporteront. Mais quant vous me laissez, s'il
„ plaist à Dieu, le Besgue de Villaines me demour-
„ ra, & son filz qui est preux & hardi: & Regnault
„ de Limosin, & Dam Pietre Ferrant. Car ie n'ay pas
„ encores Espengne du tout à mon commande-
„ ment. Il en y a bien le tiers, où ie n'ay riens. Et se
„ ie n'eusse trop à faire à mon pais, ie vous liuraf-
„ se vint mille combatans pour mener au bon Roy
„ de France. Mais se ie puis venir à ce, où ie con-
„ tens, ie monteray en la mer maintes grans galées
„ pour aidier aux François, & guerrier le Prince, &
„ tous les siens. Car i'en ay grant desir. Sire, dist
„ Bertran, à Dieu vous commant, qui vous croif-
„ se honneur par sa digne grace. Asiez le conuoya
le vaillant Roy. Et Bertran cheuaucha tant, qu'il
vint en sa Duchie de Moulines, où il accueilly
gens d'armes de tous costez. Lors enuoia vn sien
Herault nommé Guillaume, autrement Gues-
clin, deuers le Roy de France, pour lui excuser
de ce qu'il ne pouoit pas si tost venir. Et lui escri-

uoit, comme il vendroit par le pais d'Auuergne. & de Berry, où il assembleroit tant de gens, qu'il liureroit la bataille au Roy Engloiz. Et en ce contem-
 pte le Roy enuoya querre Bertran par cinq
 foiz. Lequel, ainsi comme il partoit de Molines,
 rencontra vn cortois Cheualier nommé Iehan
 de Berguettes Chambellan du Roy, & illec venu
 en message de par ledit Seigneur. Lequel Cheua-
 lier salua ledit Bertran, & il lui aussi, & bien le re-
 cognut. Si lui demanda, qui l'amenoit en ces par-
 ties. Et icellui Cheualier lui respondi, que ce n'e-
 stoit pas sans cause, & que le Royaume de Fran-
 ce seroit tout gasté, se Dieu n'en pensoit. Car
 ou pays de Picardie estoient entrez bien vingt
 mille Engloiz, que conduisoit Robert Canole,
 Thomas de Grançon, Hue de Carualay, Carso-
 ualle, Guillebert Guiffart, Richart de Guerny,
 David Hollegrent & son frere, Hennequin,
 Acquet, Geuffray Ourcelay, Thomelin Folisset.
 Et sont bien dix-sept Capitaines, qui s'en vien-
 nent tout droit és pays de Champaigne & de
 Brie, & requerent bataille au Roy. Et a iuré le-
 dit Canole, qu'il amerroit son ost deuant Pa-
 ris. Et d'autre part le Prince est sur les champs,
 ou pays de Guiéne, lequel fait maint grât guer-
 re à Monsieur le Duc d'Aniou. Si en sont les pais
 gastez, les marchadises anullées, & l'Eglise moult
 apourée. Si vous prie & conseille le Roy, que
 vous lui fassiez secours & aide de vous & de voz ..

„ gens, & il vous liurera l'espée, & fera son Conne-
 „ stable, comme au Cheualier qui auourduy vi-
 „ ue, à qui elle sera mieulx employée. Sire, dist Ber-
 „ tran, c'est bien m'entente de aler briefment de-
 „ uers le Roy. Mais ainçois me conuient aler veoir
 „ Alain de Beaumont & Iehan son frere, qui tien-
 „ nent le siege deuant le chastel de Sorye, que ie fe-
 „ ray assaillir. Et quant il sera prins, ie assembleray
 „ mes gens, & m'en yray en Languedoc veoir mō-
 „ dit Seigneur le Duc, qui en a besoing. Et vous re-
 „ tournerez deuers le Roy, auquel vous me re-
 „ commanderez humblement, & lui direz que à
 „ mon pouoir ie feray son plaisir. Adonc prindrēt
 „ congié li vns de l'autre, & s'en retourna ledit
 Cheualier en France. Et Bertran cheuaucha tant,
 qu'il vint audit siege de Sorye.

*Comment Bertran prist d'assault le chastel de Sorye en
 Espengne, & en Guienne sur les Engloiz les villes,
 chasteaulx, & fortresses de Brandomme, saint Yré,
 Montpanon, Mausénay, & plusieurs autres.*

CHAPITRE XLIII.

Q VANT Bertran fu venu deuant Sorye, au
 siege que tenoient ses cousins Alain &
 Iehan de Beaumont, qui auoient bien deux mil-
 le hommes auecques eulx des gens du Roy Hen-
 ry, mais rien n'y pouoient conquerir: Bertran
 leur

leur demanda, à quoy il tenoit, que ce chastel n'estoit prins: & dist que passé auoit vn mois, qu'il le deust estre. Et lehan de Beaumont lui respondi, que maint grans assaulz y auoient liurez: mais ceulx de dedens s'estoient fort deffenduz. Et quant Bertran l'entendi, si ne lui plut pas, & dist: Ade le veu & saint Yues, nous aurons ces gars, ainçois que repairions en France. Lors fist assaillir & trayre, tellement que ceux des murs ne s'osoyent descouurir tant fust pou: mais trefbuchaient à val grans pierres & brises, dont ilz firent brisier teltes & braz à maint soudoyer. Mais quant aucuns se vouloient retraire, pour eulx reposer, Bertran les amonnestoit de retourner à l'assault, & leur disoit: Or auât, mes enfans, ne reculez pas, mais pensez de bien besongner. Les bons vins sont leans, dont nous buuerons; pain & chair aussi, dont nous auons besoing. Et si y a grant foison or & argent, que ie vous abandonne, & l'auoir sera tellement departy, qu'il n'y aura si petit, qui ne puist repaier en France à trois cheuaulx, comme s'il estoit cheualier. Adonc s'esmurent, & commencierent à monter sur eschielles, targes d'uis, & de fenestres. Et qui les veist assaillir, à tref-grant merueille les puist prifier. Noblement se porta Bertran, & aussi fist le Seigneur de la Houffoye, Oliuier de Mauny, Alain & Henry ses parens; & commencierent à approucher les murs. Là auoit vn Escuier Breton

nommé Bertran, filleul de Bertran du Guesclin, qui sur fons l'auoit tenu. Lequel Escuier demanda le panoncel de son parrin, qui baillé lui fust. Et tantost l'ala mettre sur vne tour, que il conquist. Car il monta tout le premier dessus le mur. Et apres en monta bien deux cens tout à vn tenant, qui crioyent Nostre Dame Guesclin. Et quant ceulx de dedens se virent ainsi prins, ilz se mistrent aux genoulx, en criant mercy. Et tantost les portes furent ouuertes à Bertran, qui entra dedens, & toute sa gent. Ainsi conquist icelui chastel, que le Roy Henry lui auoit donné parauant. Mais entretandis que ledit Bertran lui estoit alé aidier au siege de Toulette, plusieurs Espaignolz se assemblerent, & mistrent oudit chastel, pour greuer les dessusdiz Roy & Bertra: lequel prist tous ceulx, qui le chastel auoient tenu contre sa voulenté, & les fist mettre en bons gresillons, & puis les enuoia à Burs audit Roy, lequel informé de leurs offenses les fist tous pendre. Apres ceste conquiste donna Bertran congé aux Espaignolz, gens d'armes, maint riche don, comme cheuaulx, or, & argent: & retint avecques soy tant seulement les Bretons, & plusieurs François, pour amener avecques lui en France. Et n'auoit gaiffes seiourné illec, quant le Marechal d'Audrehem vint à lui de par le Roy, qui prioit Bertran de aler en France, ce disoit, pour lui aidier contre les Engloiz, qui gastorent

le pais. C'est veoir, dist Bertran. Par ma foy, dist-
 il, vous estes proprement le cinquiesme message
 que le Roy m'a enuoyé. Si suis moult doulent,
 que ie n'ay obey à lui, & que ie n'y alay dès le pre-
 mier. Car certes le Roy m'a fait plus d'honneur
 que ie ne vail, ne à moy n'appartient. Mais i'ay eu
 grandement à besongner en Espengne pour ai-
 dier au Roy Henry, que i'ayme de bon cuer, cō-
 me pour garder la terre qu'il m'a donnée. Si ay
 grāt merueille, ne le vous celeray pas, pourquoy
 le Roy ne fait vne noble assemblée de vingt mil-
 le ou trente mille de bonnes gens de son Royau-
 me, ausquelz il baillast vn bon Chenetayne pour
 combattre tantost ces gars, qui ainsi robbent son
 pays, qui tant est bel & gent. Dist le Mareschal:
 Le Roy vous atant, & n'y a Princee en France, qui
 n'ait grant desir de vostre venue, & par Dieu au-
 si a tout le commun, & par especial les poures
 gens. Et vous dy que le Connestable, qui est Sei-
 gneur de Fiennes, veult rendre l'espée au Roy
 pour occupation de vieillesse, & fait grant sere-
 ment qu'il ne scait homme viuant, à qui ladite
 espée fust mieulx employée, ne aussi bien com-
 me en vous, qui estes agreable du peuple. Et se
 vous venez en France, vous aurez tant de gens,
 que oncques n'en fu tant assemble. C'est veoir,
 dist Bertran, mais que on leur baille de l'argent.
 Apres dist Bertran au Mareschal: Je vueil aler
 veoir le Roy pié à pié avec vous. Tantost feray

„ chargier armeures pour nous armer, or, argent,
„ ioyaulx pour despandre & soustenir nostre estat.
„ Ne ne vueil gesir en ville, que vne seule nuit, ius-
„ ques à tant que ie soie en France. Et s'il plaisoit
„ au Roy moy faire Connestable, & bailler ses sou-
„ doiers en gouuernement, ie leur feroie brief-
„ ment desseruir leur soudées. Ie sçay bien qui as-
„ semblera grant gent, qui feront à doubter. Mais
„ ce ne leur vault neant, qui ne leur baillera argent
„ souffisamment. Car soubdoiers ne pueuent ou-
„ veulent seruir, se ilz ne sont paieez. Apres ces pa-
rolles, Bertran donna à disner honnourablemēt
audit Mareschal, auquel il porta grant honneur
icellui iour. Et quant il ot appresté son fait, il se
mist au chemin. Et n'auoit auecques lui que cinq
cents hommes. Si cheuaucha tant, qu'il vint en
la Conté de Foiz. Et quant le Conte de Foiz sceut
sa venue, il ala encontre lui, pour lui faire hon-
neur, & le conuoya iusques à Montendour, en
disant, que bien le deuoit cherir & honnourer.
Car il ne sauoit ou monde meilleur Cheualier
de lui. Mais de sō frere ain sné se plaingnoit, pour-
tant que plusieurs foiz lui auoit porté domma-
ge, & fait deshonneur, en seruant le Conte d'Er-
meignac son aduersaire, auquel il deuoit prou-
chainement auoir la bataille. Sire, dist Bertran,
il fait ce qu'il doit, puis qu'il gaaigne son argēt.
Et se il le faisoit autrement, il seroit faulx & trai-
tre. Car il doit loyaument seruir son maistre,

puis qu'il gaaingne ses deniers. Et aussi feroie-
 vous, se ie gaaignoie vostre argent; & fust encō-
 tre mon frere. Bertran, dist le Conte, se vous me
 voulez promettre & iurer vostre foy, que vous
 me aiderez encontre tout homme, ie vous don-
 ray vn sommier chargié d'or & de fin argent. Si-
 re, dist Bertran, ie vous en respondray. Ie vous
 aideray encontre tous, excepté les Fleurs de Liz
 tant seulement, que ie vueil effaucier & honnou-
 rer à mon pouoir: & vous feray apaisier au Con-
 te d'Ermeignac. Et se il ne fait pas à vostre vou-
 lenté, si retrayray-ie mō frere deuers moy. Ainsi
 le loa Bertran au bon Conte, puis se party de lui,
 & exploicta tant, qu'il vint en Languedoc, où il
 fist bien publier son nom par faiz d'armes: & là
 assembla bien mille & cinq cens hommes d'ar-
 mes, & tout en venant son chemin conquesta
 d'affault la ville & chastel de Brandomme, & vne
 grosse ville à cloicher nommée saint Yré: vne
 autre ville nommée Monpanon, & le chastel de
 Maufenay, qui estoit hault & fort. Et tellement
 commēça à multiplier sa renommée, que l'en lui
 aportoit les clefs des villes & chasteaulx par tout
 où il venoit. Et Bertran les receuoit, & ou nom
 du Roy les faisoit iurer fealtez & hommages. Et
 tant cheuaucha Bertran, qu'il trouua à vn soir le
 bon Duc d'Aniou, qui moult le festoya, & lui
 dist: Haa! Bertran, moult faites à loer. Vostre gra-
 ce & vostre renom ne pourroit nulz prifier. Car

„ vous auez fait esbahir les Engloiz plus envne feu-
„ le quinzaine, que ie ne pourroye faire en vn an
„ tout entier. Et vous soiez le bien venuz. Car bien
„ à point venez pour trouuer auentures. On dit
„ que i'ay amené la guerre en ce pays, mais non ay.
„ Car le Prince de Galles, qui riens ne me prise,
„ vouloit imposer truages sur ma terre. Si ne lui
„ souffreray plus. I'ay depuis trois mois en ça con-
„ quis quarante forteresses ou plus. Le deisse, que vo⁹
„ demourissiez avecques moy. Mais il cōuiét cour-
„ re au plus grant besoing. Robin Canole s'en viét
„ deuant Paris, lequel a bien avecques soy vingt
„ mille Engloiz ou plus: & ont desia passée la riuie-
„ re de Sayne au dessus de Troyes. Si vous atant
„ Monsieur le Roy, pour vous liurer l'espée à la
„ Connestablie. Si ne la refusez pas, & faites son
„ plaisir: & dès ores mais ie vous seray tousiours a-
„ my. Je recommande France en la grace de Dieu,
„ & de vous, qui estes vray escu. Ne iamais après
„ vostre mort ne sera nul tel. Et quant Bertran ot
„ oy parler Monsieur le Duc, si le mercia de l'on-
„ neur qu'il lui disoit. Et bien dist Bertran de soy-
„ mesmes, qu'il ne valoit pas, ne iamais ne vaul-
„ droit le bien, que l'en auoit, ou supposoit, qui
„ fust en lui. Mais il auoit fait son pouoir, & enco-
„ res feroit. Et adonc se parry du Duc, & avec lui le
„ bon Marechal d'Audrehem. Et tant cheua-
„ chierent, qu'ilz vindrent à Perregort, où moult
„ a bonne ville. Illec trouuerent Galerén frere au

bon Conte Ionas, qui moult honnoura Bertran,
& le mena en son chastel, où il donna vn noble
disner à lui & à sa compaignie. Et apres mengier,
chacun s'en ala esbatre, & monta Bertrá en hault
sur le donion, & vit vne Abaye, où il auoit grand
forteresse, & ou cloichier d'icelle vne banniere à
vn lieppart d'or. Hee! Dieu, dist Bertran, auez
vous Engloiz si prouchains voisins? Oyl, dist le
Seigneur. Mal soient-ilz venuz. Il aura bien tost
vn an, qu'ilz ne partirent d'illec. Je ne les puis a-
uoir, ne on ne les aura ia. Car il y a fort, & bien a-
uitaillié de gens d'armes garniz, & fors defensa-
bles. Ilz l'ont bien monstre. Et quant Bertrá l'oy,
si regarda assez tost ladite fortresse, & iura saint
Yue, que du pais ne partiroit, tant qu'il eust ladi-
te Abbaye, où il pensoit à soupper, & y remet-
troit l'Abbé & tout le Couuent. Adonc descen-
di de ladite tour Bertran, qui tant estoit hardi: &
manda par son Herault ses gens, qui estoient lo-
giez en plusieurs villages autour d'illec. Et quant
il les ot assemblez, il fist sonner sa trompette, &
se armerent tuit. Eten Perregort prindrent huis
& fenestres, & bien cent eschielles, ou plus. Et
quant le frere du Conte vit ainsi l'ordonnance
de Bertran, si le lieuy en bel arroy, & fist char-
gier à charroy trois engins, qu'il cuidoit faire
drecies, & getter comme pour le mieulx. Mais
Bertran les fist lessier, & dist qu'il n'en vouloit
point: & que ainçois qu'ilz fussent leuez & ap-

prestez, buueroit-il lui & ses gens des vins de
leenslargement. Dont s'en vint Bertran aux bar-
rieres, pour parlementer au Capitaine, auquel il
dist, qu'il lui rendist le fort. Si y remettroit l'Ab-
bé & le Conuēt, qui estoit dedēs Perregort cour-
rouciez & doulens. Et leur monstra Bertran, cō-
ment ilz viuoient en pechié. Mais le Capitaine
n'en tint conte, & dist qu'ilz seroient bien ab-
soubz pour donner du leur. Et quant au fort, que
„ Bertran lui requeroit à auoir, il lui respondi: En-
„ cores ne l'auiez vous pas. A qui diroye-ie que ie
„ l'auroye baillé? Et Bertran lui respondi: Au Roy
„ de France. Car pour certain ie suis à lui, & toute
„ ma gent. Et suis nommé Bertran du Guesclin.
„ Haa! dist le Capitaine, maudit soiez vous. Vous
„ auez plus de renom, que homme qui soit en vie.
„ Mais pourtant n'aurez-vous pas nostre fort à vo-
„ stre comment. Et se vous nous assaillez, vous fe-
„ rez folie. Car vous y perdrez assez de voz gens,
„ & n'y conquesterez rien. Capitaine, dist Bertran,
„ ie vous promets, que se ie vous prenz à force,
„ vous y perdrez la vie. Lors fist sonner sa trom-
pette, & commencer l'assault, de trayre, & de
lancier, les fossez emplir de terre & de fucillye,
& maint eschielle drecier contre le mur. Et e-
stoient les montans & assaillans targiez de bon-
nes targes pour le trait. Aufquelz Bertran disoit:
„ Or auant ma noble mesnie: à ces ribaus gars. Car
„ ade le veu, ilz y mourront. Ie vous donne quan-
que

que il y a en l'Abbaye, cheuaulx, or, argent, & draps. Adonc Bertran monta sur vne eschielle. Et quant Galeren le vit ainsi essonner, si se cōmença à seigner, en disant au Mareschal d'Audrehem. Dieu, quel homme est-ce là? Doubce Vierge Marie? Dist le Mareschal, ie vous iure & promets, que en tout le monde n'a son pareil vivant. Et se il estoit Roy de Hierusalem, de Naples, ou de Hongrie, il acquesteroit toute la gēte paienne. Bonne vielui doint Dieu de Paradis. Car de sa mort seroit France toute empirée. En l'autre eschielle estoit monté Oliuier de Mauny, & d'autre part Alain & Henry son frere, Iehan de Beaumont. Mesmes le gentil Mareschal s'y exposa, & Galeren aussi, qui crioit: Perregort, Dieu aye aujourduy. Et ceulx de dehors crioient: Montioye saint Denys. Mais ceulx de dedens feroient sur eulx, & iettoient roges barreaux de fer, chauds viue, grans brises trauerfans, & maint tonnel emply de pierres. Mais toutesfoiz ne leur valu riens leur defense. Car l'assault fu si fort, que Bertran & ses hommes entrèrent dedens: & d'une hache qu'il tenoit fery le Capitaine, si qu'il lui fendi la teste. Et quant Engloiz le virent, si se rendirent à lui. Et l'Abbaye se emplit de noz gens, de tous lez. Plusieurs defendans y moururent, & plusieurs reçut Bertran à mercy. Tātost fist departir la gaangne sans noise & sans debat: & celle nuit y soppa lui & sa com-

paignie , & le landemain y remist les Moynes. Deux iours y seiourna , & landemain s'en party , & enuoya deuers le Roy ledit Mareſchal : & és fors qu'il auoit conquis leſſa ſes gens. Auquel Mareſchal il chargea ſon meſſage à faire deuers le Roy. Lequel Mareſchal cheuaucha tant , qu'il vint à ſaint Pol , où il trouua le Roy noſtre Sire. Auquel il relata grāt partie des proeſces de Bertran , dont le Roy le priſa , & auctorifa moult , & diſt que moult le deſiroit. Car Robert Canole avec les Engloiz eſtoient logiez en Gaſtinoiz , leſquelz pourroient eſtre à ſaint Marcel lez Paris dedens deux iours. Et de ce diſt le Roy verité. Car ilz s'y vindrent logier , & boutoient les feux par tout ou plat pays : dont c'eſtoit grant pitié. Et à Paris auoit lors pluſieurs gēſdarmes de cheual & de pié , bien le nōbre de dix mille , ou plus , ſans la commune. Si y auoit deux Ducs , huit Cōtes , & pluſieurs Barons : deſquelz eſtoient le Duc d'Orleans oncle du Roy , & les Contes d'Aucerre , & de Sancerre , de Tancarville & de Dāpmartin , & de loigny , de Porcien , de Harecourt , & de Brayne : le Viconte de Nerbonne & ſon frere : les Seigneurs de Fontaines & de Sempy , Gaucher de Chaſtillon , Odart de Renty , & Henry de Leſtumel. Et fuſt yſſu de Paris pour lors le nombre de ſoixante mille hommes tant vns comme autres , ladite ville ſouſſiſamment gardée. Mais il ne plaifoit pas au Roy , que nulz des ſiens yſſiſt

pour liurer bataille. Dont les gens d'armes, qui autre chose ne demandoient, estoient moult courrouciez, & le commun peuple comme tout forcené. Mais ne consideroient pas le meschief & inconuenient, qui par auenture se peult en-
 fuir de combatre lors iceulx Engloiz ainsi des-
 pourueument: attendues les diuerses fortunes de
 bataille, qui pueuet auenir, & plusieurs foiz sont
 auenuës de noz temps en diuerses parties du mō-
 de, & par especial au Royaume de France, où
 aucunes foiz le moins emporte le plus, par moult
 de cas assez communs, dont la narration seroit
 prolix & necessaire icy endroit. Et pour ce que
 le Roy, qui estoit le plus sages Prince Chrestien,
 que pour le temps regnast, amoit parfaitement
 son peuple, & le vouloit garder, ne souffiroit-il
 pas à le auenturer & exposer à tel peril? Mais y
 vouloit obuier, & au moins de grief de son peu-
 ple vouloit par bon aduis & discretion, par bon-
 ne deliberation de son conseil, faire poursuir &
 combatre ses ennemiz, quant il en seroit temps
 & lieu, comme autres foiz auoit fait. Et combien
 qu'il desliast la chose, si le desiroit-il sur toute
 personne. Car le fait lui touchoit plus au cuer
 que à nul quelconques. Car il auoit en memoire
 les faiz des aucuns de ses predecesseurs, si vouloit
 le sien gouuerner plus discretemēt, & par grei-
 gneur prudence & attrempence. Sans laquelle
 proesce & hardement ne peuent pas longuemēt

regner. Mais le Roy combattoit foubtiuement & & sceurement ses ennemiz ; lesquelz furent logiez par l'espace de cinq iours deuant Paris, & souuent demandoient bataille. Mais ilz furent tellement combatuz & assailliz de si grant famine, qui les conuint partir de place. Car les greigneurs parties des viures & fourrages s'estoit retraite du plat pays aux bonnes villes, chasteaulx, & fortresses. Et d'autre part iceulx Engloiz ne se osoiēt goute desfrouter ne eschapper, pour doute qu'ilz ne fussent prins & attrappez des gés d'armes François, qui les poursuiuoient & coustoioient à tous lez. Et qui voudroit raconter tout au long le departement desdiz Engloiz, & quelle voye ilz tindrent, les pillages, prisonniers, & rençons qu'ilz prindrent, & les rauissēmens & arfins qu'ilz firent ; trop ennuieuse chose seroit de lire, & plus de l'entēdre. Mais moult estoit courroucié Canole, que on ne lui auoit liuré bataille, & mains en prisoit les Barons de France. Et bien disoit, que se Bertran fust avecques le Roy, il lui eust liuré gent & puissance telle, que ainsi ne alissions nous pas non combatuz, mais le fussions passé a vn moiz, ou plus. Et Thomas de Grançon dist, que moult le desiroit à veoir, & n'auoit pas trois nuiz, qu'il auoit songié que vn Aigle le assailloit, duquel il se defendoit. Mais toute la force de lui & de sa gent ne lui pouoit riens valoir. Car ledit Aigle le aconuetoit tout de ses ailles, &

le vouloit bequier és yeulx, qu'il lui eust creué se à lui ne se fust rendu. Ledit de Grançon ne sauoit que c'estoit à dire. Hee! Dieu, dist Carualay, se ie „ auoye ainsi songié, ie m'en yroie tout droit, où „ ie sauroye Bertran, & sans attendre bataille me „ rendroie à lui. Car c'est l'Aigle, qui en France se- „ ra crier Montioie saint Denys. Ainsi s'en aloient „ les Engloiz, & les sieuoit chacun aux lieux enui-
ron. Et ne pourquant estoient-ilz poursuiz, & costoiez de plusieurs bonnes gens d'armes, desquelz estoient les Capitaines, les Contes d'Aucerre & de Sancerre, Gaucher de Chastillon, Odart de Renty, Iehan de Vienne, le Viconte de Nerbonne, & les Seigneurs de Angest & de Rayneual, qui aux Engloiz portoient grant dommage, & leurs rescouyrent plusieurs prisonniers & bestiaux. Et quant iceulx Engloiz se espan-
doient, noz gens les faisoient tantost rassembler, & les tenoient de si pres, & de si court clos, que moult souffroient poyne & mesaise. Toutesfoiz lesdiz Engloiz firent tant à quelque meschief, qu'ilz trauserent la riuere de Loyre, & se retrayrent deuers la cité du Mans.

Comment Bertran fu fait Conneſtable de France, apres ce que Robert Canole ot amené les Engloiz deuant Paris, leſquelz Bertran pourſuy. Et de l'assemblée des gens d'armes par lui faite à Caen, pour combattre iceulx Engloiz.

CHAPITRE XLIV.

OR vous diray de Bertran, qui auoit changié son habit, pour doubte qu'il ne fuſt rencontré, ou recogneu des Engloiz, qui ſouuent le faiſoient eſpier. Il vint à Paris en vn certain iour, lui ſixieſme ſans plus. Mais il n'eſtoit pas adonc veſtu de drap d'or, de ſoye, ne d'eſcarlette; ainçois auoit cotte & chapperon d'un fort drap de grizet, & rude & groz, & deſſoubz eſtoit armé au couuert. Et quant le Roy ſceut ſa venuë, il enuoya au deuant de lui ſon premier & mieulx amé Chambellan, nommé Bureau de la Riuiere, qui ſauoit autant bien & honneur, comme Cheualier peuſt ſauoir. Et pour ce, & auſſi que le Roy ſe fioit parfaitement en lui, comme faire pouoit, il lui bailla pluſieurs Cheualiers d'honneur en ſa compagnie. Et quant ledit Bureau, qui eſtoit Cheualier habile, courtois & gracieux, entra Bertran, ſi le ſceut bien honnourer & feſtoier, comme il appartenoit à faire. Car de pieça en auoit apris & acouſtumé la maniere. Parquoy il

le deuoit bien fauoir. Ne de faire honneur aux bons n'estoit-il pas aprentiz, ainçois y despendoit largement du sien. Or vous dy, que quant Bertran entra dedens Paris en simple habit, & à si petite compaignie des siés, il fu regardé à merueilles du commun peuple, qui attendoit sa venue. Et quant il fu venu en l'ostel de saint Pol, il trouua le Roy en sa chambre seant en vne chaire. Si se agenouilla deuant lui. Mais le Roy se dreça & le prist par la main, en disant qu'il fust le bien venu. Car trop auoit demouré en Espengne: & que desormais lui conuendroit porter sa frontiere. Apres ce, lui conta de la cheuauchée, que les Engloiz auoient faite: desquelz on pouuoit encores veoir les feux de sainte Geneuiefue dedens Paris, & comment il lui auoit enuoié plusieurs messages. Puis lui dist le Roy ces parolles, ou semblables: Bertran, nous sauons bien que vous estes hardiz aux armes, eureux en bataille, & auez la grace du monde. Et pour ce que nous sommes plainement informez de vostre loyauté & souffisance, nous vous voulons monter en honneur, & donner si grant office comme la Connestable de France: dont nous vous liurerons l'espée pour garder & deffendre nostre Royaume. Lors Bertran regracia moult humblement le Roy de l'onneur qu'il lui presentoit. Apres lui demanda en ceste maniere: Sire, n'est pas donc Connestable le noble Seigneur de Fiennes, qui

„ est bon Cheualier? Bertran, dist le Roy, nostre
 „ cousin de Fienne nous a bié serui, mais il est vieil
 „ & foible. Si n'en peut plus endurer la poine, ne
 „ soustenir le trauail, qui conuient au fait d'armes;
 „ & nous a rendue l'espée, & affermé par son sere-
 „ ment, que s'il auoit tout le monde en sa Seignou-
 „ rie, & il voulüst auoir vn bõ gonfanonnier pour
 „ garder sa terre, il ne esliroit autre de vous. Sire,
 „ dist Bertran, ie suis prest de faire vostre plaisir.
 „ Mais ie vous conseille, que vous fassiez demain
 „ assembler des gens de vostre conseil, pour auoir
 „ leur aduis, sans lequel l'en ne doit pas appointier
 „ de tel chose. Adonc le Roy par grant signe d'a-
 „ mour lui getta le braz au col. Et estoit le soupper
 „ prest. Si se assirent au mengier. Le Roy honnou-
 „ ra moult Bertran, lequel reposa celle nuit oudit
 „ hostel, en vne chambre, qui pour lui fu moult
 „ noblement pourtendue d'un drap ouuré à fleur
 „ de liz d'or. Et quant ce vint le landemain apres la
 „ Messe, le Roy assemblea son conseil, ouquel e-
 „ stoient plusieurs Ducs, Contes, Barons, Cheua-
 „ liers, les Preuosts de Paris & des Marchands, &
 „ grât partie des plus notables bourgeois, ausquelz
 „ il fist vne breue collation, en disant: Beaus Sci-
 „ gneurs, vous sauez comme nostre Royaume a e-
 „ sté moult greué & domagié ores & autres foiz par
 „ les Engloiz noz ennemiz. Et auons eu moult af-
 „ faire en nostre temps, par ce que plusieurs, qui
 „ nous deussent auoir esté amiz & aidans, nous ont
 „ esté

esté ennemiz & nuyfans. Et pour ce que nous
 voulons vser de vostre conseil à l'vtilité, & pour
 la tuicion & deffense de nostre Royaume, auons
 ordonné de eslire & faire nouuel Connestable à
 vostre gré. Combien que de nostre plaine puis-
 sance & auctorité Royale, nous le pouons faire
 du mendre Cheualier que nous ayons, si nous
 plaist à le faire par vostre acord & election. Si a-
 uons aduisé & regardé, que nostre cousin le Sire
 de Fiennes ne puet, & aussi ne veult plus exercer
 l'office, pour occupation d'aage & de fragilité:
 & nous a renduë l'espée en la presence de plu-
 sieurs de vous, & iuré par le serement qu'il a à
 nous, qu'il ne scet homme si ydoine à estre Con-
 nestable, comme est Bertran du Guesclin, que
 nous auons mandé. S'il vous semble que bié soit,
 si l'acordez que si, & nous dites vostre voulenté.
 Adonc s'escrierét tous à vne foiz qu'ilz vouloiēt
 Bertran, & non autre, & que l'espée lui fust deli-
 urée. Tantost le Roy dist à Bertran, qu'il receust
 ladite espée. Et il respondi, que voulentiers, puis
 que Dieu lui auoit presté telle grace & honneur.
 Mais ce seroit par telle condicion, & non autre-
 ment, Que se en son absence aucun traictre par
 traison ou loberie rapportoit au Roy aucun mal
 de la personne dudit Bertran, il n'en croyroit
 point le rapport, ne ia pis ne lui en seroit, ius-
 ques à ce que les parolles rapportées fussent rela-
 tées en la presence dudit Bertran. Laquelle cho-

se le Roy lui octroya. Et par ainsi il receut l'espée, & fu fait Connestable de France, apres ce que le Roy l'ot baisié. Adonc se presenterent audit Bertran gens d'armes, qu'il receut moult doubcement. Et longuement ne demoura pas, ainçois proposoit de combattre les Engloiz en bref temps. Et pour ce faire, demanda de l'argēt au Roy, qui lui fist deliurer la paie de mil & cinq cents hommes d'armes pour deux mois. Mais pou lui sembloit pour trente mille hommes. Et pour ce disoit au Roy, qu'il fist verser ses coffres, où il auoit tant d'argent. Car grant meschief seroit, se les gens d'armes qu'il retendroit, n'estoient paieez. Car la faulte de paiement leur donne mauuaiz exemple de bien seruir, & si les amonneoit à piller. Apres ce, Bertran print congié du Roy, & s'en ala à Caen en Normandie, où il fut moult festoyé & honoré. Et là fist son mandement, où gens d'armes venoient de tous lez. Car moult le desiroient à veoir. Et tel ne l'auoit oncques veu, qui moult de biens en disoit. Et combien que Bertran n'eust prins argent du Roy, que pour mil & cinq cents: neantmoins il en retint plus de trois mille. Car il n'en refusoit nul. Et quant argent lui fu failly, il les paya de sa vaisselle, & ioyaux d'or & d'argent, qu'il auoit apporté d'Espaigne. Tant, qu'il n'y eut celui, qui ne fust monté & armé souffisamment. Et donna Bertran vn moult riche disner en ladite ville de Caen aux

principaux Cheuetaines ilec venuz: c'est assauoir Messieurs les Contes du Perche & d'Alençon, Monsieur le Marechal d'Audrehem, Monsieur de Cliçon, qui celle année estoit deuenu François, & tant auoit greué les Engloiz, qu'ilz l'appelloient Boucher: Monsieur Iehan de Vienne, qui souloit estre Admiral, Messire Iehan & Alain de Beaumont, & Oliuier du Guesclin frere dudit Connestable, avecques plusieurs autres Barons: qui furent tellement seruiz de plusieurs diuers & estranges mez, qu'ilz dirent bien que oncques mais pour vn iour ne furent ainsi ordonnez, ne à Cour de Roy, ne ailleurs. Et ilec fu moult regardé l'ouurage de la vaisselle Bertran, qui moult estoit riche, comme dit est. Elle fu toute departie apres disner aux soudoyers. Et dist Bertran, qu'il le prestoit au Roy iusques à vn certain iour, que Engloiz paieroit tout. Et disoit bien, que s'il venoit à sondit mandement telz ** tant de gens d'armes, si retendrait-il tout. Moult fu ce iour honnourée la femme de Bertran. Car moult estoit saige Dame, gracieuse, & bien amoderée, & avecques ce lettrée en plusieurs ars & sciences, & extraite de noble lignée. Si l'auoient plusieurs nobles hommes requise par mariage. Mais elle ne vult autre que Bertran. Car elle sauoit sa destinée toute. Et Bertran fist sauoir à toutes ses gens, que chacun fust prest pour aler avecques lui au chasteau de Vire, où il

assembleroit ses gens. Et bien leur disoit, que prouchainement leur feroit deseruir leur soudées. Dont firent rouler leurs aubers, esclarcir leurs bacinez, fourbir leurs espées, & enhauscer les fers de leurs glaiues, & leurs cheuaux referrer.

„ Si disoient l'vn à l'autre: Viue Bertran, qui ainsi
„ regne. A tel homme doit-on charger gens d'ar-
„ mes, & donner or & argét à despendre. Il ne nous
„ laissera pas longuement iouchier icy, ne n'aten-
„ dra pas que les Engloiz le viennent assaillir ne
„ requerir de bataille; ainçois yra bien & hardie-
„ ment sur eulx. C'est vn vaillant Connestable, il
„ nous fera tous riches, & bien prouchainement.

Si vous dy, que Bertran & ses gens furent prests, il demanda congié à sa femme, en disant que elle demourast illec seurement. Et se mieulx lui plaisoit à la Roche-Derien, elle y pourroit aler: & qu'elle voulzist prier à Dieu, qu'il lui pleust de le ramener à ioye. Car iamaiz ne retourneroit en cel lieu, si auroit eüe bataille encontre Thomas de Grançon & les siens. Et la Dame lui ramantut alors, qu'il eust fouuenance des iours perilleux qui souuent aduiennent. En l'vn desquelz il auoit eu contre lui en la bataille de Nadres en Espengne. Et il dist, que bien lui en souuiendroit. Et atant s'en parti de sa femme, laquelle prioit à Dieu qu'il gardast son Seigneur de mort & de prison. Et yssy Bertran de Caen à moult noble compaignie. Et là peust-on oyr sonner trompet-

re, & maint instrument qui rendoient grant melodie, & veoir maint riche destrier, lances, escus, & bacinez si clers & si reluisans, que de la clarté des armes les champs replendissoient. Et fu Bertran conuoie de sa femme, & de maint bourgeois souffisant. Et quant vint au departir, li plusieurs plouroient de pitié. Tant cheuaucha Bertran, qu'il vint deuant le chasteau de Vire, où lui & les grans Seigneurs furent logiez, & les autres se logierent aux champs, & firent leurs logeys de fuillie & d'estrain. Et auoient les aucuns d'eulx à mengier, & les autres non. Mais à tant vous lefray de Bertran, & des siens, & vous parleray des Engloiz.

De la bataille de Pontualain, en laquelle Thomas de Grançon Lieutenant du Connestable d'Engleterre, Geuffroy Ourcelay, Thomelin Folisset, Hennequin Hacquet, & Guillebert Guyffart, furent prins, & leurs gens tuez & desconfiz.

CHAPITRE XLV.

TANDIS comme Bertran & ses gens estoient logiez au chasteau de Vire en Normendie, les Engloiz estoient à Pontualain; desquelz estoient les principaux Cheuetaignes Thomas de Grançon Lieutenant du Connestable d'Engleterre, Hue de Carualay, Guilebert Guyffart,

Dauid Helegrent, Hannequin Hacquet, Geufroy Ourcelay, Thomelin Foliffiez, Richart de Iennes, Emerion, Colon de Bordeaux, Alain de Bouchere, & Messire Mahieu de Rademain, qui iadix fu Capitaine d'un fort chastel appellé Mauconseil. Auquel Mahieu on auoit maintesfoiz baillé à mener *. Et estoient bien quatre mille, ou plus, tous gens d'esslite. Si furent ensemble à conseil les Capitaines dessus nommez. Ausquels dist Thomas de Grançon: Seigneurs, il est vray que en ceste route a maint Baron de grant renom, & plusieurs plus souffisans de moy, on le sçet bien. Et toutesfoiz il a pleu à nostre bon Roy, qui est nommé Edouart, moy ordonner Lieutenant du Connestable d'Engleterre: lequel pour certain à sa vie n'est peu venir par deça, pour commencer bataille. Si vous prie, que qui saura bon conseil, qu'il le die. Car bien en est besoing. Nous auons afaire contre un fier homme, c'est Bertran du Guesclin, que depuis brief tēps on a fait Connestable de France; ne à cellui office ne pourroit-on trouuer meilleur. Et si a auecques soy nobles gens. Et m'a l'en dit, que le Seigneur de Cliçon y est, lequel a relinqui au fort le Prince de Galles, lui ayant rendu hommage & fealté. Et auec ce, le fait deffier en son Palais. Et de tant sommes nous afoibliz. Car c'est un fier champion, & qui n'acoute riens à mort d'omme. Et pour ce est-il appellé le Boucher de Cliçon.

Adōc parla Hue de Carualay, en disant: Se m'aist " Dieux, Bertran est le meilleur Cheualier qui re- " gne à present. Il est Duc, Conte, & Connestable. " Et a esté long temps mon compaignon en Espē- " gne, où ie trouuay en lui honneur, largesse, & " amistié si habundamment: & auecques ce harde- " mēt, fierté, vassellage, & emprise, qu'il n'a hom- " me iusques à l'Abre, qui sceut que i'amaſſe au- " tant à veoir ne acompaignier de iour ne de nuit, " pour moy auenturer à viure, ou à mourir, ne fust " ce qu'il guerrie Monseigneur le Prince. Car en " ce cas ie doy mettre poyne de le nuyre & greuer " cōme mō ennemi. Si vous diray mō aduiz. Ie loe " & conseille, que * Cresoualle & moy nous par- " tons d'icy hastiuement, & alons querir secours " de gens d'armes parmi les forteresses Englesches, " dont nous leuerons les garnisons, que nous vous " amenerons cy endroit en ce champ. Et entretan- " diz s'il vous plaist, & bien vous semble, vous mād- " derez à Bertran par vn certain Herault, qu'il vous " vueille donner place pour combatre à vn certain " iour nommé. A ce conseil Thomas de Grançon " dist qu'il les attendroit illec, & enuoyeroit son " Herault deuers Bertran, lequel ne lui fauldroit " pas de bataille, si comme il tenoit. Et ledit Hue " respondi, que ce ne feroit mon. Aussi furent d'a- " cord à ce Alain de la Bouchere, & Messire Ma- " hieu de Rademain l'vn des greigneurs de l'as- " semblée, lequel tenoit l'apointement pour bon,

disant que à qui en vouldroit donner leur, que il en prest l'auangarde. Car mieulx valoit tost mourir, que languir longuement. Et lors Cres-soualle dist, qu'il lesseroit illec son panon & ses gens. Et Hue de Carualay respondi, que aussi feroit-il les siens. Adonc se partirent de leur ost, & cheuauchierent de fort en autre. Si assemblerent & firent armer & ordonner tant de gens comme ilz peurent. Ausquelz ilz conterent la cause de l'assemblée. Et iceulx respondirent, qu'ilz l'otroioient. Et entretandiz Thomas de Grançon enuoya deuers Bertran vn sien Herault, auquel il chargea son message & ses lettres. Lequel cheuaucha tant, que enuiron heure de vespres il vit les murs du chasteau de Vire, qui estoit enuironné de penonceaulx de tous costez, & de trefs, rétes, & loges de feullye. Car Bertran estoit acertainé du fait des Engloiz par certains espies secrez. Et ainsi comme icelui Herault approchoit dediz chastel & ost, il trouua sur les champs au lez deuers les forests vn autre Herault nommé Clayquin, lequel estoit à Bertran, & retournoit de la cité du Mans, où sondit Maistre l'auoit enuoyé. Et quant iceluy Clayquin apperceut ledit Herault Engloiz, si lui dist haultement: Beau compains, dont venez-vous? Vous portez les plaines armes de Messire Thomas de Grançon. Et vous celles de Bertran, dist icelui Herault. Si vous prie, que vous me menez à lui. Et ie feray autant pour vous

vous quāt vous vouldrez, & mestier en sera. Car vous ne sauez pas pourquoy ie suis ycy enuoyé. Dist Clayquin, Ie croy que vous venez requerir la bataille à certain iour nommé. Mais ie cognois Monseigneur à tel, quil ne vous y fauldra ne que Mars en Careme. Tant cheminerent les Heraulx parlans ensemble, qu'ils vindrent ou chastel, où on les laissa entrer à leur volonté. Et trouuerent Bertran en la Cour dudit chastel acompagné de plusieurs, desquels estoiet le Côte de S. Paul & sō filz, qui fu fait Cheualier deuāt Huissel, le Segneur de Rayneual, & Raoulequin son filz, qui moult estoit hardi, le quel fu fait Cheualier en vn pré deuant le chastel de Vaz, son autre filz nommé Galerén, Oudart de Renti, Messire le Mareschal d'Audrehem, le Sire de Cliçon, & Jean de Vienne, Oliuier de Mauny & son frere, Alain & Héry de Beaumôt, & plusieurs autres Barons. Et adōc le Herault de Messire Bertran commença à parler premier à luy, en disant: Sire, Dieu vous doint bonne vie, ie vien du Mans, où enuoyez m'auéz. Et ay trouué en chemin ce Herault illec, que Thomas de Grāçon enuoye deuers vous. Si oiez or ce quil vouldra dire, mais quil ne vous desplaie. Or tost, dist Bertran, ie lui en prie. Lors ledit Englois salua ledit Bertrā, & apres son salut, luy dist: Sire, vous estes de nouuel Cōestable de France, & de tant est vostre honneur creuē, & essaucē,

& bien le valez. Car par Dieu on ne scet point de
 meilleur de vo^s, ne plus entreprenât ne auâturât
 sa vie. Et tousiours auez regné en proesse, tant
 que l'en cognoist vostre nom par toute Crestien-
 té. Si est droit & raison, qu'il ne vueille desplai-
 re, que à vostre auenement vous fassiez parler
 de vous, & liurer bataille à Messieurs, qui vous
 en requierent. Et que ce soit à certain iour
 nommé, & en place diuisée. Et se vous ne le fai-
 tes ainsi, ie vous promets qu'ilz vous vendront
 assaillir ou de iour ou de nuit, par telle maniere
 que vous recouurerez grant blasme & villenye.
 Et tenez, vecy la lettre que Thomas de Grançon
 vous enuoye. Laquelle Bertran bailla à lire à vn
 sien Secretaire, à l'audience des Barons, qui là e-
 stoient. Et contenoit ladite lettre tout ce que
 icellui Herault auoit diuisé. Et quant Bertran
 l'entendi, si iura à Dieu à basse voix serrez, qu'o-
 iamaïs ne mangeroit, excepté celle nuytée; iuc-
 ques à tant qu'il aroit veu les Englois & leurs
 gens. Et lors Bertran demanda au Herault En-
 gloiz, où estoient ceulx qui ces choses lui man-
 doient, & où l'en les pourroit trouuer. Lequel
 Herault lui doubte respondre, qu'ilz estoient en
 vn champs assez pres de Pontualain, bien quatre
 mille ou plus, & encores deuient croistre ains
 l'endemain la nuytier. Et en oultre conta à Ber-
 tran, comme Hue de Carualay & Cressoualle e-
 stoient allez descoucher les Engloiz de leurs cha-

steaulx & fors pour venir à leurs secours. Si trou-
 ueroit bien Bertran, à qui commencer bataille,
 lequel il ne deuoit refuser à son dit auenement:
 mais leur deuoit monstrier de son mestier com-
 me le milleur Cheualier, qui pour le iour peust
 monter sur cheual, & le plus auentureux pour
 commécier bataille. Adonc les Engloiz l'escrie-
 roient & requerroient tous communaulment,
 lesquels auoient plus grant desir de lui veoir, que
 beau n'a de baisier sa mie. Et Bertra respondi: Par
 Dieu, ilz me verront plus briefment, s'il plaist à
 Dieu, que besoing ne leur feust. Adonc com-
 manda à son Thresorier, que au Herault messa-
 gier donnast quatorze mars d'argent, & le fist
 boire de bon vin largement, & avec ce coucher
 pour dormir icelle nuit se il vouloit. Puis lui dō-
 na congé quant aller s'en voudroit. Mais ainçois
 lui chargea qu'il deist aux Engloiz, qu'il auoit
 greigneur volenté de eulx trouuer, qu'ilz n'a-
 uoient lui, & que ce seroit au plus brief qu'il
 pourroit. Et quant le Herault Engloiz ot prins
 congé de Bertran, il fut accompagné d'autres
 Heraulx & de gentilz Menestrieux, qui tant lui
 presenterent vin, que par trop boire il fu tout y-
 ure, & le conuint dormir iusques à lendemain
 iour. Si le pouoient les Engloiz attendre longue-
 ment. Et Bertran fist saoir aux gens d'armes,
 que chacun s'armast bien tost, & monta à che-
 ual: & qui l'aimeroit, si le suiuit, & que touz ala-

seut après lui grans & petitz. Car iamais ne ar-
resteroit ne de iour ne de nuit, iusques à tant qu'il
eust combatu les Engloiz aussi tost comme il les
pourroit trouuer. Lesquelz estoient logiez au
dessous d'un larriz deuant Pontualain, en un sa-
blon au dehors des Courtiz. Sire, dirent les Fran-
çois à Bertran, qu'est-ce ce que vous dites? ia est
il nuit obscure & trouble, & vente d'un fort vêt,
qui est près à haulcier, & si pleut treffort, & ne fist
aussi fort temps passé a six mois. Il n'est homme,
qui durast sur cheual. Pour Dieu aduisez vous &
attédez iusques à demain que le iour soit esclai-
ré & le temps apaisié. Et quant Bertran les en-
tendi, si leur respondi, que or a prime il faisoit
il bon. Et iura que iamais ne mangeroit de pain,
ne ne bueroit de vin, ne de cheual ne descendroit,
se maugré sien n'en estoit abatu, iusques ad ce
qu'il auroit trouué les Engloiz, & commencié
bataille à eulx. Venist auecques lui qui vouldist,
& qui n'y vouldroit venir si demourast. Mais
ceulx qui n'y vendroient seroient reputez trai-
tres, & accusez de trayson enuers le Roy. Et ainsi
s'en parti Bertran, qui n'auoit pas auecques luy
cinq cens soubdoyers, lesquelz ne l'osoient les-
sier. Et toutesfoiz y estoit Oliuier du Guesclin,
Alain & Iehan de Beaumont, Oliuier de Mauny
& Alain son frere. Lequel Iehan de Beaumont
dist à Bertran, qu'il feist sonner la trompette, a-
fin que l'en se peust adrecier vers lui. Car le tēps

estoit fobfcur, que l'en ne faubir tenir fentende
vove. Dist Bertran, i'oy bien parole de bergier.
Car se ie faisoie sonner ma trompette, tel espie
du cheuaucheur la pourroit oir, & que bien tost
le yroit reporter à noz ennemiz. Viengne qui
peut, & pensons de cheuaucher, sans esparagner
cheaulx. Car tel les payera, qui ne les oseroit
pleigier. Assez conquererons sur les Engloiz or
& argent, & destriers. Ainsi cheuauchoit Ber
tran à petite compaignie. Et encore amassent
mieulx les gens à eulx reposer. Car il cheoit a
dōc trespesant pluie, & ventoit d'un fort vent &
singlant, & avecques ce faisoit-il noir & espēs,
que l'en ne veoit pas l'espace de cinq piez loing
de lui. Et tel cuidoit aler la voie & le grant che
min, qui transuerfoit parmi les champs, & aucu
nefoiz cheoit en un fossé. Ne oncques gens d'ar
mes n'endurerent si fort temps. Et le gentil Ma
reschal d'Andrehem, quant il sceut que Bertran
s'en aloit, iura Dieu que il suivroit lui & ses gens.
Et bien disoit que oncques Bertran ne regna, &
que Dieu l'auoit ordonné par son digne com
mant, pour remettre la Fleur de Liz en son estat.
Adonc se partit ledit Mareschal à huit cens com
batans tous armez de bacinez, de haubers, & de
glaiues. Maiz apres lui se partirent Monsieur le
Conte du Perche, Monsieur le han dit Mouton
Seigneur de Blainville, lequel estoit autre Ma
reschal de Frâce, compaignon dudit Andrehem,

Monsieur de Cligon, Monsieur le Viconte de
 Rohan, Messire Jehan de Vienne Seigneur de
 Rollans, lequel depuis a esté Admiral de la mer,
 les Seigneurs de la Hunaudaye, de Rochefort, &
 de Tournemine, & maint autres Cheualiers &
 Barons, qui se mistrent à la voye pour aidier &
 secourir Bertran, qu'ilz tenoient pour le plus
 souverain Cheualier, le plus preux, & le plus cu-
 reux que l'on sceust. Combien que encores pour
 la paine que il leur donnoit, le tenissent pour un
 Antechrist. Si vous dy, que les François, qui sui-
 uoient Bertran, ne cheuauchoit pas tous en-
 semble, mais par routes & par troupeaux; & se es-
 garoient pour la nuit, l'un çà, l'autre là, & puis
 s'en trienoient de buisson en buisson. Eb-
 eurent leurs cheuaux tant de meschief, que celle
 nuyt en mourut plus de deux cents. Mais ceulx
 especialment, qui avec Bertran cheuauchoit,
 eurent du mal à foison. Car il cheuaucha si fort,
 que il estancha foubz lui deux bons cheuaux.
 Dôt il fu assez blasme de ses hommes, qui lui di-
 soient: Haa! Sir, nous perdons tous noz che-
 uaulx, ne iamais ne nous en aiderons à nostre be-
 soing, & aussi nous assez perdu de noz gens, qui
 se sont esgarez pour l'orage du temps, qui ne
 pouuoient exploier. Seigneurs, dist Bertran,
 ie vous en respondray. Il sera tantost iour, que
 nous verrons entour nous. Se nous trouuons les
 Engloiz, nous nous bouterons dedens, & seront

tantost desconfiz. Car nous les surprendrons. Et
 se nous n'auons nul cheual, nous en conquette-
 rons assez, ou iamaiz n'en aurons besoing à quel-
 iour. Ainsi disoit Bertran, qui avec les dessus nom-
 mez auoit avec lui Bretons, Poiteuins, Man-
 seaulx, & plusieurs gentils Normans. Et tant che-
 uauchierent, que à heure de Soleil leuât se trou-
 uerent bien près de Pont-valain. Et adonc se au-
 paisa & acouisa le temps, & luy si bien cler. Dont
 noz gens loerent Dieu. Mais si moultiez estoiet,
 que il sembloit, que on les eust tirez d'un baing.
 Vn petit se arresta Bertran en vn pré, & regarda
 ses gens qui moult estoient mesaisiez, qui n'e-
 stoient pas cinq cens. Mais il vit venir le train
 qui le suyuoit, par la chaucée. Lors dist à ses ges-
 Le sçay bien que Engloiz ne feront pas loing de
 cy. Il ne nous fault raaler ne liouër ne de mie pour
 les trouuer. Si vous priez, que chascun defende sa
 vie quant il en sera temps, & descende chacun à
 pié. Si rechange son cheual, & se mette chacun
 en arroy pour assaillir les Engloiz, quant nous en
 ferons près. Et soyons si bien apprestez, que nous
 en ayons le dessus. Car nous les surprendrons tel-
 lement, qu'ilz n'auront loisir de eulx ordon-
 ner. Et se nous sommes pou de gêt, ne vous dou-
 tez pas. Car nous auons secours de Dibuz, & des
 nostres, qui nous suivent. Je sçay bien que Cli-
 çon, Roen, Rochefort, Jehan de Vienne, & le Si-
 ré de Trye ne nous faultront pas. non fera le Ma-

" reschal de Blainuille. Si ayez bon cuer en vous.
 " Car homme qui est esbahi, est à moitié mort.
 " Apres fist Bertran rafreschir la gent. Mais le ra-
 " freschissement leur valut po. Car trop estoient
 " mouillez, & leurs cheuaulx greuez & foulez. Et
 " non pourquant se ordonnerent gentement, &
 " estruyrent leurs draps en tordant; & puis se ar-
 " merent & furent prests pour assembler, se be-
 " soing leur en preist. Et en icelle place se desjune-
 " rent de pain & de vin qu'ilz auoient apporté avec
 " eulx. Et prenoient les aucuns d'iceulx du pain, &
 " le seignoiēt ou nom du saint Sacremēt. Et apres
 " ce qu'ilz estoient confessez l'un à l'autre de leurs
 " pechiez, le vsoient en lieu * d'escommichemēt.
 " Apres dirent mainte oroison, en depriant à Dieu
 " qu'il les gardast de mort, de mahaing, & de pri-
 " son. Puis monterent sur leurs cheuaulx, & tant
 " cheuauchierent qu'ilz virent tout à plain les En-
 " gloiz arouter sur les champs. Et quant Bertran
 " les vit, si dist à ses gens: Or auant, mes amis, veez
 " là les marchans, à qui nous deuons marchander
 " en present. Le vous pry que si tost comme nous
 " serons à vn arpent pres d'eulx, que nous descen-
 " dons tous à pié, & leur alons courre sus. Le vous a-
 " bandonne leur or & argent, & leurs cheuaulx &
 " ioyaulx, dont il y a planté. Car aussi sont les vo-
 " strés & les miens lassez. Si en cōquerrons des au-
 " trés à l'espec. Si vous dy, que adonc les Engloiz
 " estoient sur les champs bien deux mille, qui de la
 venue

venue Bertran ne sauoient riens. Et hors de leur ost y auoit des plus notables logiez en plusieurs villages, & attendoient la responce de leur Herault, & queroient le couuert pour ayfier leurs corps. Et se tous fussent ensemble, on les peust bien prifier à quatre mille. Et si n'y estoient pas Hue de Carualay, ne Cressoualle; combien que leurs gens y fussent. Ainçois estoient alez querir secours aux fors Engloiz, comme dit est. Mais à temps n'y porent retourner. Si eurent leurs gens vn pesant encontre, comme vous entendrez.

BIEN est vray, que en l'ost des Engloiz estoit vn Cheualier nommé Thomas de Grançon, & Lieutenant du Connestable d'Engleterre, lequel estoit leur souuerain Capitaine: & attendoit ille la responce de son Herault messagier par luy enuoyé deuers Bertran, comme dit est, fust de auoir bataille ou non. Maiz iamais n'eust pensé en sa vie, que Bertran à si po de gent fust venu sur luy, ne soy mis en la nuytée passée. Car oncques telle ne fut veüe. Mais Bertran estoit amy de cuer. Car sans mäder il venoit les Engloiz festoyer, & faisoit porter sa bāniere pres de terre. Ne il n'y auoit banniere desployée, ne trōpette sonnée. Et qui plus est, auoient couuers leurs baciniez de leurs robes, afin qu'ilz ne luifsisēt, & que Englois pensassent de leurs gens. Et quant ilz furent pres d'eulx, comme à demie arbalestée, illec descendirent à pié, & se rengerent emmi le pré.

Lors descoururent leurs armures, & dreccerent bannieres, panons, & maintes enseignes. Et approucherēt d'iceulx Engloiz, qui crioïēt, Dieux aye, Montioye saint Denys, au Roy de France, Guesclin le meilleur. Adonc se ferirent nozvail-
lans François entre eulx, par tel air que chascun abati le sien. Adonc se esbairerent Engloiz, & cō-
mencerent à fuir çà & là, crians & braians parmi
l'ost: Trahi, trahi, nostre host est tray. Et quant
Thomas de Grançon sceut ceste chose, si fu tref-
courroucié. Ha! Dieux, dist-il, or sçay-ie bien
que mon Herault, à qui enchargay mes lettres,
m'a amené Bertran par trayson bastie & propo-
sée. Il n'est pas preudomme qui se fie en Herault.
Tantost & sans delay ledit Thomas fist sonner
sa trompette, & Engloiz se ralierent & assemble-
rent entour lui. Tost furent vn millier armez,
qui coururent droit à son estendart. Mais Ber-
tran & les siens se bouterent si auant, qu'ilz ver-
ferent par terre loges & feulles, & quanqu'il en-
contrerent. Et à ce commencement exploitie-
rent tellement, qu'ilz en occirent bien six cents
dessus les champs. Mais Thomas de Grançon fist
remonter son greigneur estendart sur destrier,
où Engloiz se ralierent tous. Mais Bertran se ap-
proucha de ce lez enuers ledit Thomas, & sa plus
grant partie, sans reculer vn seul pié. Et quant
Engloiz regarderent son maintiē, ilz dirent l'un
à l'autre, que oncques tel Cheualier ne fu en ce.

monde mortel. Il n'a pas avecques lui cinq cents lances:& si ose bien assaillir vn tel ost. Maiz bien croy qu'il attend vn tref-grant secours. Et lors Thomas de Grançon chargea à Geffroy Ourcelay huit cens hommes d'armes pour enclore Bertran, & le venir assaillir par derriere. Et tantost ledit Geffroy se party de ladite bataille, en faisant semblant de fuir:&s'en party par le pendant d'vne môtaigne, en intention de retourner quād il verroit temps & lieu. Mais entretandiz Bertran assailloit ses ennemis tant comme il pouoit, & disoit aux siens: Or auant mes enfans, Engloiz " font desconfiz, les plusieurs s'enfuyent. Ie vous " requier vn don, ou nom de Dieu. C'est que vous " me deliuriez l'estendart de Thomas de Grançon, " que ie voy là deuant. Car ayans bastue la banniere, " vous verriez tantost le remenant desconfit. "

Adonc approuchierent François bellement celle part, rengiez en ordonnance, en escriant Guesclin:& Engloiz encontre eulx, qui fort se defendoient. Et adonc Thomas de Grançon enuoya à Pontualain vn coureur deuers Dauid Hallegreue: lequel tantost apres ce, lui amena de secours cinq cens combatans, qu'il auoit avecques luy, lesquelx donnerent moult à faire à Bertran & aux siens en l'estour, qui moult estoit fort & merueilleux. Et qui adonc veyst Bertran ferir de taille & d'estoc sur les Engloiz, & les combattre & renuerfer, querir le joint des armures, & soufle-

uer les pans, bouter l'espy dedens sans receuoir à rençon, de noble Cheualier lui peult souuenir. Le Conte de saint Pol aussi, & son filz, ne s'y faignoient pas. Et moult s'y portoient puissammēt le Sire de Raineual & ses deux enfans, c'est assauoir Messire Vvaleren, Messire Raoulequin, Messire Oudart de Renty, & Enguerran d'Eu-din, Alain & Iehan de Beaumont, Oliuier & Alain de Mauny, & tous les autres ensement. Et Engloiz d'autrepart aussi, lesquelz Thomas de „ Grançon reconfortoit, en disant : Seigneurs, „ poussez fort, sans reculer, & vous verrez tantost „ retourner le pis sur Bertran. Car Geffroy Our- „ celay le vendra assez tost visiter à tout huit cents „ combatans, qui enclorront lui & les siens. Et se à „ ce coup ie puist tenir ledit Bertran, ie le presen- „ teray au Roy Edouart, pour accroistre mon pris, „ & monter en honneur. Ainsi disoit Thomas, qui cuidoit penser vray. Mais le contraire en auint. Car entretandiz comme Bertran & ses gens se esprouuoyent & monstroient leur force encontre les Engloiz, Geffroy Ourcelay auoit pris son tour par dessoubz vn boquet, & cuidoit prendre son tour sur Bertran; quant le Sire de Cliçō, les Mareschaux dessusdiz, & Messire Iehan de Vienne, lui coururent sus à tout quatorze cents combatans. Et quant Engloiz virent ce tour prendre sur eulx, ilz commécierent à decliner & eulx tenir pour desconfiz. Là y en ot plusieurs occis.

Eureux fu celui, qui en eschappa. Illec furēt prins ledit Ourcelay, & plusieurs autres. Auquel Monsieur de Cliçon demanda, se il sauoit nouuelles de Bertran. Et icellui Gessroy lui compta comment ledit Bertran estoit entré en leur ost, & les auoit à moitié desconfiz, quant il le lessa combattāt en propos de lui enclorre; se ne fut le secours des François illec venus, comme dit est. Mais se ledit Bertran estoit mors ou vifs, il n'en sçauoit riens. Ha! Dieux, dist Oliuier de Cliçon, se Bertran est prins ie n'aray iamais ioye, tant comme ie viue. Dist le Marechal d'Audrehem, Alons lui aidier. Atant entrerent en la bataille, où Thomas de Grançon assailloit fort Bertran, & Dauid Hellegreue, qui lui estoit venu en ayde à tout cinq cens combatans. Mais ainsi comme il cuidoit assaillir Bertran, Cliçon & les siens se vindrent ferir és Engloiz, comme leux en brebiz. Et qui ledit Cliçon ataignoit à cop, il estoit mort sans remede. Car en plus n'y acomptoit, que vn bouchier à tuer grasses brebiz ou moutons. Si noblement s'y porterent les Marechaux, & Messire Iehan de Vienne, tant que les cinq cens desfusdiz furent matez & desconfiz. Et quant Thomas de Grançon vit ainsi diminuer ses gens, & croistre ceulx de Bertran, pour le secours qui leur suruenoit, il apperceut bien que desconfiture tourneroit sur lui, & qu'il lui conuenoit rendre, ou mourir en la place, ne pourquāt se main-

tint-il pour le iour moult fierement. Car il auoit encores avec lui bien douze cents Engloiz, auquelz Bertran s'estoit longuement & puïssamment combatu de sept contre douze. Car il auoit de cuer hardi & tres-bonnes gens avecques soy. Et mal semblaist, à encommencier la bataille, qu'ilz eussent tellement trauaillé toute nuit, ne enduré le vent & la pluye. Mais à combatre se eschaufferent tellement, que aussi comme pors sangliers, que l'en verse, ilz rendoient sueur & buée. Ne oncques en ladite bataille ne reculerēt plain pié de terre, ainçois à bons glaïues & espois repousserent Engloiz, tant qu'ilz les firent reculer maugré leurs dens. Et les aucuns de nous feroient de haches sur Engloiz. Entre lesquelz se prenoient puïssamment ces trois Barons, Cliçõ, Audrehem, & Vienne: en criant haultement, Nostre Dame, Guesclin. Et tant ferirent sur iceulx Engloiz de bataille & d'estoc, que tous fussent mors ou prins, quant à leur secours vindrēt Thomas le Folisset, Hennequin Acquet, Guillaume Guyffart, lesquelz amenoient bien douze cents Engloiz, qui s'estoient separez, comme dit est, attendant Robert Canole, Carualay, & Cressoualle. Lesquelz trois n'y porent venir à temps. Car adez a plouuoient gens à Bertran, & les Engloiz ne faisoient que affoiblir. Car contre vindrent à coup le Conte du Perche, le Visconte de Rohen, les Seigneurs de Rochefort, de

la Hunaudaye : dont iceulx Engloiz furent surpris & encloz atous : & se tint pour eureux celuy qui pot auoir garant. Et quant Thomas de Granchon vit les champs ainsi reuestuz de noz François, si fut auques amatiz. Et ne pourquant s'y porta comme gentil Cheualier, & reclamoit S. George, & puis escrioit; Ferez y, mes amis. Et là y ot tellemēt feru & estoqué, telle bataille cruelle & mortelle, & tel abatement & defoulement, que grant merueille estoit de veoir. Et moult y ot fort sachie & tiré à prendre les prisonniers à demis, qui tost lui estoit tolu & resqueux. Mais ie vous dy que Bertran, avec lui Iehan & Alain de Beaumont, Oliuier, Henry, Alain & Yuon de Mauny, à l'ayde de leurs gens, Cheualiers, & Escuiers Bretons, entrerent és Engloiz si auant, qu'ilz abatirent la banniere de Thomas de Granchon. Et quāt ledit Thomas se vit ainsi entrepris, il saisi vne hache, dont le tranchāt estoit d'acier, & la leua sur son col ainsi comme tout forcené; & puis la redescendi à deux mains, & en cuida tout pour fendre Bertran, lequel se plainga desoubz le coup, & embraca ledit Thomas par les rains, & à vn tour de lance le ietta à terre: puis lui osta sadite hache, & lui cria à haulte voix: Granchon, rendez vous, ou en present serez occiz. Et lors ledit Thomas se rendi à Bertran, qui tantost l'adreça, & prist sa foy. Et là suruint Monsieur de Cliçon, tenant vne hache tranchant, dont il eust

pourfendu & affolé ledit Thomas, quant Bertran le garanti, disant qu'il estoit son prisonnier. Et adonc ledit Cliçon s'en ala deuers Thomelin Folisset, qui ne se vouloit rēdre à François quelconque, ainçois se cououroit d'une grant taloche, & estoquoit d'un espy de guerre tellement deuant & derriere, & entour soy, que nulz ne l'aprouchoit, qui n'en eust mauuais salaire. Et nous occist vn bon Escuier nommé Regnier de Susanuile. Mais Oliuier de Cliçon approcha ledit Thomelin de bien pres, puis leua sa hache contremont à deux mains : & apres la rabaisa, & en cuida iceluy Thomelin detrenchier ; lequel getta sa targe encontre le cop, qui fu si grant, qu'il la fendi en deux moitez. Et quant Thomelin vit sa taloche en pieces, si lança de son espy de guerre audit Oliuier vn cop si grant, que se il ne feust bien armé, il eust tout tresperchié. Mais si fort estoit armé, qu'il conuint l'espy brisier en deux. Et tantost ledit Oliuier l'approcha de pres, & le herdy à l'escheuefaille, en disant, Que se il ne se rendoit, ce seroit en son encombrement. Et à ce mot se rendy ledit Thomelin, & ausli firent Hannequin Acquet, Guillebert Guyffart, & plusieurs autres. Et n'y ot nul des François, tant fust petit Escuyer, ne pource varlet, qu'il n'eust prisonnier pour payer rençon. Et avecques ce y conquirent les nostres largement or & argent. Mais plusieurs Engloiz pour leurs vies sauuer s'en

s'en vindrent à vne forte ville nommée Vaulx, entour laquelle auoit maint viuier; & ceulx qui entrer n'y peurent, s'en allerent oultre deuers Bressiere, les aucuns d'iceulx deuers Moncontour, & les autres à saint Mor sur Loyre, où Cresfoualle estoit. Et aussi s'en alloient partie d'iceux à Rully & Neroux, & en gentil pays nommé Gastine. Et ainsi ceulx eschapper porent de ladite bataille, où pou moururent des nostres, & plenté des leurs. Quant ilz ne pouoient estre receuz en l'un de leurs fors, ilz couroyent à l'autre. Et Bertran fist crier par vn Herault, que qui n'auroit bon cheual, qu'il cheuauchast le sien; & qui voudroit du conquest, qu'il en preyst, & que chacun le suyft. Car il vouloit aler gagner la ville de Vaux, & en bouter hors les Engloiz. Ha! Dieux, „ dient les François, Bertran n'est oncques en paix, „ tousiours veult guerrier. Et quant le champ fu „ finé, & ladite bataille acheuée, noz gens s'en partirent, & retournerent chacun au Mans, pour culx aisier & reposer. Car besoing en auoient.

De la prise du chasteau de Vaux, & de la ville de Bersiere: & comme les Engloiz s'enfoüyrent de saint Mor sur Loyre, où ilz bouterent le feu, lequelz Bertran aconsuy deuant ladite ville de Bersiere. Et d'une desconfiture faites sur les Engloiz au ray de saint Mahien.

CHAPITRE XLVI.

QUANT Bertran & les François ourent sejourné l'espace de trois iours en la cité du Mans, ilz s'en partirent, & vindrent assieigier la ville de Vaulx, qui moult estoit forte, & bien fermée. Et quant le Capitaine de leenz aperceut Bertran, il lui demanda, pourquoy il se trayoit si près, & quelle chose il requeroit. Et Bertran respondi, qu'il vouloit sauoir son nom. A donc icelui Capitaine dist, que on l'appelloit Gautier filz Vvatier. Et quant Bertran l'entédi, si lui dist: Or entendez à moy, mon cher amy. Il vous conuient vuidier de ceste forteresse, & la me rendez tantost, & sans delay. Car ie suis Connestable de France. Et vecy le bon Mareschal d'Audrehem & celuy de Blainuille, le Sire de Clyçon, le Visconte de Rohenz, les Seigneurs de Rochefort, de Rays, & de la Hunaudaye, Iehan & Alain de Beaumont, & plusieurs autres Cheualiers & Escuyers, iusques au nombre de trois mil, dont as-

fez tost serez assailliz, se vous ne vous rendez. Et
 le dit Capitaine respondy, & dist: Je voy que pou
 me prisez. Quant vous m'aurez assailly quatre
 iours entiers, & ie verray les murs de ceans per-
 cez & troez en plusieurs lieux, mes gens tref-bu-
 cher, & le sanc rayer de mon corps, & que vous
 combatrez à moy main à main: adonc si me fai-
 tes prier de moy rendre. Et ie vous respondray
 du faire ou du laissier. Et si bien tost ne vous tra-
 yez arriere, vous avez d'une pierre sur la teste.
 Haallierres, dist Bertran, tu és en ton cuidier.
 Mais briefment abesseray ton orgueil. Car par la
 foy que ie doy à Dieu, iamaïs ne buuray ne man-
 geray, tant que ie vous auray pris, & à mort mis
 en mon dongier. Et quant le Capitaine l'oy, ne
 s'en fist que mocquier. Mais Bertran, qui ses cõ-
 paignons attendoit, se tray vn pou en sue d'illec.
 Et quant ilz furent venuz, il leur dist: Seigneurs,
 la table est mise leens pour nous disner & aisier,
 & est la cuisine au feu, & le vin ou celier, de quoy
 il nous fauldra boire & mengier. Mais i'ay trou-
 ué vn portier felon, qui ne me ouureroit la por-
 te pour nul denier. Et pourtant les nous conuiét-
 il brisier, & ces murs percier & abatre. Qui voul-
 dra desjuner, se mette en besongne, & alons tous
 en labour. Car ie vueil commencer. Et lors des-
 cendirent Cheualiers & Escuyers ius de leurs
 cheuaux, qu'ilz baillerent à garder à leurs varlès.
 Puis s'armerent bien & bel, & vindrent à l'assault

la lance ou poing, & l'escu au col. Et là y auoit maint archier & arbalestrier, qui traioient entretandiz que les gens d'armes descendoient ou fossé. Lesquelz approuchoient du pié du mur, en menant grant huée, & entre deux pierres bouterent maint coustel pointu, mainte dague, & maint espoy, pour monter contremont. Et là endroit fu fait Cheualier Raoulequin de Raineual de la main de Bertran. Lequel Cheualier nouuel monta en vne eschielle. Mais tost fu abbatu. Car les Engloiz getoient sur les François grans caillouz cornuz, & tonneaux empliz de pierres, & grans bans trauerfans: dont ilz abbatirent ou fossé maint soudoyer. Dont les aucuns burent de l'eauë. Mais l'un aidoit à l'autre, & redressoiēt les cheuz. Et Bertran leur escrioit: Or auant mes
amis, ne vous recreez pas. Leans sont les bōs vins,
dont nous buerons. Ains l'anuytier serons tous
riches, & nos parentez. Iamais ne mengeray, tant
que nous y soions. Hee! Dieux, dirent François,
Bertran est desué. Onques mais tel ne fu. Cuy de
il que ce fort soit si tost pris? Là out vn soudoyer
Breton, qui fist tant qu'il monta sur le mur, & combati aux Engloiz main à main. Et apres lui monta vn Escuyer. Et quant Iehan de Beaumont vit cez deux monter, il monta apres eulx, parmi les cousteaux, qui estoient piquez ou mur. Et enterrent tous trois en vne petite tour, où ilz combattirent aux Engloiz main à main. Et là endroit

crioit-on fort Guesclin, saint Pol, le Perche, Rayneual, Renti, Heudin. Donc commencerent Francoiz à monter de tous costez. Et quant le Capitaine se vit ainsi atrapez, s'ë cuida fouyr par vne porte, dont il auoit les clefs. Mais il fu illecques pris. Et par icelle porte entrerent les François, & pou demoura d'Engloiz, qui ne feussent occis & mis à mort. Ainsi furent conquis Vaux, où auoit mout bõne ville & Abbaye, en laquelle noz gens se rafreschirent. Car assez y trouuerent viures & bons vins de Poitou, ioyaux, or, & argët. Puis renuoya Bertran ses coureurs à deux chasteaux, nommez l'un Raily, l'autre Neroux; pour sauoir se les Engloiz s'y estoient point retrays. Mais iceulx coureurs trouuerët, & rapporterent à Bertran, que les Engloiz, qui de la bataille de Pont valain estoient eschappez, estoient alez pour garant à saint Mor sur Loyre. Et quant ilz y furent venuz, ilz commencerent à crier: Vuidez, vuidez, ou tâtost serons prins; que murs & fossez ne nous feroient garantir encontre les François, qui d'assaut ont prins la ville de Vaux. De ceste parole s'espouenterent moult les Engloiz, qui oudit fort estoient. Et adonc haucierent leur pons, & fermerent leurs portes; & icelle nuyt firent bon guet, & le doublerët. Car moult doubtoient Bertran, & le Seigneur de Cliçon, qu'ilz appelloient boucher. Mais Bertran & sa gent se vindrent logier deuant ladite ville de S.

Mor. Et là vindrent Guillaume de Launoy, &
 Caraubret, qui estoit Capitaine de la Roche de
 Posay, Guillaume le Baueux, Yvain de Gal-
 les, & le Pourfuyât d'amours, & Messire Bom-
 bet, avecques les dessus nommez. Aufquelz Ber-
 tran dist: Seigneurs, ie vous prie & commande,
 " que chacun de vous me conseille comme nous le
 " ferons, pour l'auoir de la forteresse de S. Mor.
 " Car il le conuient, ainçois que plus auant aillons.
 " Car trop nous pourroit greuer, se nous le laissons
 " derriere. Car il y a grant garnison d'Engloiz, les-
 " quelz ont vn vaillant Capitaine nommé Cressou-
 " fouaille, lequel ie vy en Espengne avec Hue de
 " Carualay. Or medites comme nous exploitte-
 " rons. Car saint Mor est fort lieu & puissant, bien
 " fermé de murs, & assis sur la riuere de Loyre. A-
 " donc en dist chacun sa vouldenté, & ce que bon
 lui sembloit. L'vn parloit de l'asseiger, & l'autre
 de l'assaillir. Mais par grant sens ledit Bertran
 aduisa, qu'il manderait ledit Cressouaille par
 saufconduit, & qu'il venist parler à luy. Tantost
 fist escrire vn brief, qu'il enuoya à saint Mor
 par vn Herault. Lequel explecta tant, qu'il entra
 dedés ledit fort à sa vouldenté, & dist à Cressoual-
 le la vouldenté de Bertran, & aussi lui bailla ledit
 saufconduit. Et quant ledit Cressouaille vit qu'il
 auoit sauf alant, il iura Dieu qu'il yroit parler à
 Bertran. Dont laissa son fort à garder à son Lieu-
 tenant, puis monta sur vn cheual courant, sans

porter nulles armures, fors que l'espée. Et quant Bertran sceut sa venue, si ala encontre lui, & à l'approucher lui dist, bien-veignant: Sire, par saint Morice, vous dinerez avec moy, & buurez de mon vin, ains que vous partiez. Car vous auez esté mon ami de pieça à Bursen Espengne, quant nous aidions au Roy Henry. Hue de Carualay, qui est bien vostre amy, fu mon compaignon de foy. Mais il vous conuint vuider d'Espengne, pour fuir le Prince, à qui vous estes subgiet. Dôt ie fu courroucié, par Dieu de Paradiz, quant vous eslongnastes de moy. Car ie vous ay trouué preux, hardi, & loyaulx. Et pourtant vous ay-ie mandé, que i'ay grant desir de boire avec vous. Et Cressoualle, qui estoit soutil, respondi: Sire ie buuray avec vous volentiers, & non pas à enuiz: voire sauf l'onneur de Mōsieur le Prince, enuers qui ie ne vouldroye auoir mespris aucunement. Sire, dist Bertran, vous n'y prendrez point de villenie, ne de blasme. Car on peut bien boire & mengier ensemble à table, & quant vient au combatre sur les champs, là se doit-on esprouuer contre ses ennemiz, & garder l'onneur de son Seigneur de iour & de nuit. Car qui ne feroit iamais que boire & mengier, ia homme ne feroit trayne vendu. Du bon vient le bon, & du mauuaiz le mal. Tant sermonna Bertran à Cressoualle, qu'il l'amena disner avec lui moult noblement, & assez le festoya & honnora. Et de foiz à autre de-

uisoient d'armes & d'amours. Mais apres dîner
„ Bertran araisonna Cressoualle, en disant : Sire ie
„ vous diray la principale cause, pourquoy ie vous
„ ay mandé. Il est vray, chacun le scet, que vous te-
„ nez vn fort bien ferme sur Loyre. Mais'il estoit
„ encore plus fort, & eussiez avec vous cent, deux
„ cents, ou trois cents combatans : si ne pourrez-
„ vous contretester nullement, qu'il ne fust prins
„ bien prouchainement. Car nous sommes plenté,
„ & tousiours nous suruiennent gens, & avec ce a-
„ uons grant foison d'engins gettans, d'archiers, &
„ d'arbalestriers ausi. Et ie seroye dolent & cour-
„ roucié, se vous estiez prins ne mort villainemét.
„ Et pourtant, ie vous requier, que tantost, & sans
„ arrester, vous me liurez le fort de saint Mor: voi-
„ re sauf les corps & biens de vous & de voz gens.
„ Et puiz alez où il vous plaira. Et pour certain, se
„ vous attendez l'assault, & que siege y soit mis,
„ vous n'en pourrez eschapper, ne nul de voz gés,
„ que vous ne soyez mors à des-honneur. Si vous
„ aduisez sur ce. Car se vous ne me creez, vous vous
„ en trouuerez dolens & courrouciez. Car qui ne
„ croit conseil, aucunesfoiz s'en repent. Et quant
Cressoualle entendit Bertran, il lui respōdi doul-
„ cement: Certes, Bertrá, il est bien vray, que vous
„ auez de bonne gent planté, & si estes mout preux
„ & de grant renom. Ne croy pas qu'il en soit nul
„ milleur. Et pourtant ausi que estes Connestable
„ de France, deuez monter & accroistre l'onneur
du

du Roy CHARLES, & moy celle de M^osieur le Prince de Galles, de qui ie suis homme luige. Si me semble, que ie mesprendroye trop, se ie vous rendoye mon fort sans receuoir assault. Vous me requerez blame, & ne me tenez pas à bien preudomme, & me fourquerez. I'ay bonne forteresse, vous le sauez bien, & bien auitaillée de blefs, de vins, & de bons soudoyers: & vous ne l'aurez pas si tost conquise comme vous pensez. Car ainçois serôt les murs perciez en douze lieux, mes hommes occis, & moy mesme naurez. Et quant Bertran l'oy, si lui mua le sanc, & leua les fourciz, & le commença à regarder. Adonc fist vn seremêt, en disant: Cressoualle, vous me croyrez se vous voulez. Mais ie vous iure sur Dieu, qui fu pené en la croix, & qui au tiers iour ressuscita de mort à vie, ne par saint Yue, à qui suis voé; ne foy que ie doay au Roy de France, que se vous attendez tant que i'aye mis le siege deuant vostre fort, ne que ie y fasse tendre trefs ne tentes, que iamaiz ie n'en partiray pour vêt ne pour orage de tēps, tant que i'aye prins ledit fort tout à ma volenté, ou par force d'assault, ou par icellui affamer. Et se ie vous y puis tenir, vous y perdrez la teste, & voz hommes tous, sans nulz deporter, que ie ne fasse decoler & pendre aux fourches. Si vous aduisez sur ce serement. Car se ie m'en pariure, dont soye-ie dēpné. Quant Cressoualle oy Bertran, qui ainsi iura, si sceut bien que nul remede

n'y auoit, & qu'il n'en mentiroit point, ne pariu-
reroit sa foy. Si dist à lui mesmes, qu'il se accor-
deroit & adsentiroit au gré de Bertran. Et tant a-
la en la chose, que en conclusion il lui promist de
lui rendre ledit fort à certain iour nommé. Et
ainsi leur parlement fina, apres lequel Cressoual-
le prist congié dudit Bertran, & monta sur son
cheual, & s'en retourna à saint Mor sur Loyre. Et
tantost qu'il entra en ladite ville, il descendi de
son cheual, & monta en la salle. Illec assembla ses
gens, & son conseil, & leur cōpta le serement que
Bertran auoit fait. Et quant ilz sceurent cōmēt
la chose aloit, ilz dirent l'un à l'autre: Sauvez vous
„ comment il va? Se ce Bertran vient icy, il nous
„ honnyra tous. Fuyons nous en, il n'y a autre tour.
„ Seigneurs, dist Cressoualle, i'ay tant fait à Ber-
„ tran, ne le vous celeray pas, que noz biens & vies
„ sauf, nous partirons d'icy, & irons ailleurs: & lui
„ ay nommé le iour que ce fort lui rendrons. Car
„ mieulx se vault rendre, que receuoir mort. Car
„ Bertran est si cruel, & le boucher de Cliçon aussi,
„ qui est son cōpaignon, qu'ilz n'acoutent à mort
„ d'omme par quelque voye. Lors parla vn autre
Engloiz Cheualier de grant renom, en disant:
„ Sire, il me semble que ce seroit grant mesprison
„ de rendre ceste forteresse sans la licence du Prin-
„ ce. Car aucun pourroit tantost dire, que vous
„ l'auriez liuré par trayson, & en receu or & argent
„ par corruption. Nous deuons tous obeyr à vous,

& garder vostre honneur de nostre pouoir. Et „
 pourtant ie vous dy en la présence de grans & de „
 petiz, que se vous rendez paisiblement le fort à „
 Bertran, que long temps auons tenu & gardé, „
 l'en pourra supposer ce que i'ay dit dessus. Et „
 certes miculx vault mourir à honneur, que viure „
 à honte. Si vous aduisez sur ce, & plus ne vous en „
 dy. Car à vn bon entendeur ne fault pas plenté „
 parolles, fors tant que derechief vous dy, se Ber- „
 tran a iuré, & fait son serement; ce n'est que pour „
 esbahir vous & nous, ne à lui ne acoute rien. S'il „
 est qui bien assault, autel qui bien deffend. Quāt „
 ledit Capitaine, qui estoit nommé Vvel * Dece,
 ot finée sa raison, tous crierent à vne voix: Nous „
 n'en ferons neant, ainçois nous en yrons sans at- „
 tendre Bertran. Car celui qui l'attent, n'ayme „
 pas sa vie. Et quant Cressoualle l'oy ainsi parler, „
 & qu'il lui amenteuoit les faiz de trayson, il lui
 respondi bellement sans noisier, que oncques
 son corps ne pensa trayson à nul iour, & brief-
 ment le monsteroit. Nonobstant, ce qu'il auoit
 en conuenant à Bertran tendroit en tout, ou par-
 tie, & sans blasme se purgeroit de trayson, qui
 l'en voudroit accuser, & aussi obeyroit au gré de
 ses gens. Adonc commanda à tous ses hommes,
 que chacun preyst le sien le plus tost qu'il pour-
 roit, & s'en allast à Bressiere, ou à Moncontour,
 que les Engloiz tenoient, pour auoir sauueté.
 Car il feroit bouter le feu en toutes les maisons

& chambres de leenz, & puis y venist Bertran logier se il veult. Car il n'y mettroit point de defense, & ainsi acquitteroit sa foy enuers lui: & si ne pourroit dire nul Engloiz, qu'il en eust prins finance. A ce conseil se accorderent tous, & issirent de leenz qui mieulx mieux, chacun emportant son auoir selon son endroit: & bouterent le feu par tout, qu'il ne demoura en estant borde ne maison, Chappelle ne Moustier quelconques. Et veoit-on le feu de bié loing, qui estoit moult hideux: dont vn coureur nommé Hasequin porta les nouuelles à Bertran, à Saumur, où il estoit:

„ Ha! Sire, dist-il, pour Dieu entendez moy. Vra-

„ yement ie vieng de saint Mor sur Loyre, dont les

„ Engloiz sont partiz, qui ont bouté le feu, & s'en-

„ fuyent cōtreual les prez: les aucuns deuers Mon-

„ contour, & les autres enuers Bressiere, & plus y

„ en va que en autre lieu. Cressoualle vous a bien

„ changé le dé, qui vous deuoit rendre la ville. Car

„ il n'y a que les murs & les fossez. Bon seroit de les

„ rataindre. Car ilz sont riches, & meublez d'or &

„ d'argent. Et quant Bertran l'entendi, tout le sanc

„ lui mua, & dist: Ha! Cressoualle, à quoy pensez

„ vous? Or voy-ie bien & congnoiz, que vous ne

„ me osez attendre pour doubte du serement que

„ i'ay fait. Vous m'auiez en conuenant, de moy ré-

„ dre les clefs; & vous estes pariuré enuers moy

„ faussement. Dist le Mareschal d'Audrehem: Il

„ n'a pas trop mespris ne mesferré, puis que vous

trouueres les portes ouuertes. Mais Bertran fist sonner sa trompette, & crier en ladite ville de Saumur, & dehors, Qu'il ne fust si hardi, qui ne alast apres lui pour visiter Engloiz, qu'il vouloit trouuer à Bressiere, & aussi assaillir & prendre icelle ville. Qui adonc veyst armer Cheualiers & Escuyers François, monter sur les cheuaulx noblement ensellez, mettre les bacinetz és testes, & les glauiues és poings, de bonnes gens & abiles lui peust remembrer. Mais Bertran, qui tout l'ost deuoit gouuerner, si fut le premier prest, & yssy hors de Saumur. Auecques lui n'y auoit bachelier, sa trompette empres soy sonnant haultement; laquelle hastoit moult les François en disant: Ha! Dieux, ie croy que Bertran ne sauroit reposer trois iours entiers. Car sera merueille, se il puet longuement durer. Ce il est tousiours le premier à donner & receuoir les coups, & si ne prent point garde à l'assembler, se ilz sont trop, ou po, pour soustenir bataille. Taisiez vous, disoit l'autre: tel homme doit-on amer. Car qui doute trop la mort, il ne peut escheuer bon fait. Ainsi disoient les François, qui cheminerét apres Bertran.

V N petit vous laisseray à parler de lui, & vous diray des Engloiz, qui vindrent à Bressiere, pour eulx logier. Mais on ne les laissa pas entrer dedes à leurs volentez: ainçois ferma l'en les portes, & leua l'en les pons encontre leur venuë. Car les

Engloiz doubtoient tant Bertran, qu'il leur sem-
bloit tousiours main & soir qu'il deust venir sur
eulx, pour les attrapper. Et ilz n'en pouoyent
maiz, se ilz le doubtoient. Car bien y auoit cau-
se. Et ainsi comme les Engloiz issus de saint Mor
estoint deuant Bressiere, tous esbahys, le Capi-
taine de leenz, qui estoit homme d'entendement,
„ leur demanda à haulte voix: Seigneurs, dont ve-
„ nez vous, & que querez vous? Estes vous En-
„ gloiz, ou se vous estes François? Dites moy vo-
„ stre estat. Car ceans n'entrera homme ne femme,
„ qui ne se nomme deuëment. Car trop doubtons
„ Bertran, qui se repose à Saumur avecques sa gët,
„ où il ne fera pas longuement, si comme ie croy;
„ mais nous vendra assaillir. Adonc parla vn En-
„ gloiz audit Capitaine, en disant: Sire, ou nom-
„ de Dieu lessiez nous leenz entrer, & vous ferez
„ loyauté; & se nō, trayson à plain. Car nous som-
„ mes bons & loyaulx Engloiz, & venons de saint
„ Mor sur Loyre, qui est toute arse & exillée. Et
„ s'en y a de telz, qui viennent à fuyant de plu-
„ sieurs fors, qu'ilz ont delaisiez, pour doubte de
„ Bertran, qui nous monstre les dens, & les Fran-
„ çois qui sont avecques lui. Sire, lessiez nous leēz
„ entrer, & vous ferez loyauté. Il ne tient pas en
„ vous, que nous ne soyons icy tuez & occis lai-
„ dement. Car se les François sauoient que nous
„ fussions cy attendans, ilz vendroient bien sur
„ nous en nostre grant encombrier. Et se vous ne

nous lessez leenz entrer, pieurs ennemiz n'aurez
 de nous: & vous assaudrons viftement à force. Et
 ledit Capitaine respōdi: Je vous iure & promets,
 que vous n'y entrerez pastous. Mais se entrer y
 voulez cy cinquāte, cy cinquāte pour yfsintātost
 & passer oultre, sans arrester, vo⁹ le pouez faire. Et
 Engloiz respondirent, que aultrement ne vou-
 loient eulx. Et le Capitaine leur octroya, en di-
 fant: Or venez de par Dieu, assez prouchain vous
 feray ouurir la porte, & le pons aualer. Je m'en
 vois ordonner magent ça dedens. Ainsi furent
 d'accord iceulx Engloiz, lesquelz Bertran ap-
 prouchoit de prés. Et n'en estoit pas entré en la
 ville plus de quarante, ou enuiron, quant la gait-
 te, qui estoit montée sur la tour, commença à
 crier: Tray, tray, ferme la porte, vecy Bertran qui
 vient. Je croy que ces Engloiz esgarez nous ont
 venduz. Car vecy François venir de tous lez. Je
 voy la banniere de Bertran, & celle de Cliçon,
 des Mareschaux d'Audrehem & de Blainville,
 Alain de Beaumont, Caraenloet, Rohem, & Ro-
 chefort. Vecy la fleur de France, fermez tout,
 ou nous sommes attrappez. Tuez, mettez à mort
 Engloiz, qui entrez sont ceens. Car aussi vray
 comme Dieux est, ilz nous ont venduz. Adonc
 furent Engloiz assailliz & tuez, & la porte close,
 & le pont leué. Et Bertran & les siens se vindrent
 bouter és Engloiz, qui lors estoient bien cinq
 cents, ou plus: lesquelz se misdrent à deffense,

quant ilz virent noz François. Mais petit leur valut. Car tellement furent encloz, que oncques pié n'en eschappa, & y furent tous pris, mors, ou assaillis. Et quant les nostres en furent au dessus, si se logierent aux champs, où le cōquest fut paisiblement departis. Excepté que pour aucun prisonnier commença estrif. Pour lequel oster, & leurs gens mettre à paix, fu ordonné par Bertran & Cliçon, que tous les Engloiz, grans & petiz fussent tuez, si n'y auroit point de discort. Et ainsi fu. Si mourut bien deuant Bressiere cinq cens Engloiz, & dedens ladite ville quarante, qui entrez y estoient. Et lors le gentil Connestable Bertran monta sur vn destrier, & s'en vint deuant la porte assez près du pont leueis, & regarda les Engloiz armez dessus la porte. Ausquelz il dist: Seigneurs, faites moy parler à vostre Capitaine, pour traitier de paix & d'accort, & me donnez treues tāt que i'aye parlé à lui. Quant les Engloiz oyrent ainsi parler Bertran, ilz l'asseurerent bien du trait, & firent venir leur Capitaine monter sur la porte. Lequel, quant il apperceut Bertran, commença à crier: Haa! Bertran du Guesclin, Dieu vous puisse confondre, oncques ne feustes nez, que pour greuer Engloiz. Il n'a pas trois mois que l'en me dist que vous estiez mort en Espengne. Or vous ont diables ressuscité, tant que vous estes nommez Connestable de France. Vostre auenement vous faites Cheualier compeer.

rer. Je oseroie bien gaigier ma teste, que vous “
venez demander ceste ville, que on la vous ren- “
de sans liurer assault. Dist Bertran, Vous sçavez “
moult bien à deuiner. Vous auez trop demouré “
leenz. Si vous en fault partir. Et se rendre me “
voulez la ville, ie vous en lefferay aler à vostre “
vouloir vous & voz gens, & soudoyers:& en em- “
porterez vostre or & vostre argent. Et se ainsi ne “
le faites, vous serez tous occis, se ie vous prens à “
force, ainsi comme veez ces autres Engloiz, que “
nous auons trouuez sur ces prez. Et le Capitaine “
respondi: le vous iure en loyaulté, que se vous “
me donniez la valeur de dix mil mars d'argent, ie “
ne feroye pas ce marché. I'ay ville forte & assez “
bien garnie de vins & de bonnes gens: & si ay “
bon Seigneur & puissant, qui me fera secours, se “
ie en ay besoing. Et se ie rendoye si noble forte- “
resse sans siege & sans assault, on me pourroit “
nommer traître tout à plain: & bien seroit em- “
ployé, se l'en me pendoit. Car on ne doit point “
pleurer ne plaindre traicteur. Et pour ce, vous “
requier par la foy que vous deuez à Dieu, que “
vous me dictes verité. Se vous teniez vn fort aussi “
noblement muré & garni de vins & de lars, & au- “
tres chars sallées, & aussi bonnes gens comme “
ceulx de ceans sont, & ie fusse deuant à tout qua- “
tre mille hommes d'armes, ainsi comme vous “
pourriez estre; dedens le tiers iour le me redriez- “
vous, se ie venoye deuant? Or ne me le celez pas.

„ Je sauray bien se vous direz verité. Et quant Ber-
„ tran l'oy, si pensa vn pou, & apres son penser res-
„ pondit au Capitaine: Par ma foy bien vous en di,
„ tant que ie auroie vn tel fort, ie ne le rendroie en
„ iour de ma vie, se n'estoit par famine ou par as-
„ fault, & par promesse & don d'or & d'argent. Et
„ encor feroit-ce au gré de Monsieur, à qui ie se-
„ roie. Et par tant que vous m'avez ietté ce mot,
„ nous passerons outre sans vous adommaigier en
„ riens; mais que vous nous donniez pour nostre
„ argent vitaille pour vn iour. Vous le pouez bien
„ faire, ce me semble, quant leenz en avez assez.
„ Et le Capitaine lui respondi: Assez vous en don-
„ neroie sans denier, se ie sauoie que estrangler en
„ deussiez tous, grans & petiz. Je n'auray ia le cuer
„ lye, le iour que ie vous voie. Maudit soit l'or &
„ l'argent, que vostre Roy vous tramest: parquoy
„ vous enduisiez telz gent de porter si grant dom-
„ maige au gentil Prince, en qui est tout honneur.
„ Alez vous en d'icy, i'ay assez argent. Car du no-
„ stre n'aurez qui vaille vn pou de croie. Je seroie
„ bien enragé de vous reconforter ne liurer vitail-
„ le. Car trop mieulx pourroie recouurer à or & à
„ argent, que à viures. Et quant Bertran l'oy ainsi
„ parler, tout le visage lui rougy. Lors dist au Ca-
„ pitaine: Par tous les Saints que l'en aoure, iamaiz
„ moy ne ma gent ne partirons de cy, si aurons le
„ fort conquis, & tous ceulx qui leenz sont, pen-
„ duz à vostre ceinture. Adonc Bertran s'en parti

dillec, & se retourna à sa gent. Si assembla en-
 tour lui les Princes & Cheualiers plus notables,
 ausquelx il dist : Seigneurs , entendez à moy. “
 Pour certain oncques mais ne trouuay homme, “
 qui si po prifast moy ne ma gent, comme fait ce “
 Capitaine là. Il m'a dit du desplaisir assez, & lar- “
 gement. Mais se Dieu le consent, ie lui en feray “
 ausi. Il fault briefment auoir ce fort, ne iamais “
 ne buuray de vin: si auray souppé leens à mavou- “
 lenté. A ce se accorderent le Marechal d'Au- “
 drehem, le Seigneur de Cliçon, & les autres Ba-
 rons. Mais vn Escuier d'onheur nommé Iehan du
 Bois, lequel auoit portée la banniere Bertran,
 voa à Dieu, que se il lui plaisoit, il la mettroit i-
 celui iour sur la tour, en criant Guesclin, où il
 mourroit en la poine. Ainsi furent nos François
 d'accord de assaillir Bressiere en Poitou, où il a
 ville & chastel moult bien fermée. Et lors Ber-
 tran, & le Sire de Cliçon, & le Marechal d'Au-
 drehem allerent autour de la ville, pour espier &
 aduiser, où il seroit plus conuenable de assaillir;
 & tantost retournerent à leur gent: Seigneurs, “
 dist Bertran, il n'y a que l'esploittier, chacun se “
 voist armer. Car nous aurons assault fort & fe- “
 lon. Et se conuendra faire targier pour le trait de “
 ceulx de leens. Et quant il leur sera failly, il nous “
 faudra trestous lancier en ces fossez, & remper “
 encontre ces murs, & les abatre & depecier. Ie “
 n'y voy autre conseil, mais que de assaillir de bon “

cuier, comme gens d'armes. Car par force d'as-
" fault nous fault leens entrer, se nous voulons
" maishuy boire ne mengier. Quant adonc veist
noblement armer & aprestier François, porter
huis & fenestres, & paüais pour eulx targier, &
mouuoir archiers & arbalestriers pour traire,
sonner trompettes, & ioüier challemies; hennir
cheualx, que l'en faisoit reculer pour le trait de
ceulx de dedens: tous Cheualiers approucherët
du fossé, & Engloiz se ordonnerent moult bien
pour eulx deffendre. Mais pou de trait. Si firent
comblir leurs murs de tonnelles empliz de cail-
loux, & de grans bans trauersans, qu'il ne failloit
que ruer ius pour tout fauldroier nos gens. Et
quant le trait failly à iceulx Engloiz, ilz gettoïët
cailloux à grans fondes. Mais nos gens n'y acou-
toient riens, ainçois entroient communément
és fossez cy cinquante, cy cent: & plus s'y auan-
turoient les greigneurs, que tous les plus men-
dres soudoiers. Car ilz estoient au pié du mur, &
faisoïët eschielles de dagues & cousteaulx poin-
tuz, qu'ilz ficheoient entre les pierres & le mor-
tier, & puis rampoient de l'un à l'autre. Aucuns
montoient à mont abandonnéement, & aucuns
autres estoient raualez laidement ou fossé. Mais
celui, qui portoit la banniere Bertran, la vint po-
ser au pié du mur, en criant Guesclin. Si ot vn En-
gloiz lassus, qui pour monstrier deffense, cuida
faisir ladite banniere. Mais Iehan du Bois por-

teur d'icelle le fery du fer, qu'il tenoit au bout du
 baston, en telle maniere qu'il lui creua le destre
 yeul de la teste. Et qui lors veist le maintié du gé-
 til Marechal d'Audrechem, & comment il mon-
 toit hardiement, en soy auanturant, lui peust re-
 member de hardi Cheualier. Et trois fois monta
 sur le mur, & autant de fois fut raualeé & des-
 cendu ou fossé, & tellement battu, qu'il ne ves-
 quit puis gueres. Car trop fut greué de cops qu'il
 receut. Apres fu rué ius ou fons du fossé Cliçon,
 & puis Bertran, tant qu'il le conuint tirer à mōt.
 Mais quant il fu en estant, nul semblant n'en fist,
 ainçois remonta à mont, & commença à crier:
 Or auant bonnes gens, la viande est leenz, que
 nous deuons soupper. Mais il la nous fault gai-
 gner à l'espée. Puis dist à Iehan du Bois dessus
 nommé: Lieue hault ta banniere, il conuient
 qu'elle soit leenz la premiere mise. Et pour cer-
 tain, combien que Engloiz gettassent sur noz
 gens maintes pierres, barilz emplis, ce nonob-
 stant les Cheualiers en present nommez, & aussi
 Iehan & Alain de Beaumont, Guillaume le Ba-
 ueux, les Seigneurs de Rohem & Rochefort, de
 Rays, & de Val-tédeur, & de la Hunaudaye, Mes-
 sire Iehan de Vienne, Caraenloet, Yuain le Sei-
 gneur, Iehan Vvyn dit le Pourfuyant d'amours,
 & Alain du Tailleral dit de Male paye; lesquelz
 estoient tant bonnes gēs d'armes, que ie ne croy
 pas que en tout le monde il n'en fust nulz mil-

leurs; firent ou mur ancien grant trou de picques, que ilz auoient, & monterent les aucuns en hault sans retourner, & pour deffense que l'en feist ainçois, escrioiēt Guesclin, le miller à Bertran. Et quant Englois se virent ainsi souppedittez, les aucuns d'iceulx bien enuiron cinquante, ouurirent vne posterne au lez deuers Moncouteur, par laquelle ilz cuidoiēt eulx en fouyr à garant. Mais le Mareschal les apperceut & rencontra, & quanqu'il en pot ataindre occist és fossēz bien la moitié, & les autres rentrerent en leur fort. Mais il les poursuy de si près, que il entra auecques eulx maugré leurs dens, en criant Audrehem. Et en mist à mort, ainçois que le posteis peust estre fermé, lesquelz il occist d'un glaiue, dont il les repoussoit. Et illec fu tellement battu, que se il n'eust esté secouru de ses gens, il estoit mort sans remede. Et entretandis le noble Bertran estoit monté sur le mur, auec plusieurs Bacheliers, bien cinq cens des greigneurs & plus renommez, qui à celle heure se combatoient de bonne volenté aux Engloiz. Maugré lesquieulx la banniere dudit Bertran fu mise sur vne tour, en criant haultement Guesclin. Et adonc entreurent François de tous costez, qui occirent tant d'Engloiz, que ce fut infinité. Et aucuns autres pour estre à sauueté se trayrent vers le chastel. Mais chacun n'y fut pas receu à sa volenté, mais que tant seulement les greigneurs & les petis de-

mourerent dehors. En conclusion, ladite ville fu ainsi prinse par force d'assault, & les Engloiz mis à fin. Puis furent les portes ouuertes, & les pons abessiez. Si entrerent noz gens: Mais tref-grant hideur estoit de regarder les mors. Car tant de dehors que dedés, on les pouoit nombrer à trois cens soixante, ou plus, sans ceulx qui furēt prins ou rançonnez, & autres qui s'enfoüyrent. Mais le chastel ne fut pas prins à ceste foiz. Et ne pourquant Bertran vouloit, que on l'assaillist. Mais les nobles Barons ne s'y assentoient pas. Car il n'y auoit cellui, qui n'eust la char traueillée, & plusieurs d'eulx & leurs gens estoient naurez & blechiez en diuerses parties du corps. Mesmement le gentil Mareschal d'Audrehem y print & encharga la maladie de mort; non pas qu'il fust nauré, mais d'orbes coups qu'il receut. Grant auoir y conquesterent noz gens, & des viures planté. Celle nuit si repouserent, & firent moult bon guet. Et quant ce vint le landemain, Bertran & tous les autres Seigneurs oyrent la Messe. Et puis y ot vn traictié entre eulx & les Engloiz, par lequel ledit chastel se deubt rendre à Bertran dedens vn certain iour nommé; lequel apres icelui traictié s'en retourna à Saumur, où il seiourna quinze iours, tant que ses gens feussent rafrechiz, les prisonniers renduz, & leurs rençons payées. Et là acoucha malade le noble Mareschal d'Audrehem, qui oncques puis n'en leua, mais

trespassa en ladite ville. Dieu ayt mercy de son
ame. Car il regna loyaulment, ne oncques pensa
mal. Grant dueil en demenerent les Barons, & en
ce deul menant vint illec vn homme à cheual,
„ qui s'enclina deuant Bertran, en disant: Chier
„ Sire, oncques telle auenture ne auint, comme
„ i'ay trouuée. Robin Canole est ou chastel de Der-
„ ual, qui a donné congié à sa gent pour repasser la
„ mer: lesquelz i'ay veulez vn boys, & s'en vôt vers
„ le Rays de saint Mahieu bien douze cens sou-
„ doyers, lesquelz ont grant foison or & argent.
„ Et en est Maistre & Capitaine general Robert
„ de Neuville. Et quant Bertran entendit ceste
nouuelle, si dist que Engloiz seroient poursuiz:
& fist sonner sa trompette. Mais Oliuier de Cli-
çon luy demanda le don de ceste poursuite. Car
il sauoit les adresses, pour aduancier Engloiz, &
si auoit auecques lui bonnes gens. Lequel Oliuier
„ parla audit Bertran, en disant: Sire vous sauez
„ bien que Engloiz sont à Portieres à grant effort,
„ lesquelz Chandos a en son gouuernement. Et
„ vous promets bien, qu'il ne demourra gaires,
„ qu'il ne cheuauche sur les champs, pour greuer
„ le pays. Si aurez voz espies, pour sauoir son estat.
„ Car se par aucun tour le pouyez estrapper, vous
„ auriez fait tres-grant guaigue, & se rendroit la-
„ dite cité à vostre vouldé. Et pour ce, demou-
„ rez icy s'il vous plaist, & ie yray d'autre part pour-
„ suivre les Engloiz, qui s'en cuident aler à sauucté.

Ceste

Ceste requeste oëtroya Bertran au Seigneur de Cliçon, qui en ot trefgrant ioye. Lequel esexploitagentement son herre, avecques lui le Viconte de Rohé, Robert de Beaumanoir, les Seigneurs de Rays & de Rochefort, Messire Geffroy Carismel. Si exploicta tant ledit Oliuier en cheuauchant de iour & de nuit, qu'il approucha le rais de saint Mahieu, où Engloiz cuidoient entrer paisiblement en nef, & en basteaux, pour passer oultre la mer à nage. Et si tost comme il fu approuché d'eulx, il & ses gens descendirent à pié sur le sablon, pour liurer bataille à leurs aduersaires. Et commencerent à crier Guesclin, & Cliçon, pour esbahir Engloiz: A mort traitres recreans, iamaiz en Guienne ne en Engleterre ne retournerez, sans mortel encombrer. Et quant Engloiz entendirent Oliuier, si se mirent en ordonnance pour eulx deffendre. Et aidoint les vns aux autres à eulx armer. Li plusieurs auoient bon cuer, & les autres trambloïët comme feuille; pour doubte que ilz ne cheussent és mains dudit Oliuier, lequel ilz appelloient le bouchier de Cliçon. Car en iceulx Engloiz se bouta, & en feri vn tellement d'vne hache sur la teste, que le bacinet lui fist embarrer sus, & le conuint soubz mettre à terre. Et là endroit lui coppa vne iambe, si que oncques puis ne se pot releuer. Puis feri le second, & le naura à mort, & le tiers & le quart abbati & affola aussi; & le fuioit chacun,

tant faisoit à redoubter. Aussi s'y porterēt moult bien le Viconte de Rohem, les Seigneurs de Rais & de Rochefort, Messire Robert de Beaumanoir, & Geuffroy Carismel. Tellement assaillirēt Engloiz, qu'ilz les faisoient desfrangier, & fuir, & reculer : & en reculant repousserent si fort, qu'il en conuint plusieurs cheoir & réuerfer en l'eauë. En conclusion, tous furent mors, ou prins. De douze cents qu'ilz estoient le matin, il en mourut neuf cens en bataille. Et illec fu prins le Capitaine, qui gouuerner les deuoit, nommé Robert de Neufuille. Lequel se rendi audit Cliçon, qui l'emmena depuis ce deuers Bertran. Et là endroit conquesterent noz François grant auoir.

L'armée faite par YYAIN DE GALLES sur la mer. De la prinse du Conte de Pennebroc Engloiz faite par les Espaignolz, ou nauire d'Espengne, deuant la ville de la Rochelle.

CHAPITRE XLVII.

EN ce temps estoit le Prince de Galles en Engleterre, qui pour certain essoyne de maladie s'estoit parti de la Duchié de Guiëne : & pour icelle garder & gouuerner y auoit laissié le Duc de Lenclastre, le Captal de Buch, Thomas de Felton, le Seneschal de Bordeaux, Guillaume Clenon, avecques plusieurs autres Cheuetai-

gnes, qui icy ne sont pas nommez. Lesquelz gardoient le pas encontre Bertran, qui souuent les visitoit, & prenoit tours & chasteaux, qu'il faisoit arraser : puis retournoit à Saumur, pour ordonner ses gens. Si auint à vn certain iour, ainsi comme il se reposoit illec, & qu'il attendoit l'argent du Roy, pour payer les soubdoyers, à qui il deuoit beaucoup, combien qu'il y eust employee toute sa finance & vaisselle, que vn cheuaucheur venant de Paris entra en ladite ville de Saumur ; lequel se vint agenouiller deuant Bertran, & le salua de par le Roy Charles de France. Et quant Bertran l'oy, si lui demanda tantost, où estoient les sommiers & l'argent que l'en apportoit. Et le message respondi, que point d'argent n'y auoit ; & que se Bertran ne lui en prestoit pour payer ses despens en faisant son retour, il lui cōuendroit vendre son cheual, & retourner à pié. Et quant Bertran l'oy, si ne lui plut pas. Incontinent icellui messaige lui presentavne lettres closes adreçant à lui : laquelle Bertran ouury, & puis fist *. Et en icelles estoit contenu, que sans aler plus auant, il cassast ses gens iusques au temps nouuel, & venist à Paris parler au Roy. Et quant Bertran oy ces nouuelles, il fu si doulent, que nul ne feroit compter le dueil qu'il demenoit. Et se fery à la poitrine, en disât : Haa ! Dieux, qu'est ce que de seruice de Roy ! L'vn est riche, & l'autre est poure. Et aucunesfoiz cellui, qui mieux y fait,

» est le pis contempté. Je eusse conquise toute
» Guiéne, si les gens d'armes fussent bien paieez. Or
» voy-ie bien, que ie ne r'auray rien du mien, qui
» est alé pour les payer: & conuiendra qu'ilz soient
» tous cassez. Et pour ce, ie m'en yray à Paris, au
» mādement du Roy. Mais foy que ie doy à Dieu,
» se il me vouloit croifre, il feroit visiter ces chap-
» perons fourrez, dont il deust estre aidié, qui re-
» çoiuent le sien, dont le menu peuple est tellemēt
» greué. Et ainsi comme Bertran diuisoit, vint à
lui vn message, qui le salua de par le Roy Henry
d'Espengne, & lui presenta vnes lettres, & deux
sommiers troussiez d'or & d'argent. De laquelle
lettre la teneur portoit, que ledit Roy se recom-
mandoit à Bertran du Guesclin Duc de Mouli-
nes, & Connestable de France, & lui enuoyoit
deux sommiers chargiez de finance, & de telz
ioyaulx comme il auoit pou recouurer ou pays
d'Espengne, comme icellui, à qui il se sentoit re-
nu de plus que de tant, & par lequel il portoit
couronne de Royaume. Et depuis ce qu'il n'auoit
veu Bertran, auoit eu grant esloyne. Car contre
lui auoient esté rebelles mains Espaignolz puis-
sans. Et ne fust le Besgue de Villaines, qui l'auoit
aidié & conforté, il eust perdue toute sa terre.
Lequel Besgue le Roy auoit mandé n'agaires. Et
se ainsi estoit qu'il lessast ledit Roy d'Espengne,
il auroit tout perdu. Et pour ce prioit audit Ber-
tran, qu'il fust pour lui enuers le Roy, afin qu'il

lui leffast ledit Befgue, & Pierre fon filz, avecques les François qui estoient deffoubz eux. Et se icelui Roy d'Espengne pouoit conquerter trois villes, où il contendoit, c'est affauoir Carmonne, Semore, & Chonart, il mettroit sur la mer vingt & deux gallées bien garnies de gens & de vitailles, pour greuer Engloiz, & aidier François. Et se treues ou pays se mettoit entre ces deux nations, icellui Roy d'Espengne prioit à Bertran, qu'il lui enuoyast gésd'armes, lesquelz il paieroit bien. Et toutesfoiz ne requeroit pas audit Bertran, qu'il y venist, pour ce qu'il seruoit le plus noble Roy du monde. Mais comme à son amy se plaignoit des Espaignolz, qui lui estoient rebelles, lesquelz ne l'osassent estre, s'il fust avecques soy. Et quant Bertran ot oy la lettre, il festoia moult, & honnoura ledit message, & reçut les presens & les ioyaulx, qu'il fist drecier en la sale, esquelz auoit vne nef de fin or, & de riches pierres moult belles. Et si auoit caintures, coppes, hanaps, couronnes, & chapeaux, & afiches à perles, & avec ce or fin monnoyé. Et lors donna Bertran à disner à tous ses Barons, le quelz sās nul conuoitise disoient bien, que oncques mais en leurs vies, tant fust à Cour de Roy, ny ailleurs, ilz n'auoient veuz si beaux ioyaux, ne si bien ordonnez & ouurez. Mais Bertran departi iceulx à la Cheualerie, en disant: Seigneurs, ie vous prie prenez en gré, & s'en reuoist chacun en son lieu: „

„ & ie m'en yray à Paris deuers le Roy, à qui ie dō-
„ ray ceste nef, & lui demanderay de la monnoye,
„ dont nous vous paierons ainçois l'année passée,
„ & reuendrez à moy, & ie vous en prie, si tost cō-
„ me ie le vous feray fauoir. Et ie vous feray tous
„ riches. Et si ie vous iure par Dieu, que se ie n'ay
„ argent du Roy à ma volenté, pour payer les
„ soubdoyers, & oster les Engloiz de Guienne, ie
„ renonceray à la Connestablie, & m'en yray à ma
„ Duchié aidier au Roy Henry, tant comme ie vi-
„ uray. Quant Bertran ot ainsi donné à sa gent ses
loyaulx, il leur donna congé de cuer triste & dol-
lent, & moult honnoura le message du Roy Hé-
ry, comme dit est, & lui donna beau don. Puis lui
encharga, qu'il le recommandast audit Roy,
qu'il mercioit plus de cent foiz, & prouchaine-
ment l'iroit veoir, s'il plaisoit au Roy de France.
Après ce, Bertran mist bonnes gardes aux cha-
steaux qu'il auoit conquis. A Caraenloet bailla à
garder la Roche de Posay, & à Saumur leffa A-
lain & Iehan de Beaumont, Oliuier de Mauny,
Guillaume le Baueux, & Yuain de Galles, avec-
ques plusieurs autres bons Cheualiers & Escu-
yers, qui auoient maintes rotes de tres-bonnes
gens, qui sans gaiges viuoient sur le pays; & par
foiz couroient en la Duchié du Guienne, con-
quester auantureusement sur les Engloiz, en at-
tendant le retour de Bertran, qui prist son che-
min à moult pou de gens, pour aler à Paris de-

uers le Roy. Mais ledit message aloit deuant, qui en ladite ville entra à vn soir, & trouua le Roy au manoir de saint Pol, auquel il conta que il auoit trouué Bertran à Saumur, lequel feroit deuers ledit Roy dedens trois iours, & auoit cassé gens d'armes par faute d'argent, dont il estoit si doulent, qu'à pou qu'il n'issoit du sens. Et lui auoit oy dire n'auoit gaires, qu'il se desfesiroit prochainement de l'office qu'il tenoit, & briefment iroit en Espengne au Roy Henry, qui lui auoit enuoyé le plus noble present, que oncques Roy enuoiait à Cheualier. Mais Bertran, pour le bien qui estoit en soy, auoit tout departy en nom de paiement aux nobles soubdoyers, qui estoient grant foison, & mesmement à icellui messagier auoit donné vne cainture. Et quant le Roy entendit le respons dudit message, il mist sa main sur l'espaule d'un noble Cheualier nommé Bureau de la Riuiere, qui son premier Chambellan estoit, & lequel il amoit moult, & tenoit chier, & non pas sans cause. Bureau, ce dist le Roy, il conuendra ouurir noz coffres, & bailler de nostre argent à Bertran, ainçois qu'il se eslongne de France. Sire, ce dist Bureau, c'est bien raison. Car se il s'en partoit, oncques tel meschief n'auint depuis cent ans en ça. Et se il vouloit rendre l'espée de la Connestablie, pour Dieu ne la vueillez pas recevoir; ains lui promettez & baillez or & argent. Car assez en auez pour bailler. Nul ne scet que

„ c'est de perdre vn tel ouurier. Apres ces parolles,
le Roy ala seoir à sa table pour sopper. Ainsi se
passa celle nuit. Et quant vint au tiers iour, Ber-
tran entra dedens Paris vestu d'un gros bureau à
guise de bouvier. Car oncques ne lui prinst vou-
lente de foy cointoyer. Et quant il fu descendu &
appareillé en son hostel, il s'en ala tout simple-
mēt lui dixiesme sans plus audit manoir de saint
Pol deuers le Roy. Donc vint encontre ledit Bu-
reau en bel appareil, & le prist par le doy, en di-
„ fant: Monsieur le Connestable, vous soyez le
„ bien venuz. Je sçay bien que le Roy a grant desir
„ de vous veoir. Lors s'en alerent deuers le Roy,
qui se seoit au hault dois. Lequel se dreça vn
pou encontre Bertran, & le prist par la main, en
„ disant: Bien veignez vous mon amy, que i'ayme
„ en bonne foy, & à qui ne doy faillir en mon vi-
„ uant de riens quelconques, ainçois vous doy hō-
„ nourer & cherir comme moy. Sire, ce dist Ber-
„ tran, ie m'en apperçoy mauuaisement. Car vous
„ auez osté tout mon estat, & maudit soit l'argent
„ qui se tient ainsi coy. Et ne vault riens le conseil,
„ parquoy vo' le tenez ainsi serré. Car trop mieulx
„ le vault departir à ceulx qui guerroyent voz en-
„ nemiz. Et se vous ne creussiez cōseil, fors que
„ de vous, vous auriez les clefs de toute Guienne,
„ ainçois trois ans passez, & puis pourriez cheuau-
„ cher parmy Engleterre à vostre plaisir. Mais l'en
„ vous fait regner, ie ne sçay comment. Quant le
Roy

Roy oy Bertran parler ainsi, si lui dist doubce-
 ment: Or ne vous vueillez courroucer, assez au-
 rons argent. Et n'aiez desplaisance, se nous vous
 auons mandé. Car il nous plaisoit de vous veoir,
 & vous dire nostre plaisir, ne le nostre argent
 n'est point si enfermé, que vous ne puissiez
 bien par tout bouter la main. Mais, beau Sire,
 nous lesserons le temps renouveler. Sire, dist
 Bertran, qui moult estoit courcié, dequoy vi-
 uront, pour passer la saison, les gens d'armes que
 i'ay laissiez derriere pour la frontiere tenir, &
 garder le pays, si n'ont argent? Il conuendra fu-
 ster ledit pays pour eulx, & paier sur les pouures
 gens. Et puis les vouldra l'en appeller faux pil-
 leurs. Mais ceux qui le font, sont plus fort à blas-
 mer, que tellement tiennent vostre argēt enfer-
 mé, que vous n'en pouuez ouurer à vostre plai-
 sir. Bertran, dist le Roy, ie ne le puis amender. Ie
 ne suis que vn seul homme, si ne puis pas estri-
 uer contre tous ceulx de mon conseil. Mais de-
 dens trois iours feray defferrer vn coffre, où
 vous pourrez trouuer vingt mille frās, que vous
 pourrez departir à voz hommes tout à vostre
 gré. Hé! Dieu, ce dist Bertran, ce n'est que vn des-
 iuner. C'est pour gouuerner huit mille hommes
 iusques à demi an. Sire, dist Bertran, ie auoie as-
 semblé trois mille hommes d'armes, & cinq mil
 deuoient venir apres moy; lesquelz pour faulte
 d'argent a conuenu retourner. Et aussi me vueil-

„ ie departir de France. Car vrayement ie ne me y
„ ſçay cheuir, ſi me conuient renoncier à l'office
„ que i'ay, & aler ſeruir en Eſpengne le Roy Hen-
„ ry. Que ne faites vous faillir ces grans ſommes de
„ deniers que l'en cueille par le Royaume ſur mar-
„ chans & pouures gés, tant d'impoſitions, trezieſ-
„ me & quatorzieſme, comme foiüages & gabel-
„ les, le dixieſme ne vient pas à voſtre prouffit. Et
„ puis que ainſi eſt, faites tout abatre, afin que le
„ peuple ſe reſioyſſe: & faites venir auant ces chap-
„ perons fourrez, c'eſt aſſauoir Prelaz & Aduo-
„ caz, qui mengent les gens. A telz gens doit-on
„ faire ouurir leurs coffres, & non pas à pouures
„ gens, qui ne font que languir. Car on doit que-
„ rir l'argent. Mais ie voy aujourduy aduenir le cō-
„ traire. Car celui qui n'a que vn pou, on lui veult
„ toulir: & celui qui a du pain, on lui en offre. Tant
„ diuiſa Bertran, que il fiſt qu'il eut de l'argent, où
„ qu'il fuſt pris, qu'il enuoya à ſes foudoyers. Et
„ en ce contempe eſtoient en Eſpengne le Beſgue
„ de Villaines, Pierre ſon filz, qui ſeruoient le Roy
„ Henry. Et acheuerent tant nobles faiz, & prin-
„ drent citez, villes, & chaſteaulx aſſis ſur roches,
„ que de leurs vies peult-on faire Romans. Et don-
„ na le Roy à icellui Beſgue la Conté de Riue-
„ Dieu, vn ſouffisant païs. Et quant les villes de
„ Cramonne & de Semore furent prinſes, & toute
„ Eſpengne acquitée, le Roy ordonna vn nauire
„ de vingt deux gallées, où il auoit pluſieurs Ef-

paignolz, archiers, & arbalestriers, & les autres lançans de dardes. Et leur commanda, qu'ilz se espendissent en la mer de Guienne, pour greuer Engloiz, & conforter François, & ainsi le firent. Car moult de dommage porterent à iceulx Engloiz, & aux Bordelais toulirent plusieurs viures. Tellement fusterent ladite mer de Guienne, que nulz marchans n'y osoient aler, non pas les pescheurs. Et quant ilz encontroyent Flamés, Braibançons, Picars, ou Normans, ilz les pilloyent tous: & afin qu'on ne les encusast, ilz les noyoiét. Car telz escumeurs de mer en escumant ne cognoissent nulluy.

APRES ce ne demoura guaires, que le Roy de France fist ordonner vn beau nauire à Harfleu, où il auoit cinq cens hommes d'armes, & trois cens arbalestriers, & douze grâs vaisseaulx. Desquelz estoit Capitaine vn gentil Escuier, ietté à tort de sa terre, nommé YVAIN DE GALLES, lequel auoit avecques lui maint gentil Gallois. Lesquelz se partirent de la fosse de Leure. Et qui oynt sonner les grans trompes, & veissiez leuer leurs voiles, & lesdites berges noblement floter, pour tref-belle chose le peust tenir. Et cōbien que petit nauire y eust, si faisoit-il moult à loer. Et se deuoient Espaignolz adiouster avecques eulx. Mais ilz ne vindrent pas au iour nommé. Car trop d'auentures aduiennent à homme nageant sur mer. Tant nagierent noz François,

qu'ilz aduissent l'Isle de Greneslye, qui moult estoit bonne. Et quant Yuain aperçut ladite Isle, il demanda conseil aux Cheualiers, se c'estoit bon que on y alast monter. Car ceulx, qui y demouroient, tenoient pour le Roy d'Engleterre. De ce furent d'avis tous les Barons. Lors s'en alerent à vn port nommé saint Pierre en port. Et quant ceulx dudit port le choisirent, si s'estourmirēt, & crierent aux armes. Et en iceluy pais auoit six vingts Engloiz, qui s'estoient partiz de saint Sauueur, & conduisoient leurs pillages à Londres, & s'estoient illec aencrez pour eulx rafraichir. Et si tost comme ilz oyrent dire, que noz gens vouloient arriuer à saint Pere en port, ilz se coururent armer, & se assemblerent avecques gens du pays, tant qu'ilz estoient bien six mil, qui rien ne prisoient Yuain, ne les siens. Lesquelz descendirent à terre tref-bien armez & aprestez de combatre. Lors affaillirent moult fort Engloiz, en auenturaht leurs vies, ne ne se faignoiet pas de traire ne de lancier. Car les arbalestriers trayoient de carreaux dur comme noif: dont le commun du pays ot bien sa part. Car trois cens y moururent sur le pré, & conuint les autres reculer à fenestre partie. Si les en chassoient François, & par especial les gens d'armes se boutoiet es Engloiz comme tous enragiez. Mais iceulx Engloiz plains d'oultre cuidance se deffendoiet moult fierement. Ne pourquant leur defense ne

leur valurien. Car il les conuint vuidier de place, & s'en fuyerent vers vn chastel, pour auoir garant : lequel noz gens asseigierent puissamment. Mais assault ne leur pot greuer. Et adonc fu icelle Isle courue & pillée, & moult grant auoir y conquist Yuain & ses gens. Ne oncques en celle bataille ne mourut que vn seul François. Et singlerent tant iour & nuit, qu'ilz arriuerent en vne Isle nommée laquelle se rençonna toute. Puis se bouterent en la mer, & nagerent tant, qu'ilz virent seize nefz bien garnies, lesquelles estoient aencrées. Si cuiderent les François que ce fussent Engloiz, & dirent li vns à l'autre: Vecy ce que nous auons quis bien quinze iours. Adonc se apprestèrent pour les assaillir, & à l'approucher leur escrierent: Engloiz, vous estes mors, sans rençon. Adonc parla vn marchand de grand renom, en disant: Seigneurs, nous ne sommes pas de guerre, mais marchans qui venons d'Espaigne, où nous auons chargié maintes marchandises, si comme cordouen, & auoir de prix. Si nous reposons cy en attendant bon vent pour aller en Flandres & en Braybant. Assez auons ceas pain & vin à vostre commandement. Nous sommes voz voisins, & voz amis, qui ne voulons combattre à vous ne à autrui. Et s'il vous plaist de noz biens, nous vous en donnerons assez. Dirent François, Ce n'est riés à dire, vous estes Engloiz, & pour telz vous tenons-nous, quant vous les

„ confortez de viures, & marchandez avecques
„ eulx. Si estes ennemiz du Roy & des nostres.
„ Pour ce ferez tous mors sans remede. Et quant
Flamens oyrent ce, & virent François apprestez
de trayre & de lancier sur eulx, bien voulzissent
auoir esté en leurs maisons. Mais Yuain de Gal-
„ les dist aux François: Seigneurs, ie vous prie que
„ à ces bons marchans on ne mefface rien. Car on
„ ne doit pas marchans greuer. Puis dist aux Fla-
„ mens: Beaux Sires, vous n'aurez point de mal,
„ par ma foy, ne homme, qui cy soit. Mais se vous
„ auez veu aucunes nefz Englesses, si ne le nous ce-
„ lez pas, & ie vous en prie. Donc respondirent-
„ Flamens: Sire, aujourd'hui auons rencontré en la
„ mer de Bordeaux le plus beau nauire d'Engloiz,
„ que oncques mais veissions, & sont dixhuit bar-
„ ges, quinze grosses nefes, & deux cognes, que nul
„ mal ne nous firent. Et y est le Conte de Penne-
„ broc, qui en amayne tant d'or & d'argent avec-
„ ques foy, que nulz ne le pourroit nombre, pour
„ paier gens d'armes. En ce mois d'Auril rafreschi-
„ ra tous les ports de Guienne. Et sont les Engloiz
„ en grant doute, que le pays ne se tourne deuers le
„ Roy de France. Et briefment yront Engloiz à la
„ Rochelle, afin que Bertran du Guesclin ne s'y
„ viengne bouter. Car il a enuoyé aux bourgoiz
„ de la ville lettres de par le Roy, qu'ilz se rendent
„ à lui. C'est quant que nous fauons de nouuel.
„ Seigneurs, dist Yuain, Dieux vous gart d'ennuy;

à qui nous vous commandons. Rien ne perdrez „ par nous. A tant se passe oultre le nauire Fran- „ çois, & Flamens demourerent moult resioiz. Et disoient l'un à l'autre: Dieu nous a ressuscité. Car „ se ne fust le gentil Yuain de Galles, felons Fran- „ çois nous eussent murdriz. Tant nagierēt Yuain „ & les siens, qu'ilz entrerent en la mer d'Espen- gne. Et la cause pourquoy ilz nagoiēt celle part, le Roy Henry promist au Roy de France, qu'il enuoieroit audit Yuain son nauire, avec ses gens, & garnison, & il n'en fallut pas. Et quant Yuain arriua au port de saint Andrieu en Espengne, il trouua beau nauire, que l'en garnissoit de par le Roy Henry, ouquel estoit son Admiral. Mais Messire Iehan de Trye, le Besgue de Villaines, Iehan son frere, & Pierre son filz. Lesquelz hon- nourerent moult les François, & adiousterent ensemble leur nauire, qu'ilz firent bien garnir & pourueoir de quanqu'il fault à nauire. Car Yuain auoit grant desir de aller en Galles chalengier le pays, qui pieça lui fu toullu par Edouart d'Engleterre.

MAIS or vous lesseray à parler iusques à vne autre foiz, & vous diray des gallées d'Espengne, qui tenoient la mer de Guienne, tellement que Engloiz n'y osoient entrer. Si auint en icelluy réps, que icelui Conte de Pennebroc, qui estoit Cheualier puissant, vint au port de la Rochelle à tout mille Engloiz ou plus, tous deffensables.

Mais la mer leur estoit trop basse pour arri-
uer au port. Car il conuient plus grosse eauë
à vne grosse barge, que à vne gallée qui court
bien en platte eauë, où vne grosse nef peri-
roit. Et pour ce ne se doit pas orgueillir qui
siet en haulte selle. Car Dieu a bien tost aba-
tu son orgueil quant il lui plaist. Et ausi com-
me il fist à ce Conte, lequel vn Cheualier En-
gloiz, Sire de Norantie, appella, & lui dist: Sire,
se ie en estoie creuz, nous ystrions de cyien vn
petit batel. Car bon fait garentir son corps. Se
ces felons Espaignolz vous assaillent, ilz ne vous
espargneront d'occire, ne que tout le moindre
qui y soit. Alons à la Rochelle querre l'arriere
ban, afin que l'en viengne secourir nostre nauir-
re. Par Dieu, ce dist le Conte, vous me voulez
bien honnir, & malement abessier mō honneur,
qui cuidiez que pour telle gent ie doye fuyr, &
pour vn tel penilleux nauire m'esbahyssez. Car
tant y en vendra, tant y'en ferons morir. Et se
vous auez paour, si vous en fuiez. Et par Dieu, il
vous en vaulzist mieulx estre teu. Sire, dist le
Cheualier, or faites vostre plaisir. Mais ie me
doubte que ainçois le vespre ne vous en repen-
tiez. Et pour la sauueté de voz corps ie yray à la
Rochelle, pour faire venir le secours. Puis dist
coiement: Perte me puist venir, se ie retourne
maishuy pour maintenir estour. Car bon voya-
ge fait, qui garentist son corps. A tant ledit Che-
ualier

ualier leffale nauire, & en vn petit batel s'en ala en ladite ville, où il compta la venue desdiz Espaignolz, & dist que l'en allast aidier aux Engloiz. Et les bourgeois, qui bien veoient comme la chose en aloit, pour ce que c'estoit pres d'illec, coururent aux armes, & entrèrent maint marinier, archiers, & arbalestriers, en cognes & en plusieurs bateaux; & se ordonnerent moult bien pour aidier aux Engloiz. Mais se ilz sceussent bié leurs pensées, ilz ne s'en fussent aentremiz. Car li aucuns, & plusieurs des Engloiz, dont ie vous deuise, auoient commission de iusticier la bonne ville tout à leur vouldenté, de pendre les bourgeois, ou eulx emprisonner, & les mener à Londres en Engleterre deuers le Roy Edouart. Mais tant vous dy, que les Espaignolz mirent hors de leurs gallées petiz batellets, lesquelz ilz raserent de busches & de fagoz, & avec ce y mirent huile, faain, & autres gressés: & puis y bouterent le feu, qui tantost se esleua. Et pour chacun batel vn Espaignol entra en l'eauë, plungant à guise de plunгон. Et conduit chacun son batelet desfoubz les grans barges, qui estoient de riche ouurage. Et par ce point y bouterét le feu, que defense n'y valut riens. Et ardirent icelui iour quatorze gros vaisseaulx, tant nefes comme barges. Et qui adóc veist les Espaignolz assaillir de tous lez les Engloiz, ausquelz ilz estoient abordez; archiers & arbalestriers trayre & getter cailloux

& lances par grant fierté, de bonnes gens lui peust souuenir. Et Engloiz d'autre part defendoient fierement leurs vies. Aucuns s'entremettoient du feu estaindre, & les autres se combattoient main à main de bons espoys, & de bort à autre; en escliant haultement, Par Dieu, faulx
» Espaignolz, vous mourrez de male mort, ne ia-
» mais ne retournerez en Espengne par delà. Se
» par vostre malice auez bouté le feu en nostre na-
» uire, il sera bien destaint maulgré vous. Il fu vray
que les nefes estoient haultes, & les gallées basses. Si vint vne desdites gallées courant, à vne trompette, nagans à trois cens auirons. Laquelle hurta de tel randon à la nef, où estoit le Conte de Pennebroc, que le vessel fu fendu, & y entroit la mer en plusieurs parties. Si que ledit Conte, pour se sauuer, entra en vne autre nez. Et là ot dur assault, & mortel estour. Mais combien que les Engloiz se meissent à tresgrant defense, ilz furent tous descōfiz, & les quatorze vaisseaux dessus diz ars & bruis. Là furent prins le Conte de Pennebroc, Huart d'Angle, & Iehan de Harpe dayne, ou nombre de quatre cēs personnes tous riches. Et en icelui estour moururent huit cens Engloiz, ou plus, tant de ceulx qui furent ars es nefes, & des noiez en la mer, comme des occys à l'espee. Et trouuerent les Espaignolz es nez dessus diz Engloiz grant finance d'or & d'argent, & bien dix mille gresillons, avecques les choses

deffusdites. Si parlerent iceulx Efpaignolz aux bourgeois de ladite ville, aufquelz ilz monstre-
 rent les grefillons, que Engloiz auoient appor-
 tez, pour eulx emprisonner, & auffi lefdites cō-
 miffions qu'ilz auoient toutes feellées, l'un pour
 estre Baillif, l'autre pour estre Preuoft, l'un Re-
 ceueur, l'autre Capitaine. Et deuoit estre icelui
 Conte de Pennebroc Gouverneur dudit pays
 toute fa vie. Et quant les bourgeois apperceurent
 ce fait, fi ne furent pas courrouciez defdiz En-
 gloiz. Et n'y ot en ladite ville grant ne petit, qui
 ne defirast estre bō Frāçois. Car chacun trait à fa
 nature. Tantoft Efpaignolz lefierent le port de
 la Rochelle, & se retrayrent en la mer avecques
 leurs prifonniers, or & argent auffi qu'ilz auoiēt
 conquis. Et en leur voyage conquirent trois nefes
 Angleffes deuant Bordeaux, lefquelles ilz ardi-
 rent, & noierent ceulx qui dedens eftoient, & en
 la mer dudit pays efcumoient: tellemēt que nulz
 n'y entroit ne iour ne nuyt. Puis se partirent d'il-
 lec, & vindrent vers Espengne au port saint An-
 dry, où ilz trouuerent Yuain de Galles, qui eftoit
 avecques les Efpaignolz. Lequel commença à
 maudire le Conte de Pennebroc, tantoft com-
 me il leuit. Car moult le heoit, & iura que se il fust
 fon prifonnier, que il le mettroit à mort, voyās
 tous les Barons. Et difoit que par fon faulx con-
 feil il ne pouuoit rauoir fa terre de Galles, dont il
 auoit esté chaffé à tort, & par enuie. Et le Conte

„ respondi: Par moy n'est-ce pas, & faites villenie,
 „ de moy remponner. Car homme, en qui a maint
 „ honneur, ne doit dire à prisonnier que toute
 „ courtoisie. Mais à qui il meschiet, on lui mesof-
 „ fre aucunesfoiz. En conclusion, tous les prison-
 niers dessusdis furent bien tenuz liez, enches-
 nez & escoplez, iusques à ce qu'ilz eussent paie-
 leur rençôs. Et Yuain de Galles assembloit na-
 uires & gens, tant comme il pouoit. Mais de lui
 vous lefray, & parleray du Roy & de Bertran.

*De vne bataille, où Chandos fu mort, & Caraenloet
 pris. Et de la prinse, mine, & assaut de Chasteau-
 rant, Moncontour & sainte Sauere, que les En-
 gloiZ tenoient: & de la destruction des faux Fran-
 çois illec estans.*

CHAPITRE XLVIII.

Q VANT le Roy de France sceut, comment
 Espaignolz s'estoient bien portez deuant
 la Rochelle, il ot tresgrant ioye, & commist à
 Bertran de y aler bien acompaigné de gés d'ar-
 mes, & de dire aux bourgeois qu'ilz lui rendissent
 les clefs, & feissent feaultez & hommage ou nom
 du Roy. Et Bertran respondi, qu'il feroit son
 commandement. Et s'en party de Paris, & exple-
 éta tant, qu'il vint bien pres de la Rochelle. Et
 tantost fu le plat pays couru & fusté des Fran-

çois. Mais incontinent Bertran manda les greigneurs bourgeois de la ville, & leur exposa en substance la voulenté & commandement du Roy, & monstra les causes & poins, par lesquelz les Engloiz s'estoient pariurez, sans tenir aux François foy ne loyauté de l'acort, qui auoit esté fait entr'eulx. Et pour ce, les habitans de la Rochelle feroient que sages, de eulx rendre François: & se ilz ne le faisoient, il s'en repentiroient bien brief. A ce respondirent les bourgeois desfufdiz, qu'ilz en donroyent briefue response, mais qu'ilz eussent parlé à la communaulté, sans laquelle ilz ne pouoient riens accorder. Car autrement ilz feroient marchié d'estretuez incontinent. Si s'en retournerent iceulx bourgeois parler au commun de la ville, & leur monstrent ce que dit est. Et lors furent tous d'acort, que ilz feroient sauoir au Roy Engloiz, que se dedens vn certain iour n'omé il ne les secouroit, ilz se tourneroient deuers le Roy de France. Lequel Roy Engloiz fu moult courroucié de ces nouuelles. Mais autre remede n'y pouoit mettre quant alors. Non pourquant il māda aux bourgeois qu'ilz feroiēt secouruz ainçois que ledit iour escheust. Et quant Bertran ot oye la relacion desdiz bourgeois, il iura Dieu & sa digne puissance, que de leurs vignes il ne demourroit cep, branche ne racine, qui ne fust coppée, ou escappée, tant que iamais ne porteroit substance. Et quāt les bour-

gois l'oyrent ainsi iurer, par certaine finance les appaisierent, laquelle estoit de cinquante mille frans, qu'il prist pour payer & distribuer aux gens d'armes. Et aussi lui promistrent rendre & liurer ladite ville, ou cas que dedens certain iour ilz ne auroient secours dudit Roy d'Engleterre. Et Bertran, qui à autre chose ne contendoit, que de tenir gés d'armes en puissance, & garder l'onneur du Roy & le prouffit de son pays. Et quant il ot cheminé aussi comme vne iournée, vn Heralut vint à lui à vn soir, qui se disoit estre au Captal de Buch, lequel lui iura & promist, que se il vouloit attendre où il estoit logié, l'espace de trois iours, on liureroit bataille à lui & à toute sa gent. Et Bertran iura, que ainsi seroit-il fait. Et ainsi cōme il le dist, il le fist. Mais oncques personne ne se monstra icelui temps durant, pour lui liurer bataille. Dont il fu moult courroucié. Si en appella les plus notables de ses gens: c'est assauoir Monsieur de Cliçon, Iehan de Bueil, Oliuier de Mauny, Guillaume Boytel, Guillaume de Launoy, Alain de Beaumont, le Bourc de Rabastaing, avec plusieurs autres Cheualiers & Escuiers de grāt renom. Ausquelz il dist: Seigneurs, „ il est vray que Engloiz nous ont menty leur foy. „ Car nous les auons icy attenduz trois iours. Or „ n'auons de quoy viure en cest pays. Si n'y pouons „ plus arrester, & pour ce yrons où est le Captal, & „ lui courrons sus lance leuée. De ce furent tous

d'accort, & ilz fussent allez; quant vn Escuier vint illec batant de par Mōsieur le Duc de Bourbon, qui venoit pour auoir la Rochelle. Et quāt Bertran sceut la venue de mondit Seigneur le Duc, si ala à l'encontre, & l'encontra ausi comme à heure de complice. Et trouuerent vn chastel fort & muré, que ilz conquirent d'assault ainçois heure de sopper. Et furent les Engloiz dedens estans, tous mors, ou prins. Celle nuit se reposerent oudit chastel, où ilz soupperent, & trouuerent des vins assez. Et se ilz ne l'eussent gaaingné, il leur eust conuenu toute nuit gerir aux champs sur l'erbe. Car la ville estoit gaste & deserte. Puis se mirent au chemin deuers France au mandement du Roy. Et moult estoit courroucié Bertran, qu'il n'aloit plus auant ou pais de Guienne. Mais de luy vous lefray en present, & y retourneray quant il en sera temps; & vous parleray d'un Cheualier de grant renom & loyal Engloiz, nommé Iehan de Chandos, lequel estoit Capitaine de Poitiers. Lequel auoit avecques luy moult noble garnison de gens d'armes, & en ces frontieres là auoit plusieurs chasteaulx François, où il auoit maint bon Capitaine de noble lignée. Caraenloet y estoit, qui long temps auoit esté Capitaine de la Roche de Pozay, avecques lui son compaignon Alain, Henry Boscherel, Iehan Payen, & plusieurs autres. Et estoient cinquante glaiues, & enuiron dixhuit archiers. Si les venoit

souuent Chandos assaillir, & courir deuant leur chastel. Mais petit y conquestoit. Car il trouuoit les François deffensables: c'est assauoir Bretons, qui pou prisoient Engloiz. Si auint à vn certain iour, que Caraenloet & les siens yssirent de leur fort, & s'en allerent cheuauchants tout droit enuers Potiers, fustant le pays: & leuerent & acueillirent proyes & bestail, dont il ot foison, que amener cuidoient dedens leurs logeis. Mais les fuytifs, qui s'enfuirent à Poitiers, conterent à Poitiers ceste perte. Lors iura nostre Sire, que mal auoit Caraenloet fait telle mesprison. Tantost sans arrester fist sonner sa trompette, & Engloiz coururent bien trois cens ou enuiron, qui auoient chacun le bacinet en la teste, la lance ou poing, & vestu de iaques par dessus la cote de fer ou d'acier: lesquelz estoient bien montez, & iuroient tous la mort de Caraenloet, qui tât estoit loyal homs. Mais à qui Dieu veult aidier, nulz ne puet nuire. Si cheuaucherent iceulx Engloiz au dehors de Poitiers assez près d'une iustice, lés vne riuiera appelee Vienne, où il auoit maint pontcelet. Et n'eurent gaires cheuauchié, qu'ilz encontrerent vn homme veneur tenant en sa main vn cornet, lequel estoit de Poitiers, & brochoit tant comme il pouoit, pour la paour qu'il auoit. Si s'adreça tout droit à Chandos, qu'il recognut assez, & le salua. Et tantost ledit Chandos lui demanda, se il auoit veu François: Oyl, Sire, dist le varlet,

varlet, ils en emmainent maint riche prisonnier, & tref-grant foison bestail. Se aujourduy voulez conquerre grant honneur, dont vous serez renommé à tousiours, si alez au deuant d'eulx à loy de guerrier : Car vous les aconsuiurez bien ains vne heure de iour. Mais il vous conuendra passer le pont de Vienne au port de Lussant, qui n'est que vne tour. Et il disoit verité. A tant s'en passa oultre Chandoz, avecques lui les trois cens Engloiz dessusdiz. Et cheuaucherent tant enuers ledit pont, qu'il aprouchierent tant qu'ilz virent les François de l'autre part de l'eauë, qui en amenoient prisonniers à force & à desroy, & chassoient bestail contreual la préce. Or auant, dist Chandoz, hastons nous à ceste foiz. Car se François viennent au pont, ainçois que nous, ilz nous voudront deffendre le passage, iusques à tant qu'ilz ayent enuoyé leurs prisonniers & leur bestail dedens leur fort. Je cognoiz trop bien les faiz de Caraenloet. Car il m'a autresfoiz ioué de tel tour. Entretandiz vint à Caraenloet vn sien Escuier, qui lui dist: Sire, soiez sur vostre garde. Car pour certain Chandoz est yssu hors de Poitiers, & avecques lui bien trois cens combatans, qui menacent de mort vous & les vostres, & contendent à passer au pont de Lussant, pour vous dommager; & affin qu'ilz puissent tenir en plains champs vous & les vostres. Et quant Caraenloet l'ot oy, & entendu, si lui demanda comme il le

„sauoit. Sire, dist icelui Eſcuier, ie l'ay tout main-
„tenant ſceu par voſtre eſpie, qui eſt paſſé la riuie-
„re de Vienne à noe, dont il eſt ſi moillié & tra-
„ueillié, que à peine puet-il venir parmy les prez.
„Dieu, diſt Caraenloet, ſoiez nous en aide. Beaux
„Sires, ſauezvous que nous ferons? Nous leſſerons
„tous nos priſonniers avec ce beſtail à nos varlés,
„qui les merront tout droit à noſtre fort; & entre
„nous yrons, ſe bon vous ſemble, au pont de Luſ-
„fant, qui n'eſt pas loing de nous, & illec garde-
„rons le pas contre noz aduerſaires, tant & ſi lon-
„guement qu'il ſera nuit ſerrée. Adonc nous yrôs
„bouter és boys, pour ſauuer nos vies. Car ſe
„nous nous mettons maintenant à la fuite, nous
„ſerons mors, ou prins en brief temps, & noſtre
„proye requeuſſe. Et ſe nous attendons la bataille
„main à main, nous n'y pourrons durer. Car de
„trois cens contre cinquante, c'eſt choſe mal par-
„tie. A ce conſeil s'accorderent tous, & chargie-
„rent priſonniers & beſtial à leurs varlés, puis che-
„uaucherent tant arouteement ſur l'eauë, qu'ilz
„choiſirent Engloiz de l'autre part. Et adonc Ca-
„raenloet haſta moult ſes gens, pour doubte que
„Engloiz n'entraſſent les premiers ſur le pont. Et
„Chandoz d'autre part monſtra aux Engloiz Ca-
„raenloet, que il auoit moult bien aduiſé. Car c'e-
„ſtoit l'omme viuât en ceſt ſiecle, qu'il plus doub-
„toit. Tant ſe haſterent d'une part & d'autre, qu'ils
„vindrent au pont deſſusdit. Mais Caraenloet

monta le premier dessus, & aussi tost comme il y fu, il descendi de son cheual, & se mist à pié; & aussi firent tous les gens par son commandemēt. Et se ranga chacun la lance ou poing. Et bien disoient entr'eulx, que se Engloiz ilz vouloient passer, il counendroit que ilz se nommassent. Et mirent les François leurs archers deuant, qui n'estoient que dixhuit, qui tendirent leurs ars, & encoicherent leurs fleiches. Et lors vint ledit Chandoz, qui en soy merueillant disoit aux Engloiz: le vous auoye bien dit commant il en va, & vous iure par ma foy, que en France n'a meilleur homme d'armes. Si lui donray beau don, qui vif le me pourra rendre. Je sçay bien de certain, que ainçois qu'il y muyre, il se vendra chier. Adonc fist Chandoz descendre ses hōmes rengiez & ordonnez, lesquelz estoient tous armez de pié en cap. Et adonc commencierent Engloiz à traire. Mais assez tost failly leur trait, & ne dura pas longuement. Adonc commença Chandoz à crier haultement: Haa! Caraenloet, tu éstrop hardi & outrecuidié, qui de cinquante hommes d'armes veulx tenir bataille encontre trois cens. Ne fay pas occire toy & ces gens, ainçois te rends paisiblement à moy. Je te quitteray toy & tes gens pour demie raençon. Je te iure & promets par ma foy, que celui qui pourroit payer cent frans, n'en paiera que cinquante: mais que ainsi tu me rendes les prisonniers & le bestail, que tu

as conquis sur nous. Et quant Caracnloet l'entendi, si lui respondi qu'il parloit de neant: mais quant il le verroit en son deffoubz, adonc le requerroit-il de rendre. Car se ainsi s'estoit réduz, iamaïs ne se oseroit veoir deuant Bertran, ne aucun Cheualier d'honneur. Ceste response ne plut pas bien à Chandos. Si luy requist le Seigneur de Mortemer la premiere bataille contre les François, laquelle lui fu octroyée. Adonc vint assembler avecques lui cinquante glaiues, qui bié cuïdoient les François abatre & renuerfer. Mais iceulx François par grant deffense & force de pousser, les firent reculer. Et eussent esté les Engloiz de la premiere bataille mors ou prins, quāt Chandos le secourut. Et auoient plusieurs de ses gens haches, qui trop greuerent les François, qui fort se defendoient pour sauuer leurs vies. Et là bouterent fort de lances & de glaiues. Et aussi comme icelle bataille se prenoit à arriuer, vn varlet François s'en parti, lequel ala dire à ses cōpaignons, qui le bestail dessusdit menoiēt, qu'ilz le lessassent & venissent aidier à leurs maistres, qui fierement estoient assailliz des Engloiz. Adonc iceulx varlez s'en corurent vers ledit pont, & emplirent leurs girōs de pierres & de cailloux. Et quant ilz vindrent à leurs maistres, qui estoient sur le point de perdre & de reculer, les varlez dessusdiz commencerent à crier le cry de Caracnloet, & à getter sur les Engloiz, oultre & par des-

sus les François, & à cheoir sur les bacinez. Iceulx
 cailloux & pierres, qui descendoient druz, mar-
 teloient moult fort. Dont Chandoz ot moult
 grant merueille. Et adonc efforça les gens de cō-
 battre, en disant, que oncques tel honte ne leur
 auint, s'il les conuenoit reculer & vuidier de pla-
 ce. Puis leur dist ainsi: Nous sommes trois cens, & "
 les François n'estoient que cinquante au com- "
 mencement. Or leur est venu ne sçay quel se- "
 cours, qui iette par derriere, lequel a malement "
 empiré noz gens. Sire, dist vn Engloiz, ce ne sont "
 que varlez, qui tost seront desconfiz qui voudra "
 aler sur eulx. Or auant, dist Chandoz, pensons "
 de besongner. Adonc y out forte bataille d'vne "
 part & d'autre, & moult fort estoqua de glaiues.
 Mais Engloiz estoient trop. Si feroient tellemēt
 de haches sur les François, qu'ilz les entrainerent
 & ouurirent à force; & plusieurs en prindrent
 prisonniers. Moult s'y prouua bien Chandoz, &
 entre les autres aconſieuy d'vne hache vn Fran-
 çois nommé Pierre le Boucher, tellement qu'il
 lui embarra le bacinet en la teste, & l'abat y ius.
 Et illec fu prins des Engloiz, present Caraenloet,
 qui moult en fu courroucié. Là y auoit vn Bretō
 bon archié, nommé Alain de Greingneux, le-
 quel descocha vne fleche sur Chandoz si fort,
 que elle lui perça toute ses armeures, & le naura
 en char, tellement que le sanc en issy: mais non
 pas à mort, se il n'eust eu pis. Et quant il se senty

blecié, s'il n'y ot que courroucié. Mais nul semblant n'en fist, ainçois commanda à ses gés, qu'ilz occisissent François, qui rendre ne se voudroiet tost & apertement. Illec se deffendi puissammēt Yuonnet de Launoy, qui portoit le panon de Caraenloet; & y fu pour ce iour vn des meilleurs de toute l'asssemblée. Qu'il y ataignoit à cop il abatoit. Et pour soy mieulx combatre bailla son dit panon à porter à vn sien seruiteur. Apres ce, repoussa Engloiz d'une hache qu'il tenoit, & en naura cinq deplayes tres-grandes. Et avec ce abaty la baniere de Chandoz. Et quant Engloiz le virent ainsi contenir, si l'encloyrent & auironnerent de toutes pars, & tant le batirent de haches, qu'il fu trespuchié par terre, où il fu pris & faisfy. De ce fu moult courroucié Caraenloet, qui le vit, & le cuida requerre. Si escria son enseigne pour lui aidier. Mais fu pour neant. Car il mesmes fu abbatu & fusté par telle maniere, que illec en la place eust esté mort, ne fust vn Engloiz, qui son prisonnier auoit iadix esté. Lequel Caraenloet auoit tellement raençonné, & prins du sien si largement, qu'il ne lui estoit demouré de nier, ne il n'auoit cheual ne armeures qu'il n'eust emprunté. Et pour ce icelui Engloiz l'auoit acucilly en haine, & iuroit que se iamais le pouoit prendre, ou auoir le dessus de lui, qu'il ne le respiteroit pour tout l'or du monde, qu'il ne fust occis & decoppé. Mais Dieu lui enuoya alors au-

tre pensée & vouloir, & inspira son cuer telle-
 ment, qu'il en osta hayne & mauuaistié; si que en
 lieu de mal il rendy bonté & courtoisie, dont il
 fu prisé en plusieurs lieux. Quant ledit Engloiz
 vit Caraenloet tumbé à terre, à qui l'en batoit
 les flanz & les costez de grans haches pesant; dōt
 Engloiz le cuidoient occire, le bon preudomme
 Engloiz getta sur lui vne hache, qui auoit large
 alemelle, & dist à ceulx qui l'en pressoiēt: Traiez "
 vous arriere. Comment estes vous si osez ne si "
 hardiz, de occire ne de tuer vn homme de grant "
 sens, & de noble lignée, puis qu'il requiert à estre "
 receus à rençon? Foy que ie doy à Dieu, le pre- "
 mier qui lui touchera meshuy, ie luy donray de "
 ceste hache où ie le pourray asséner. Et lors le bō "
 Engloiz fist reculer Caraenloet, & lui dist: A di- "
 re verité, vous me deuez mieux aimer, que ie ne "
 faiz vous. Car ie vous ay sauué la vie, & vous avez "
 pris de moy si grant rençon, que ie n'ay cheuaux "
 ne armeures, qui mieux soient. Si fault, que vous "
 me aidiez à remonter, ou ie vous feray finer de "
 mauuaise mort. Rendez vous tantost sans plus "
 deffendre à la volenté de Iehan de Chandos no- "
 stre Capitaine & Gouverneur. Adonc Caraen- "
 loet se rendy. Sien furent François moult espo- "
 uantez. Et lors commencierent fort à decliner.
 Aucuns se rendoient pour auoir leurs vies sau-
 ues, & les autres se mettoient à deffense. Et là y
 auoit vn Escuyer François moult hardy, qui par

grant hardiesse ala ferir Chandoz d'un glaiue
en pouissant, & tellement l'empaint & de si grant
force, à la 'peine qu'il y mist, que par deffoubz
la poitrine lui perça le iaque, la cotte, & le
pourpoint à armer, & lui bouta le fer dudit glai-
ue dedenz le corps. Et quant Chandoz se senty
„ nauré, si escria à ses gés: Ayme Dieu, ie suy mort,
„ huy est venu mon derrain iour & ma fin. A Dieu
„ comment Monsieur le Roy d'Engleterre, Mon-
„ sieur le Prince, & la Dame que i'ay espouseé. Et
„ quant son frere l'oy ainsi dementer, si commen-
ça à plourer, & à le regretter: & commanda que
l'en mist à mort tous les François, tant prison-
niers comme autres, sans nulz deporter. Car il
vouloit prendre vengeance de la mort son frere,
„ lequel lui dist: Beau frere, vous non ferez. De-
„ portez vous, & soiez en paix. François font leur
„ deuoir. Si ne les doit-on blasmer, mais priser &
„ honnourer. Car qui fait ce qu'il doit, il ne mes-
„ prent en rien. Si est legier à excuser. Tant depria
Chádoz son dit frere, & ses nobles hommes, que
François furét pris & receus à rençon. Et ne vou-
loit pas pourtant s'il estoit nauré, que pis leur en
fust. Adonc promistrent Engloiz, que François,
qui tantost se rendroient sans plus deffendre, se-
roient deliurez par rençon payant, & qui ne se
rendroit, il seroit mis à mort sur la place. Et Frá-
çois, qui bien veoient qu'ilz en auoient du pis,
se rendoient tous communaulment. Ne des Frá-
çois

çois n'y ot que quatre occis en celle bataille. Si vous dy, que celui qui auoit Chandos ainsi nauré, fu prins du bon Engloiz dessusdit. Lequel pour le faire decongnoistre, lui fist deuestir son iaques, & puis reuestir à l'enuers, ou autrement il eult esté recognu & occis du frere Chandos, lequel auoit plusieurs foiz demandé audit Chandos, qui estoit celui qui l'auoit ainsi nauré. Et il respondi: Vn vaillant Escuyer, qui auoit son iaques semé de cloichettes d'argent. Adonc fu quis entre les autres prisons icelui Escuier nommé Esmery. Mais son Maistre l'en auoit ia enuoyé ailleurs à sauueté. Si furent tous les François retenuz & prins, comme dit est. Et avec ce les varlés, pages, cheuaux, males, & harnoiz, & les prisonniers requeux que François auoient pris, & la proye aussi. Puis se partirent Engloiz de Lassant, & fu mené Iehan de Chandos à Chauuigny, où il trespassa. Et Caraenloet fu mené au chastel de Mortemer en prison, & les autres François à Poitiers. Depuis ce fu mis Caraenloet à finance, à la somme de trois mil frans, qu'il paya pour sa rençon. Mais la cité de Tours les lui donna, & si lui en demoura mil de remenât. Car il estoit moult amez ou pais. Et il n'est rien, qui vaille amy au besoing. Apres sa deliurance retourna à la Roche de Posay. Si fist tant, que dedens certain iour il deliura par rençon payant, son compaignon Alain, Pierre le Boucher, Geuffroy Payen, Hen-

ry Boscherel, Yuon de l'Espine, & plusieurs autres. Et briefment, il fist tant, qu'il r'eut toutes ses gens quites & deliures.

A v temps dessus dit auint, que Mōsieur Bertran lui manda par vn sien Herault, que il gardast bien la Roche de Pofay. Et il luy conterremanda, que si feroit-il. Si assembla auecques lui quatre vingts combatans, & ne refusoit homme. Et s'il n'auoit argent, si leur promettoit-il à les faire riches. Vne nuit s'en vint deuant vne ville fermée, nommée Chasteauleraut, assise sur la riuie-re de Vienne, & fermée de grans pieux sur bout, qui au deuât du mur faisoient deffense. Si auoiēt apporté les François plusieurs syes sourdes, & bien tranchées, amanchées de plomb; dont sans noise faire ilz soyerent par deux nuitz iceulx pieux rez à rez de terre, mais non pas tout oultre: & puis remplirent la tranche de terre. De iour s'en aloient courant le païs. Et à vn point du iour vindrent là, & apporterent plusieurs eschielles, & pour la ville eschieller descendirent és fossez. Là y auoit vne tour grant & haulte, où estoit vne gaite, qui escrioit souuent, en disant qu'ilz gardassent au pié du mur. Mais ceulx, à qui il parloit, dormoient tous. Si ne lui respondirēt mot, combien que plusieurs foiz leur dist, que tantost feroit iour. Si iroient mengier des tripes, qui au feu bouloient. Et lors y auoit au pié du mur bien trente François, qui respondirent audit gaite:

Nous garderons bien par tout. Car nous ne dormons pas. Et quant le gueitte les entendit, si regarda ou dit fossé, & oy remuer le bois, & cheoir les grans pieux tout à cop par grosses parties, qui moult donnoient grant flac. Et lors icellui gaitte commença à crier à haulte voix: Alarme, tray, Seigneurs tray. Adonc se coururent armer bourgeois & soubdoyers. Mais riens ne leur valut. Car ilz ne sceurent si tost venir, que François ne fussent ia montez sur les creneaulx. Si se deffendirent Engloiz de glaiues & de bons espoix. Mais leur deffense ne leur valu pas vn seul denier. Car tous furēt mors ou prins, excepté ceulx qui s'enfuyrent. Et adonc François entrerent en ladite ville, & Bretons tous les premiers, qui fusterent maint bon hostel, ou ilz conquirent moult de richesse, & prindrent partie de ceulx de la ville, & les autres entre deux tours de nouuel edifiées. Et illec se mist à garant le Viconte du lieu, mais du sien perdi grant foison. Bien cuidoiēt François conquerer briefment ce pont, sur lequel auoit maint Engloiz. Mais ainçois fu chierement comparé. Celle nuit se reposerent François en ladite ville, dont ilz vuidierent assez de pillage qu'ilz departirent entr'eulx, c'est assauoir or & argent monnoyé, hanaps d'or & d'argent, & de madre, riches draps, gros bureaux, beaux linges, chaudières, chauderons, & maint beau lit: mesmement les enclumes à feures, & les meules à blé

chargierent-ilz toute nuit en nefz, & en bateaux, & les enuoyerent à Saumur & à Chinon; ne oncques mais ville ne fu mieulx pillée. Long temps tindrent François ladite fermeté, & par deuant le pont dessusdit firent bretesches pour defendre, afin qu'ilz ne fussent surpris. Illec s'assemblerent François de tous pays, & ains quinze iours furent bien deux mille. Si furent les greigneurs à conseil pour conquerir ledit pont, & furent tous d'accort, qu'ilz merroient en certains bateaux plusieurs François bien armez, lesquelz à piques & à hoës y roient miner le maistre pillier, surquoy icellui pont estoit fondé, & qui soustenoit aussi l'une desdites tours. Ainsi comme il fu dit, il fu fait. Et furent les Engloiz moult esbahiz, quant par assault de mine ilz virent cheoir l'une des arches dudit pont, & la tour qui estoit dessus verser de l'autre costé. Et lors pour doubte de mort s'en fuyrent en l'autre tour à garant, où ilz firent par force d'archiers & arbalestriers reculer. Car ils auoient leanz plusieurs arbalestes & ars à tour. Si gariterent leur dite tour moult noblement tout autour, laquelle estoit garnie de maint vaillans hommes d'armes Engloiz, & de assez de viures. Et si pouoient aler à Poitiers sans nul peril. Car entr'eulx & les François estoit la greigneur eauë. Si ne pouoit sauoir Caraenloet, comme il peust auoir celle seconde tour, pour laquelle miner, François ordonnerent en

plusieurs bateaux gens d'armes bien armez, & pionniers bien targiez, lesquelz portoient picques & houës. Car moult desiroient de miner celle tour. Mais Engloiz trayoient & lançoient à eulx, & bien cuidoient iceulx Engloiz, que Caraenloet fust alé és deffusdiz bateaux, lui cinquiesme de ses greigneurs hommes. Et la cause pourquoy ilz le cuidoient estoit ceste. Les cinq deffusdiz auoient baillé leurs armes à cinq archiers, dont l'un d'iceulx, qui portoit les armes de Caraenloet, estoit né de Paris, & nommé Ican de Limoges. Et quant Engloiz choisirent les armes, si trayrent à lui plus fort que deuant: mais rien ne lui meffirent. Car il estoit fort armé. Et dura tel assaut iusques à Soleil couchât, que oncques l'en ne meffist rien audit pont, fors que tant que l'en eslocha & fist croler trois pierres, par lesquelles on eust bié eu les autres. Mais Engloiz monstrerent alors si grant deffense, que oncques puis l'en n'y ala volentiers miner. Car eschaudé caue craint. Ainsi furent les François longuemēt deuant Chasteauleraut, sans conquerir le pont. En ce temps, Messire Bertran māda Caraenloet, & tous les autres Capitaines des fors, qu'ilz allassent parler à lui à Bloys: & ceulx qui venir n'y voudroient s'en allassent tout droit deuāt Huissel: où ilz trouuerēt à certain iour nommé Messieurs les Ducs de Berry & de Bourgoigne, Monsieur le Conte de Bloys, & ledit Connestable. De

ce furent François moult ioyeux, & au iour nommé furent deuant Huissel en Auvergne, logiez tout autour bien douze mille tant gens d'armes comme archiers & arbalestriers tous souffisans. Et y donnerent vn moult fort assault, & toulirēt l'eauë des fossez, lesquelz ilz emplirent, & avec ce minerent & trouierent les murs. Et eust esté ladite ville prinse, ne fust la nuit qui les surprint. Parquoy ledit assault cessa. Et icelle nuit leua vn grant vent, & se changea le temps si diuersement, qu'il chey tant de neige, que landemain dedens heure de prime, fu ladite neige de cinq piez de hault, ou de plus. Et par ce conuint noz genz departir à grant meschief, & retourner chacun en son lieu, & en chemin en mourut plusieurs par mesaise de faim & de froit. Ainsi se passa celyuer. Et quant vint à l'esté, François se assemblerent, c'est assauoir Messieurs les Ducs de Berry & de Bourgoigne, le Conte de la Marche, & le Viconte de Meaulx, Raoul de Raineual, Raoulequin & Galeren ses enfans, Enguerren Deudin, Odart de Renty, Tristan de Roye, le Seigneur de Hangeft, & le Sire de la Tour, avec celui de Canny, & plusieurs autres, qui alerent au mandement de Monsieur de Berry, lesquelz estoient bien mil hommes d'armes. Et aussi mōdit Seigneur le Duc manda le Conestable & ses gens, qu'ilz venissent à luy en Berry. Lequel Cōnestable lui escripsi, qu'il luy amerroit si grant

foison Bretons, qu'il ne demourroit Engloiz ou pais; & qu'il pleust à mondit Seigneur aler deuant sainte Sauere, où le siege estoit leué, & là yroit.

A D O N C s'en party Bertran du pais de France, où il ne retourna iusques à tant qu'il eust conquis soixante fors, tant en la Guienne, comme en Berry. Et assembla ledit Bertran de cinq à six cents hommes d'armes, desquelz estoient les Cheuetaines, le Seigneur de Cliçon, Monsieur le Marechal de Sancerre, Monsieur Alain de Beaumont, & Messire Jehan son frere, le Seigneur de Rays, de Rochefort, & de la Hunaudoye, le Sire de la Roche-guyon, le Gouverneur de Bloys, & le bastart de Flandres, & plusieurs autres nobles Cheualiers & Escuiers. Ausquelz Bertran ordōna de aler deuant sainte Sauere. Mais quant il vint à Saumur, il ordonna à mondit Seigneur de Cliçon trois cens lances, pour aler assaillir Montcontour. Lequel y ala, mais oncques par assault qu'il peust faire, rien n'y conquist. Et leans auoit vn Engloiz felon & despit, auquel Bertran s'estoit de pieça obligé par lettre obligatoire seellée de son seel, en vne certaine somme d'argent, & par obliance il ne l'auoit pas encores païée. Si fist icellui Engloiz paindre les armes de Bertran, & ou despit de lui les fist trayner, & puis pendre au dehors de la porte assez pres des postys, renuersées ce desseure dessoubz. Et par ce donnoit à entendre le faulx Engloiz, qui puis le compara,

que Bertran, qui estoit tant loyal, il tenoit pour
faulx & pariure. Ne demoura gueres que Mon-
sieur de Cliçon fist fauoir à Bertran par vn che-
„uaucheur ce que dit est, lequel dist: Il est biē vray,
„que ie me obligay vn iour passé pour vn mien
„soudoyer, c'est à sçauoir pour sa rençon, & y
„soubsmis mes biens & ma terre. Et se le iour de
„payement est passé, si pust aler mon creditur
„gaiger & executer sur ma terre & sur mes biens,
„sans moy despiter ne blasmer. Et ie veu à Dieu
„tout puissant, que iamais ne mengeray de chair,
„ne despoulleray ne de iour ne de nuit, si auray
„pris Moncontour, ou ilz se rendront à mavou-
„lente, & me liurerōt prins & lié le felon Engloiz
„qui tant m'a auilé. Si le feray trayner & puis pen-
„dre par le col en la propre place, où il a pendu
„mon blason. Car vouldentiers me pendroit se il
„me tenoit. Tantoist Bertran fist sonner sa trom-
pette, & fauoir à ses gés qu'il s'en va deuant Mō-
contour, à Monsieur de Cliçon, lequel vint en-
contre lui quant il en approucha. Celle nuit se
reposerent François. Mais Bertran n'y māga de
char, ne iut en lit; ainçois imagina comment il
pourroit auoir Moncontour, qui estoit bien fer-
mée. Et icelle nuit vindrent mainte grant route
de gens, & de maintes parties, lesquels suiuoient
Bertran qui mieulx mieulx. Et à Soleil leuant
Bertran fist crier, que tous alassent à l'assault.
„Di eux, dirent li plusieurs, nous auons toute nuit
cheminé,

cheminé, & sans boire, & sans mengier. Si fu dit à Bertran, que ses gens se dementoyent ainsi. Mais il n'en tint compte, ains fist sonner sa tröpette. Et lors noz François se armerent, puis descendirent ou fossé à tout picques & eschielles, au pié du mur. Si trayoient & lançoient sur les nostres maintes pierres pesantes, & aussi versioient eauë & poix bouillant avec chaux viue, barilz aempliz, & grans merriens pesans, dõt plusieurs François blessierent & abatirent es fossiez. Mais quant releuez estoient, ilz n'y acoutoient rien. Noblement s'y porterent tous les Barons, & par especial Bertran, Messieurs de Cliçon & Louys de Sancerre Mareschal de France, les Seigneurs de Rochefort, de Rays, & de la Hunaudoie, le Viconte de Rohem, Morelet de Montmort, & Mefsire Jacques son frere, & le Gouverneur de Bloys. Lesquelz firent tant que par force d'assault ilz conquistrent icellui iour Moncontour, où auoit planté Engloiz. Là estoient Cressouale, David Hollegreue, & autres Cheualiers de nom, qui fierement se deffendoient. Mais les nostres, qui furent les plus fors, se bouterent dedens, & occyoient Engloiz à planté; & encores eussent plus fait se ilz n'eussent encusé & liuré celui, qui auoit pendues les armes de Bertran; lequel ledit Bertran, aussi tost comme il le tint, fist trayner, & puis pendre ou propre lieu, où il auoit pendu son blason. A Moncontour lessa grant garnison

de gens d'armes, puis s'en party pour aler à sainte Sauere. Et en son chemin print plusieurs villes, & fors Monstiers. Tant chemina, & sa gent avec lui, qu'il vint deuant sainte Sauere, où il trouua Messieurs les Ducs de Berry, de Bourgongne, & de Bourbon, le Côte de la Marche, & le Sire de la Tour. Si auoit mondit Seigneur le Duc de Bourgongne trainez illec de son país maint Gentilzhommes d'armes Bourguignons par vn noble Cheualier nommé Messire Guy de la Trimouille, lequel les conduisoit. Et quant Bertran fu assemblé avecques eulx, ilz furent bien deux mille de nobles combatans, qui estoient tresbien armez, & avec ce pourueuz de pauez, escuz, eschielles, picques, hoës, & marteaux, de pierres & d'engins gettans icelles; & neant moins d'archiers arbalestriers, & artillerie. Et Bertran ala lui quatriesme sans plus aduiser le fort, pour sçauoir en quel lieu il estoit le plus prenable. Et bié deffendoit aux Engloiz, qu'ilz ne fussent si hardiz de trayre. Car mal leur en vendroit, & seroient assailliz ainçois qu'il fust nuit. Et ilz le asseurerent de trayt, disant, qu'il regardast hardiement les murs, se ilz estoient assez haultz & espez, & leur fossez assez parsons. Neantmoins estoient bien garniz de bonnes gens d'armes, & arbalestriers bien abiles. Et Bertran respondi, que folz seroiēt se ilz se blasmoient. Mais puis qu'ilz tenoient leur forteresse pour si forte, & ne doubtoient as-

fault de nul homme à leur dit, tāt deuroit mieulx estre prisie celuy, qui dedens quatre iours les prendroit. Et quant Bertran ot bien visitée la ville, si dist à Monsieur de Cliçon, qu'elle estoit moult noblement murée, & close de nobles fosses, le chastel fort & bien garité, & la basse court bien fermée. Qui tout pourroit prendre en vn iour, il en seroit parlé en bien à tous iours. Et l'Abbé de Malepaye dist, quil n'y conuendroit pas aler la teste desarmée. Car Engloiz monstroient grant deffense. Et d'autre part ce seroit grant honte pour la Baronnie, qui illec estoit, qui commenceroit assault en demenant grant posuée; & puis lessast tout en paix, & s'en retournaist. Si seroit bõ, que nos Seigneurs fissent crier, que qui se partiroit dudit assault, sans auoir bras, ou iambe, ou autre membre cassé, au retourner il auroit la teste coppée. Et quant Bertran l'entendi, il commença à rire, & dist que oncques de mauuais cuer ne fu telle chose pensée. Et le Sire de Cliçon dist, que c'estoit vray, & ainsi seroit fait. Puis retournerent au logeys, où de telz y auoit, qui pou auoient de pain. Car le pays estoit exilié de guerre. Ne pourquant li aucun auoient à mengier souffisamment. Si auint à vn iour de Samedi, que les Seigneurs disnoient en l'ost François enuiron heure de Midy, & leurs gens seoiēt les aucuns à table, les autres iooyent aux tables & aux dez sur le pré, qui estoit vert, & li aucuns mu-

soient sur les fossez parfons, & auiroient la muraille dessusdite. Si y estoit Geuffroy Payen acōpaigné de son cousin Richart & Guillaume Bofcherel. Lequel Geuffroy tenoit vne hache, dont le tranchant estoit d'acier. Si en fery vn bout en terre sur le bort du fossé, & sur l'autre bort se appoya, en regardant les murs du fort, ne il ne craignoit riens le trait. Car il estoit bien armé & par corps & par teste. Et ainsi comme il regardoit contremôt, sa hache, qui estoit pesant, & à quoy il ne pensoit, lui eschappa, en soy vn petit estendant, & chey ou fons du fossé. D'où il fu moult doulent, & assez la regretta. Car elle lui auoit eu besoing en plusieurs places, & iura que sans elle ne retourneroit-il pas, & deust illec estre occis. Bien fut vray, que entour icelle forteresse ot iadis grosse ville & de grant renom, laquelle par les guerres auoit esté destruite. Si auoient ceulx dudit fort prins la pierre tailliée, & le moillon de la ville fermée; & en auoient ediffié nouueaulx fossez, & nouueaulx murs: & si auoient avec eulx plusieurs du pays, faulx François reniez, qui moult greuerent nos gens à l'assault, qui commença & esmut par ladite hache. Car Geuffroy Payen voa, que ainçois qu'il ne l'eust, descendroit ou fons du fossé. Mais pour soy humilier, & mettre les Engloiz en leur tort, leur requist ainçois qu'ilz l'asseurassent, sans traire ne lancier à lui, iusques à tant qu'il eust esté querre sadite hache, en di-

fant, que il & ses compaignons n'estoient pas venuz pour commencer assault, mais que pour eulx esbatre. Et Engloiz lui respondirent, que iamaiz n'en auroit point, & se tantost ne reculoit, il seroit mehaygnié, & afolé du corps. Donc le dit Geuffroy, qui lors estoit lui xiv. dist à ses compaignons, qu'il descendroit en bas: & quant il seroit saisy de sa hache, ilz le tireroient à force armôt. Et moult les hastoit, pour doubte du trayt. Donc s'entreprindrent main à main, comme s'ils voulzissent dancier. Si se deuala premier icellui Geuffroy, & son compaignon second le tenoit, & le tiers le second, & le quart le troiesme. Et ainsi de l'un à l'autre, tant que d'iceulx quatorze en descendirent dix ou fossé, & quatre en demourerent dehors. Et quant vint au sacher, oncques pour tirer ne se sceurent gueritier, & qu'il ne les conueinst plaquier l'un sur l'autre, ou sous dez fossez. Mais tantost se releuerent. Car besoing leur en fu. Car l'en gettoit sur eulx maint gros cailloux tranchant. Et toutesfoiz riens ne leur meffist, pour ce que ilz estoient bien armez & par corps & par teste. Et si estoit chacun d'eulx fort & courageux. Si dirent l'un à l'autre, que grant honte seroit, se ainsi se partoiient d'illec comme recreans, sans esprouuer leur force, & leur vertu encontre le mur. Consideré que se on les veoit bien assaillir, ilz seroient tantost secouruz de ceulx de leur costé. Adonc alerent iceulx

yfnclment tous ensemble au pié du mur, & commencerent à miner d'espoys qu'ilz auoient. Et lors fu dit à noz gens, qui tantost coururent à l'assault, bien pourueus de piques, de hoës, & de leuiers de fer bien affulez, & là vindrent tous les mineurs. Lesquelz, ainçois que les mineurs en sceussent riens, furent desconfiz au pié du mur. Et là commencerent l'assault Berruyers, François, & Bretons, bien quatre cens, ou plus. Et à celle heure se disnoient Messieurs les Ducs de Berry & de Bourbon, qui se leuerent de table tantost, comme ce fait leur fu compté. Et aussi fist Bertran de celle où il estoit assis, tellement qu'il rumba le pain & le vin ius. Moult furent noz gens estourmiz à celle heure, ne n'y demoura table qui ne fust trespuchée pour courir à l'assault, qui mieulx mieulx. Et là y auoit mainte eschielle noblement cheuillée. Si ordonnoient les nobles Cheualiers chacun sa Connestablie de sagent, pour les mener vers les murs anciens entrer és fossez à banniere desployée, monter contremôt à grant paine, venir au pié du mur, & dreccer lesdites eschielles par force & maistrise. Et Bertran ordonnoit les Cheualiers, & leurs gens; bailloit-il à l'un vne tour à assaillir, & à l'autre un pan de mur, & à chacun archiers & arbalestriers garniz selon ce qu'il appartenoit. Car chacun obeissoit à lui. Et tandiz que l'en assailloit Monsieur le Duc de Bourbon se fist armer gentemét, & cou-

rut à l'assault avec les autres. Et quant il vint sur
 le bort du fossé, il vit les assaillans, qui la murail-
 le auoiēt percée en deux lieux, & enfaiché main-
 te pierre, il congnut bien que c'estoit sans moc-
 querie. Adonc fist venir eschielles à planté, &
 failli d'escucille és foussez, puis rampa au pié du
 mur avec les autres, & commença à miner de pi-
 que. Et Bertran, qui alloit autour de la fermeté,
 s'embati droit là; le quel apperceut le vaillant
 Duc. Si lui dist: Sire, haat folie vous tien, là à vous
 n'appartient, ne à nul Prince aussi, de miner. Car
 aussi tost vous pourroit occire vn chetif, com-
 me le plus Gentil-homme qui soit en ce fort là.
 Et petit d'onneur est à vn noble Prince, quant
 vn varlet, ou vn garçon le met à mort. Mais quāt
 vous ferez en bataille, allez si auant comme il
 vous plaira, & assemblez aux greigneurs & aux
 plus drus. Se ycy moriez, ce seroit grāt honte; on
 le pourroit reprouer à voz hoirs. Nous auōs des
 varlez assez, & si a chacun bō cuer. Se il en meurt
 aucuns; on en fera armer des autres; & se l'en pert
 vn homme d'armes, on en fera vn autre. Faites
 leur vne eschielle, & on vous aidera; puis mon-
 tez à ces creneaulx, & vous trouuerez qui vous
 donra assault. Maudit soit-il de Dieu, qui pre-
 mier se aduifera de trayre ne de getter. Car onc-
 ques hardi homme ne le pourpensa. Ainsi Ber-
 tran fist retraire Monsieur le Duc hors de la mi-
 ne, puis vint ou fons du fossé, & il trouua vne es-

chielle, qu'il fist tantost leuer par ses gens, & y cuida monter. Mais l'Abbé de Mallepaye vint illec la teste armée, qui y rampa comme tout forcené, tenant vn espoy en sa main: dont il eust commencée la meslée aux creneaulx, quant vn merrien luy fu getté d'enhault, qui lui rompi son eschielle, & l'abbati ou fons du fossé. Si lui fist Dieu grant grace, quant il n'ot rompu ou bras ou iambe. Vn pou fu estourdi, mais tantost dreça la teste, & se releua. Puiss'en ala d'autre lez à vne autre mine. Là ot fier assault & fiere deffense. Mais au commencier n'auoit que varlez & mesnye sur les murs. Car Engloiz ne se doubtoient pas que on les deust icelluy iour assaillir. Et non eust-on fait, se ne fust l'occasion de l'ache qui chey és fosséz. Mout fu dur icellui assault sur tous autres, & Engloiz coururent aux armes. Lesquelz crioient: Tray, tray. Puis vindrent deffendre leurs murs, & en trayant d'ars & d'arbalestres, sayetes, & viretons, & gettans pierres, tonneaulx plains de cailloux, & grans bans trauerfains. Et avec ce repoussèrent de glaiues & d'espoiz les François audit assault, qui longuement dura. Et nulz ne se faignoit, & n'y auoit Prince, qui n'y alast en personne. Mesmement Messieurs les Ducs de Berry & de Bourbon mōterent chacun en l'eschielle. Mais pour ce que lesdiz Engloiz auoient bonne forteresse, ville, chastel, & bassecourt, bien murée, & noblement garnie,

garnie, tant de gens d'armes comme de viures, ilz ne craignoient riens les François. Si leur escria Bertran, Beaux Seigneurs, ie croy que vous feriez que saiges de vous rendre. Car ie vous iure par Dieu, que se l'en vous prent à force, tout l'or de ce monde ne vous garantiroit pas, que vous ne soiez penduz comme larrons. Vous donnez destourbier icy endroit à nos Seigneurs, & sauez bien que c'est contre Dieu & raison. Et toutesfoiz ie vous dy, que l'en vous respiteroit & receuroit les vies sauues, se vous volez rendre: & se retrairait l'en tantost. Et Engloiz respondirent si hault, que chacun le pouoit oyr, qu'ilz ne se redroient à nul iour, tât que Dieu fust, & qu'ilz auroient briefment secours. Et voirement leur venoit-il vn noble secours de mil & cinq cens lances, que le Captal admenoit; & il en venoit autant d'autre costé. Et se ledit assault n'eust esté si auancié, & en icellui iour propre, l'en y feust venu trop tart. Et quant Bertran oy iurer les Engloiz, qu'ilz ne se rendroient tant comme ilz peussent durer, il fist renforcer l'assault, & doubler, sonner sa trompette, cryer, & commander, que chacun alast à l'assault, sur paine de perdre la teste. Et ceulx, qui n'aroient de quoy traire, gettassent cailloux, ou allasét hoüer au mur de picques & de hoës, & drecier eschielles contremont. Et Engloiz gettoient pierres de faiz, tonneaux empliz de cailloux, & grant boy-

ses sur nos gens. Et qui adonc les veist subourner, cheoir, & rondeller à val, mauuaise-
ment cuidast, ne peust penser, qu'ilz ne feussent afo-
lez des membres. Mais ce qu'ilz estoient si bien
armez, & le bon cuer qu'ilz auoient, aidoint les
grans faiz à supporter. Là y auoit plusieurs fem-
mes de vie, qui seruoient les François d'eauë dou-
ce pour boire. Et dist lors vn bon homme d'ar-
mes, que à celle heure l'en deust bien apporter
de bon vin, qui en sceust finer. Car le bon vin ac-
croist le hardement de l'ame. Et Bertran, qui bien
l'entendi, commença à crier: Or auant mes amis,
„ pensez de labourer. Je vous feray tous riches, &
„ seruir de bon vin ains qu'il soit nuyt. Adonc ap-
„ pella son bouteiller, & lui enioint & commanda
„ qu'il feist venir de bon vin à planté, & les ton-
„ neaulx leuer sur bout, pour abeuurer les assail-
lans. Ainsi comme il fu dit, il fu fait; & furent re-
ceulx tonneaulx enfoncez à l'vn des bouz. Puis
en vindrent puisier varlez & femmes, qui en ser-
uirent. Lesquelz quant ilz eurent beu de ce bon
vin, furent plus fiers & plus hardiz que lyons ne
sangliers. Adonc s'employèrent à l'assault grans
& petiz communément. Si ne s'en retrayoit pas
Monsieur le Duc de Berry, non faisoit pas Mon-
sieur le Duc de Bourbon, & son cousin le Conte
de la Marche. Ainçois se auanturoient tres-puif-
samment, & avec eulx Bertran du Guesclin, le
Mareschal de Sancerre, & Messire Jehan de Vië-

ne, & Messires Iehan & Alain de Beaumont, le
 Gouverneur de Bloys, & l'Abbé de Malepaye.
 Celui s'y porta bien & notablemēt. Car par qua-
 tre foiz, il monta aux creneaulx, & par autant de
 foiz il fu rualé & abatu ius. Grant temps dura
 l'assault, & le trait de nos gens, lesquelz trayoiēt
 si dru, que à paine osoient les Engloiz mettre la
 teste dehors. Mais pour résister audit trait, ilz
 mirent hors de leurs murs perches en trauersant,
 où ilz pendirent coustes mouillées: pourquoy le
 trait des nostres ne peust aler auant, ne les gre-
 uer. Et par ce se targerent Engloiz, qui getterent
 mainte pierre de leurs creneaulx sur François,
 qui minoient en bas. Et fu vne chose, qui gran-
 dement greua les nostres. Assez s'en apperceut
 Bertran, qui dist aux Engloiz: A Dé le veu, ri-
 baux failliz, tous voz vieulx pourpoins ne vous
 vaudront pas vn gant. Adonc fist venir au pié
 du mur arbalestriers, qui trayoient si droit con-
 tremont, qu'il n'y auoit si hardi Engloiz, qui o-
 fast mettre la teste hors. Car aussi dru comme
 noif vouloient carreaulx & virretons en l'air. Et
 quant Engloiz orent getté pierres & tonneletz
 empliz de cailloux, & plusieurs merriens, ilz get-
 terēt les pierres de leurs creneaulx, tant que leurs
 murs furent tous dessoubz lesquelz les Fran-
 çois firent plusieurs trouz bien grans, par où en-
 trerent maint François, vieulx & ieunes. Mais ilz
 estoient repoussez par merueilleux debaux, &

gettoient Engloiz sur eulx poinçons plains de chaux viue, eauë bouïllât, mortiers, & peſceaulx. Et apres ce bouterent en ladite mine fain feurre à grans monceaux liez par boteaulx, où ilz mirent du fer, & le feu avec éſtroux des murs. Ce fiſt endurer tant de mal à pluſieurs François, que voulentiers euſſent delaſſié ledit aſſault. Mais par le congié de nos Seigneurs, & en leur preſence iura, que ſe aucun aſſaillant ſ'en retournoit dudit aſſault ſans naureure, ou autre bleſſeure, il le feroit pendre par le col. Adonc recommença l'aſſault grant & fier, où nulz ne ſe faignoît, de quelque eſtat qu'il fuſt. Les vns minoient, les autres montoient par eſchielles ſur le mur, & combattoient main à main aux François. Mais ſur tous les aſſaillans l'Abbé de Malepaye y aſſailly ce iour. Car en la plus forte tour dudit chaſtel il mina ſi fierement, qu'il y fiſt vn trou, par où feuſſent entrez deux hommes tout d'un front, & il meſmes fuſt entré dedens ledit trou, quant mallement fu repouſſé des Engloiz. Et adonc commença à crier Berry, & puis Gueſclin. Si vindrét à lui gens d'armes de tous coſtez. Et quant il les vit venir, il cueillit en ſoy fierté & hardement, & ſe bouta incontinent ou trou, en combatant main à main aux Engloiz. Et les repouſſa ſi fort d'un eſpoy qu'il tenoit, que malgré eulx les recula dedens. Par Dieu Engloiz vous morrez de mauuaſe mort, qui encontre le Roy & nos Sei-

gneurs ses oncles, qui cy sont, tenez ceste ville à tort, & sans raison. Et Engloiz lui respondirent, qu'il mentiroit, & se il entroit leens, iamais n'en ysteroit en vie. Ce nonobstant, ledit Abbé feust entré dedens, quant il fu feru d'vne hache, tellement que le bacinet lui fu embarré, & lui tomba par terre. Et quant Engloiz le virent ainsi abatu, & soubuyue * ou trou de ladite mine, si le saisirent par le camail, & tirerent à eulx tant come ilz porrent. Et François d'autre part le prendrent par les bras, & le tirerent à eulx tant comme ilz pourrent contre Engloiz. Si fu tellement tiré d'un costé & d'autre, que à pou qu'il ne fu desmembré. Mais François le rescöuyrent à force, & lui deslacerent son bacinet, pour lui rafraeschir. Car le temps estoit chault. Et quât l'Abbé fu vn pou rafreschy, & il ot bu vne foiz, il alla miner en vn autre lieu plus auant. Et d'autre part commença grant content à lez, où les Bretons assailloient, & ia auoient miné tant & si largement, qu'ilz combatoient main à main aux Engloiz. Adonc se auancerent Berruiers & Bourbonnois, qui vindrent fierement assaillir. Et montoient les aucuns d'eulx sur eschielles, où ilz se combatoient à force main à main, & les autres estoient ruez ius laidement ou fossé. Car Engloiz monstrent moult fiere deffense. Mais ne leur vault pas vn seul denier. Car ilz auoient grant planté de leurs gens naurez, & leurs murs trouiez

en plusieurs lieux, c'est assaouir en plus de vingt lieux:& n'auoient mais que ietter pour eulx defendre, tant qu'ilz faisoient despauer vne grant partie de leur pauement. Adonc le Capitaine de leans nommé Richart Gilles, lequel estoit vaillant homme d'armes Engloiz, se aduifa comme il peust faire cesser ledit assault. Si appella Bertran, que il vit,& lui dist haultement: Connestable, entendez ce que ie vous diray, & faites deporter vos gens iusques à ce que ie vous aye dite ma volenté. Ie vous prie que ie soye entendu. Capitaine, dist Bertran, parlez hardiement, & ie vous entendray bien. Car foy que ie doy à Dieu, l'assault ne cessera pour vostre parlement, se ie ne vous oy dire, que vous vous rendez au plaisir de nos Seigneurs. Moult fu dolent ledit Capitaine, quant il entendit Bertran. Adonc lui commença à dire: Bertran, nous nous rendrons, s'il vous plaist, par telle condicion, que nous aurons saufz nous & nos biens. Et si emmenerons avec nous noz prisonniers,& tous nos aliez & bien-vueillant. Et avec ce nous donrez d'or fin monnoyé la charge d'un sommier. Et par ainsi vous rendrons nous la forteresse & la tour. Et quant Bertra l'entendi, tout le sanc lui remua. Si dist: Mal ait qui ce fera, ne qui vn seul denier vous en donroit. Vous, qui estes Engloiz, nez d'Engleterre, aurez rençon, si vous n'estes occis. Mais les faux François, qui leans sont, lesquelz ont renyé Monsieur

le Duc de Berry, feray-ie tous pendre. Car dam-
 pné soit-il, qui ia en aura mercy. Rendez vous si
 vous voulez sur ce que ie vous ay dit. Plus vous
 deffendrez, en plus faisant ennuy, & mains nous
 trouuerez amis. Car vous ferez payez selon ce
 que defferuy l'aurez. Dieu, dist le Connestable,
 quel Capitaine est ce cy. Engloiz doiuent bien
 maudire l'eure que oncques nasquy. Adoncques
 ledit Capitaine iura haultement, qu'il ne se ren-
 droit de la sepmaine ne de l'an, tant qu'il eust
 leans pierre ne cailloux. Car leur entente estoit,
 se ilz perdoient la ville de entrer en la tour, & en
 la basse court, qui estoit plaine de biés. Mais leur
 pensée estoit vaine. Car à celle heure l'Abbé de
 Malepaye auoit miné à longue alayne d'un picq
 acéré contre le mur du chastel:& tellement y tra-
 ueilla, qu'il y feurestendi les ners & vaynes de
 son corps, & oudit mur fist vn tres-grant trou,
 parmi lequel il vist & apperceust oudit chastel
 vne grange plaine de foing. Si demanda du feu,
 que on lui apporta,& tantost l'ala lancier & bou-
 ter oudit foing. Et quant Engloiz virent leuer le
 feu contremont, si furent moult dolens,& com-
 mencerent à destasser le foing, pour destaindre
 ledit feu, qui moult les effrayoit. Si en ot plu-
 sieurs ars. Car le feu monta contremont. Et droit
 à celle heure les François entrerent d'autre part
 à ladite forteresse, les vns par les mines, & les au-
 tres contremont par eschielles; & coururent sur

Engloiz, où il n'auoit que espouenter. Et quant ilz virent qu'ilz ne pourroient durer, si coururent vers la grosse tour, pour sauuer leurs vies. Et François deffermerent tantost la ville, & mirent les bannieres de nos Seigneurs sur les murs, en criant haultement, Ville gaignée. Adonc entre-
rent François dedenstout à cop, lesquelz met-
toient tout à fait Engloiz à mort, excepté ceulx
qui crioient mercy, & requeroient estre receuz à
rançon. Si cuiderent bien ceulx de la tour con-
trestre contre les François. Mais le vent leur fu
contraire, & monta la fumée contremôt la tour.
Et par ce point ne purent leans durer Engloiz,
& se rendirent. Car plus ne pouoient reculer.
Leans auoit faulx Berruiers pillars, qui auoient
delaiissié le seruice de Monsieur le Duc, & serui
les Engloiz pour pillier & embler, & plusieurs
bannis aussi. Si les fist Bertran tresbien lier & ac-
coupler, & iura que iamais ne buroit ne men-
geroit, tant qu'ilz feussent trestous pendus yceulx
rebelles, & bannis. Si fu son serement tenu, ne
oncques ne but ne manga, tant que iceulx mal-
faiteurs feussent tous executez de pendre. Par
l'ottroy & licence de Monsieur le Duc de Berry,
les autres mors furent enterrez, & ceulx viuans,
qui Engloiz estoient, furent prins, comme pri-
sonniers, & receus à rançon. Et en ladite ville cō-
questée fu trouuée mainte noble richesse, com-
me ioyaulx & monnoye d'or & d'argent, & tres-
grant

grand garnison de blez, & de bons vins, de lars, & autres chars salees, & neant moins de fleur bulletée. Et aussi y trouuerent plusieurs nobles armeures, dont l'exposition seroit longue, penes, linges, huches, & coffres, tous plains de meubles. Si se logerent les François parmi les hostelz de la ville, & fu la forteresse deffermée, & le Capitaine prins. Et furent noz Seigneurs moult bien herbergiez, & toutes leurs gens aussi. Et quant vint au partir, plusieurs femmes & enfans petiz furent mis dehors, & pour cause. Et laissa Monsieur le Duc de Berry garnison là, & les murs fist refaire & remparer. Puiz se partirent d'illec nos Seigneurs avec noz gens, & alerent logier en vne Abbaye, laquelle estoit à trois lieues d'une ville fermée, nommée la Soubzterraine. Trois iours seiournerent François en ladite Abbaye comme dehors. Car le lieu leur estoit petit.

MAIS d'eulx vous lesseray quant à present, & vous parleray du Captal de Buich, qui s'estoit * à tout trois mil bacinez & trois cens Archiers pour leuer le siege de sainte Sauere. Laquelle ville fu prise en l'an de l'Incarnation nostre Seigneur MCCCCLxx. Et ainsi comme ledit Captal cheuauchoit, il apperceut sur les champs venir encontre lui, plusieurs Engloiz partiz de ladite ville, raenconnez & mis à finance: lesquelx s'en aloient sur leurs foys tous desarmez & desnuez

de leurs bons draps, & grant partie d'iceulx naturez & blecez en plusieurs lieux. Si les monstra ledit Capital à ses gens, & puis brocha del'esperon encontre eulx, & leur demanda qui ilz estoient. Et lors iceulx Engloiz lui compterent tout au long la maniere de l'assault & prise de sainte Sauere, l'occision faite sur leurs gens, & l'exécution des François reniez. Adonc le François comméca moult fort à regretter ceste perte, en disant, que les Engloiz auoient perdu vn moult riche iouel & bien garniz de richesses, de bonnes gens d'armes, & de viures. Adonc icelui Capital attendi ses gens lez vn boschet, & leur compta la perte & le meschief. Si leur demanda conseil furee. Et l'vn d'iceulx Engloiz lui cōseilla de aler tout droit à la Soubzterraine. Car bien pensoit, que François la deussent assaillir. A ce se acorda ledit Capital, & fist sonner sa trôpette, drece banieres & panons, & ses gens mettre en ordonnance. Et commencerent à cheuaucher deuers la Soubzterraine, dont les François n'estoient que à trois lieuës: lesquelx estoient encores logiez en l'Abbaye deffudite. Et adonc leur vint l'vn de leurs cheuaucheurs, lequel s'agenouilla deuant nos Seigneurs les Ducs de Berry & de Bourbon, Monsieur le Connestable, & les autres Seigneurs, & leur dist qu'il venoit de Guienne, & auoit esté en Ango-
lesme, où il auoit donné à entendre qu'il reue-

noit de S. Iacques cōme pellerin. Et en ladite ville d'Engolesme auoient veu grāt establie d'Engloiz, bié quinze cens bacinez, & quatre cens archers, que le Capital conduisoit; & encores attédoit il bien sept cens hōmes d'armes, tant Bourdeloiz, comme Guiennois. Et estoit *** *Icy manque la fin du Chapitre, & le commencement du suiuant.*

De la rendue des villes & chasteaulx de Chaunigny, & de la Rochelle, & de la cité de Poitiers, & de la prise des chasteaulx dudit Poitiers & de Benon par assault, lesquels chasteaux les Engloiz tenoient.

CHAPITRE XLIX.

*** Saiges de eulx retourner & rendre à leur droit Seigneur Monsieur de Berry, qui illec venoit. Car s'ils ne luy aloiēt tātost ouurir les portes, ilz verroiēt leur cité ardoir & destruire. Et si on les pouoit tenir, ilz seroiēt trestous penduz, ou decolez. Mais se ilz vouloiēt liurer leur cité, on les garentiroit contre tout homme. Et pour ce prissēt la meilleur voye des deux, & sur ce donnassent responce. Quant Bertrā ot finée sa parole, vn bourgeois respōdi pour tous les autres, lequel estoit chargié de la responce faire, qu'ilz se rendroiēt en l'obeissance du Roy par telle cōdition, qu'ils seroiēt tenez aus vs & aus coustumes du tēps S. Loys. Et se le Roy auoit besoing d'eulx, il les trouueroit vraz & loyaulx subgiez pour

viure & pour morir sur ses ennemis. Apres requirent vn don à Monsieur Bertran, que de aucuns Engloiz qu'ilz auoient trouuez à amis, & qui auoiét esté grant temps avecques eulx nourriz, sans pourchasser outraige ne de iour ne de nuit, que on ne leur feist mal, ennuy, ne despit. Et Bertran respondi, que non feroit-on. Moult fu liez & ioyeux, quant il entendit leur response, & non pas sans cause. Si leur dist, que pour l'amour d'eulx il aloit querre Mōsieur de Berry & Monsieur de Bourbon. Et ilz respondirent, qu'ilz ne demandoient pas mieulx. Dont s'en retourna Bertran, & les bourgeois allerent parler au commun, & ordonnerent que chacun alast ordonnément parmi la cité adeuant de nos Seigneurs, pour les receuoir, en chantant *Te Deum*. puis allerent defermer leurs portes. Et nos Seigneurs les Ducs y entrerent à leur plaisir, & leurs gens aussi, bannieres desployées, & armez, comme pour entrer en bataille mortelle. Et auoient noz dessusditz Seigneurs leurs armes parées de tunicles par dessus. Deuant eulx se mirent le pource peuple à genoulz, en merciant Dieu, & disant, qu'ilz fussent les bien venuz, & qu'ilz deuoient biē honorer la noble fleur de liz, que Dieu tramist en terre par Ange au Roy Clovis, plus qu'ilz ne faisoient ce selon lieppart, ce qu'ilz n'auoient plus que faire. Et quant Engloiz

virent le fait, si s'en fuirent vers le chastel, & disoient en hault: Ha! faux villains, vous estes traitres, & de fausse condition. Non sommes, respondirent les bourgeois, mais preudhommes, mais vous estes traitres, felons, & oultrageulx. Car celui qui ne tient foy n'est pas sans trayson. Ainsi la cité de Poitiers fu rendue à vn Samedi en l'an MCCCLxx. Et le lendemain furent tous d'accors les Cheualiers & les bourgeois, de assailir le chastel. Lequel fu assailly, & sy auanturoient plus les greigneurs que les mendres. Illec ne se faigny pas le commun de Poitiers. Car ilz emplirent les fossez de fagoz & de tonneaulx vuiz, & par dessus gettoient huis, & fenestres. Et Bertran bailla à chacun de nos Seigneurs vn pan de mur, vn à Monsieur le Marechal, & l'autre à Partenay, & par semblable à tous les autres, chacun selon son estat. Puis s'en vint Bertrans deuât la porte, & portoit Jehan du Boys sa banniere. Plusieurs eschielles auoient François, lesquelles ilz auoiēt prises en la ville. Si se deualerēt es fossez, criās les vns Berry, les autres Bourbō, & les autres Guesclin: & happoyerēt leurs eschielles aux murs, & mōterent contremōt qui mieux mieulx. Et Engloiz, qui sur les murs estoient, ietterēt grans bois sur eulx, qui lesdites eschielles rompirent à force, & firent François rouler es fossez moult courrouciez. Et puis iettoient pierres & cailloux sur eulx, puis huyoient les

Engloiz, & crioient haultement saint George. Quant Bertran vit sa gent ainsi ressortir, il commença à crier: Or auant, mes amis, alez hardiemēt, & ne vous faignez pas. A dé le veu ces gars serōt nostres. Je vous abandonne tout leur vaillant. Aussi rechetoient leurs gens Messieurs les Ducs de Berry & de Bourbon & mondit sieur le Marechal. Et firent apporter derechief eschielles, où l'en mōta secōde foiz. Mais on les abatoit laide-
mēt oudit fossé. Apres ce, apresterent eau bouillant pour getter sur les François. Et quāt Bertrā vit ce, si en fu moult dolent. Adonc commanda aux arbalestriers qu'ilz traissēt tost & vistemēt. Et eulx si firēt. Et quāt Engloiz virēt que on les seruoit ainsi, si emparerēt leurs murs de couuerturs mouilliez. Mais ce ne leur valu riēs. Car le trait qu'ilz doubtoiet les esbahy moult. Et ainsi mōterēt plusieurs Cheualiers & Escuiers sur les eschielles, tāt qu'ilz cōbatoient main à main aux creneaulx. Et quant ilz furent dessuz, ilz mirent les bannieres de nos Seigneurs, & le panon de Bertran. Mais ceulx qui minoient au pié du mur entrèrent premiers dedens par force de miner, en criant Guesclin. Si descendirēt aual plusieurs Engloiz, pour les repousser, & bouter dehors. Mais ilz ne purent. Et quant ilz se virent ainsi surpris, ilz faillirent ius des creneaulx, pour eulx enfuyr. Mais ilz furent tous mors, ou pris, & le chastel ainsi conquis. Si se reposerent François à Poitiers, lesquelx auoiet grāt besoing de repos,

iusques à tāt que Mōsieur le Duc de Bourgogne
 y vint, lequel admena avec luy Monsieur de Cli-
 çon. Deux iours y seiournerēt depuis ce les Frā-
 çois, & autres s'en partirēt. Si cheminerent pour
 aler deuers la Rochelle, & passerēt deuāt sainct
 Maixent, où il auoit grāt forteresse Englesse. Et
 le Capitaine de leans appella Bertran, & lui dist
 que se il vouloit attēdre trois iours, il auroit ba-
 taille aus Engloiz. Mais c'estoit pour neant. Car
 Engloiz n'estoient point d'acort de liurer ba-
 taille. Car trop doubtoient Bertran. Et si estoiet
 alors François bien deux mille & cinq cens lan-
 ces, qui fusterent tout le païs. Et se rendi à eux
 Fontenay l'abatu, & le Bourc-neuf, avec la tour
 de Herfāt, qui n'estoit que à deux lieuës de la Ro-
 chelle. Si mādèrent nos Seigneurs aus bourgeois
 de ladite ville, qu'ilz venissēt parler à eulx oudit
 Bourc-neuf, où ilz estoiet logicz. Lesquelx bour-
 gois respōdirent à vn herault, qui vint à eulx cō-
 me messaige, que lēdemain yroiēt parler à nos-
 ditz Seigneurs au matin. Car biē vouloiēt obeir
 à leur plaisir. Et quāt vint à lēdemain à soleil le-
 uāt yceulx bourgeois se partirēt par bō saufcon-
 duit, que ledit Herault leur auoit apporté; & ale-
 rent au Boure-neuf parler à nos Seigneurs. Et
 Bertrā, qui premier commença la parole, si leur
 dist : Seigneurs Bourgois, il est vray que nous
 auons pieç'a requis, que vous voulussiez re-
 tourner bons François. Et vous nous promei-
 stes de vous rendre au Roy de France, ou cas

“ que secours n'aurez du Roy Englois dedens vn
“ certain iour nommé, lequel est passé. Si vous
“ prie & commande, que vous tenez voz conue-
“ nās, sans les faulser. Car se vous meffaites enuers
“ le Roy, ie vous iure sur Dieu, que nous ferons
“ vostre ville tout embraser à feu, qu'il n'y de-
“ mourera maison, où l'en puisse habiter, mur,
“ ne forteresse, que ne fassions raser. Comment,
“ Sire, dist vn bourgeois, auriez donc si tost rasé
“ la forteresse? Oy, dist Bertran, vous n'y pour-
“ riez durer. Sire, dist le bourgeois, il ne vous y
“ faudra trauciller, mais que vous nous ottroyez
“ vn don, qui sera sans apeticier l'onneur du Roy.
“ Hee! dist Bertran, ie scay bien quel don c'est.
“ Vous voulez tenir vostre ville franchement.
“ C'est voir, dirent les bourgeois. Vous plaist-il
“ à le acorder! Oyl, dist Bertran, refuser ne le
“ vucis-ie pas. A ce traité s'acorderent tous nos
Seigneurs aussi. Puis se partirent les bourgeois,
& alerent dire au commun ledit accort & fran-
chise à eulx donnée & octoyée. Si auoit en icel-
le ville vn chastel, que les Engloiz tenoient, le-
quel estoit maistre de ladite ville. Mais iceulx
Engloiz en vuiderent, & furent boutez hors
par les gens de commun, qui ledit chastel aba-
tirent & raserēt par licēce de nos Seigneurs, ou
au moins par remission à eulx ottroyée...ce avec
les libertez dessusdites. Adonc ilz furent moult
yoieulx. Si mercierent nostre Seigneur à ioin-
tes

tes mains , en disant que bien fussent venuz ceulx qui portoient la noble fleur de liz, & qui venoiét en son nō. En la Rochelle y ot grāt ioye demenée, & n'y ot bourgoiz ne bourgoise, qui ne fust resioyz au cuer. Moul't firent noble appareil pour receuoir nos Seigneurs. Et quant vint le lendemain, ainsi comme à heure de Tierce, si entrerent en ladite ville nos Seigneurs les Ducs de Berry, de Bourgongne, & de Bourbon, Monsieur le Conte d'Aucerre, M^r le Marechal son frere, Monsieur Bertran, Messieurs de Cliçon, de Rays, & de Rochefort, Messire Iean de Vienne, & plusieurs autres Cheualiers qui cy ne sont pas nommez. Moul't y auoit gentil assemblée, de si pou de gent. Car iceluy iour n'estoient pas plus de deux mil en tout. Mais c'estoient gens armez de toutes armes, & si bié ordonnez que ce fust pour entrer en bataille mortelle. Et auoiét banieres & panons desployez. Si n'y auoit grant Seigneur, qui n'eust vestu son tunicle par dessus ses armes. Y cellui iour y ot maintes trompes sonnées. Grant noblesse estoit de veoir leur venue. Et quant ils approcherent de l'entrée, le commun, qui estoit dehors, sās armeures, leur preséterēt les clefs de la ville, en disāt, que Messieurs du noble sanc Royal fussēt tresbié venuz. Et se mettoient les plusieurs à genoulx emmy les prez, plourans moul't tendrement, quāt ilz regardoient les bannieres de

la fleur de liz. voir de la grant leesse qu'ilz auoient
au cuer. Si que grant pitié estoit du voir. Moul-
t furent nos Seigneurs esiouys, quant ilz virent
l'ordenance du commun. Car il n'y auoit grant
ne petit, mesmes les femmes, & les enfanz,
quant ilz regarderent les fleurs de liz semées es-
dites bannieres & tunicles, qui ne criaist d'une
" voix & d'un accort: Bien viengne la fleur de lys,
" qui dignement fu enuoyée des fains cieulx au
" Roy Clouis. Bien deuons amer l'eure & le iour,
" qu'elle nous vient visiter. En ce disant ioig-
noient les mains, & estoient à genoulx. Et apres
ce les petiz enfans crioyent de certain sente-
" ment, Montioye au Roy de France nostre Sire.
Dequoy tous les Barons acueilloient moul-
t cel-
gent en grace, & les prindrent a en amer. Ainsi
sejournerent en ladite ville deux iours en grant
consolation. Puis s'en parti Bertran, Monsieur
de Cliçon, & plusieurs autres Cheualiers, pour
aler enuers Bennon, vn fort chastel, & qui
moul-
t auoit greué & apoury le pais, & estoit
au Captal de Buich. Si en estoit le Capitaine
nommé Daurid, lequel n'auoit oncques amé François.
Si auint que vn sien espie lui vint dire à vn
soir, que la Rochelle estoit rendue aux Ducs de
Berry & de Bourgongne, & à Bertran du Gues-
clin: lesquels il auoit veu entrer dedens icelle
ville, & venoient tous apprestez pour lui liurer
assault, pourquoy il feust sur sa garde. Et quant

le selon Capitaine entendit ces parolles , si fut
 tres-dolent & empli de grant felonnie. Lors
 fist venir six compaignons nez de ladite ville de
 la Rochelle , lesquelz auoient demouré oudit
 chastel bien vn an & demi , en seruant loyal-
 ment ledit Captal. Et à iceulx six il fist coper
 les nez & les baulieures , & à chacun d'eulx vng
 poing. Et puis leur commanda , qu'ilz se par-
 tissent legierement d'ilec , & alassent à la Ro-
 chelle dire de par lui , qu'ilz estoient trestouz
 traytres & foymentiz , & se il les pouoit prédre ,
 ne tenir par aucun tour , ilz seroient ainsi appa-
 reilliez , que ia pour rençon il n'en auroit mer-
 cy. A tant se partirent les six du chastel , & s'en
 alerent deuers la Rochelle courrouciez & mar-
 ris , maudissans la ville , quant oncques s'estoit
 rendue. Si furent iceulx rencontrez des Fran-
 çois en chemin , qui les menerent deuant Mon-
 sieur le Duc de Berry , & là compterent où ilz
 auoient esté ainsi ordonnez , & pour quelle cau-
 se. Puiss'en allerent outre leur chemin. Et Fran-
 çois cheuaucherent tant à banniere desployée ,
 qu'ilz vindrent à Bennon , que ilz assiegerent.
 Et adonc Bertran ala deuant la porte , pour par-
 ler au Capitaine , & commença à crier haulte-
 ment: Entre vous Englois subgiez du Roy d'En-
 gletterre , qui estes leans , rendez tantost le fort
 au Roy de Frâce , & vous mettez en sa mercy. Et
 se vous ne faites , vous serez assaillis , prins à for-

ce, & trestous mors. Et le Capitaine luy demanda, se il les cuidoit esbahir pour ses menaces, & trouuer si anulliz, pourtant se ceulx de la Rochelle s'estoient renduz, qui en la fin en seroient exilliez & destruis. Car Engloiz n'estoient mie encores si au bas, ce disoit, qu'ilz ne peussent greuer leurs ennemis. Puis dist à Bertran, que se François seroient trois iours entour ce chastelet, il ne leur en seroit ia de pis. A ce dist Bertran: Vous prifiez pou François, ce me samble. Mais foy que ie doy à Dieu, nous ne partirôs iamais decy ne de iour ne de nuit; si serons saisis du chastel, & de la tour, & de vous mesmes, par force, ou autrement, que vous vous rendrez en nostre mercy, & à nostre gré. Puis retourna Bertran deuers nos Seigneurs, & leur compta la responce des Engloiz, qui riens ne prisoient François. Si dist à Monsieur le Duc de Berry, que le chastel seroit assiegé, & puis on aduise-roit comment il seroit assailli. Et à ce se accorda Monsieur le Duc de Bourgogne. Adonc gens d'armes & pietaille firent logis de rousies & de buissons: & n'eurent pas illec esté deux iours, que dudit chastel yssirent des hommes d'armes tres-bien armez, aussi comme enuiron heure de maynuyt, que les coqs chantent. Et se ferirent sur François à vn copton de l'ost moult fierement, en criant l'enseigne du Duc de

Lenclastre. Si cuiderent plusieurs François, que
 icelluy Duc y fust en personne, à tout grant
 foison gent. Parquoy ilz se esbahyrent moult.
 Mais le guet de la mit suruint là endroit, où
 la noise estoit, & où Engloiz auoient fait du
 mal & du tourment, prins & nauré Gieffroy Pa-
 yen moult laidement, lequel se nomma à eulx,
 disant qu'il estoit de noble sang, & à Monsieur
 de Cliçon, & auoit soubz luy xxx. hommes
 d'armes. Parquoy ilz n'auoient pas failly à
 prisonnier. Car ilz auroient assez or & argent
 de luy. Si leur deprioit doucement, qu'ilz
 le voulussent laisser retourner en l'ost, pour
 lui bender & medeciner ses playes, qui moult
 estoient doloieuses: & il leur iuroit & pro-
 mettoit sur sa foy, comme Gentilhomme,
 qu'il retourneroit à leur commandement. A-
 donc commencerent Engloiz à maudire, di-
 sans: que ilz ne prendroient de luy or quel-
 conque, ainçois mourroit promptement à
 douleur, & ou despit de Oliuier de Cliçon,
 qui faisoit son esbatement de mettre En-
 gloiz à fin. Et lors ferirent Engloiz sur ledit
 Geuffroy, tellement qu'ilz le occirent, &
 mirent à mort. Puis rentrerent en leur cha-
 stel. Et Monsieur de Cliçon venoit illec à
 falloz, torches, & brandons, à tout cinq-
cens hommes; lequel trouua emmy sa voye.

geuffroy Payen occis. Dont il fu moult courrou-
ciez & dolent. Car moult l'amoit, & moult le
regretta & plaignist. Puis cōmāda qu'il fust en-
seueliz. Et par ce fait cy il en hay mout Engloiz.
Et iura dieu, que toute l'ānée il n'ē prédroit nulz
à rençon, ains les mettroit à mort, se ilz cheoiēt
en samercy. Et dece tint-il bien conuenāt. Ainsi
se passa celle nuit. Et quāt François orent esté de
trois à quatre iours deuāt ledit chastel, ilz orent
conseil qu'ilz l'assaudroient. Et toutesfoiz n'a-
uoient en l'ost que trois eschielles. Mais assez y
auoit mineurs & pions. Adōc firent bondir leur
trōpes. Si coururēt à l'assault, qui miculx miculx.
Onques de cel n'oy nul homme parler, & se de-
ualerent ou fons des fossez. Puis alerent au pié
du mur, & drecierent à mont les trois eschiel-
les dessusdites. Le premier, qui y mōta auoit nō
Barbarie, & tenoit en sa main vn moult ioly pa-
nō. Et quāt Engloiz le virent, si en furent mout
courrouciez. Et ietterent sur luy vne pierre de
fer mout pesant, dont il fu rualé ou fons du
fossé parfont gesant d'vn costé, & son panon de
l'autre lez lui. Adonc Engloiz huerent fort, &
crierent: Rallez vous en François à voz hostelz.
„ Car vous ne sauez riens de vous tenir sur es-
„ chielles. Ne vous auenturez pas à receuoir cel
don. Mais Bourguignons montoient d'autre-
part, & firent plusieurs trous ou mur, par où
l'en peust bien estre entré. Et ainsi que ledit pre-

mier monté & abatu d'eschielle gisoit oudit fossé en paumoison, vn homme d'armes François nommé Hymbert de Cugnieres vint à luy, qu'il le releua, & faisi son panon, & monta en l'eschielle iusques au desfrain eschiellon. Mais ainçois recut maint cop, & fier horion. Mais en foy fort deffendant monta sur le mur, & y attacha son panon. Lors monterent apres lui plusieurs hommes d'armes. Et d'autre part les Bretons orent tant myné à force, qu'ilz entrerent leans à leur vouldté, en criant aus Englois, que tous y mourroient. Et quât Engloiz virent ceste prise, si s'enfuirent en la tour encienne, où ilz se enfermerent. Et François & Bourguignons entrerent ensemble en la basse court. Aufquelx dist Bertran: On ne demande point ceste basse court, ains demande-on ce dongon lassus. Hee, Dieu! dirent aucuns François, vecy assez paine, n'aurons ia repostant comme Bertran viue. Lequel appella haultement yceulx Englois, en disant qu'ilz se rendissent au Roy. Et ilz responderent, que si feroient ilz vouldentiers, saufs leurs corps & leurs biens, & non aultrement. Et Bertran respondi, qu'ilz n'en emporteroient riens, & si se rendroient sans condition à la vouldté du Roy, & des Princees, ou leur tour seroit minée & abatue. Lors furent Engloiz dolens, grâs & petiz. Car ilz veoient bien, qu'ilz ne pouoiét durer l'espace de trois iours. Si consentirent au

derrenier à eulx rendre & venir à mercy, chacun la hart au col. Et quant Monsieur de Clignon sceut qu'ilz se rendroient ainsi, il supplia & requist aus Seigneurs, qu'il peust des Engloïz faire sa voulenté. Lesquelz luy ottroierent, car ilz ne sauoient sa pensée. Et quant il en ot l'otroy, il faist vne hache grant & pesant, & vint à l'huys de la tour, où on les attendoit. Et le premier qui en yssi feri de sa hache, qui à vn seul cop lui fendi la teste: le second & tiers aussi. Et ainsi comme ilz venoient, il les occioit. A quinze cops de hache il en tua quinze.

De la prise & rendue de saint Iean d'Angely, Xaintes en Poitou, Monstereul Bonnyn, Cyzay, Nyors, sainte Foy, Bergerac, & saint Maquaire. Et de la bataille de Cyzay, & de vne autre faite le Bergerac: esquelles batailles Engloïz furent desconfi.

CHAPITRE L.

A PRES ce que François orent conquis le chastel de Benno, ilz alerent deuant Surgieres, qu'ilz eussent assailli, ne feust pour l'amour de la Dame, que Engloïz tenoient en prison. Si en auoit vn moult puissant nommé Bernart Auart, qui yssy de leans, & s'en fouy à la tour de Broe. Apres ce, se bouterent François plus auant en la Guienne. Et se rendi à eulx saint Iean d'Angely

d'Angely & Xaintes en Poitou. Si menoit Bertran oudit pays grant route de gens d'armes, & ala assieger Cifay. Mais ainçois prist d'assault Monstereuil, où il n'ot gaires esté, quant Messieurs de Cliçon, de Laual, & le Viconte de Rohem, lesquelz tenoient le siege deuant la Roche-sur-Yon, lui firent sçauoir par vn Herault, qu'il fust sur sa garde & de iour & de nuit. Car Engloiz faisoient leur assemblée à Nyors. Et estoient bien huit cents combatans, tous hommes d'armes souffisans, & plusieurs Archiers. Mais ne sauoient pas les dessusdiz de Cliçon, de Laual, & de Rohem, quel chemin iceulx Engloiz tendroient, ou sur eux, ou sur ledit Bertran, qui lors donna à icelui Herault vn bon cheual, & lui dist qu'il le recommandast aus Seigneurs dessus nommez, & à tous les compaignons. Et tantost Bertran fist enclore sa gent tout entour de paliz & de mairien, qu'il fist ficher en terre, afin qu'ilz ne feussent surprins. Et incontinent ledit Bertran manda ces nouuelles à Alain de Beaumont le ieune, nepueu de Monsieur Alain de Beaumont, qui adonc tenoit le siege deuant Lesignen. Lequel Alain, icelles nouuelles sceuës, fist enclore ses gens de palis tout enuiron, ainsi comme Monsieur Bertran auoit fait les siens. Et ainsi les François tenoient les trois sieges dessusditz. Cōbien qu'il leur eust esté bien besoing d'estre tous ensemble. Plus

sieurs assauts donna Bertran au chastel de Cifay, mais riens n'y conquist. Si parlementa au Capitaine pour le rendre, & luy en offroit grant finance. Mais Engloiz n'y vouloient entendre, ainçois se moquoient des François, & disoient plusieurs derisions & friuoles, qui ne sont à relater. Et Engloiz, qui leur mandement faisoient deuant Niort, se trouuerent bien huit cenz cōbatans. Desquelx estoient les Capitanes, le sire d'Angorisses, Messire Iean d'Eureux, Iagues Mouffe, Iennequin Acquet, Iacouelle, le Capitaine de mortemer, & Thommelin Aycon, qui furent au cōseil, ouquel parla premier ledit d'Angorisses, pource que c'estoit le plus souffisant, & leur demanda, lequel seroit le meilleur d'aler à Cifay, ou à la Roche sur-Yon, ou à Lesignen. Si conseilla Messire Iehan d'Eureux, que on alast premierement sur Bertran. Car qui le pourroit prédre & occire en chāp, Engloiz disoient, que pou deuoient dobter le remenant. A ce s'accorda aussi Iacouelle, & voa qu'il iroit prendre par force ledit Bertran, ou milieu de sa gent, & l'amenroit en la place où il estoit; & s'il ne le pouoit auoir vif, il le mettroit à mort. Apres leur dist, que pour François esbahir il auoit aduifé vne chose. C'estoit, que par dessus ses armes il se feroit vestir de roile, dōt il pouoit bien recouurer mil aulnes là endroit, & qui s'en voudroit ainsi vestir par dessus ses armeures, il lui abādonnoit. Et avec ce, il feroit mettr e vne croix vermeil

deuant, & vne autre darriere. A ce s'acorderent tous les Engloiz, qu'ilz feroient cotes blanches de toille & de linceulx par dessus leurs armes, & seroient vestuz tout d'un parement, pour esbahyr plus François, comme dist est. Ainsi comme ilz parloient de telz raisons, vindrent à eulx quatre cens Englois, qui leur prièrent de eulx receuoir avecques eulx, pour eulx aduéturer sur François: & que bien estoient garnis d'ars & de sajettes. Et de leur venue furēt Engloiz ioyeulx. Car pour lors ilz furent douze cens, qui n'auoient à besongner que à cinq cents François. Et quant iceulx Engloiz furent prests de partir, & qu'ilz orent fait ordonner tous leurs blās habitz, ilz se partirent de Nyort, ne oncques puis n'y rentrent. Mais ençois leur partement, la couelle ordonna à aucuns de ses subgiets, qu'ilz feissent parer ses chambres, & eussent bonne garnison de vitaille, pour bien honnorer Bertran, qu'il pensoit à ramener avecques lui, ou iamais ne retourneroit. Et estoiet Engloiz d'accort, de tuer touz les François, excepté trois, dont les noms ensuiuent, Monsieur Bertran du Guesclin, Messire Morice du Parc, & Messire Geffroy Carismel, Cheualiers Bretons. Et de ce ne sauoient riens François, mais que ce que Monsieur de Cliçon leur en auoit fait sçauoir comme dit est. Tant cheuauchierent Engloiz, qu'ilz vindrent à vn grant bois. Si encontrerent

en leur chemin deux charrettes chargées de vin, quel'en cuidoit mener au siege de Cizay. Et icelui vin estoit moult bon, creu ou terroïer de Monstrueil-bellay, qui est la meilleur vinée qui croisse, tant comme le trauers de Poitou peut comprendre. Tantost les Engloiz firent descharger lesdites charrettes, drecier le vin sur bout, & puis deffoncier au bout d'enhaut. Si en vindrent puiser à crusses, à bacinetz, & à chapeaulx de fer ou d'acier: & en burent si largement, qu'il leur faisoit la ceruelle trotter, & en buuant menaçoient François de mettre à mort. Car le vin fait dire maint fol parler. Ainsi beuoient Engloiz liement dedens le bois, disans que oncques maiz de si bon vin n'auoient beu. Et disoient li aulcun d'eulx, que tant comme il y en auroit goutte, ilz ne se partiroient d'illec. Et li autres respondoient, qu'ilz leur tendroient compagnie, & quant ilz auroient bien beu ilz s'en combatroient mieulx, & n'en sentiroient pas si tost les cops. Et s'il leur conuenoit morir, ils en mourroient le cuer plus gay. Et entretandiz comme ilz deuisoient ainsi, les gens de Bertran prindrent vn Bretõ, qui auoit esté Engloiz pres de trois ans. Si le menerent deuant lui. Et il le commanda à pendre. Mais icellui Breton dist qu'il n'auoit oncques fait ne pèse trayson; ainçois auoit-il esté prins des Engloiz, qui luy auoiēt fait iurer & promettre, que pour mort ne pour vie il ne partiroit d'eulx tant comme il vesquist: mais

nō obstant ce, il vouloit deuenir bon François en icellui iour, & diroit à Bertran si bonnes nouuelles, dont sa vie pourroit estre sauuée, ou cas qu'il le voudroit respiter de mort. Or auant, dist Bertran, ie te receuray par tel conuenant, que se de ce que tu me diras ie ne voy certaine esperance, ie te feray * encrer à Tarbie. Car ie ne me fieray ja en traicteur, ne pour luy ne crefroy, fors ce que ie voudray. Sire, dist le Breton, ie ne suy point traître, quant ie veul retourner à ma droite nature. Et vous iure sur Dieu, que Englois sont pres de cy, de gens fors & feurs, & quatre cens de bons archiers, qui cheuauchoiēt fort, & ont vestuz cotes blāces dessus leurs armes. Et si ne vous dōnez de garde qu'ilz vous courront desus ou de iour, ou de nuit. Haa! dist Bertran, comme tu scez bien parler, & faigement, & louer les Engloiz. Mais s'il n'est ainsi comme tu dis, ie te feray pendre. Et toutes fois le Breton disoit verité. Car Engloiz n'estoient que à vn cart de lieuë d'illec tant seulement. Et conseilloyent les aucuns qu'ilz demourassent en ce bois iusques à la moitié, qu'ilz surprendroient Bertran & ses gens. Mais Messire Iean d'Eureux leur dist vne fiere parole & orueilleuse, qui fust ceste, ou la semblable: Seigneurs, Barons François veullent dire tout communément, que Engloiz n'oseroient seoir sur eulx, que malicieusement & en trayson, pour surprendre quant ilz

„verroient leur auantage. Je le dy pource, & ne
„le celeray pas, que nous sommes icy planté de
„bonnes gens tous hardiz & esprouuez en ba-
„taille, & sommes deux contre vn. Ainsi comme
„ie l'entens, ce seroit pou d'onneur à nous, ne ne
„seroit tenu à nul hardement, se nous assaillons
„de nuit François. A son conseil se accorderent
tous les Engloiz, de aler courre sus à Bertran. Si
ordonnerent leurs coureurs, qu'ilz enuoyent
deuant, pour descouurir l'estat des François.
Car Engloiz doubtoient moult que François,
quant ilz sçauroient leur venue, ne partissent
de place sans eulx liurer bataille. Car ilz estoient
beaux à voir, & grant foison. Et si auoient de-
dens Cizay cent soubdoyers tous aprestez d'is-
sir, si tost comme ilz verront Engloiz assaillir
François sur les champs. Et ainsi comme Bertrā
auoit assemblé ses gens sur les champs à conseil,
pour deuiser comme il les ordonneroit, deux
coureurs vindrent deuers le destre costé parez
de blanc, & du fenestre costé en vindrent deux
autres. Et ainsi vindrent deux à deux ferir aux
„hourdeys du logeys, en disant: Or sus François,
„venez dessus les champs. vous aurez incontinct
„la bataille, se vous voulez attendre, & vous l'oz,
& auxi *. Et à tant se retrayrent. Et quant y fu-
rent vn pou eslongiez, on vit venir Engloiz à
pié tout bellement, rengiez & ordonnez, les ar-
chiers tout deuant, tenant chacun l'arc entesé,

la lance ou poing, l'espee au costé. Et auoient leurs bannieres desuelopez au vent. Si gettoient leurs bacinez mout grant clarté. Et par les corps estoient vestuz sur leurs armes de toilles blanches. Noble chose estoient du veoir. Longuement furent regardez des François. Et tel faisoit au deuant chiere de grant fierté, qui lors deuint coy & simple. Quant ilz virent que Engloiz estoient bien huit cens bacinez & quatre cens archiers, se prioient les aucuns d'eulx, que Dieu les voulzist getter d'icelle iournee à honneur. Et quant vit les François regarder Engloiz, & beffier les testes, il leur dit haultement : Pensez de vous eslecier, & vous fouuegne de Dieu. Je voy, que grant honneur nous vient, que nous recouurerons aujourdui. Il nous conuient penser & subtillier, comme nous nous ordonnerons & rengerons. Car iamais ne mangeray ne buuray aucy, si me seray essayé encôtre Engloiz. Voiez vous les paremens de toille blanche qu'ilz ont vestuz? Ce nous donne à entédre, qu'ilz ne nous veulent pas tant priset, comme de descouurir leurs armeures. Vrayement grant orgueil leur a fait encharger, & oncques homme n'ama homme orgueilleux. Je oëtroiy que l'en me tranche tous les membres, se vous ne veez huy leur orgueil tresbuchier. Qui n'est armé, si se voist armer. Je auray vne bataille, & yray ou premier front, & Geuffroy Carismel vne elle destre lez

„ moy, & la fenestre mon cousin Alain de Beau-
„ mont & Morice du Parc. Et nous lay tous icy
„ pour tenir le siege & garder mon cousin Iehan
„ de Beaumont, à tout quatre vingts soudayers:
„ afin que les Engloiz du chastel ne nous puissent
„ greuer ne nuire par derriere.

A CE conseil se accorderent tous, & tantost
se appointierent mout tref-bien. Et lors vint
vn Herault Engloiz, qui print hault à crier:
„ Bertran c'est honte à vous, de faire tât iocquier
„ nos Seigneurs. Faites nous sauoir, se vous vou-
lez combattre, ou lessier la place. Et Bertran lui
respondi, qu'il pensast de retourner, & que as-
sez tost approcheroient ses gens des leurs. Si s'e-
retourna iceluy Herault aux Engloiz, & leur
dist que Bertra mettoit grant poine de appoin-
ter ses gens. Adonc Engloiz par leur grant or-
gueil & outrecuidance se assirent dessus le pré,
en croisant leurs iambes l'une sur l'autre, en gui-
se de cousturier. Neantmoins en y auoit-il bien
de telx, qui eussent eu grât mestier de dormir le
vin qu'ilz auoient beu à oultrage, lequel leur au-
oit vn peu esmeu la teste. Si virent bien Fran-
çois, que Engloiz estoient esprins de grant or-
„ gueil. Et lors Bertran dist à ses gens: Or auant
„ mes amis, abatons ces paliz, & yffons hors de ce
„ parc. Alons courre sus à noz mortelz ennemiz,
„ desquelx nous abatons aujourduy l'orgueil. Si
s'en yffirent Bertran & ses gens dudit paliz, &
se reenge-

se rengerent sur le pré aussi paisiblement, cōme si les Engloiz estoient petiz enfans: lesquelx ne se daignoient leuer de là où ilz estoient assis, iusques à tant que François feussent bien près d'eulx. Et entretandiz les Engloiz, qui ou chastel estoient, yllirent sur Messire Iean de Beaumont, & ses gens, pour commancier noyse. Mais iceulx Engloiz furent tous atrapez. Et en y ot partie de morts, & partie de prins, lesquelx pouoient tous paier rençon. Et d'iceulx prins fu Robert Myton Capitaine dudit chastel. Si n'en fauoit riens Bertrā, iusques à tant que on lui cōpta apres le fait, dont il mercia Dieu. Puis dist aux François: Or soiez tous preudommes. Et à Dé le veu, nous desconfirons les Engloiz, se ilz estoient deux tantes. Car ilz sont ja estrené à leur auanture. Et est signe, qu'ilz seront confus à la fin. Ainsi disoit Bertran maint parler à sa gent, pour les resbaudir, & les auoit moult bien ordonnez. Et quant tout fut prest pour commancier bataille, vn Herault Engloiz vint erier hautement à Bertran, que chacun le pot oyr: Sire, quant serez vous prest? Vous mettez trop longuement à vous ordonner. Vous prifiez pou nos Seigneurs, ou vous auez paours de liurer bataille. Se vous voulez paiz sans point combattre, tresliement ie l'iray dire à nos Seigneurs. Nennil, dist Bertran, par ma foy, ie n'ay enuie de paiz,

ne de concorde. Ceux du chastel sont desconfiz
en present, & Robert Myton prisonnier. C'est
signe que Dieu nous donrra victoire prouchai-
nement. A lez faire leuer vos gens sur les piez.
Car ie ne daigneroie assembler à eulx, se ilz n'e-
stoient en estant. Si dist le Herault, Vous parlez
saigement. Adonc retourna aux Engloiz, &
leur cria haultement: Or sus Seigneurs, assaillez
François. Car ilz ont ja desconfiz ceulx du cha-
stel, le Capitaine prins, & ses gens occis. Et ainsi
feront-ilz de vous, se vous ne vous deffendez
bien. Lors se leuerent Engloiz en criant haulte-
ment; Saint George obliez vous ainsi vos gens?
Adonc firent sonner leurs trompettes, & vin-
drent pas à pas encontre nos gens, & les autres
aussi encontre eulx. Si auoient mis Engloiz leurs
archiers deuant, qui trayoient durement des
flesches, lesquelles faisoient grant noyse au
cheoir sur les bacinetz. Mais ce trefyt ne greua
riens les François. Si trayerent Archiers d'une
part, & gens d'armes approucherent tout belle-
ment. Maiz Ichã d'Eureux s'en aloit par les renz
qui disoit aux Engloiz, Que si tost comme ilz
auroient estoquié & bouté de leurs glaiues puis-
samment en poussant, que par compas ilz meis-
sent lesdiz glaiues à terre, & puis courreussent
aux François à bonnes espées, & leur decoupa-
sent leurs armeures. Puis monterent sur leurs
cheuaux, & prindrent les bannieres & panons

des Engloiz leuez en hault. Si cheuaucherent tant, qu'ilz vindrent deuant Nyors. Et là commencerent à crier Saint Georges. Si cuiderent les Engloiz, qui dedans estoient, que ceulx de dehors feussent Engloiz. Si deffermerent leurs portes tout à plain, & François entrerent dedens. Lesquelx quant entrez y furent, crierent à la mort. Et Engloiz, qui furent surpris, ne durerent que vn pou. Qui demanda rençon, il fu depporté; & qui se deffendi, il fu liuré à mort. Ainsi prindrent & cōquirent François Nyors. Puis conquirent Chymay, où ilz trouuerent grant auoir. Gensay aussi gangnerent-ilz par force, & alerent-ilz au fort chastel, où ilz trouuerēt Caraenloet trespaslé, que Engloiz auoiét mis à fin. Mais François le vengierent depuis ce chierement. Lesquelx desnichierent adonc les Engloiz du pais de Poitou, & les en chasserent à force & à vertu. Et par bon accort y ordonnerent Seneschal Alain de Beaumont. Puis s'en alerent tout droit à Pontorson. Et assez tost s'en ala B. à Paris deuers le Roy, qui bié le fist festoyer, & lui donna du sien. Puis ne demoura gueres, que par ordonnance du Roy Monsieur le Duc fist vne cheuauchee deuers Perregort, & auoit auecques lui moult noble compagnie. Si en estoit Bertran du Guesclin, Monsieur le Mareschal de Sancerre, Yuain de Galles, Thibaut du Pont, Guy Roulant, & plusieurs autres bons

Cheualiers & Escuyers. Et quant ilz furent tous assemblez, ilz se acheminerent, pour aler à vn chastel nommé la Bernardiere, où il y auoit plâté d'Engloiz de tref-mauuaise mesnie. Et si tost comme ilz oyrent dire par vn leur espie, que môdit Seigneur le Duc venoit sur eulx, & Bertrā avecques lui, ilz s'en fouyrent de paour, & bouterent le feu en leur manoir. Et par leur mauuaistié & cruauté tous les prisonniers y furent ars. Apres ceste auanture les François vindrent là, qui pou y conquirent, & d'illec s'en allerent à Condat, qu'ilz assaillirent. Maint mout de maulx y souffrirent par force de temps, ne oncques tel orage ne fu veu, par lequel François perdirent bien cent cheuaulx icelle nuit. Mais le lendemain ilz assaillirent ledit chastel bien & puissamment, & tant y getterent d'engins, & firent d'assaulx, que Engloiz se rendirent en fin à Monsieur le Duc, voire sauf leurs vies; & s'en alerent à Bergerac conter ces nouuelles. Et quāt ilz sçeurent, que François les venoient veoir, ilz se apprestèrent pour les recueillir. Mais Monsieur le Duc, & Messire Bertran, & leurs gens, en venant conquirent quatre chasteaulx. Tant cheuaucherent François, qu'ils virent les murs de Bergerac. Si y auoit entour faux bours bruiz, mais nō pas du tout tresbuchié ne cheu: ainçois s'y pouoient bien François repouser & dormir. Et Bertran logea M^r le Duc aux Cordeliers. Si

vous di, que François n'auoiēt pas eu encores loir
 fir de eulx tous amoisonner & logier, quant En
 gloiz les vindrent assaillir plus de Lx. lances, qui
 yssirent de Bergerac. Mais François les firent
 ressatir arriere: si que au reñtrery en morut xii.
 ou plus. Et s'en lessoiēt plusieurs cheoir és fos
 sez. Si les suiuiōient François tant & de si près,
 que à pou qu'ilz ne gāgnerent la ville. Là y auoit
 vne auant-porte, où mout y ot fier assaut. Et gā
 gnerent les François l'auant-tour à celle foiz, &
 nō plus; puis se retrayrent en leur logeys. Et n'y
 orent pas esté longuement, quant on leur dist,
 que Engloiz venoiēt habōdamment, & à grāt
 effort fur eulx: c'est assauoir le Seneschal de Bor
 deaux, & les Seigneurs de Durats, de Muxiden,
 & de Lengoré: lesquelx estoient bien six vingts
 lances, & deux cens archiers, qui vindrent à
 vn chastel bel & gent, que on appelle Vourde.
 Maiz ne sauiōēt bonnemēt les François où iceulx
 Engloiz estoient. Et pour ce, firent fossoier en
 tour leur logeys, & eulx enclorent de paliz tout
 enuiron. Si auint que Yuain de Galles out talēt
 & voutenté d'aler fourrager sur les chāps. Et ala
 Thibaut du Pōt avec lui. Et n'ourent gaire alé,
 qu'ilz apperceurēt Engloiz. Et quāt Thibaut les
 vit, si ordōna ses gēs, & les fist mettre à piē dedēs
 vne grāt fouchiere. Là se couchierēt François ma
 licieusement, & lessierēt leurs varlez, & paiges au
 couuert. Engloiz venoiēt moult efforciemēt. Si

fu ainsi, que celui qui portoit le panon du Seneschal de Bourdeaux l'ala asscoir & ficher ou plus beau lieu de la place. Et là vindrent Engloiz cheuauchant tout gentement. Car ils ne sauoient pas François si prés. Et quant ledit Thibault apercut ledit Engloiz, qui faisoit estendard de son panon, il se leua, & l'ala fierement assaillir. Mais il se deffendi. Et là suruindrent trois Engloiz, qui assaillirent Thibaut tout environ, & le ferirent si fierement de trois glaives, qu'il fut tout trespercié & nauré à mort, & mourut presentement en la place. Dont François furent dolenz au cuer. Mais à qui est fait, ne puet estre * aucié. Et si tost cōme il ot prins fin, son goufanonnier criant haultement, Nostre Dame, le Pont, aidiez à voz gens: adonc d'une hache trenchant, que il tenoit, fery sur les trois Engloiz si roidement, qu'il en tua les deux. A tant vint Yuain de Galles & ses gens, & avec lui le Seneschal d'Anjou, & Guy Roulant, qui se prindrent aux Engloiz en criant chacun son cry. Et venoient iceulx Engloiz si druz, que à merueilles. Et estoient bien six contre vn. Si firēt Frâçois ressortir arriere, & reculer sur le pont de...desconfiz: quant douze compaignons tāt varlez comme paiges acoururent sur eulx, en criant haultement: Nostre Dame, Anjou, trois beaulx Seigneurs ferez. Vecy venir Monsieur le Duc & Bertran. Adonc furent

François mout resioys, & tant s'efforcerent en boutant, qu'ilz repousserent Engloiz. Et lors suruindrent les varlez François, que l'en auoit embuschyé, dont dessus est faite mention. Et estoient bien LXX. N'y auoit celui, qui n'eust espee ou coustel sur lui. Si reluisoient leurs armes fort contre le Soleil. Et commencerent à crier fort, Guesclin. Si cuiderent de certain les Engloiz, que ce fussent gens d'armes d'Escoffes. Adonc se commancierent fort à esbahir, & à eulx desfrouter. Car ilz se tenoient comme pour touz desconfiz. Si suruindrent en leur nuisance, & en l'ayde des François, quatre vingts combatans, que Messire Pierre de Bueil menoit, pour ouurer vn engin appellé Truye. Lequel Cheualiers'ala bouter ou plus fort de l'estour, en criant, Nostre Dame, Bueil. Qui adonc veist Engloiz desfengier à force, & François ferir fierement sur eulx, de perilleux estour lui peust souuenir. Là vist-on Engloiz mourir & tresbuchier, partir de place, & eulx enfuyr vers vne grant riuiere, où il en noya le iour bien quatre vingtz. Et là furent prins, le Seneschal de Bordeaux, le Sire de Duras, le Sire de Muxident, le Sire de Resnon son nepueu, & trois Escuiers filz de Barons, auecques plusieurs autres. Puis prindrent François icelluy iour vn chastel grant & fort appellé Esmet. Et apres alerent asseigier Sainte Foy, qui en la fin se rendi. Et aussi fist

*per-
di-
cas.* Bergerac. Puis ne demoura gueres, que à Mon-
sieur le Duc d'Anjou se rendi vn grant Cheua-
lier Baron nommé Berducat * d'Alebrét, &
xxvii. chasteaulx de son heritage. Mais le Sire
de Duras dessus nommé, qui estoit prisonnier,
promist & fiança de sa foy à mondit Seigneur le
Duc, qu'il vouloit deuenir bon François & loyal
sans varier. Maiz il faussa sa foy, & retourna à
Bordeaux deuers les Engloiz. Et quant Mon-
sieur le Duc le sceut, si lui en despleut mout. Le-
quel s'en alla en ce temps deuant saint Maquai-
re. Et là vint à luy le Sire de Coucy, qui amena
de France maint nobles Cheualiers. Si se ren-
doient à mondit Seigneur le Duc plusieurs vil-
les & chasteaus: & mesmement ladite ville saint
Maquaire. Apres ce, se party de Guienne Mon-
sieur le Duc, & retourna en Anjou, & donna
congié à ses gens. Et Bertran s'en vint à Paris.
Puis n'y demora gueres, qu'il s'en party pour a-
ler en Guienne. Maiz il pleut à Dieu, qu'il alast
de vie à trespassement, comme vous pourrez
ouyr ou Chapitre subsequent, qui est le derre-
nier de ce presente Liure.

De la

De la prise de Chasteau-neuf de Rendon, qui volentierement se rendi à Bertran, lequel ala ilec de vie à trespassement. & de sa sepulture & enterrement à saint Denys en France.

CHAPITRE LI.

ATANT partie des faiz Bertran du Guesclin, & des nobles Gentilzhommes lors auecques soy estans auez cy deuât oy recorder, ainsi comme il est trouué ou Liure, dont ce present est extrait ou compillé. Et se aucune faulte a en ce Liure de plus ou de mains, soit en la substance, ou en langage, l'auteur en fait bien à excuser par viue raison & iuste, par lui pretenduë de cedit Liure present, lequel pour doubte de traictié prolix & ennuyeux aux escoutans, sera en present conclut. Et s'il est mis en trop rude langage, il leur plaise à receuoir en gré. Car impossible chose est à vn homme mortel de trayctier & au plaisir de tous. Car selon le Philosophe, tant de testes, tant d'opinions. Mais quant à venir à la conclusion de ce Liure, Bertran vint mettre le siege deuant vn fort chastel, nommé Chasteau-neuf de Rendon en Aluergne. Et auoit auecques lui assez de bonnes gens d'armes. Si requist Bertran au Capitaine dudit chastel, que icelui chastel lui rendit ou nom du Roy. Car il y tendroit le siege tant & si longuement, & n'en partiroit maiz à nul iour tant qu'il

lui seroit rendu. Lequel Capitaine respondi au-
dit Bertrá: Sire, il est vray, qu'il est bié en vostre
puissance de nous asseger, & toulir viures. Car
vous estes grát foyson, & des meilleurs que l'en
pourroit à presét trouuer. Et si auez le plus puis-
sant Roy qui soit ou monde. Si ne desprisons
pas vostre pouoir, que l'en doit honnourer plus
nul autre apres le sanc Royal. Nous le sauons
bien de certain. Mais se vous auiez encores plus
cent fois de force, & de renō, si ne vous rendriōs
pas ainsi nostre fort, se nous ne sauons par quel-
le raison. Car nous auons chastel bon & fort,
& bien auitallié de tous viures, & garny de
bonnes gens pour le deffendre. Si ne nous a-
uez encor assailly. Se ainsi nous rendions,
le Roy d'Engleterre pourroit bien dire, que
nous aurions commis enuers lui trayson. Et hō-
me qui veult viure sans estre souspeçonné, se
doit bien garder de mesprendre. Car mieulx
vault honneur & bon renom, que or ne argent.
Et quant Bertran entendit la réponse de ce Ca-
pitaine, si iura haultement, que iamaiz ne par-
tiroit d'ilec, si auroit le chastel à son plaisir. Lors
s'en retourna à son tref, & assez toult apres fist
liurer assault. Mais il n'y conquist riens, ainçois
furent ses gens moult greuez, & fort menez.
Dont Bertran fu moult courroucié. Si auint par
la volenté de Dieu, lequel a ordonné à toutes
choses ayans commencement auoir fin aux ter-

mes establiz, que l'en ne puet passer, comme dit en vne Epistre Monsieur Saint Iehan Euangeliste, certaine maladie prist à Bertran, lui estant audit siege, de laquelle il ala en brief temps de vie à trespassement. Et luy acouchié ou lit de la mort faisoit plusieurs regrez moult piteulx. Et cōmandoit à Dieu le Roy son Seigneur, en depriant que aussi vrayement cōme il l'auoit loyaument serui, luy fist Iesus Christ pardon à l'ame. Puis commandoit à Dieu nos Seigneurs les Ducs d'Anjou, de Berry, & de Bourgongne. En apres sa femme, qui regrettoit piteusement le doux païs de France, & prioit à Dieu qu'il le voulsist garder, & donner prouchainement si bon Connestable, dont il vauksist mieulx. Si se fist ledit Bertran adrecier bien & bel & dignement de tous les Sacrements qui lui appartenoient. Puis fist venir deuant luy Monsieur le Mareschal de Sancerre, & lui pria qu'il alast parler au Capitaine du chastel, & leur dist bien & hardiement, qu'il lui apportast les clefs: ou se non, on l'assauderoit tellement, & deust couster la vie de cinq mille hommes, que on auroit le chastel. Si suppose-l'en que Bertran le disoit, pource qu'il fauoit bien que Engloiz le doubtoient mout, & lui sembloit bien, que se il trespassoit, le fort tendroit longuement encontre François. Illec monstra nostre Seigneur, que il amoit bien Bertran. Car Engloiz auoient bien

iuré touz d'un accort, qu'ilz ne se rendroient à nul homme, que audit Bertran. Et quant ilz furent requis de Monsieur le Marechal de rendre leur chastel, ilz s'y accorderent tous, mais que Bertran venist là. Et mondit Sieur le Marechal leur respondi, que Bertran auoit iuré, qu'il ne leur en parleroit en iour de sa vie, mais apportassent les clefs à Bertran. Et Engloiz se acorderent à ce faire. Lors issirent dudit chastel, & vindrent à Bertran, & lui presenterent les clefs. Et ne demora gueres, qu'il getta le souppir de la mort. Là n'y eut si dur cuer, qui de pitié ne pleurast. Et est à supposer, que tous les biens vueillâs du Royaume de France, de quelque estat qu'ilz fussent, ne furent pas mains courrouciez, se plus non, de la mort de Bertran, que furent les Troyens de la mort de Hector filz au Roy Priâs: ne que les Gregeois furent de la mort d'Achilles. Mesmement plusieurs Engloiz, qui ses ennemiz estoient, en ourent grant compassion. Mais sur tous autres le noble Roy CHARLES de France le plaint & regretta, comme Charlemagne fist son neveu Rolât, & le Roy Dauid Ionathaz, que il tant amoit. Et se le Roy Alexandre ama bien son Connestable Emendus, encores estoit cestuy plus amé de son Seigneur. Bien lui auoit monstéré à la vie, & luy monstra plus encores, à la mort, comme vous auez en present,

L'histoire dit, que ainçois que Bertrá trespassast il demanda l'espee de la Cōnestablie, & la bailla garder à Monsieur de Cliçon, pour la rendre au Roy : auquel il le voulist recommander, & à tous les Barons de France. Et pria à ceulx qui là estoient, qu'ilz voulsissent prier pour lui, qu'ilz s'entramassent, & qu'ilz seruissent loyaument le Roy de France.


APRES le trepassement de Bertran du Guesclin, fu ordonné par plusieurs Cheualiers & Escuyers Bretons, tant ses amis charnels comme autres, que son corps seroit porté ou pais de Bretaigne, dont il estoit nez : & enterré en certain lieu, où ilz auoient ordonné sa sepulture avec ses predecesseurs. Et l'auoient ja porté bien loing de là où il trespassa, en descendant la riuere de Loyre. Mais le Roy nostre Sire réuoya bateau audeuant, & commanda le corps dudit Bertran estre amené à Saint Denys en France, & estre enterré au pié de la propre sepulture où il deuoit estre mis apres son trespassement. Et tout ainsi fut-il fait. Si ne demorra puis gueres, qu'il plaist à Dieu que le Roy nostre Sire vint à son derrenier iour, & parti de ce siecle. Dieux vueille receuoir son ame en la sainte gloire de Paradis. Je croy de certain que si soit-elle. Car ie ne croy pas que oncques Roy Chrestien feist plus belle fin.

Il estoit tres-vray Catholique, qui regnoit son lieu, honnouroit l'Eglise, & amoit iustice, & retribuoit largement les faiz d'un chacū. Et guerrioit le plus destrement, que oncques mais feist Prince, en gardant son peuple sans foulement. Auantureux en conquerant, & recouurant pais, & en greuant ses ennemiz. Parquoy tous les populaires, & especial ceulx, qui estoient les plus prez de sa personne, le durent bien autant plaindre & regretter, comme les Grecs & ceulx de Macedone firent le large Roy Alexandre. Mais la mercy de Dieu, il nous laissa si noble tresor de sa droite lingne, c'est assauoir le Roy nostre Sire, qui à present est, lequel au plaisir de Dieu, & par la bonne apparence que l'en y voit; sera aussi vaillant, ou plus, en meurs & en grace, comme fu son pere. Car desia il a eue victoire en bataille arrestee sur ses ennemiz, luy estant en tres-grant ioeunesse. Auec ce il est bel, hardi, sage, & entreprenant. Et son frere Monsieur LOYS DE FRANCE Duc de Touraine & Conte de Bloys luy pourtrait bien de beauté & de bonte. Si ont vne ieune seur tres-belle Dame & bonne nommee KATHERINE DE FRANCE. Dieux leur doint bonne vie & longue, & à tous ceulx de leur noble sanc: & au Roy nostre Sire si bien gouverner son Royaume, que ce soit à l'onneur de Dieu, & au sien, & au prouffit de son peuple. Et à tous ceulx, qui ce Liure liront & ourront,

BERTRAND DV GVESCLIN. 543
& especiaulment à celui qui l'a fait ordonner,
doint Dieu bonne vie, & Paradis à la fin. Amen.

*En vn temps qui a yuer nom,
Du chastel Roial de Vernom,
Qui yst aux champs & à la ville,
Fist IEHANNET DESTOYTEVILLE,
Dudit chastel lors Capitaine,
Aussi de Vernonnet sur Sayne,
Et du Roy Escuyer de corps,
Mettre en prose, bien m'en recors,
Ce Liure cy extrait de ryme,
Complet en Mars dixneufyme:
Qui de l'an la date ne scet,
Mil trois cens quatre vingts & sept.*

FIN.





TABLE

DES MATIERES

CONTENUES EN L'HISTOIRE DE BERTRAN DV GUESCLIN.

A



IMART de Poitiers. page 131.
Alain de Beaumont. 121. 321. 384. 403. 409. 445. 454. 531.
Alain de la Bouchere. 406. 407.
Alain de Greingneux. 477.
Alain de la Houffoye. 308.
Alain de Mauny. 122. 308. 321. 362. 385.
Alain du Tailleral, dit de Malepayc. 445. 491.
Aleçtaire filz du Roy de Belmarin. 348. 355. 358.
Alphôs pere du Roy Pietre. 243.
Amenyon Sire de Pommiers. 246. 257.

Annet. 71.
Arlele-Blanc. 307. 312.
le Sire d'Auberoche. 265.
Aubert Comte de Hainau. 120.
Aulroy. 71. 124. 129. assiegé par le Comte de Montfort. 130. 131. & sui. pris. 151.

B

la **B**ARRE, Breton de grand renommée. 132.
le Bascon de Mareuil. 74. 75. 76.

78. 109. 112. 114. 115. 118.

Bataille d'Aulroy. 140. 141. & sui.
Bataille de Cocherel. 98. 108. 109. & sui.
Bataille de Nadres. 257. 258. & sui.
Baudouin Dennequin Maistre des Arbalestriers. 95. 112. 113.
Becherel. 64.
Bennon. 515. 520.
Bergerac. 532. 533.
Bernart Auart. 520.
Bertrand du Guesclin. 3. 4. & sui.

Voyez la table des Chapitres, au commencement de ceste Histoires.

Beruesque. 187.
le Besgue de Villaines. 77. 102. 121. 212. 250. 292. 312. 458.
Besiers. 289.
le Moyne de Bethune. 131.
Borge, Comté. 201. 331.
Bressieure. 425. 435.
Brest. 62.
Bretons Galoz & Bretonans 14.
Brenal. 71.
la tour de Broe. 520.
Burs. 196. 197. 273.

Z z z

TABLE

C

CARTAL de Buich. 109. 116.
120. 255. 271. 505. 506.
Caraenloet. 222. 321. 335. 471.
Carenten. 127.
Catherine de France. 542.
Charles Regent le Royaume,
depuis Roy. 73. 119. 120.
Charles Roy de France. 169.
433. 451. 540.
Charles de Blois. 17. 18. 20. 22.
24. 28. 35. 46. 64. 66. 71. 124.
129. 130. & fuiu. 149. 150. 152.
Charles de Dinan. 130. 143. 145.
149. 319.
Chasteaulerault. 485.
Chasteauneuf de Randon. 537.
Chauuigny. 481.
Chierbourg. 72.
Cisay. 521. 526. 531.
Commune de Rouan. 87.
le Comte d'Aucerre. 88. 91. 95.
113. 121. 131. 143. 394. 513.
le Comte d'Ausenne. 296.
le Comte d'Ayne en Arragon.
253. 260. 368.
le Comte de Dammartin. 394.
le Comte d'Ermeignac. 246.
254. 265.
le Comte de Harecourt. 394.
le Comte de Ioigny. 394.
le Comte de l'Isle. 257. 265. 299.
le Comte de Pembroc. 22. 32. 41.
246. 277. 462. 466. 467.
le Comte de Porcien. 394.
le Comte de Sancerre. 394.
le Comte de Tancarville. 394.
Comtesse de Haynault seur du
Roy Philippe. VI. 16.
Conches. 72.
Condat. 532.
Cerdas ou Gordouc. 210. 214.

le Seigneur de Craon. 313. 319.
la Croix S. Leufroy. 95.

D

DAVID Hollegrent. 383.
406. 489.
Dinan. 47. 48. 55.
Douure fortteresse. 127.
Duc d'Aniou. 290. 307. 310. 312.
Duc de Bourbonnois, & ses
seurs. 154.
Duc de Lenclastre. 17. 22. 23. 24.
26. 32. 36. 246.

E

EDOUARD Roy d'Engleterre.
Erc. 16. 22. 62.
Enguerran Dendin. 95. 113. 486.
Ernoul d'Audrehem Marechal
de France. 175. 184. 207. 246.
293. 403. 447.
Ernoul de Magdalene. 264.
Eureux. 72.
Eustasse de la Houffoye. 122. 131.
142.

F

FERRANT de Castres. 192. 193.
205. 336.
Fleurs de liz transmises du ciel au
Roy Clouis. 508.
Foucaut d'Archiac. 258.
Fougeray. 18. 19. 37.

G

GASTINE, pays. 425.
Gaucher de Castillon. 394.
397.
Gautier d'Auberor. 257.
Gautier Huet. 65. 145. 146. 170.
184.
Gensay. 331.
Gerart de Frontigny. 131.
Geuffroy Carismel. 449. 450.
523. 527.
Geuffroy Dennequin. 114.
Geuffroy Ourcelay. 383. 406.
419.

DES MATIERES.

Geuffroy Payen. 481. 492. 517.
 Gillet du Bois. 373.
 Guilbert Guiffart. 405. 424.
 Guillaume le Baueux. 309. 445.
 454.
 Guillaume de Blâbourc. 36. 37.
 Guillaume Boscherel. 492.
 Guillaume Boitel. 122. 142. 174.
 184.
 Guillaume Clenon. 450.
 Guillaume de Felleton. 67. 68.
 93. 246. 250.
 Guillaume de Granville. 119.
 Guillaume de Launoy. 82. 83.
 84. 131. 174.
 Guillaume Trenchant. 95. 13.
 Guy Roulant. 531. 534.
 Guinguant. 69. 70. 152.

H

le sieur de **H**ANGEST 397.
 486.
 Hennequin Hacquet. 383. 406.
 424.
 Henry de Beaumont. 409.
 Henry Boscherel. 471. 482.
 Henry Huet. 257.
 Henry de Lestumel. 394.
 Henry de Mauny. 308. 321. 362.
 Henry de saint Omer. 196.
 Henry de Pierrefort. 131.
 Henry Comte de Trichemare,
 depuis Roy d'Espagne. 154.
 156. 165. 169. 179. 180. 199.
 Voyez la table des Capitres.
 Huart d'Angle. 466.
 Hue de Carualay. 127. 128. 141.
 145. 170. 184. 190. 222. 246.
 299.
 Huon de Iugon. 147.
 le Seigneur de la Hunaudaye.
 423. 426. 487.

I

IACQVBS de Lieur. 82.
 Jacques de Montmort. 489.
 Jaques Mouffle. 522.
 Jaquet de Bray. 309.
 Iamed'Audelée. 22.
 S. Iean d'Angely. 520. 521.
 Iean de Beaumont. 65. 384. 385.
 393. 403. 412. 445. 454. 629.
 Ieã Royde Frâce. 28. 63. 94. 290.
 Iean du Bois. 509.
 Iean de Bucil. 470.
 Iean de Caieu. 95. 113.
 Iean Chandos. 22. 50. 51. 64. 124.
 143. 146. 255. 258. 481.
 Iean Dauy. 119.
 Iean d'Eureux. 171. 175. 196. 522.
 525.
 Iean de Felleton. 246. 253.
 Iean de Harpedaine. 466.
 Iean Iouel. 72. 99. 102. 115. 119.
 Iean de Limoges. 485.
 Iean de Maynel. 329.
 Iean Comte de Montfort. 17. 22.
 64. 66. 67. 124. 129. 130. 82.
 Iuy.
 Iean dit Mouton Seigneur de
 Blainville. 413.
 Iean Payen. 471.
 Iean de Vienne. 397. 403. 409.
 415. 421. 445.
 Iean Vvin dit le Pourfuiuat. 445.
 Ieannot d'Estouteuille Capitai-
 ne de Vernon. 543.
 Iagon. 46.

L

Seigneur de **L**AVAIL 65.
 le Sire de Lebrer
 155. 246. 265. 297.
 Lissebonne. 226.
 Longueuille Comté, donnée à
 Bertran du Guesclin. 121.

TABLE

Louuaux Abbaye.	131.137.	Nicole d'Aubechicourt.	257.
Louys de France Duc de Touraine.	542.	Niort.	521.531.
Louys de Chalon.	131.	Nogent.	72.
Louys de Hauesquerque.	95.	Nouencourt.	118.
Louys de Sancerre Marechal de France.	489.539.	O	
Lussant, port.	473.	O DART de Renty. 394. 397.	
M		409.486.	
MADRIC.	295	Oliuier de Cliçon.	138. 142.145.
Maguelon.	185.186	298.299.403.448.	
Mahieu de Rademain.	406	Oliuier du Guesclin.	47.48.49.
407.		50.62.308.336.403.	
Manchion de Blancbours.	106.	Oliuier de Mauny.	65.122.127.
Mante.	72.81.82.83.84.	131.143.172.174.189.308.470.	
Saint Maquaire.	536.	Othon d'Auberote.	257.
Mathieu de Gournay.	170.216.	P	
222.226.228.246.		P ACR.	
Mauconseil.	73.	Paix entre les Roys de France & de Nauarre.	
Maurice du Parc.	523.	153.154.	
Melun.	74.75.81.	Perdicas d'Albret.	536.
le Borgne de Melun.	309.	Perrin de Sauoye.	309.
Menestreux iouants deuant l'espoufée.	229.	Philippes VI. Roy de France.	16.
Menestreux & Heraux.	205.411.	Philippes de Beauieu.	131.
Meulanc.	72.81.86.87.	Pierre le Boucher.	481.
Moncontour.	435.489.	Pierre de Bueil.	535.
Montefclaire.	331.	Pierre le Doux.	127.
Montiardin.	332.	Pierre del'Espine.	113.
Montjoye saint Denys.	91.	Pierre de Londres.	115.
Montueil.	353.369.	Pierre de Sacquainville.	72.99.
S. Mor sur Loire.	425.429.430.	102.118.120.121.	
Moradaz de Roinuille.	364.369.	Pierre fils du Besgue de Villaines.	
Morelet de Montmort.	362.489	458.	
Mote de Broon.	3.	Pietre Roy d'Espagne.	154.181.
le Moulin Chappel.	72.	199. Voyez la table des Chapitres.	
Moulines Duché.	201.331.382.	Pietre de Sarmonte.	296.
le sire de Mucident.	258.265.535.	le Sire de Pons.	257.265.
N		Pont del'Arche.	95.97.
Roy de	72.	Ponteaudemer.	72.
N A V A R R E .		Pontualain.	405.
Nicolas Scambourc.	170.196.207.	Prince de Galles.	153.224.240.
		& fuii.246. & fuii.262. & fui.273. & fuii.	

DES MATIERES.

R

RAOUL de Raineual & ses enfans. 486.
 Raoulequin de Raineual. 428. &
 Galeren son frere. 486.
 le fleur de Raineual. 397. 409.
 Renaud de Bournonuille faict cheualier. 113.
 Regnaut du Guesclin. 3.
 Regnaut de Limoufin. 295. 382.
 Regnaut d'Oridon. 311.
 Regnier de Sufanuille. 424.
 Rennes. 9. 13. 22. 23. 27. 36. 38.
 Renneuille. 72.
 Richart Gilles. 502.
 Richart de Guerny. 383.
 Richart de Iennes. 406.
 Robert de Beaumanoir. 449.
 Robert de Beaumont. 319.
 Robert de Blanchourc. 18. 21. 37.
 Robert Canole. 22. 51. 64. 124. 143.
 Robert le Comte. 311.
 Robert de Neuville. 450.
 Robert Miton. 519.
 Robert du Sart. 115.
 Robert Scot. 170. 175.
 Robert de la Treille. 95.
 Robert de Villequier. 95.
 Robillart de Frontebos. 95.
 Roche-derien. 47.
 Roche de Pofay. 454.
 Roche-sur Yon. 521.
 Rogier Dauby. 64.
 Roleboise. 72. 81. 82. 86.

S

ſaincte **S**AVERE. 487. 505. 506.
 le Seigneur de Sempy. 394.

T

TARASCON. 307. 308. 311.
 Thibault des Esteufs. 362.
 Thibaut de Pauie. 321.
 Thibaut du Pont. 107. 112. 116. 531. 533. 534.
 Thierry de Bournonuille. 95.
 Thomas d'Aldonne. 237.
 Thomas Pinel. 295.
 Thomas de Cantorbie. 48. 50.
 Thomas de Grançon. 56. 383. 396. 405. 417.
 Tiphaine, dame née de Dinan. 53.
 Tournay. 16.
 Tours. 481.
 le sire de Trye. 270. 415.
 Turchebray. 72.
 Turquot lez Iugant. 64.

V

VALLONGNES. 122.
 Vaulx. 425. 429.
 Vernon. 94. 153.
 Vicomte de Beaumont. 94. 95. 102.
 Vicomte de Narbonne. 394. 397.
 Vicomte de Roham. 64. 123. 130. 144. 146. 147. 319.
 Vire en Normandie. 405.
 Vourde. 533.

Y

YMBER de Cugnieres. 519.
 Yuain de Galles. 445. 454. 459. 460. & ſui. 467. 531. 534.
 Yuon de l'Espine. 482.
 Yuon de Launoy. 188.
 Yuon de Mauny. 423.
 Yuonnet de Launoy. 321.


FIN.

Extraict du Priuilege du Roy.

LE Roy de sa puissance & auctorité Royale, a permis par ses lettres patentes, à Sebastien Cramoisy, Marchand Libraire Iuré en l'Vniuersité de Paris, d'imprimer ou faire imprimer durant le temps & espace de neuf ans entiers & consecutifs, vn liure intitulé, *Histoire de Messire Bertrand du Guesclin Connestable de France, &c.* Faisant tref-expresses inhibitions à tous Libraires & Imprimeurs d'imprimer ou faire imprimer, vendre ny debiter ledit liure, pendant ledit temps sans le consentement dudit Cramoisy, & ce sur les peines contenuës audit Priuilege. Donné à saint Germain en Laye le 26. Iuillet 1618. & de nostre regne le neufiesme.

Signé, par le Roy en son Conseil.

RENOVARD.



plu









